

〔重刊訂正本〕

中國醫學大成

錢若利題



【三十一】

〔重刊訂正本〕

中國醫學大成

〔三三〕

上海科學技術出版社

中國醫學大成（全套共五十冊）

上海科學技術出版社出版

（上海瑞金二路四五〇號）

新華書店上海發行所發行

上海市印刷十廠印刷

開本七八七×一〇九二

三十二開

精裝

總字數二二,七九〇,〇〇〇

總印張八六二

一九九〇年六月第一版 一九九〇年六月第一次印刷

脈因證治

〔元〕朱丹溪 撰著

韓氏醫通

〔明〕韓忭 著

醫林改錯

〔清〕王清任 著

醫學舉要

〔清〕徐鏞 輯述

原 編 曹炳章

總審定 裘沛然

總審閱 蕭敏材 朱邦賢 沈麗君

重刊訂正《中國醫學大成》序

中國醫學大成一書，我鄉先輩四明曹炳章先生所輯集，爲發揚中醫學，保存古醫籍，以饗同道並惠後學作也。曹氏纂集是書時，正值西學東漸，國內淺見倖進之徒，競尚浮華，大肆鞭撻我國文化固有之精英，如民族醫學，悉在消滅之列，中醫學不絕如縷。而先生乃在此時從事中醫叢書巨著之編輯，姑不論其學術價值，獨其保存民族文化精粹之苦心孤詣令人可敬，其卓識遠見，又何其可欽也。

楊志一在原書序中有說：『大凡學術之成立，歷久而不敗者，必有其真實之價值在。』善哉言乎！中華民族立國數千年而得以生存繁衍，如無優秀之文化及可貴之醫學，則亦何逃於優勝劣敗之例。尤

其在科學迅猛發展之今日，百技更新，而古老之中醫藥學日益引起國內外有識之士之重視。各類中醫藥研究所之建立，亦爲保護人民健康之需要，順應世界醫學發展之潮流而設。凡此種種，夫豈偶然。

惟中醫學歷史悠久，濫觴於炎黃，昌盛於漢唐，歷代醫家多有創見，其學術經驗載於文獻者浩如煙海，遺佚者可弗論，僅就先生纂集之時，存書尙達萬種，學者既不能盡讀，又無力購置，且諸書精粗雜糅，版本文字舛誤殊多，使學習中醫者常興望洋之嘆。先生乃爲之博採精選，上自先秦，下迄近代，凡理論、方藥、臨床各科咸備，別爲十三類，書計三百六十五種，分醫經、藥物、診斷、方劑、通治、外感病、內科、外科、婦科、兒科、針灸、醫案及外集雜著各類。其中傷科、眼科及五官病歸入外科，推拿、手術歸入針灸，醫論、醫話、醫史歸入雜著。所收各書，皆中醫要籍，大都內

容精粹，切合實用，版本亦從精選，並加句斷。各書之首，皆列著作校刊略歷及內容提要，以便讀者入門粗知梗之助。

中醫學歷來叢書頗少，是書搜羅廣而選擇精，洵爲前所未有之巨著。惜全書印刊未半而抗戰軍興，烽煙迷漫，醫籍出版被迫中輟。而已印行之一百三十六種，今亦散佚不全。上海科學技術出版社爲應學者需求，重爲付梓，並影印以存原貌。書中明顯錯訛者，由我院及中醫文獻研究所等有關單位專業人員校勘改正，使之益臻完善。

夫文以載道，中醫學爲我國醫學之重要財富，文獻則是寶庫中之重要內容。故有志斯道者，務求先通中醫之理論法則、方藥效用和臨床處置，使對中醫學有全面之理解，更須驗之臨床，以汲取其理論精華與豐富經驗。學問之事，原恃艱苦以求而非獵取可得。昔張仲景勤求古訓，博採衆方；孫思邈青衿之歲，高尚是典，白首之

年，未嘗釋卷；葉香岩以不讀破萬卷，不敢輕言醫。茲三人者，皆由勤奮好學而成一代高醫，故學習中醫宜下一番札實工夫。在此基礎上運用現代科學技術研究和整理中醫學，才有闡明和提高希望。中西醫結合，亦將另具特色。以務實精神，走中醫現代化循序而進之道路，勇於繼承，敢於創新，使傳統醫學有所發現與創造。苟能如此，不僅爲祖國爭光，並將爲人類造福。

本叢書一百三十六種，分爲五十冊；每冊後並皆附有全部書目。它的出版，爲中醫和愛好中醫者提供珍貴之醫學文獻，讀者勤習而深研之，必能奠定中醫學根柢，大有助於中醫事業之繼承與發展。

裘沛然

一九八八年六月作於
上海中醫學院

脈因證治提要

元、朱震亨著。其卷一。列卒尸、痺、痿、厥、傷寒、大頭腫痛、霍亂、瘟病、傷暑、瘧、疽、癰。其卷二。列熱、吐衄不止、下利、泄、自汗、頭汗、淋、頭目痛、眩暈、心腹痛、腰痛、肩背痛、脅痛、逆痰嗽、喘。其卷三。列宿食留飲、噯氣吞酸、嘈雜、積聚、消渴、痞腫、脹、嘔吐、噎、噎隔、瘡瘍、癰疽。其卷四。列乳癰、癰、癰、丹疹、金瘡、傾仆、百藥中傷、癲狂、驚癇、疝癰、脚氣、蟲、喉痺、口舌、耳、目、鼻、齒、結燥、痔漏、婦人胎產、帶下、經候、崩漏、小兒證、雜證、雜治、五臟證、七情證、雜脈、察視、汗等七十證。詳列諸病。先脈次因。次證次治。頗有條理。繆導義云。脈因證治一書。簡而賅。約而備。學者循是而窺長沙。如得其肱與楫。沿而不止。固自不可量也。而流傳絕少。歷三十年未獲一觀。心常快快。歲乙未。客有持來示余。欲廣諸同好。亟請付梓云云。查四庫總目。亦有脈因證治八卷。不著撰人名氏。將各證分屬春夏秋冬四季。未免牽強。分別真陰元陰。真陽元陽。其意主先後天立說。然所載方如左歸丸、右歸丸。皆出自明景岳全書。而亦以古目之。知其斷非震亨所著矣。茲恐後學誤會。特表而出之。

脈因證治提要

繆序

余自歸里後。杜門不與世事接。先太宜人病痰飲。延葉眉壽治。歷四年弗痊。而眉壽謂爲痼疾難效。因偏覽方書。頗會其旨。揀方以治。不一年而瘳。後遂旁搜博採。窮幽極渺。而於長沙河間東垣子和丹溪諸書。尤三致意焉。竊嘗謂醫之有長沙。時中之聖也。而四家並峙。猶清任和之各成其聖。偏焉而至者也。學不從此參究。猶航斷港絕潢。以望至於海也。其能之乎。但四家自河間東垣而外。子和文多缺略。未爲全書。丹溪著作。類出門人記載。惟聞脈因證治一書。簡而該。約而盡。學者循是而窺長沙。如得其舩與楫。沿而不止。固自不可量也。而流傳絕少。歷三十年未獲一睹。心常怏怏。歲乙未。客有持來示余。欲廣諸同好。亟請付梓。不禁欣感交集。以爲一線靈光。忽然湧現。真爲桑榆之幸。因不辭而爲之序。以弁其首。

乾隆乙未仲夏吳趨繆遵義書於芝田山房

脈因證治繆序

脈因證治目錄

卷一

一 卒尸	一
二 痺	三
三 瘞	六
四 痿	七
五 厥	九
六 傷寒	一〇
七 大頭腫痛	三〇
八 霍亂	三〇
九 瘟病	三二
十 傷暑	三二

卷二

十一 瘧	三四
十二 疸	三九
十三 勞	四一
十四 熱	一
十五 吐衄下血	八
十六 下痢	一四
十七 泄	二二
十八 自汗頭汗	二四
十九 淋	二五
二十 頭目痛	二八

二十一眩暈	三三
二十二心腹痛	三四
二十三腰痛	三九
二十四肩背痛	四二
二十五脇痛	四三
二十六逆痰嗽	四五
二十七喘	五三

卷三

二十八宿食留飲	一
二十九噯氣吞酸嘈雜	八
三十積聚	一〇
三十一消渴	一六
三十二痞	二一

卷四

三十三腫脹	二三
三十四嘔吐噦	三三
三十五噎膈	四〇
三十六瘡瘍	四三
三十七癰疽	五〇
三十八乳癰	一
三十九癰	二
四十發斑	四
四十一丹疹	四
四十二金瘡	五
四十三傾仆	六
四十四百藥中傷	八

四十五癲狂	八
四十六驚悸	一〇
四十七疝癰	一二
四十八脚氣	一七
四十九蟲	二二
五十喉痺	二三
五十一口	二五
五十二舌	二六
五十三目	二七
五十四耳	三一
五十五鼻	三二
五十六齒	三三
五十七結燥	三四
五十八痔漏	三六

五十九婦人產胎	三九
六十帶下	四四
六十一經候	四七
六十二崩漏	四八
六十三小兒證	五〇
六十四雜證	五二
六十五雜治	五四
六十六臟證	五五
六十七七情證	五六
六十八雜脈	五七
六十九察視	六〇
七十汗	六一

版因證治目錄

脈因證治

元 金華 朱丹溪震亨撰著

鄞縣 曹赤電炳章圈點

卷一

一 卒尸

脈。寸口沉大而滑。沉則爲實。滑則爲氣。實氣相搏。厥氣入臟則死。入腑則愈。脣青身冷。爲入臟死。身和汗自出。爲入腑則愈。緊而急者。爲遁尸。少陰不至。腎氣衰。少精血。爲尸厥。跌陽脈不出。脾不上下。身冷硬。呼之不應。脈絕者死。脈當大反小者死。證治。在外者可治。入裏者死。血氣并走於上。則爲厥暴死。素有痼疾。新加卒病。先治卒病。尸厥者。昏不知人。脈動如故。開上焦心肺之陽自愈。尸厥脈動無氣。氣閉靜而死也。以

蒲菖屑內鼻兩孔中吹之。令人以桂屑放舌下。

又方 剔取左角髮方寸燒末。酒和灌入喉立起。

救卒死身熱者驗方

礬石半升。以水一斗五升。煮消。浸脚令沒踝。蓋取礬性收瀉。而斂其厥逆之氣。

還魂湯 治卒死客忤氣。

麻黃三兩去節

杏仁八十箇去皮尖

炙甘草一兩

右三味。水八升。煮取三升。去渣入薑汁少許令咽之。蓋取辛甘通陽氣。發越邪氣故也。

救卒死目閉方

搗薤汁灌耳中妙。或吹皂莢末於鼻中立效。薤汁辟邪安魂。莢末取嚏開竅。

救卒死張口反折方

灸手足兩爪後十四壯。飲以五毒諸膏散。

外有中惡。中氣。中食等狀。與卒尸相類。須詳諦脈證而投之。慎勿泛視。誤人倉

卒。變通在神。法難畢述。

一二痺

脈。寸口喘而堅。痺在心。

喘而浮。痺在肺。

長而左右彈。痺在肝。

大而虛。痺在

脾。堅而大。痺在腎。

因風。風爲行痺。風性善行。

寒。寒爲痛痺。寒主收引。

濕。濕爲着痺。濕本重滯。

三氣致痺之原。或外兼他患有之。若舍此而能痺。未有也。證。其合而爲痺也。以冬遇者骨痺。春遇者筋痺。夏遇者脈痺。長夏遇者肌痺。秋遇者皮痺。久而不去。內舍五臟之合。待舍其合。難治矣。

痺論中議痺。乃三氣皆可客於五臟。其風寒濕乘虛而客之故也。筋痺不去。內舍於肝。皮痺不去。內舍於肺。肌痺不去。內舍於脾。脈痺不去。內舍於心。骨痺不去。內舍於腎。其客於心則煩心。上氣嗌乾。恐噫厥脹是也。其客於肺使人煩滿而喘吐。其客於肝多飲數洩。小腹痛如懷妊。夜臥則驚。其客於脾四肢解墮。發渴嘔沫。上爲大塞。其客於腎善脹尻以代踵。脊以代頭。其客於

腸數飲而小便不得。中氣喘爭。時發飧洩。夫大腸乃傳道之官。爲沖和之氣。三氣乘虛客之。而和氣閉矣。水道不通。使糟粕不化。故喘爭飧洩也。其客於胞。小腹膀胱按之內痛。若沃以湯。小便澁。上爲清涕。夫三氣客於胞中。則氣不能化出。故胞滿而水道不通。隨經出鼻竅。其客於血脈。隨脈流通。上下升降一身。謂之周痺。

華佗論痺。乃邪氣合四時不正之氣。感於臟腑。所爲有氣、血、筋、肉、骨之分。其氣痺者。愁思喜怒。過則氣結於上。久而不消。則傷肺。正氣衰。邪氣勝。留於上。則胸腹痛而不能食。注於下。則腰脚重而不能行。貫於舌。則不言。遺於腹。則不溺。壅則痛。流則麻。右寸脈沉而遲。濇者是也。其血痺者。飲酒過多。懷熱太甚。或寒折於經絡。或濕犯於營衛。因而血搏。漸成枯削。失血之證。左寸脈結而不流利。是也。其肉痺者。飲食不節。肥美之爲肉。不榮。膚不澤。則紋理疎。三氣入之。則四肢緩而不收持。右關脈舉按皆無力而澁也。其筋痺者。由叫怒無時。行步奔急。淫邪傷肝。肝失其氣。寒熱客之。流入筋會。使筋急而不舒。左關脈弦急而數。浮沉有力是也。其骨痺者。乃嗜慾傷於腎氣。內消而不能閉禁。邪氣妄入。

脈遲則寒。數則熱。浮則風。濡則濕。滑則虛。治法各隨其宜。
麻木餘辨。是風濕熱下陷入血分陰中。陽氣不行。其證合目則渾身麻。亦有
痰在血分。痒者。血不營肌腠。

治。附子湯 治風寒濕痺

附子炮去 桂枝 白芍 甘草

茯苓 人參各三錢 白朮一兩

行痺。加麻黃桂湯。痛痺。加附子、薑、茯苓湯。胞痺。加四苓。腸痺。加平胃茱

萸、草、肉、豆蔻等。

戴人法。苦劑湧寒痰。次與痰劑。使白朮除濕 茯苓養腎

桂伐木 薑附加 寒勝

麻木方 人參助陽 當歸行陰 生甘草去熱

白朮 茯苓除濕 升麻 柴胡 白芍

蒼朮 黃柏 痰加二陳

忍冬藤膏 治五痺拘攣

二二瘧也

脈。太陽發熱。脈反沉細難愈。太陽證備。脈沉遲。此爲瘧。寸口脈直上下行。伏

緊。緊如弦。沉弦沉緊。少陰脈緊。暴微者。欲解。

因。血氣內虛。四氣外襲。因濕諸瘧。項強。皆屬於濕。寒濕同性。故濕可傷太陽。

三因論狀。身熱足寒。頭強項急。惡寒時。頭熱面赤。目赤脈獨頭搖動。卒噤。角弓

反張。皆因血虛筋無所養。邪因入之。故寒則緊縮。熱則弛張。風則弦急。濕則脹

緩。又有因瘡口未合。風入之。爲破傷風。濕入之。爲破傷濕。與瘧同。但少頭強項

急。餘並相如。

又有因汗下過多。

又有產後怒氣。致此病者。項強亦有痰者。

證。有汗而不惡寒。名柔瘧。無汗口噤脚攣。名剛瘧。

治。宜流濕祛風。緩表而安。詳有無汗而藥之。

柔瘧。葛根加桂湯。剛瘧。大承氣湯。葛根湯。汗之。有表證可用。大承氣下

之。有裏證可用。

四痿

脈浮而大。浮虛大熱。滑而大。滑痰大虛。洪而緩。洪熱緩虛。因腎水不能勝心火。火上燦肺金。六葉皆焦。皮毛虛弱。急而薄着者。則生痿躄。皆因貪慾好色之故。濕痰亦能爲之。

經論有由悲哀太甚。陽氣內動。數洩血。大經空虛。熱起於心。病則樞紐如折。不相提挈。名曰脈痿。

有思想無窮。入房太甚。宗筋弛縱。熱入於肝。病則筋急而爪枯。名曰筋痿。

有由濕地以水爲事。熱生於脾。病則胃乾而渴。肌肉不仁。名曰肉痿。

有因遠行勞倦。遇大熱而渴。陽氣內乏。熱舍於腎。病則腰脊不舉。骨枯而髓減。

名曰骨痿。然此皆熱熏於肺之爲也。火上炎肺。治節不行。而痿躄矣。

證面黃身熱肌瘦。往來寒熱。涎嗽喘滿。面浮弱而不用者。爲痿。外有痿。卽軟風也。柔風脚弱。病同而證各異。

治法。獨取陽明。陽明者胃脈也。五臟六腑之海。主潤宗筋。宗筋主束骨而利機關也。故陽明虛而然。

張以黃連解毒湯加歸等劑治之。

李以甘寒瀉火。苦寒瀉濕熱。四君子補陽明虛。清暑益氣治之。濕痿之為病。宜二陳湯加朮苓柏治之。

清暑益氣湯 治熱傷肺氣虛成痿

黃芪一錢 汗少 補氣 人參救火

白朮各半

蒼朮一錢 除濕 甘草炙三錢 當歸三錢

升麻一錢 酒潤 風勝 濕

葛根二錢 陳皮半錢 澤瀉半錢 神麴半錢 消食 去痞

黃蘗三錢 補水 瀉熱

五味九分 酸寒 傷金 麥門冬三錢 青皮二錢

黃蘗三錢 補水 瀉熱

或加知母黃芩。

健步丸 治濕熱成痿

羌活

防風

柴胡

滑石

炙甘草

生薑酒洗 各半兩

澤瀉五錢

防己酒製 一兩

川烏

苦參酒洗

肉桂一錢

愈風湯下。

秘方

氣虛四君子加蒼白朮苓柏。

痰加竹瀝。

血虛四物湯。

濕

痰。二陳湯加蒼白朮苓柏竹瀝下補陰丸。
經論。瘖痺乃腎虛也。舌不語。腎脈夾舌本。腎氣厥不至。足不行。腎氣不順。

五厥

脈。沉微而不數。謂之寒厥。沉伏而數。謂之熱厥。

因虛。因痰。因熱。因寒。

證。厥當分二種。次分五臟。寒厥為手足寒也。陰氣勝則寒。其由乃恃壯縱慾於

秋冬之間。則陽奪於內。精氣下溢。邪氣上行。陽衰精竭。陰獨行。故為寒厥。熱

厥為手足熱也。陽氣勝則熱。其由乃醉飽入房。氣聚於脾胃。陰虛陽氣入則胃

不和。胃不和則精竭。精氣竭則四肢不榮。酒氣與穀氣相搏。則內熱而溺赤。腎

氣衰。陽獨勝。故為熱厥。

五心煩熱。有小腸熱者。有心虛而熱者。

厥亦有腹暴滿不知人者。或一二日稍知人者。或卒然衰亂者。皆因邪氣亂。陽氣逆。是少陰腎脈不至也。腎氣衰少。精氣奔逸。使風促迫。上入胃膈。宗氣反結。心下陽氣退下。熱歸股腹。與陰相助。令人不仁。又五絡皆會於身。五絡俱絕。則令人身脈俱動。而形體皆無所知。其狀如尸。故曰尸厥。正由臟氣相亂。或與外邪相忤。則氣鬱不行。閉於經絡。諸脈伏匿。昏不知人。厥有痰如曳鋸聲在咽中。爲痰厥。骨枯爪痛爲骨厥。身直如椽爲肝厥。因醉而得爲酒厥。暴怒而得爲氣厥。手足搐搦爲風厥。喘而狂走爲陽明厥。此皆氣逆之所爲也。

治。李法。痰用白朮竹瀝。熱用承氣下之。氣虛補氣四君子。血虛補血四物。張法。降心火。益腎水。通血和氣。必先涌之。

六傷寒

脈。陽浮而陰弱。謂之傷風。邪在六經俱強。加之風傷陽。故浮虛陽浮衛中風也。陰弱營氣弱也。

浮緊而無汗。謂之傷寒。寒傷營。營實則衛虛。寒傷陰。故堅牢。陽緊。邪在上焦。主欲嘔。陰緊。邪在下焦。必欲利。

脈浮。頭項痛。腰脊強。病在太陽。脈長。身熱。目痛。鼻乾。病在陽明。脈弦。胸脇

痛。而耳聾。病在少陽。脈俱沉。口燥。舌乾。邪在少陰。脈俱微緩。煩滿。囊縮。邪

在厥陰。脈俱沉細。噤。乾腹滿。邪在太陰。脈陰陽俱盛。重感於寒。而緊。濇。變

為溫瘧。陰陽俱盛。傷寒之脈。前病熱未已。後寒復盛也。脈陽浮滑。陰濡弱。更

遇於風。乘變為風溫。陽浮而滑。陰濡而弱。皆風脈也。前熱未歇。風來乘熱。脈

陽洪數。陰實大。遇濕熱兩合。變為溫毒。洪數實大。皆兩熱相合。脈陽濡陰弱。

而陰弦緊。更遇溫氣。變為溫疫。病發熱。脈沉而細。表得太陽。名曰瘧。病太陽身熱疼。脈微弱弦。名曰中暍。

病若發汗已。身灼然熱。名曰風溫。風溫為病。脈陰陽俱浮。自汗出。身重多眠。

睡。語難。以小便不利。更被其下。若被火者。微發黃色。劇者則驚癇。時瘈瘲。若

火熏則死。病太陽關節疼痛而煩。脈沉細。名曰濕痺。脈沉細而疾。身冷則

四肢冷。煩躁不欲飲水。狂悶。名曰陽厥。脈當有神。不問數極遲敗。當中有有力。

即有神焉。神者。血氣之先。傷寒熱甚。脈浮大者生。沉小者死。已汗沉小者生。浮大者死。溫病二三日。體熱腹滿頭痛。飲食如故。脈直而疾者。八日死。溫病八九日。頭身不痛。目不赤。色不變。而反利。脈來牒牒。按之不彈手。時大。心下堅。十七日死。溫病四五日。頭痛腹滿而吐。脈來細強。十二日死。溫病汗不出。出不至足者死。厥汗出。腎脈強急者生。虛緩者死。溫病下痢。腹中痛甚者死。熱病七八日。不汗躁狂。口舌暴燥焦黑。脈反細弱。或代者死。八日以上。反大熱死。邪勝故也。熱病七八日。當汗反下。脈絕者死。熱病得汗。脈躁者死。脈轉大者死。厥逆呼之不應。脈絕者死。陽厥有力者生。陰厥按之大者生。熱病七八日。脈不躁。喘不數。後三日中有汗。不汗者。四日死。熱病脈濇小疾。腹滿臑脹。身熱。不得大小便死。熱病脈浮大。絕喘而短氣。大衄不止。腹中疼死。熱病脈浮洪。腸鳴腹滿。四肢清。注泄死。熱病脈絕動疾。便血。奪形肉。身熱甚死。熱病脈小疾。咳喘眩悸。奪形肉。身熱死。熱病腹脹便血。脈大。時時小絕。汗出而喘。口乾視不見者死。熱病脈轉小。身熱甚死。熱病脈轉小。身熱甚。欬而便血。目陷妄言。循衣縫。躁擾不臥死。熱病嘔血。咳而煩滿。

身黃。腹鼓脹。洩不止。脈絕死。熱病瘕瘕。狂走不能食。腹滿胸痛引腰脊。嘔血死。脈浮而洪。邪氣勝也。身體如油。正氣脫也。喘而不休。水漿不下。胃氣盡也。體麻不仁。營衛不行。乍靜乍亂。正邪爭也。故爲命絕也。熱病喘欬。唾血。手足腹腫。面黃。振慄不言。名肺絕死。丁日死。後倣此。熱病頭痛。嘔宿汁。嘔逆吐血。水漿不入口。狂妄。腹大滿。名脾絕死。熱病煩滿。骨痛。噎腫不可咽。欲欬不能欬。歌笑而哭。名心絕死。熱病僵臥。足不安地。嘔血。血妄行。遺尿溺。名肝絕死。熱病喘悸。吐逆骨痛短氣。目視不明。汗如珠。腎絕死。太陽病。脈反躁盛。是陰陽交死。得汗脈靜者生。少陰病。惡寒而踈。下利手足逆者死。又吐利躁逆者死。少陰病。四逆惡寒而踈。其脈不至。不煩而躁者死。少陰病。下利止而頭眩時時自冒者死。又七八日息高者死。少陰病。脈微沉細。但欲臥。汗出不煩。自欲吐。五六日自利煩躁不得臥寐者死。若利止惡寒而踈。手足溫者可活。少陰病。下利止。厥逆無脈不煩。服湯藥。其脈暴出者死。微續者生。傷寒下利。厥逆躁不得臥者死。下利至厥不止者死。傷寒厥逆。六七日不利。便發熱而利者生。汗出利不止者死。有陰無陽故也。傷

寒五六日。不結胸腹濡。脈虛復厥者。不可下。下之亡血死。熱病不知所痛。不能自收。口乾陽熱甚。陰頗有寒者死。熱病在腎。渴口乾。舌燥黃赤。日夜飲水。不知腹大脹。尚飲。目無精光者死。傷寒下利。日十餘行。脈反實者死。病者脇下素有痞。而下至於臍旁。痛引小腹。入陰挾筋。為臟結者死。結胸證具而煩躁者死。直視譫語喘滿者死。若下利亦死。

因房勞辛苦之過。腠理開洩。少陰不藏。觸冒冬時殺厲之氣。嚴寒之毒。中而即病。曰傷寒。不即病。寒毒藏於肌膚之間。至春變為溫。至夏變為熱病。皆腎水涸。春無以發生故也。皆熱不得發洩。鬱於內。遇感而發。雖曰傷寒。實為熱病。春病溫疫。夏為熱病。及飧洩。秋發痄瘡。冬生咳嗽。皆因感四時不正之氣。總名之曰傷寒。

證治。自外而入。內傳經絡。

太陽證。頭疼發熱惡寒。腰脊強。脈浮而緊。無汗。謂之傷寒。可汗。宜麻黃湯。脈緩自汗。謂之傷風。宜桂枝湯。忌利小便。重汗下大便。陽明證。身熱目疼鼻乾。不得臥。不惡風寒而自汗。尺寸脈俱長。宜白虎湯。浮

沉按之有力。宜大承氣湯。胃血也。不主汗利。忌汗。利小便。
少陽證。往來寒熱。胸脇痛而嘔。耳聾。脈弦。宜和解之。小柴胡湯。膽無出入水
火之間。下犯太陽。汗下利皆不可。忌利小便。忌汗。忌利大便。
太陰證。腹滿咽乾。手足自溫。自利不渴。時腹痛。脈沉細。其藏寒。宜四逆湯。脈
浮可汗。宜桂枝湯。又大實痛可下。用詳。忌三法。宜三法。用詳。
少陰證。口噤舌乾而渴。脈沉實。宜大承氣湯。脈沉細遲者。宜用溫之。四逆湯。
身涼。脈沉細而虛。宜瀉心湯。身熱煩躁不寧。大小便自利。脈浮洪無力。按
之全無。宜附子瀉心湯。其吐瀉不渴。脈浮弱。理中湯主之。渴而脈沉。有力
而疾。宜五苓散。少陰證。脈沉發熱。當汗。麻黃細辛附子湯。少陰證。下利色
不青。當溫。色青口燥。當下。脈弱忌下。乾燥忌汗。厥陰證。煩滿而囊縮。大小
便不通。發熱引飲。腹滿。脈俱微沉實。按之有力。當下。無力。當溫。厥陰乃二陰交
盡。曰厥陰。爲生化之源。喜溫而惡清。大抵三陰非胃實不可下。此三陰無傳
經。止胃實可下也。
太陽標本不同。標熱太陽發熱。本寒膀胱惡寒。故宜汗。

陽明從中氣。標陽肌熱。本實妄語。標陽故宜解肌。本實故宜下。

少陽。標陽發熱。本火惡寒。前有陽明。後有太陰。故宜和解。

太陰。標陰本濕。腹脹滿。或噎乾。身目黃。從標治則溫。從本治宜洩滿下濕。

少陰。標陰爪甲青冷。本熱脈沉實口乾渴。標宜溫。本宜下。

厥陰。中氣宜溫。煩滿囊縮。故為熱。宜苦辛下之。麻黃桂枝之輩。汗而發之。葛

根升麻之屬。因其輕而揚之。三承氣陷胸之輩。引而竭之。瀉心十棗之類。中滿

泄之。在表宜汗。在裏宜下。在半表半裏宜和。表多裏少。和而少汗之。裏多表少。

和而微下之。在上者吐之。中氣與脈氣微者溫之。脈亦同法。又當求本。假令

腹痛用桂枝芍藥湯。何不只用芍藥。却於桂內加之。要知從太陽中來。故太陽

為本。又如結胸麻黃亦然。

劉法分病及脈。以五藏言之。諸在皮者汗之。麻黃湯內加表之。在內者下之。麻

黃細辛附子湯內加下之。

此言藏者五臟也。可通經入臟。物之藏者府也。方可下。麻黃湯治外證之外。麻

黃細辛附子湯治內證之外。

肝脈外證。善潔。面青。善怒。脈弦。前方加羌活、防風三錢。

內證。滿。祕。便難。淋瀝。轉筋。沉而弦。後方加同前。

心脈外證。面赤。口乾。善笑。脈沉而洪。前方加黃芩、石膏各三錢。

內證。煩心。心痛。掌中熱而噦。脈沉。後方加同前。

肺脈外證。面白。善嚏。悲愁欲哭。脈浮而澁。前方加薑、桂各三錢。

內證。喘咳。洒淅寒熱。脈沉。後方加生薑、桂枝。

脾脈外證。面黃。善噫。善思味。脈浮而緩。前方加白朮、漢防己。

內證。腹脹滿。食不消。怠惰。脈沉。後方加同前。

腎脈外證。面黑。善恐。脈浮。前方加附子、生薑。

內證。泄如注。下重。脛寒。脈沉。後方加同前。

已前外證。皆表之表。汗而發之。內證者。裏之表也。瀆形以汗。如脈沉。復有裏證。

裏證。爲發熱。引飲。便利。赤澁。泄下赤水。或祕。按之內痛。此爲裏證。宜速下之。依

方加大黃三錢。如邪又未盡。復加大黃二錢。

劉張又相繼論人多勞役飢飽者。得之火化火擾。治之宜以辛涼。比及年少性

急勞役。豈非火乎。遲脈年老之人。可以辛溫解之。故制雙解散。治諸傷寒時氣。在表裏皆可服之。表裏證有相似。藥不可差。傷寒表證。發熱惡寒而渴。獨頭痛。身熱目疼鼻乾。不得臥。乃陽明經病也。白虎湯主之。雜證裏證亦同。但目赤者。藏病也。脈亦洪大。甚則吐血。先有形也。乃手太陰肺不足。不能管領陽氣。亦以枸杞、地黃等物治之。

補瀉當察虛實。假如洪弦相雜。洪客也。弦主也。子能令母實。又脈弦無表證。是東方實。西方虛也。又前來者爲實邪。依此補瀉。餘倣此行之。

表汗。通聖散、雙解散。

半表半裏。涼膈散、柴胡湯。

裏下。右手脈實承氣湯。左手脈實抵當湯。不分浮沉。但實可用。

血氣俱實。主三承氣湯。溫。四逆湯、真武湯。解利。五苓散、解毒散、白虎

湯、甘露飲、梔子湯。發黃。茵陳湯。

傷寒得傷風脈。傷風得傷寒脈。假如太陽證。頭疼身熱。自汗惡風。脈當緩

而反緊。是傷風得傷寒脈也。餘以例推之。桂枝麻黃各半湯、羌活湯尤妙。

吐。瓜蒂散。瓜蒂赤小豆。豆豉湯下一錢。結胸脈浮大者。不可下之。下之必死。

小陷胸湯

半夏

黃

連

薑汁

瓜蒌實

大陷胸丸

炒大黃五錢

苦葶藶炒三錢

芒硝一錢

杏

仁十二箇

丸如彈子大每服一丸入甘遂末三字蜜半匙水煎至半溫服。

六經餘證

太陽瘧。汗多熱利。誤下變證。

陽明煩躁。火入於肺煩也。火入於腎躁也。梔子豆豉湯。宿食加大黃。狂譫實熱

發斑。胃火嘔吐噦。

少陽潮熱。有平旦日晡之分。詳見前。

太陰腹痛有部分。同雜證治。痞有虛實。實便秘。厚朴、枳實。虛便利。白芍。

少陰心驚悸是雜證。吐瀉同霍亂證。治咽喉熱。甘草、桔梗。寒熱合二方。

下利色青下。色不青溫。渴逆乃陰消陽逆。或兼以舌攣語言不正。昏冒咽

痛。大承氣。

厥陰羌活湯

厥利傷寒。不問何經。辨兩感傷寒之例。

羌活

防風

川芎

甘草

黃芩各一錢

地黃

細辛二錢

白朮二錢

加身熱。加石膏四錢

腹痛。加芍藥三錢

往來寒熱。加柴胡一錢

半夏五錢

心下痞。加枳實一錢

裏證。加大黃三錢

邪去止之。

治疫

麻黃一兩

甘草半兩

石膏

滑石

黃芩

白朮四兩

煎服表汗。

解利 大羌活湯

治兩感傷寒

出李

防風

羌活

獨活

防己

白朮

甘草炙

黃芩

黃連

蒼朮

川芎

細辛各三錢

知母

生地黃各一兩

白芷陽明加之。

雙解散

混解不問風寒

出張李劉皆用

梔子豉湯

出李

消毒飲 治疫癘時毒

黃芩

黃連各半

連翹一錢

陳皮

玄參各三錢

甘草

黍粘子

板藍根

馬勃各一錢

人參

殭蠶各一錢

桔梗三錢

升麻七錢

柴胡五錢

薄荷

川芎各五錢

大黃便硬加之。以水煎服。

傷寒中寒說 傷寒爲外寒鬱內熱。傷寒面慘而不舒。惡寒不惡風。中寒謂

寒乘其膚腠。不分經絡。疎豁一身。無熱可發。溫補自安。此胃氣之大虛也。

風濕不可汗下論 春夏之交。病如傷寒。自汗。肢體重痛。轉側難。小便不利。此

名風濕。非傷寒也。因陰雨卑濕。或引飲多有此證。宜多與五苓散。切忌汗下。

四證類傷寒 傷寒右寸脈緊盛。痞滿。

脚氣如傷寒證。但病起於脚胫。痰證嘔逆頭痛。脈浮而滑。痞滿虛煩不惡寒。

不頭痛身疼。

陽毒身重腰痛。狂言。或吐血下利。脈浮大數。咽喉痛。唾血。面赤如錦文。五六

日可治。

陰毒身重背強。腹中絞痛。咽喉不利。毒氣攻心。心下堅。嘔逆。唇青面黑。四肢冷。脈沉細緊數。身如打。五六日可治。

陰盛格陽。目赤煩躁不渴。或渴不欲水。脈七八至。按之不鼓。薑附主之。

陽盛拒陰。身表涼痛。四肢冷。諸陰證。脈沉數而有力。承氣主之。

陽厥極深。或時鄭聲。指甲面色青黑。勢困。脈附骨。按之有舉之無。因陽氣拂鬱。不得榮運於四肢。以致身冷。先涼膈。養陰退陽。以待心胸微煖。可承氣下之。

陰證身靜。重語無聲。氣難布息。目睛不了了。鼻中呼不出。吸不入口。鼻中氣冷。水漿不入口。二便不禁。面上惡寒。有如刀刺。

陽證身動。輕語有聲。目睛了了。鼻中呼吸出入。能往能來。口鼻氣熱。

傷風氣出粗。合口不開。面光而不慘。惡風不惡寒。傷食口無味。液不納息肩。

兩感。一日太陽受之。即與少陰俱病。頭疼口乾。煩滿而渴者是。二日陽明

受之。即與太陰俱病。腹滿身熱。不飲食。譫語。三日少陽受之。即與厥陰俱病。

煩滿囊縮。水漿不入口。不知人。六日死。

瘥。太陽病。發熱無汗。反惡寒者。名剛瘥。無汗爲表實。惡寒爲重感。故名剛瘥。太陽病發熱有汗。不惡熱者。爲柔瘥。表虛傷濕。其病身熱足寒。頸項強急。惡寒時頭熱。面赤目脈赤。頭搖。卒口噤。背反張。

中濕見前脈。其病一身盡黃。頭痛汗出。欲水而不能飲。反欲近火。

頭汗乃邪搏諸陽。熱不得越。津液上湊。又見自汗條下。

手足汗。有邪聚於胃。則便硬。有寒則便溏。不能食。小便不利。

煩躁。有熱傳於內。胸中有熱。關前洪數。宜解熱。有虛因汗吐下。虛協餘熱。身

不疼。脈不緊數。宜補之。又初解胃弱強食。胃脈浮洪。

胎皆心經之熱。淺深也。白而滑。乃邪在半表半裏也。白而澁。熱在裏也。黃而乾。

熱在胃也。黑者宜下。

噦皆胃疾。或寒或妄下之虛。

厥。手足冷。有寒有熱。先熱而後厥者。熱伏於內。先厥而後熱者。陰退陽氣復。

始得之便厥。皆陽不足而陰勝也。所主爲寒。

譫語四證。傷寒譫語屬陽明經。乃胃有熱。脈洪大者。是宜調胃承氣湯。

身不熱身困者。謂之鄭聲。病退人虛。脈和平。宜滋補。

婦人經來。適邪氣乘虛入於血海。左關脈數者。小柴胡湯主之。

有邪祟者。言語涉邪。頗有意味。狀多變。與病相違者是。

氣喘七證。傷寒太陽證。下之微喘者。內虛外熱故也。宜解其表。飲水過多。

水停心下。胸膈滿而喘者。宜利其小便。病本無喘。因藥下之。瀉止而喘。其色

已脫。不治。喘而四逆者。不治。喘而噫者。不治。

喘而魚口者。不治。喘而目閉面黑者。不治。

目瞪四證。傷寒至目瞪不省人事。此中風瘖證。以藥開關吐痰。瘖退眼開。隨

證治之。

傷寒病已過經。瘖退無熱。人困不語。脈和目瞪。謂之戴陽。下虛故也。

陽毒不解。熱毒之氣伏於太陽之經。故便目瞪。六脈弦勁。漸作魚口。氣粗者死。

太陰痰潮。上灌七竅。兩目瞪。與小兒驚風之類同。下痰則愈。

舌卷唇焦。乃心肝熱極。三焦精液不生。可治。舌卷卵縮。厥陰絕也。必死。

厥逆幽悶三證。陰毒陽冷。四肢逆冷。心膈幽悶。默默思睡。脈沉伏者是。

傷寒起。汗下後。又戰汗過多。人困身冷不動者。乏陽也。傷寒未三日。身冷額上汗出。面赤心煩者。非陰毒證。謂之陰盛格陽。陰氣并於外。陽氣伏於內。其脈沉數也。

咽乾二證。少陽證。口舌咽乾。乃膽熱也。小柴胡湯。少陰證。口燥咽乾。主腎熱。津液不生。宜下。

惡寒三證。發熱惡寒。發于陽。脈浮數。宜麻黃桂枝汗之。無熱惡寒。發于陰。脈沉細。宜四逆溫裏。發汗後。反惡寒。氣虛也。脈弱微。補虛。芍藥附子甘草湯主之。

惡風三證。汗出而脈緩。宜桂枝加葛根湯。便遍身潤。

太陽病。發汗過多。亡陽。胃虛惡風。當溫其經。宜桂枝加附子湯。

風濕相搏。骨節煩痛。不得屈伸。汗出惡風。不欲去衣。宜甘草附子湯。

汗後發熱。并再傷入證。發汗不入格。其病不解。宜再汗之。發汗後。再傷風邪而熱。宜發汗。再傷風寒而熱。隨證治之。汗後溫之熱。脈弦小而數者。有餘熱也。宜和解之。汗後溫之熱。脈靜身無痛處。虛熱也。宜平補之。汗後溫

之熱。或渴。或煩。或胸滿。或腹急。有裏證。脈沉數。宜下之。勞力而再熱。平解勞

倦。宜柴胡鼈甲散。食過而熱者。宜消化其食。

中暍。夏月發熱惡寒。小便已。洒然毛聳。脈弦細而芤遲。宜白虎人參湯。忌汗下。

中暑。背寒面垢。手足微冷。煩躁引飲。四肢不痛。脈浮。宜五苓白虎。

中溫。冬月冒寒。至春夏再感非常之氣。

風溫。先傷風。後傷溫。頭疼自汗。體重息如喘。但默默欲眠。尺寸脈俱浮。風溫脈

浮。證同前條下。

溫毒。汗吐下。表未罷。毒邪入臟。身有斑。脈陽洪數。陰實大。濕溫。先傷濕。後中

暑。

瘟疫。衆人一般。脈陽虛弱。陰弦緊。

潮熱。陽明申酉時分也。胃實宜下。寒熱相繼在他時。太陽病熱在寅卯。少陽

在巳午。

汗自出。太陽經自汗。營弱衛強也。中風。太陽脈緩。風溫身重多睡。脈浮緩。

風濕。脈沉而細。證同前條下。少陰咽痛拘急。四肢疼厥逆。自汗亡陽也。

太陽亡陽自汗。柔痊同前痊下。

除中者死。傷寒六七日。脈遲。下利而熱。合與黃芩湯。徹其熱。腹中惡冷。當不能食。今反能食。名曰除中。脾經受邪。則下利而熱。合與黃芩。邪熱未去。而胃氣先去。

禁忌。厥陰心痛發斑。不飲食。食則吐衄。下則利不止。諸四肢厥逆。不可下。五六日不結胸。腹痛滿。脈虛復厥者。不可下。當下反汗之。必口爛。

少陰脈沉細數。病在裏。忌汗。微者忌汗。尺脈弱瀋者。不可下之。

太陰腹滿。吐食不下。自利。時腹自痛。忌下。下之胸下結硬。脈弱自便利。雖用下。宜減之。

少陽不可汗。忌利小便。忌利大便。犯之各隨上下前後本變及中變諸變例。

太陽小便不利。不可利之。利之邪氣入裏不能解。咽乾淋衄。小便不利。當汗不可汗。在表不可下。下之動血。誤犯之。成結胸痞氣。汗之成血畜於胸中。當汗而下之。成協熱利。

太陽證誤下有八變。脈浮者。必結胸。緊者。必咽痛。弦者。必兩脇拘急。

細數者。頭疼不止。沉緊者。必欲嘔。沉滑者。必熱利。浮滑者。必下血。

陽明不當發汗。發汗成畜血。上焦爲衄。不當下而下之。血畜下焦發狂。

有年老患時熱狂妄。服附者愈。服寒涼者死。

足太陽未渴小便清者。禁利。咽乾禁汗。成畜血。禁下太早。已渴者。五苓散。

譫語潮熱大渴。宜下。足少陽三禁。胃實可下。足太陰禁下。足少陰脈

沉口燥咽乾而渴。禁汗。脈澁而弱。禁下。三陰非胃實不可下。

治三焦便有膽少陽經。作風治不宜汗下利小便。治心便有腎少陰。故本熱標

寒。故脈沉細。按之洪大。用承氣湯。酒製熱飲是也。

治膀胱便有小腸太陽。故本寒標陽。故脈緊數。按之不鼓而空虛。用薑附寒飲

頓服。

治肺便有脾太陰。故寒因寒用。大黃、枳實下之。

治陽明純陽大腸。喜熱惡清。當以熱治寒也。絡宜清。當以寒治熱。

許學士解利外感

傷風者惡風。用防風二錢。甘草。麻黃一錢。頭痛。加川芎。

項背腰痛。加羌活。

身重。加蒼朮。

肢節痛。加羌活。

目痛鼻

乾及痛。加升麻。

或乾嘔。或寒熱。或脇下痛。加柴胡。

傷寒者惡寒。

用麻黃二錢。防風。

甘草

各錢

頭沉悶。加羌活一錢。

凡治傷寒。以甘草為君。防風、白朮為佐。是寒宜甘發也。看他證加減。傷風以

防風為君。甘草、白朮為佐。是風宜辛散也。其傷寒表證。以石膏、滑石、甘草知

母慈鼓之類。汗出即解。如熱半表半裏。與小柴胡汗出而愈。熱甚大柴胡

與之。更甚小承氣。裏熱甚大承氣。發黃者。茵陳蒿湯下之。結胸。陷胸湯

下之。

內傷見於右手。內傷躁作寒已。寒作躁已。不相併。但有間。且晡時必減。乃胃氣

得令。潮作之時。精神困倦。乃其氣不足。

外傷見於左手。外傷但無間。且晡時必作劇。乃邪氣盛。潮作之時。精神有餘。乃

邪氣勝。

寒邪不能食。風邪能食。

表虛不作表虛治。或勞役於涼處解衣。或陰虛新浴。表虛為風寒所遏。切不可

妄解表。

七大頭腫痛附蝦蟆瘟

因。陽明邪熱太甚。故資實少陽相火而爲之也。濕熱爲腫痛。治之視其腫勢在何部分。隨結而取之。是天行也。

治。黃芩炒 甘草 大黃煨 黍粘子炒 芒硝

陽明渴。加石膏。少陽渴。加瓜蒌根。陽明行經。加升麻、白芍、葛根、甘草。太陽行經。加羌活、防風。

蝦蟆瘟

因。風熱。
治。解毒丸下之。

側柏葉自然汁調蚯蚓糞敷。燒灰大妙。車前葉服。或丁香尖、附子尖、南星、酢磨敷皆可。五葉藤汁敷亦可。
八霍亂

脈微澁。或代或伏。脈弦滑者。膈有宿食。身卻不熱為霍亂。大者生。微遲者死。

脈洪者熱。

因其氣有三。一曰火。二曰風。三曰濕。

邪在上焦則吐。下焦則瀉。中焦則吐而且利。吐為渴熱也。瀉為濕也。風勝則動。故轉筋也。或因大渴而大飲。或飢或飽甚。傷損胃氣。陰陽交爭而不和。此為急病也。不死如乾霍亂而不得吐利。必死。

證其狀。心腹卒痛。嘔吐下利。憎寒發熱。頭痛眩暈。先心痛則先吐。先腹痛則先下。心腹俱痛。吐利並作。甚則轉筋入腹。則死。不然則吐瀉。乾霍亂者。忽然心腹脹滿絞刺痛。欲吐不吐。欲利不利。須臾則死。以鹽湯大吐之。佳。

外有衝惡。病同而名異。

治。五苓散。治熱多飲水。關上脈洪者。熱也。宜清之。

理中丸。治寒多不飲水。身不熱者。

半夏湯。治霍亂轉筋。吐利不止。身痛不止者。宜加桂枝湯。半夏麴。

茯苓 陳皮 白朮 薄荷 桂枝 甘草

和解散 治霍亂。此條內有所積。外為邪氣所阻。甚用吐法。二陳湯。

和解散 川芎 蒼朮 白芷 防風

九瘟病

證。衆人一般者是。治有三法。宜補。宜散。宜降。

大黃 黃芩 黃連 人參 桔梗

蒼朮 防風 滑石粉 人中黃 香附子

右神麴丸送下。隨宜。氣虛。四君子血虛。四物湯。痰。二陳湯。熱甚。童便作湯送下。

春夏不服麻黃。秋冬不服桂枝。夏不服青龍。冬不服白虎。

十傷暑

脈。脈虛身熱。或浮自汗。自汗者火動而散故也。

因夏火太熱。損傷肺金元氣。其感有二。動而得之。乃辛苦之人。動而火勝。熱傷氣也。脈洪而大。靜而得之。乃安樂之人。靜而濕勝。火勝金位也。脈沉而實。

證治暑喜歸心。入心則噎塞。昏不知人。入肝則眩暈。入肺則喘滿痿躄。入脾則昏睡不覺。入腎則消渴。病則怠惰嗜臥。四肢不收。精神不足。兩脚痿弱。頭疼惡熱。躁熱大渴。引飲。大汗。因動而中。白虎加人參湯主之。頭疼惡寒拘急。肢節疼大熱無汗。因靜而中。大順散。白虎加蒼朮。有陰勝陽之極。甚則傳腎肝。為痿厥。清暑益氣湯主之。

凡中暈死。切忌與冷水涼處。須沃以湯。宜黃龍圓主之。心虛傷暑。身熱頭痛。煩滿而渴。五苓散主之。肺虛傷暑。身熱煩悶而喘。白虎湯主之。脾虛傷暑。則為痲瘧。常山飲主之。

黃連香薷湯 治暑 挾痰加半夏 虛加參朮。

清暑益氣湯 治暑傷金虛甚。

玉龍丸 曾用治暑 油炒半夏薑汁丸。

補中益氣湯 治主夏痰滲。

二苓湯 治春夏之交。病似傷寒。自汗體重。痛難轉側。此名中濕。

澤瀉一兩 滑石二兩 茯苓 猪苓 白朮半兩

暑風挾火痰實者可用吐法。

玉龍丸 治暑泄瀉。或二便秘。

焰硝 明礬 滑石 硫黃一兩 白麵六兩

水丸水下。

十一瘧

脈。瘧脈自弦。弦數多熱。弦遲多寒。弦小緊者可下之。弦遲者可溫之。緊數

者可汗灸之。浮大者可吐之。弦數者風發也。以飲食消息止之。

因。夏暑舍於營衛之間。腠理不密。遇秋之風。玄府受之。慘愴之水寒氣閉而不出。

舍於腸胃之外。與營衛並行。晝行於陽。夜行於陰。併則病作。離則病止。併於陽

則熱。併於陰則寒。淺則日作。深則間日。在氣則早。在血則晏。因汗鬱成痰。因虛

弱陰陽相乘。

外因。從六淫。有寒溫痺濕牝。

寒則先寒後熱。溫則先熱後寒。痺則但熱不寒。

濕則身骨節疼。牝則寒多不熱。

內因。有臟氣不和。鬱結痰飲所致。有肝心脾

肺腎之說。說見後。

不內外因。疫瘧。一歲之內。大小相似。

鬼瘧。夢寐不祥。

瘧瘧。乍有已。

食瘧。

因飲食得之。

勞瘧。因勞得之。

母瘧。有母傳染者也。

李論夏傷於暑。秋為痃瘕。暑者。季夏濕土。濕令不行。則土虧矣。所勝妄行。木氣

太過。少陽主也。所生者受病。則肺金不足。不勝者侮之。水勝土之分。土者坤。坤

在申。申為相火。水入土。則水火相干。則陰陽交作。肺金不足。洒淅惡寒。土虛少

陽乘之。則為寒熱。發於秋者。濕熱則卯酉之分也。

證治。先寒而熱。謂之寒瘧。先熱而寒。謂之溫瘧。治之宜乎中也。中者少陽也。渴者

燥勝也。不渴者濕勝也。又有得之於冬。而發於暑。邪舍於腎。足少陰也。有

藏之於心。內熱畜於肺。手太陰也。但熱而不寒。謂之瘧瘧。足陽明也。在太

陽經。謂之風瘧。宜汗之。在陽明經。謂之熱瘧。宜下之。少陽經。謂之風熱。宜和之。

此傷之淺也。在陰經則不分三經。謂之溫瘧。宜從太陰經論之。此傷之重也。太陽經。頭痛腰痛。寒從背起。先寒後熱。宜小柴胡。羌活地黃湯。少陽經。心體解。寒熱不甚。惡見人。多汗出甚。小柴胡湯。陽明經。先寒久乃熱。熱大汗。喜見火。乃快。宜桂枝二白虎一湯。少陰經。嘔吐煩悶。熱多寒少。欲閉戶而處。病難已。小柴胡加半夏湯。太陰經。好太息。不嗜食。多寒熱汗出。病至喜嘔。乃衰。理中湯。厥陰經。小腹腰痛。小便不利。意恐懼。四物玄明苦棟附子湯。心瘧。煩心。甚欲得清水。反寒多不甚熱。宜桂枝黃芩湯。肺瘧。心寒甚。熱間善驚。如有見者。桂枝加芍藥湯。肝瘧。色蒼蒼然。太息。其狀若死。通脈四逆湯。脾瘧。寒則腹痛。熱則腸鳴。鳴已汗出。小建中湯。芍藥甘草湯。腎瘧。腰脊痛。宛轉便難。目眴然。手足寒。桂枝加當歸芍藥湯。胃瘧。將病也。善飢不能食。能食而肢滿腹脹。理中湯丸主之。勞瘧。經年不差。後復發作。微勞力不任。名曰勞瘧。

母瘧百藥不差。結成癥癖在腹脇。名瘧母。
治雖不同。瘧得於暑。當以汗解。或汗不徹。鬱而成痰。宜以養胃化痰發汗。邪氣
得出。自然和也。虛則補之。脈洪數無力者是也。

羌活湯 治邪氣淺在表。

羌活 防風

甘草

惡寒有汗加桂枝。惡風無

汗加麻黃。吐加半夏。

麻黃桂枝湯 治夜瘧。此散血中風寒。

麻黃一兩

桂枝二錢

甘草三錢

黃芩五錢

桃仁三十粒 邪氣深入入血故夜。以桃仁緩肝散血中邪。

桂枝石膏湯 治邪深間日。

桂枝 石膏

知母

黃芩

汗出不愈。為

內實外虛。寒熱大作。必傳入陰。太陽陽明。莖芍。寒熱傳入太陽陽明少陽合
病。加柴胡。半夏。人參。甘草。

藜蘆散 治久瘧欲吐不能吐。宜吐之。

藜蘆爲末。溫蠶水調下半錢。以吐爲度。

張法 白虎加參湯。小柴胡合五苓散。神祐丸治之。

服前三方未動。次與之承氣湯治。甚者甘露飲調之。人參柴胡飲子補之。常山飲吐之。

老瘧丹 治老瘧。風暑入陰在臟。礙血氣。

川芎 桃仁 紅花 當歸 蒼朮

白朮 白芷 黃柏 甘草

右水煎。露一宿。次早服之。

瘧母丸 治瘧母食瘧。

鼈甲酢炙 三稜 莪朮酢炙 香附子

阿魏食積加酢化

截瘧丸 先補藥表藥。徹起陽分。方可截。

川常山 草果 知母 檳榔 烏梅

川山甲炒 甘草炙

用水一大碗。煎半碗。露一宿。臨發時溫服之。宜吐。

一補一發丹 治久瘧內傷挾外邪。內發必主痰。外以汗解。

半夏 茯苓 陳皮 柴胡 黃芩

蒼朮 川常山 葛根 虛加參朮補氣。甚加芩連。

有一人夏感。脈沉細。服之愈。

常山湯 治婦胎瘧。

常山二兩 黃芩三兩 石膏八錢 烏梅十四

甘草一兩 煎服之。

不二散 白麵二兩 砒一錢 和勻。以香油一斤。煎之色黃。用草紙

壓之去油爲末。入江茶三兩。每服一字。

神妙絕瘧 木通 川者 秦艽去蘆 川山甲炙 常山各等

辰砂半錢 烏梅七箇 大棗七箇 右以水三盞。煎至半。入酒一

盞。再至半。先刮砂棗服。次服藥。

十一 疸

脈證。

脈沉。渴欲飲水。小便不利。皆發黃。脈沉乃陽明畜熱。喜自汗。汗出入水。熱

鬱身腫。發熱不渴。名黃汗。脈緊數。乃失飢發熱。大食傷胃。食則腹滿。名穀疸。

數爲熱。熱則大食。緊爲寒。寒則腹滿。脈浮緊。乃因暴熱浴冷水。熱伏胸中。身

面目悉如金色。名黃疸。陽明病。脈遲者。食難用飽。飽則發煩。頭眩者。必小便

難。欲作穀疸。脈沉弦。或緊細。因飲酒。百脈熱。當風入水。懊懣心煩。足熱。名酒

疸。其脈浮。欲嘔者。先吐之。沉弦者。先下之。脈浮緊。乃大熱。交接入水。腎氣虛。

流入於脾。額黑。日晡熱。小腹急。足下熱。大便黑。時澹。名女勞疸。腹如水狀。不治。

脈寸口近掌無脈。口鼻冷。不治。其病身熱。一身盡痛。發黃便澁。

因。內熱入水。濕熱內鬱。衝發胃氣。病雖有五。皆濕熱也。

治。諸黃家。但利其小便。愈。假令脈浮。以汗解之。如便通。汗自當下之。愈。當以十八

日爲期。治之十日以上。爲差。反劇者。難治。治法以疏濕利小便。清熱。或汗之。五

苓加茵陳連類。

茵陳梔子湯 茵 陳 各一兩 大 黃 半兩 山 梔 十箇 豆豉湯下。

五苓散 熱加苦參。渴加瓜蒌根。便澁加葶藶。素熱加黃連。

茵陳蒿湯 治黃疸寒熱不食。食則頭眩。心胸不安者是。

滑石石膏丸 治女勞疸。證見題下。

滑石 石膏 膏

研末下粥飲。便利則止。

十三勞 勞極煩

脈。男子平人脈大為勞。極虛為勞。浮大為裏虛。男子脈虛弱細微者。善盜汗。

男子脈虛沉弦。無寒熱。短氣裏急。小便不利。面色白。時目瞑喜衄。諸乳動微。

緊。男子失精。女子夢交。脈沉小遲。名脫氣。其人疾行則喘。手足寒。腹滿。甚則

漉洩。食不消。脈弦而大。大則為芤。弦則為減。女子漏下。男子失精。脈微弱

而澁。為無子。精氣清冷。尺脈弱寸強。胃絡脈傷。安臥脈盛。謂之脫血。脈

舉之而滑。按之而微。看其在何部。以知其藏。尺弱滑而澁。下虛也。尺滑而澁。疾。為

血虛。脈數。骨肉相失。聲散。嘔血。陽事不禁。晝涼夜熱者死。脈輕手則滑。重

按則平。看其在何經。而辨其府。寸弱而微者。上虛也。

因。喜怒不節。起居不時。有所勞傷。皆傷其氣。氣衰則火旺。火旺則乘其脾土。而胃

氣元氣散解。不能滋養百脈。灌注藏府。衛護周身。百病皆作。證。百節煩疼。胸滿氣短。心煩不安。耳聾鳴。眼黑眩。寒熱交作。自汗飧泄。四肢怠惰者。

外有脾痺。中風。濕痺病。傷暑骨熱不同。治。法以甘寒瀉火。甘溫補中。溫之收之。

十全散。四物湯。治血虛。四君子湯。治氣虛。加升麻。補中益氣湯。牛膝丸。治腎肝損。骨痿不能起床。筋緩不能收持。

川草薺炒

杜仲炒

菰蓉酒浸

兔絲酒浸

牛膝酒浸

蒺藜治肝各

桂枝半兩

酒煮猪腰子丸。梧桐子大。空心酒下。亦治腰痛。

腎氣丸。治腎脾不足。房室虛損。宜此榮養血以益腎。腎苦燥。以辛潤之。

致津液。故用川芎。酸以收之。故用五味。蓋神方也。

蒼朮一斤 熟地一斤 五味半斤 川芎冬一兩 夏半兩 秋

右為末。用棗肉丸。米飲下。

地黃煎丸 解勞生肌活血。

生地汁

藕汁

杏仁汁

薑汁各五升

薄荷汁

鵝梨汁

法酒二升

沙蜜四兩

已上慢火熬成膏入後藥。

柴胡三兩去蘆

秦艽去蘆

桔梗各二兩

熟地黃四兩

木香

枳殼炒

柏子仁炒

山藥

白茯苓

遠志去心

人參

白朮各一兩 麝香半錢

右爲末和前藥。丸如梧桐子大。甘草湯下。

辛苦勞

柴胡

人參

黃芪

黃柏

甘草

牡蠣散

治諸虛不足。津液不固。自汗出。

牡蠣煨取粉

麻黃根

黃芪

或加秦艽、柴胡、小麥同煎。

麥門冬湯

治大病後虛煩。則熱不解。不得臥。

半夏

竹茹

陳皮

茯苓

麥門冬

人參

炙甘草湯

治虛勞不足。汗出而悶。心悸脈結代。

酸棗仁丸 治虛勞虛煩不得眠者。

棗仁兩炒一 參錢各一 桂錢各一 茯苓三錢 石膏半兩 猪苓三錢

固精丸 治精滑。

牡蠣砂鍋煨酢淬七次。酢糊丸梧子大。空心鹽酒送下。

參歸散 治骨蒸勞。

知母炒 人參炒 秦艽去尖 北柴胡同朮炒

鼈甲麥湯浸七次 前胡各半 烏梅三箇 地骨皮

川常山酒浸三日 川歸柴胡同炒 甘草 白茯苓各七錢半

水煎服。

脾虛 本經宜四君子湯。

肝乘之脇痛。口苦往來寒熱而嘔。四肢滿悶。淋瀝便難。轉筋腹痛。宜防風、獨活、

川芎、桂、芍藥、白朮、茯苓、猪苓、澤瀉、黃柏、細辛、滑石。

心乘之。宜連芩、柏、白芍、地黃、石膏、知母。

肺受病。痰嗽短氣。懶語嗜臥。洒淅寒熱。宜補中益氣湯。作涎清涕。肩甲腰痛。

冷泄。宜乾薑、朮、附、烏、蒼朮、桂、茯苓。

勞極

勞者。神不寧也。

肝勞實熱。關格牢澁。閉塞不通。毛悴色夭。肝勞虛寒。口苦關節疼痛。筋攣縮煩悶。

心勞實熱。口舌生瘡。大便閉塞。心滿痛。小腹熱。心勞虛寒。驚悸恍惚多忘。夢寐驚魘。神志不定。

脾勞實熱。四肢不和。五臟乖戾。脹滿。肩息氣急不安。脾勞虛寒。氣脹咽滿。食不下。通噎宿食臭。

肺勞實熱。氣喘鼻脹。面目苦腫。肺勞虛寒。心腹冷氣。氣逆遊氣。胸脇氣滿。從脇達背。痛嘔逆虛乏。

腎勞實熱。小腹脹滿。小便赤黃。末有餘瀝。數少。莖中痛。陰囊生瘡。腎勞虛寒。恐慮失志。傷精噓吸短氣。遺洩白濁。小便赤黃。陰下濕痒。腰脊如折。顏色枯悴。盡力謀慮則肝勞。曲運神機則心勞。意外致思則脾勞。預事而憂則肺

勞。矜持志節則腎勞。

極者窮極無所養也。

筋實欬而兩脇下痛。不可轉動。脚下滿。不得遠行。脚心痛不可忍。手足爪甲青黑。四肢筋急煩滿。筋虛好悲思。支噓吸。脚手俱攣。伸動縮急。腹內轉痛。十指甲疼。轉筋。甚則舌卷卵縮。唇青面色蒼白。不得飲食。脈實氣衰。血焦髮落。好怒。唇舌赭。甚則言語不快。色不澤。飲食不爲肌膚。脈虛。虛則欬。欬則心痛。喉中介介如梗。甚則咽垂。肉實。肌脾淫淫如鼠走。津液開。腠理脫。汗大洩。或不仁。四肢急痛。或腹緩弱。唇口壞。皮膚變色。肉虛體重怠惰。四肢不欲舉。關節痛疼。不嗜飲食。飲食則欬。欬則脇下痛。陰引背及肩。不可轉動。氣實喘息衝胸。常欲自恚。心腹滿痛。內外有熱。煩嘔不安。甚則嘔血。氣短乏不欲食。口燥咽乾。氣虛皮毛焦。津液不通。力乏腹脹。甚則喘息。氣短息塞。晝差夜甚。精實目視不明。齒焦髮落形衰。通身虛熱。甚則胸中痞痛。煩悶洩精。精虛尪

羸驚悸。夢洩遺瀝。小便白濁。甚則莖弱核微。小腹裏急。骨實熱耳鳴。面色焦枯。隱曲膀胱不通。牙腦苦痛。手足酸疼。大小便閉。面腫垢黑。脊痛不能久立。氣衰髮落齒槁。腰背相引痛。甚則喜唾不了。骨虛

煩熱

內熱曰煩。外熱曰熱。

身不覺熱。頭目昏痛。口乾咽燥不渴。清清不寐。皆虛煩也。平人自汗。小便頻併。遺洩白濁。皆憂煩過度。大病虛後煩悶。謂之心虛煩悶。

古今錄驗五蒸湯 治五蒸病

甘草炙一兩 人參 知母 黃芩各二兩 茯苓

熟地 葛根各三兩 竹葉二把 石膏碎五兩 粳米二合

右咬咀。以水九升。煮取二升半。分爲三服。亦可以先煎小麥水乃煎藥。忌海

藻、菰菜、蕪夷、大酢。

實熱 黃芩 黃柏 黃連氣也 大黃血也

虛熱 烏梅 秦艽 柴胡 蒿氣也

蛤蚧

鼈甲

小麥

丹皮血也

肺鼻乾

烏梅

天冬

麥冬

紫苑

皮唾血白

桑白皮

石膏

膚嗜睡

牡丹皮

氣喘遍身虛熱

人參

黃芩

梔子

大腸乾痛右孔

大黃

芒硝

脈唾白浪語脈絡

生地黃

當歸

心舌乾

生地

黃連

當歸

血髮焦

地黃

當歸

桂心

童便

小腸焦下唇

赤茯苓

木通

生地

脾唇焦

芍藥

木瓜

苦參

肉食無味而嘔

白芍藥

胃痛舌下

石膏

粳米

大黃

芒硝

葛根

肝眼黑	川芎	當歸	前胡
筋甲焦	川芎	當歸	
膽眼白	柴胡	栝萎	
三焦乍寒熱	石膏	竹葉	
腎焦兩耳	生地	石膏	知母
腦頭眩	地黃	防風	羌活
髓中熱	天冬	當歸	地黃
骨齒黑腰	鼈甲	地骨皮	牡丹皮
肉肢細膚腫	生地黃	石膏	當歸
胞赤小便	澤瀉	茯苓	黃柏
膀胱左耳	沉香	茯苓	滑石
			生地

外有胸中煩熱。肝中寒煩悶。肝中風酒疸。中暑中風濕。心痺脾痺。肝虛寒精實。

五心煩熱。小腸熱。心虛熱。

足下熱。酒疸女勞疸。日晡熱如疸。

勞瘵

脈虛。

因痰與血病。

證其病俗名傳尸。雖多種不同。其病與前人相似。大略令人寒熱盜汗。夢與鬼交。遺泄白濁。髮乾而聳。或腹中有塊。或腦後兩邊有小核數箇。或聚或散。沉沉默默。咳嗽痰涎。或咯膿血。如肺痿肺癰狀。或腹下利。羸瘦困乏。不自勝持。雖不同證。其根多有蟲嚙心肺一也。

治。

青蒿半斗

童便三斗

文武火熬至七分。去蒿再熬至一升入。猪膽

汁七箇。辰砂枳榔末再熬數沸。以甘草末收之。

四物湯

治虛勞痰竹瀝。薑汁便。或加參朮。

三拗湯

治傳尸勞瘵。寒熱交攻。久嗽咯血羸瘦。先服此方。後服蓮心散。

萬無一失。

麻黃 生甘草 杏仁不去皮尖炙。薑棗煎服。痰清則止。

蓮心散 當歸 黃芪 甘草 鼈甲酢炙

前胡 柴胡 獨活 羌活 防風

防己 茯苓 半夏 黃芩 陳皮

官桂 阿膠 赤芍 麻黃去節 杏仁

蓮心去心 天南星 川芎 芫花酢炒 枳殼炒

除芫花每服二錢半。水二盞半。薑三片。棗一枚。入芫花一抄。煎至八分服。須吐有異物。漸減芫花及甘草。殺蟲少之。

調鼎方 治傳尸勞神效。

混沌皮一宿焙乾 炙鼈甲 桔梗 芍藥

胡黃連 製大黃 甘草 豉心

苦參 貝母 秋石另研 草龍膽

知母 黃柏蜜炙 芒硝 犀角一錢

蓬朮一箇

脈因證治卷一 十三勞

五二

右煉蜜爲丸。溫酒下二十九丸。腸熱食前。膈熱食後。一月平安。

白蠟塵

治療

脈因證治

元 金華 朱丹溪震亨著

鄞縣 曹赤電炳章圈點

卷二

十四熱

脈浮大而虛爲虛。脈細而實爲實。脈沉細或數者皆死。病熱有火者心脈洪是也。無火者死。細沉是也。脈弱四肢厥不欲見人。食不入。利下不止。死。因。因心火爲之。心者君火也。火旺則金燠水虧。爲火獨存。證治。暴熱病在心肺。積熱病在腎肝。

虛熱。如不能食而熱。自汗氣短。屬脾虛。治宜甘寒溫而行之。實熱。如能食。口乾舌燥。便難者。屬胃實。治宜辛苦大寒下之。火熱而鬱。乃心火下陷脾土。抑而不伸。五心熱。宜汗之發之。心神煩亂。血中伏火。病蒸蒸然不安。宜鎮陰火。

硃砂安神丸主之。蒸勞熱。乃五臟齊損。病久憔悴。盜汗下血。宜養血益陰。陰虛而熱者。用四物加柏。

治法。小熱之氣。涼以和之。大熱之氣。寒以取之。甚熱之氣。汗而發之。不盡則逆治之。

又治法。養血益陰。其熱自治。經曰。壯水之主。以制陽光。輕者可降。重者從其性而伸之。

李論外有元氣虛而熱。有五臟而熱。有內中外而熱。輕手捫之則熱。重之則不熱。在皮毛血脈也。輕按之不熱。重至筋骨熱。蒸手足甚。筋骨熱也。不輕不重而熱在肌肉也。

凡三法。以三黃丸通治之。

肺熱者。輕按之。瞥瞥見於皮毛。日西甚。其證喘咳。洒淅寒熱。輕者瀉白散。重者涼膈。白虎。地骨皮散。

心熱者。微按之。熱見於血脈。日中甚。其證煩心。心痛。掌中熱而腕。以黃連瀉心湯導赤散。硃砂安神丸。

肝熱。肉下骨上熱。寅卯間甚。脈弦。四肢滿悶。便難轉筋。多怒驚。四肢困熱。筋痿不起。牀。瀉青丸。柴胡飲。
脾熱。輕重之中見於肌肉。夜甚。怠惰嗜臥。無氣以動。瀉黃散。調胃承氣。治實熱。補中益氣湯。治虛熱。
腎熱。按至骨蒸手如火。困熱。不任起牀。宜滋腎丸。六味地黃丸。
平旦潮熱。熱在行陽之分。肺氣主之。白虎加芩。日晡潮熱。熱在行陰之分。腎氣主之。地骨皮。牡丹皮。知母。柏。

木香金鈴子散 治暴熱心肺。上喘不已。

大黃五錢 金鈴子三錢 木香三錢 輕粉 朴硝

右爲末。柳白皮湯下三錢。以利爲度。止喘亦止。

牛黃散 治上焦煩。不得臥睡。

大黃 梔子 鬱金各五錢 甘草二錢

煎服微利則止。

黃牛散 治相火之氣。遊走臟腑。大便閉。

大黃一兩 牽牛頭末半兩 酒下三錢。以利為度。此不時熱溫熱也。

金花丸 柏

連

芩

梔

大黃

則便實加

煎丸任用。或腹滿吐嘔。欲作利。加半夏、芩、朴、生薑。如白膿下利後重。加大黃。

涼膈散

退六經熱。

連翹

山梔

大黃

薄荷

甘

草半兩

黃芩半兩

朴

硝半兩

如咽噎不利。腫痛并涎嗽。加桔梗一兩。

荊芥半兩

咳而嘔。加半夏三錢。

薑煎。

鼻衄嘔血。加白芍、地黃。如淋。

閉。加滑石四兩。

茯苓一兩。

或悶而不通。腹下狀如覆碗。痛悶難忍。

乃腸胃乾涸。膈中氣不下。先用木香三錢。

沉香三錢。

酒下。或入正

散。甚則宜上涌。

當歸承氣湯

治陽狂奔走。罵詈不避親疎。此陽有餘。陰不足也。

當歸

大黃

芒硝

各一兩

甘

草半兩。每二兩薑棗煎。

牛黃膏

治熱入血室。發狂不認人。

牛黃半兩

硃砂一兩

鬱金

甘

草各半

腦子一錢

丹皮 三錢

右煉蜜丸。皂子大。水下。

三黃丸 治實熱能食者。能食為實熱也。

白虎湯 治表熱惡寒而渴者。

柴胡飲子 治兩脇下肌熱。脈浮弦者。

四順飲子 治一身盡熱。日晡肌熱。皆血熱也。

桃仁承氣 治血熱夜發熱者。

潮熱者。黃芩、生甘草。辰戌時加羌活。午間黃連。未時石膏。申時柴胡。

酉時升麻。夜間當歸根。如有寒者。黃耆、參朮。

兩手大熱為骨厥。如在火中。可灸湧泉五壯。立愈。

地黃丸 治久新憔悴。寢汗發熱。腸澼下血。骨蒸痿弱無力。五藏齊損。不

能運動煩渴。皮膚索澤。食後更宜當歸飲子。

熟

地八兩

山茱萸

山

藥 各四

丹

皮

茯苓

苓

澤

瀉 各三

右煉蜜和丸。梧子大。每服五十丸。空心酒下。

當歸飲子

柴胡

人參

黃芩

甘草各一兩

大黃

當歸

白芍各三兩

滑石三兩

薑煎服。如痰實咳嗽。加半夏。五穀不化完出。淋悶驚悸。上下血。宜金花丸。

硃砂安神丸 治心神煩亂怔忡。兀兀欲吐。胸中氣亂而熱。似懊懣狀。皆

是膈上血中伏火。

硃砂一錢 黃連一錢半

炙甘草五分

生地五錢

當歸半錢

餅丸津下。如心痛。食入反出。加煨大黃。除地黃。

補血湯 治肌熱燥熱。目赤面黃。煩渴引飲。日夜不息。脈浮大而虛。重

按之全無。為血虛發熱。證似白虎。唯脈不長。併實耳。

黃芪一兩 當歸二錢 熱服。

火劑湯

黃芩

黃連

山梔

黃柏

火鬱湯 治四肢熱。五心煩熱。因熱伏土中。或血虛得之。或胃虛多殭冷

物。抑遏陽氣于土中。

羌活

升麻

葛根

人參

白芍各半

柴胡

甘草炙三錢

防風二錢

葱白三寸

煎服。

硃砂涼膈丸 治上焦虛熱。肺脘咽膈有氣如烟搶上。

黃連

山梔各一

人參半兩

硃砂另三錢

腦子另五錢

茯苓五錢

右蜜丸。硃砂爲衣。水下。

黃連清膈丸 治心肺間及經中熱。

麥冬一兩

黃連五錢

鼠尾三錢

右蜜丸。菉豆大。溫水下。

補中益氣湯 治脾胃虛弱而熱。

長砂滑石丸 治表裏熱。

辰砂

龍腦

薄荷

六一散

秘方 治陰虛發熱。

四物湯

黃柏

龜板

人參

白朮二味氣虛加之

治酒發熱 青黛

瓜蒌仁

生薑

十五吐衄下血

脈。脈。瀋。濡。弱。為。亡。血。細。弦。而。瀋。按。之。虛。為。脫。血。也。脈。浮。弱。按。之。而。絕。者。為。下。血。煩。欬。者。必。吐。血。脈。沉。弦。面。無。血。色。無。寒。熱。者。必。衄。沉。為。在。裏。營。衛。內。結。胸。滿。必。吐。血。脈。滑。小。弱。者。生。浮。大。牢。數。者。死。又。血。溫。身。熱。脈。躁。者。死。熱。為。血。氣。散。故。也。藏。血。脈。俱。弦。者。死。滑。大。者。生。因。外。有。肺。癰。肺。痿。亦。能。咳。嗽。膿。血。勞。亦。能。吐。血。證。治。麻。黃。湯。治。傷。寒。證。大。壅。塞。內。熱。火。氣。不。伸。成。衄。脈。浮。緊。為。寒。

桂枝湯 治證同前 脈浮緩為風

五苓散 治伏暑熱流入經絡

黃芩芍藥湯 治傷寒風二證脈微

衄血方 治出於肺經。如不止。用寒水紙於胸膈大椎三處貼之。

犀角

升麻

山梔

黃芩

白芍

生地

丹參

紫參

阿膠

荊芥穗

研服亦良。

蘿菔頭段搗飲。又汁滴之亦良。大椎啞門灸之亦止。

咯唾血方

出於腎亦有瘀血內積。肺氣壅遏不能下降。肺壅非吐不可。

天冬

麥冬

知母

貝母

桔梗

熟地

遠志

黃柏

有寒加乾薑、肉桂。

嘔痰涎血方

出于脾。

黃耆

黃連

白芍

當歸

甘草

沉香

葛根

嘔吐血方

出于胃。

犀角地黄湯

治實及病餘瘀血。

犀角一兩

生地八兩

白芍三兩

丹皮二兩

小建中湯加黃連

治虛及傷胃吐血。

三黃補血湯

治六脈大。按之虛。面赤善驚上熱。乃手少陰心之脈也。此

氣盛而亡血。瀉火補氣。以墜氣浮。

丹皮一錢

川芎二錢

熟地二錢

生地三錢

柴胡

當歸錢各半

升麻

黃耆錢各半

白芍五錢

人參飲子

治脾胃虛弱。衄血吐血。又治吐血久不愈。于氣冲三稜針出

血立愈。

甘草一錢

麥冬二錢

當歸三錢

黃耆一錢

五味子五個

白芍一錢

救肺飲 治欬吐血。

升麻

柴胡

白朮

白芍錢各一

歸尾

熟地

黃耆

人參錢各二

蘇木

陳皮

甘草分各五

作一服。

清心蓮子飲

治欬血兼痰。

涼血地黃湯

治腸澼下血。水穀與血。另作一派。

知母炒

黃柏炒各一兩

槐子炒

青皮

熟地

當歸

如餘證同痢門法治之。

胃氣湯 治風毒客腸胃。動則血下。

芍 朮 參 歸 桂 芎 苓各等分

尿血方 治心腎因房勞憂思氣結。

髮灰。能消瘀血通閉。酢湯下三錢。棕櫚燒灰。米飲下亦可。

三汁丹 治小便出血。

水楊樹腦 老鴉飯草 赤脚馬蘭 各自然汁。以水服之。

益陰散 治陽浮陰翳。咯血衄血。

黃 柏 黃 連 黃 芩以蜜水炙乾 白 芍 人 參

白 朮 乾 薑各三錢 甘 草炙六錢 雨前茶二錢

香油釜炒紅米飲下三四錢。立安。

三黃丸 治衄血不止。大便結燥者。下之。

大 黃半兩 芒 硝 地 黃二錢 黃 連 黃 芩

山 梔錢各一 老蜜煉丸。

咳血丹 治因身熱痰盛血虛。

青黛

瓜蒌仁治二味

訶子

海石瘡

杏

仁治嗽甚

四物湯治虛

薑汁

童便

山梔

蜜調噙化

嘔血丹

治因火載血上。錯經。

四物湯

山梔炒

鬱金

童便

薑汁

韭汁

山茶花痰加竹瀝

喉中痛是氣虛。加參芪朮柏。

衄血丹

涼血犀丹地黃湯入鬱金。

瀉血丹

治熱

生地四兩

蘇木根

淡竹葉

山梔炒

滑石

甘草

蒲黃

藕節

當歸

血虛加四物、

牛膝膏、通草。

下血丹

四物湯。

熱加連。酒煮

山

梔炒

秦

芫

升麻

膠珠

白芷

虛加乾薑炮

五倍子

寒

加辛升溫散。一行一止。

神效方

治吐血痰血。酒色過度者。

批杷葉去毛

款冬

紫苑茸

杏仁去皮

鹿茸法如

桑白皮

木通各一

大黃半兩

煉蜜丸。臨臥含化口中。

聖餅子治咯血。

青黛一錢 杏仁四十分

右杏仁以黃蠟煎黃色研細入黛作捏餅子。每日柿一個中破開入藥合定。

溼紙煨飲下。

羅麵丹治內損吐血。

飛羅麵略炒 京墨二錢下

越桃散治下血及血痢。

山梔 槐花 大棗 乾薑各等 燒存性。研。米

飲下三錢。

伏龍肝散治便血。因內外有感。凝住在胃。隨氣下通。亦妄行之類。

伏龍肝八兩 白朮 阿膠 黃芩 乾地黃

脈因證治卷二 十五吐衄下血

一四

甘草各三兩煎服。

赤豆歸散 治先血後便。謂之近血。

赤小豆五兩浸令芽出晒乾當歸一兩 爲末漿水下。

五靈脂散 治下血。

五靈脂炒爲末芎歸湯下。

有血脫盡色白而夭不澤脈濡此大寒證乃始同而末異治宜辛溫益血甘熱溫經乾薑類是也。有陰結者便血夫邪在五藏則陰脈不和陰不和則血留之血無所稟滲入腸間其脈虛瀉非腸風藏毒也治宜生地黃汁。

小薊汁各一升

砂糖

地榆

阿膠

側柏葉

十六下痢

脈。脈滑按之虛絕者必下痢。

寸脈反浮數尺中自澀必下清膿血。

脈沉弦者

下重其脈小大者爲未止。

脈數若微發熱汗自出者自愈設脈復緊者必爲

未解。

脈微若數者令自止雖發熱不死脈反弦發熱身汗出自愈。脈絕手

足厥。灸之手足溫者生。若脈不還。反微喘者死。脈遲而滑者。實也。利未止。當下之。數而滑者。有宿食。當下之。腸澼下白沫。沉則生。浮則死。腸澼下膿血。懸絕死。滑大生。又沉小流連者生。數大有熱者死。腸澼轉筋。脈極數者死。凡諸痢泄注。脈沉小者生。浮大者死。身熱者死。或譫語。或腹堅痛。脈沉緊者。可下。遲者可溫之。下痢不欲食。有宿食。腸滿痛。爲寒食。腸堅。心下堅。爲實。皆可下。下痢脈遲。緊痛。腸鳴。心急。大孔痛。皆可溫。傷寒下痢。三部無脈。尺中時小見。脈再舉頭者。腎氣也。形損脈不至者死。因風溼熱論之。則火盛而金去。獨木火旺。而脾土損矣。輕則飧泄。身熱脈洪。穀不能化。重則下利濃血。經曰。春傷于風。夏必飧泄。又曰。諸下利。皆屬于溼。又曰。下利稠粘。皆屬於火。又曰。利下膿血。皆屬滯下。前證皆熱證實證也。忌用龍骨石脂粟殼等劑。虛證。泄利水穀。或化或不化。並無努責。惟覺困倦。脈弦澹者是也。宜溫補之。治法重則大黃湯主之。輕則黃芩芍藥湯主之。後重則宜下。乃有物結墜。裏熱脈洪甚宜下。若脈洪大甚。不宜下也。又大腸經氣不宜加木通。檳榔。木香。

腸痛則宜和。胃氣不和。當以茯苓歸芍和之。身重則除濕。脈弦則去風。風氣因動。屬于內。大柴胡湯主之。血濃稠粘。以重藥竭之。熱甚故也。身冷自汗。以毒藥溫之。有暴下無聲。身冷自汗。小便清利。大便不禁。氣難布息。脈沉微。喘吐。雖有裏急後重。謂寒邪在內而氣散也。可溫藥而安。則漿水散是也。屬少陰。風邪在內。縮。宜汗之也。有厥陰下利不止。脈沉而遲。手足厥逆。涕唾濃血。此難治。宜麻黃湯。小續命湯平之。法曰。謂有表邪縮于內。當散表邪而安矣。李用升舉之法亦然。驚澹爲利。宜溫之。謂利有結糞。屬太陰。有裏者下之。或後重。或食積與氣墜下之。在上者涌之。或痰氣在上。涌之安。在下者竭之。大法去者送之。盛者和之。過者止之。假如惡寒熱。腹不痛。加苓爲主。痛甚。加當歸倍芍。如見血。加連。或發熱惡寒。非苓不止。上部血也。如惡寒。脈沉腰痛。或白痢下痛。或血。非連不止。中部血也。或惡寒。脈沉。先血後便。非地榆不止。下部血也。痢下有風溼。熱寒虛滯下。噤口痢。疳痢。瘵痢。濕蝕瘡。病同而因異。血痢有瘀血。血枯肺痿。風血酒痢。證同而因異。泄痢是積辨。泄痢有期。或久亦然。或久神不瘳亦然。宜逐去之。此名滯下。

有一人年六十。憂患滯下。褐色。腹微痛。後重頻併。食大減。身微熱。脈弦而瀉。似數。稍長。非滯下。乃憂患所致。心血虧脾弱也。以四物、四君。合而治之。愈。有一人年三十。奉養後。秋間患滯下。腹大痛。左脈弦大。似數。右脈亦然。稍減。重取似緊。此乃醉飽後吃寒涼。當作虛寒治之。遂以四物、桃仁、紅花。去地黃。加參、朮、乾薑。煎入薑汁、茯苓。一月安。

黃芩芍藥湯 治洩痢腹痛後重。身熱。脈洪疾。

芍藥 黃芩各一兩 甘草五錢 痛加桂少許。

大黃湯 治前證重者。

大黃一兩 酒浸半日煎服。以利爲度。

芍藥湯 治下痢膿血。裏急後重。行血則便膿自安。調氣則後重自除。

芍藥一兩 當歸 黃連各半兩 甘草炒 木香

枳榔 桂枝各二錢 黃芩半兩 大黃三錢

白朮芍藥湯 治脾受溼水洩。微滿困弱。暴下無數。

白朮 芍藥各一兩 甘草

腹痛甚。加芩、桂。脈弦頭痛。加蒼朮、防風。下血。加蒼朮、地榆。痒則同上。如心下痞滿。加枳實。

黃連湯 治大便下血。腹中不痛。謂之溼毒下血。腹中痛。謂之熱毒下血。

當歸 半兩

大黃 半兩

熱毒加之。芍藥、桂、腹痛加之。

訶子散 治虛滑久不已。

黃連 三錢

木香 半兩

炙甘草 三錢

訶子皮 半兩

白朮

芍藥湯送下。

桃花湯 治冷痢腹痛。下魚腦白物。

赤石脂 煨

乾薑 炮

餅丸。飲下。

漿水散 治暴洩如水。身冷脈微氣少。甚者加吐急痛。

半夏 一兩

炮附子

乾薑 五錢

桂枝 五錢

炙甘草 三錢

夏薑 半兩

右爲末三五錢。漿水二盞。煎半。和滓熱服。

小續命湯 治風積痢。

龍芽草 劉寄奴

椿皮丸 治風邪內陷。

香連丸 止痢。

燥溼和血湯 治腸澼下血。合作一派。腹中大痛。此乃陽明氣衝。熱毒所作也。以下出李。

地黃 生熟各半兩 牡丹皮 半錢 白芍 半錢 當歸 二錢

甘草 生熟各半錢 黃耆 一錢 升麻 七錢 蒼朮

秦艽 肉桂 各三錢 橘皮 二錢 作一服。

升麻補胃湯 治前證腹中不痛。腰沉沉然。乃陽明少陽經血證。名溼毒下血。効過老人久痢。

升麻 一錢 羌活 二錢 獨活 柴胡 防風 各五

葛根 三錢 肉桂 少許 白芍 半錢 當歸 三錢 丹皮 半錢

地黃 生熟各半錢 炙甘草 半錢 黃耆 一錢 槐花 治濕 青皮

作二服。

益智和中湯 治前證腹中痛。皮惡寒。脈俱弦。按之無力。關甚緊弦。肌表陽明分涼喜熱熨。為內寒明矣。

升麻半錢 葛根半錢 白芍半錢 炙甘草一錢 桂皮四錢

益智五分 當歸一錢 黃耆一錢 牡丹皮炙 柴胡

半夏各五分 乾薑炒 肉桂一錢

茯苓湯 治傷冷飲水。變成白痢。腹內痛減食。

茯苓六錢 澤瀉一錢 當歸四錢 蒼朮二錢 生薑二錢

黃芩三錢 肉桂二錢 猪苓六錢 甘草炙半兩 芍藥一錢

升麻 柴胡各二錢

止痢神丸 川黃連 茱萸 粟殼 清泔浸三日。又酒

浸七日。炒乾。上二味同此制。

右末為丸。熱則甘草湯下。寒薑湯下。八十丸。

小柴胡去參湯 渾身熱。挾外感。

沒乳丸 治瘀血痢。

乳香

沒藥

桃仁

滑石

佐以木香。檳榔。蘇木。湯下。

保和丸 治食積痢。

噤口丹 治禁口痢。嘔不納食。亦治痢吐食。

枇杷葉蜜炙張 宿砂十個

熟蜜調抹口上。

半夏四錢 人參八錢

薑煮乾焙末。以薑粉入香附丸服。連多加參

煎呷。

大承氣湯 治下痢不欲食。

許學士云。凡痢病腹痛。以白芍甘草為君。歸朮為佐。見血前後。以三焦熱論。

凡治痢病。小便清白不瀝為寒。赤瀝為熱。

又法。完穀不化而色不變。吐利腥穢。沉微清冷。小便清白不瀝。身涼不渴。脈微

細而遲者。寒也。穀雖不化而色變。非白煩渴。小便赤黃。而或澀者。熱也。凡穀消

化。無問他證及色。便為熱也。寒洩而穀化者。未之有也。

傷食微加大黃。腹脹川朴。渴者白茯苓。腹痛白芍。甘草為主。冬月白芍藥一半。

白朮一半。夏月制黃芩。先見膿血。後見大便者。黃蘗爲君。地榆爲佐。加歸尾。先見大便而膿血者。制芩歸梢。膿血相雜下者。制連。大便腹不痛。白芍半之。身倦目不欲開。口不能言。黃耆人參。沉重者。制蒼朮。不思食者。木香。藿香。餘同上。

十七泄

脈疾身多動。音聲響亮。暴注下迫。此陽也。熱也。脈沉細疾。目睛不了了。飲食不下。鼻準氣息。此陰也。寒也。

因溼多成五泄者。胃泄。脾泄。大腸泄。小腸泄。大瘕泄。證治。胃泄。飲食不化。色黃。宜承氣湯。

脾泄。腹脹滿泄注。食嘔吐逆。宜理中湯。一云。腸鳴食不化者。經云脾虛。

大腸泄。食已窘迫。大便色白。腸鳴切痛。宜乾薑附子湯。

小腸泄。溲便膿血。小腹痛。宜承氣湯。

大瘕泄。裏急後重。數圜不得。莖中痛。宜五苓散。

五病治雖不同。其溼一也。有化寒化熱之異故也。虛則無力。不及拈衣而已出。

謂之不禁故也。溫之熱之。實則固不便。虛坐努責。宜下之。

痰積下流。因太陰分有積痰。肺氣不得下流降而鬱。大腸虛而作泄。當治上焦。以蘿蔔子等吐之。水泄。乃大引飲。是熱在膈上。水多入下。胃經無熱不勝。

寒泄。大腸滿而泄。驚瘡。風泄。久風為飧泄。乃水穀不化而出也。防風為君。

平胃五苓散 治溼泄。水泄。熱泄。此方治一切陽證。

平胃散 五苓散 白朮 熱加黃連、木通。

補胃丸 治氣虛下溜。四君子 白芍炒 升麻

流積丸 治痰積下流。甚則吐之。

青黛 黃芩 海石 神麴 砂仁

止瀉丸 肉豆蔻五兩 滑石 春一兩 夏二兩

寒加神麴、砂仁、吳茱萸。熱加黃連、茯苓。滑加訶子。煨

溫六丸 清六丸。

脾泄丸 白朮二兩 白芍酒炒一兩 神麴半兩 查子

半夏一兩 黃芩半兩 蒼朮

虛加參朮甘草。裏急後重。加枳榔。木香。荷葉煨飯丸。

薑附湯 治寒泄。

椒朮丸 治溼泄。

川椒

蒼朮

肉果

胃風湯 治風泄。

太平丸 治泄。黃連

一方與乾薑炮各一兩。或加訶歸。名駐車

丸。一方與茱萸各一兩。或加芍藥。又名苦散。

腸鳴乃溼與熱相搏也。或大熱亦然。或飲水亦鳴。許論泄瀉有八。冷瀉。脈

微。宜暖藥。熱瀉。胃中有熱。傷寒多有脈數。宜涼解之。積瀉。脾脈沉弦。宜逐

積。脾瀉。同上條。氣泄者。躁怒不常。傷動其氣。肝氣乘脾而泄。脈弦而逆。宜

調氣。飧泄者。春傷于風。肝旺受病而傳于脾。至季夏土而泄。宜瀉肝補土。

驚泄者。因心受驚。驚則氣亂。心氣不通。水入穀道而泄。心脈散大者。是宜調心

利水。病亟氣敗而泄者。素問云。門戶不要也。

厥逆憂悶。困瀉不止。四肢冷。困軟不能轉側。下泄不知。脈亡陽喘者死。

十八 自汗頭汗

山。溼能自汗。熱能自汗。虛則盜汗。痰亦有汗頭汗。
山。陰陽俱虛。身體枯燥。頭汗亡津液也。熱入血室頭汗。
傷溼額上汗。因下之微喘者死。胃熱上熏頭汗發黃。頭汗小便不利而渴。此
瘀血在裏也。心下懊憹頭汗。

十九淋

附小便不禁腎藏風

脈細而數。脈盛大而實者生。虛小而濇者死。尺中盛大。此陰血不足。陽乘
之為關。

山。膀胱有熱則淋。然赤濇淋濇如脂膏。如砂石。皆內熱也。如水煎鹽而成也。
氣不利則不通。經曰。小便為氣所化。氣不化則臍腹滿不利悶而為淋。
石法。淋者。解熱利小便。閉者。行氣則水自下。有氣虛則氣不行。血虛則氣不升。
痰多氣塞。則氣不運。治法。氣虛補氣。血虛補血。痰多導痰。先服本藥。後皆用吐
之以提其氣。氣升則水自下。加以五苓散。有人患淋。乃血滯。故四物湯內加杜
牛膝而愈。死血亦淋也。

李論皆邪在肺。而無資其化源。邪熱在腎。而閉其下焦。可除其熱。瀉其塞當已。治熱在上焦。以梔子。黃芩主之。熱在中焦。加以連芩。熱在下焦。加之以柏。

資腎丸 治小便閉不渴。熱在下焦血分也。

知母酒製 黃柏各二兩 肉桂一錢

清肺飲子 治渴小便不利。熱在上焦氣分。

茯苓二錢 猪苓三錢 澤瀉五錢 琥珀五分 燈心一錢

木通七錢 通草二錢 車前子一錢 扁豆七錢 瞿麥五分

導氣除溼湯 治小便閉。乃血滯致氣不通。或淋者。即有死血。

知母三錢 黃柏四錢 滑石二錢 澤瀉 茯苓各三錢

空心服。

牛膝膏 治前方證大妙。

腎疸湯 治目黃漸至身。小便赤滯。

升麻半兩 羌活 防風 藁本 獨活

柴胡各五 白朮 蒼朮一錢 猪苓四錢 茯苓二錢

黃柏二錢 澤瀉三錢 白芍五分 神麴六錢 人參三錢

甘草三錢 作二服

秘方 淋熱則利之。山梔之類。氣虛補之。參朮加木通、山梔之類。

小便不通。氣虛。參朮升麻湯。後吐之。血虛。四物湯。後吐之。痰氣閉塞。二陳湯。加木通、香附。後吐之。

又方 治淋 麥門冬 葱頭帶根 人參 三白根

黑豆 濃煎飲之

淋方 五淋散 牛膝根 葵子 滑石 瞿麥

冷加附熱加芩。血加梔子。膏加秋石。加石韋。氣小腹滿閉。加沉香、木香。

髮灰散 治飲食忍小便。走馬房勞。皆致轉胞。臍下急滿不通。酢服一

合。或加葵子、甘遂。加大蒜搗餅安臍心。令實。著艾灸三十壯。治小便不通。

小便不禁。膀胱不約。為遺溺。

因。歸之。腎冷。用韭子丸。炒六兩。佐以鹿茸。

肉蓯蓉 牛膝 巴戟 兔絲 石斛

杜仲

肉桂

當歸

地黃等藥。

阿膠散

治溼。

阿膠

炒二兩

牡蠣

煨

鹿茸

酥炙

煎散任下。

茯苓丸

治心腎虛淋瀝。

赤白茯苓各二兩

地黃汁

好酒熬膏

丸鹽酒下。

證。大小便閉者。外有骨熱不同。

關格者。外有肝實熱。心實熱。

便利不禁者。外

有風溼肝痺不同。腎臟風乃溼。

治。陰莖痒痛不忍。苦參、大黃、荆芥、皂角洗薰。

陰胞痒

蟲蝕方

狗脊

不用金

黃連、黃柏、黃丹、水銀粉、光粉、赤石脂、

為末傅好。

又方 大甘草湯浸。海螵蛸末傅。

二十頭目痛

附腦痛
眉骨痛

脈。寸脈緊急或短。皆曰頭痛。

又浮而滑為風痰。主頭目痛。脈反短濇者死。

又

卒然無所見者死。

腦痛脈緩大者死。

太陽頭痛。脈浮緊惡風寒。

少陽頭

痛。脈弦細有寒熱。陽明頭痛。脈浮緩長自汗。太陰頭痛。脈沉緩必有痰。
厥陰頭痛。脈浮緩為冷厥。少陰頭痛。脈沉細為寒厥。左屬風。右屬痰。
因。有風有痰者。多風痰結滯。痛甚者。火多。火曰炎上。血虛頭痛者。亦多血不
上榮。諸經氣滯亦頭痛。乃經氣聚而不行也。
證治。太陽頭痛兼項痛。足太陽所過攢竹痛也。惡風寒。羌活、川芎主之。陽明頭
痛。自汗發熱。石膏、白芷、葛根、升麻主之。少陽頭痛。額角上偏痛。往來寒熱。柴
芩主之。太陰頭痛。有溼痰實體重腹痛。半夏、南星、蒼朮主之。少陰頭痛。主
三陰三陽經不流行而足寒逆為寒厥。細辛主之。厥陰頭痛頂痛。血不及。或
痰吐涎沫厥冷。吳茱萸主之。氣虛頭痛。黃耆主之。病則耳鳴九竅不和。參耆
主之。血虛頭痛。芎歸主之。傷寒頭痛。從傷寒法治之。太陽證。麻黃湯、桂枝湯。
陽明。脈洪。白虎。少陽。柴胡。太陰。脈浮。則桂枝。脈沉。則理中。少陰。麻黃加辛。附子。
厥陰。桂枝麻黃各半湯。痰厥頭痛。吐之。火作痛。清之散之。傷暑亦同。
濕熱頭痛。證則心內煩。外有脚氣。亦能頭痛。其狀吐逆寒熱便溲不通。有
穀疸亦頭痛。

半夏白朮天麻湯 治痰厥頭痛。

天麻五分 木香一錢 半夏七錢 黃耆五分 蒼朮

陳皮各五分 人參 澤瀉錢各一 神麴炒一錢 乾薑

黃柏二錢 茯苓五分

清空膏 治風濕熱及諸般頭痛。惟血虛不治。

羌活 黃連酒製 防風錢各一 柴胡七錢 川芎五錢

甘草半錢 黃芩三錢 白湯調下 顛頂痛。加蔓荊子、藁本。

芎歸湯 治血虛。自魚尾上攻。

茶調散 吐頭痛有痰。

家珍方 治偏頭痛連睛痛。

石膏 黍粘子炒 爲末。酒下。

玉壺丸 治風濕頭痛。亦治痰患。

雄黃 白朮 南星 半夏 天麻

香芎散 治一功頭風。

香附二兩炒 川芎 甘草一兩炙 石膏五錢 細辛

防風 草烏 川烏 白芷 荊芥

羌活 煎

諸頭痛有六證。

傷風頭痛。或半邊偏痛。皆因冷風所吹。遇風冷則發。脈寸浮者是也。

食積。因胃中有陰冷。宿食不化。上衝頭痛。右手脈浮緊甚者是也。

氣虛。因下部氣虛上攻。溫溫而痛者。異乎邪毒所攻。無邪。脈尺虛浮是也。

傷寒在太陽經。其痛如破。關前脈數是也。緊數是也。陽明經胃熱上攻。右關洪

大而數是也。

膈上有風涎冷痰。而或嘔吐。脈弦細出于寸口是也。陰毒傷寒。身不熱。脈沉細

目痛。皆血有太過不及。皆能為痛。太過則目壅塞而發痛。不及則無血養而枯

痛。目之銳眦少陽經也。血少氣多。目之上綱皆太陽經也。血多氣少。目之下綱

陽明經也。血氣俱多。唯足厥陰連于目系而已。血太過者。血得太熱而溢于上。

所以作痛。治法血實者決之。虛者補之。宜以辛散之。涼以清之。汗之吐之。

腦痛。乃風熱乘虛而入於腦。以辛涼之藥散之行之。眉骨痛乃風痰。

羌活湯 治風熱壅盛上攻頭目眩昏疼痛及腦疼。

羌活 防風 黃芩酒一兩 黃連酒一兩 柴胡七錢

黃柏酒炒 瓜蒌根酒製 甘草 茯苓各半 澤瀉三錢

羌附湯 治冬大寒犯腦痛。齒亦痛。名曰腦風。

麻黃 黑附 升麻 防風 白僵蠶

黃柏三錢 羌活 蒼朮各五 甘草 白芷

黃耆一錢 作一服。

眉骨痛方 羌活 防風 甘草 黃芩酒炒

白朮 半夏 南星 細辛

又方 加烏頭、草烏。童便炒去毒為君。

藿香散 治腦風頭痛。 霍香 川芎 天麻

蔓荊子 槐花 白芷 酒調下。

吹搐方 治同上。 穀精草 銅綠各二 硝石一錢

研吹鼻中。

細辛

瓜蒂

良薑各一錢

硝五錢

含水滿口以藥搐鼻。

荊芥

薄荷

木賊

殭蠶

蝎梢

茶清下二錢。

風成寒中則泣出。

風氣與陽明入胃。循脈而上至目內眥。人瘦則外泄而泣。

宜辛溫。

風成熱則目黃。

風氣與陽明入胃。循脈而上至目內眥。人肥不得外泄。故熱

鬱也。

二十一眩運

因痰飲隨氣上伏。留于陽經。遇火則動。

去血過多。亦使眩運。頭眩亦然。兼挾氣

虛。

證。外因者。風在三陽經。頭重項強有汗。寒則掣痛。暑則熱悶。濕則重着。皆令吐逆。暈倒。

內因者。因七情。致藏氣不行。鬱而生涎結爲飲。隨氣上厥。伏留陽經。嘔吐眉目疼痛。眼不得開。

因房勞飢飽。去血過多者。眼花屋倒。起則暈倒。治。散風行濕湯。治痰火暈眩。二陳湯。

蒼朮 黃芩 羌活

瓜蒂散 治暈眩痰厥。

芎歸湯 治血虛眩暈。

參朮湯 治挾氣虛頭痛。補氣降火爲主。

人參 白朮 黃芩 黃連

一十二心腹痛

脈。陽微陰弦。胸痺而痛。責在極虛。短而數。心痛心煩。心腹痛不得息。脈細小遲者生。堅大實者死。若腹痛。脈反浮大而長者死。跌陽脈滑而緊。滑者穀氣強。胃氣實。緊者陰氣勝。故痛。病腹痛而喘。脈滑而利。數而緊者實也。心痛

有熱厥、寒厥、大實。

因勞役太甚。飲食失節。中氣不足。或寒邪乘虛而入客之。或久不散鬱而生熱。或素有熱。虛熱相搏。結鬱于胃脘而痛。或有實積痰飲。或氣與食相鬱不散。停結胃口而痛。

證治。胃病者。腹臌脹。胃脘當心而痛。上支兩脇。膈咽不通。食飲不下。

脾病者。食則嘔吐。腹脹喜噫。胃脘痛。心下急。

熱厥心痛。身熱足痛。四肢寒。甚則煩躁而吐。額自汗。脈洪可汗。刺太谿、崑崙。

寒厥心疼。手足逆。通身冷汗。便利溺清不渴。氣脈微弱可溫。

大實心痛。卒然而發。大便或秘。久而注悶。心胸高起。按之痛。不能飲食。可下。

腎心痛。與背相接。癰如從後絞觸其心。偃僂。刺束骨、合骨、崑崙。胃心痛。腹脹

胸滿。刺太都、太白。脾心痛。如錐刺。刺然谷、太谿。肝心痛。狀如死。終日不得

休息。取行間、太衝。肺心痛。臥若徒居。心痛間動作益盛。刺魚際、太淵。

厥心痛。乃寒邪客于心包絡也。宜以良薑、菖蒲、大辛熱之藥。

蓋諸心痛。皆少陰厥氣上衝也。刺之宜通氣行氣。無所凝停也。

腹痛

因。有客寒阻之不行。有熱內生鬱而不散。有死血食積溼痰結滯。妨礙升降。故痛。蓋痛當分其部分。從其高下而治之。治中脘痛太陰也。理中草豆蔻主之。小腹痛厥陰也。正陽回陽四逆湯主之。

雜證而痛苦練湯酒煮當歸九丁香練實丸等主之。

腹中不和而痛者。以甘草芍藥湯主之。

傷寒誤下傳太陰經。腹滿而痛。桂枝芍藥主之。痛甚桂枝大黃湯主之。夏月

肌熱惡熱。脈洪實而痛。黃芩芍藥主之。諸蟲痛者。如腹痛腫聚往來。無有休

息。涎出。嘔吐清水。痰積腹痛隱隱然。得熱湯辛物則暫止。宜導痰解鬱氣。溫

散之。中氣虛亦痛。或飢而痛是也。理中湯主之。胸痺皆痰水宿飲停留不

散。宜瓜蒌枳實香附芎蒼朮溫散之。

外有似類而痛異名。心痛。有心中寒。有心熱。有心虛。有脾積。有宿食留飲。

有胸痞。有胸痛。有積實。小腹痛。有肝脾。有胞痛。有筋

虛。有疝。有腸癰。

金鈴子散 治熱厥心痛。或作或止。久不愈。

金鈴子

玄胡各一兩

熱加黃連。疝氣加荔枝核。酒下三錢。

煮雄丸 治大實心痛。痙瘕如神。

雄黃

另研一兩

巴豆五錢

生用去油爛研。却入雄黃末。白麵二兩。

右再研勻。水丸。梧桐子大。每服時先煎漿水令沸。下藥二十四粒。煮三十沸。撈入冷漿水沉水冷。一時下一丸。二十四時也。加至微利爲度。用浸藥水下。

朮附湯

治寒厥心暴痛。脈微氣弱。

附子

去一兩兩白朮

朮四兩

甘草二兩

薑棗煎服。

朮香散 治心脾卒痛不忍。

木香

蓬朮

各一兩

乾漆

烟一錢炒

酢湯下一錢。

燥飯丸

治飲水吞酸作痛。

墻上蜆壳丸。

秘丹 治心痛久則成鬱。鬱久必生火。

川芎

梔子炒

蒼朮

香附

石碱

乾薑炒

反治之法。

有人飽過患此。以火毒治。遂以黃連六錢。甘草一兩。一服而安矣。有心痛十八年。因酒牛乳。痛時以一物拄之。脈三至。弦弱而濇。吞酸。七月內以

二陳湯。朮。芩。連。桃。郁李仁。澤瀉。

祕丹 治死血留于胃口作痛。

承氣湯 梔子 韭汁 桔梗能開血氣

麻黃重者須此發之

蟲痛方 治面上白斑唇紅。能食者是。苦練根 錫灰

胃脘當心痛。有垢積者。斑貓 烏梅肉 丸如菉豆大。泔

下一丸。皂樹上葦炮湯。有肥珠起。飲之。微泄見效。未已又服。無不驗。

草豆蔻丸 治脾胃傷損客寒一切虛證。心腹大痛。

理中建中湯 治寒腹痛。

調胃承氣加木香枳榔湯 治熱腹痛。

大承氣加方 治有人雨後得涼腹痛甚。問之。于夏月投淵取魚。脈沉弦而細實。重按則如循刀上。本方加桂枝二帖。又加桂桃仁二帖。又加附

二帖。下黑血。

二陳芎蒼丸 治清痰腹痛。脈滑者是。

二陳湯 台 芎 蒼 朮 香 附 白 芷 薑 汁

一十二腰疼痛附腰膝腫痛腰軟

脈。尺脈鼈常熱。謂之熱中。腰膝痛。脈大者腎虛。脈濇者瘀血。

因腎虛而致。有溼熱。有瘀血。有外感。

腎虛皆起于內。蓋失志傷腎。鬱怒傷肝。憂思傷脾。皆致腰痛。故使氣結不行。血停不禁。遂成虛損。血氣去之。又有房勞過者多矣。

濕熱亦因腎虛而生焉。腎者水也。氣不利而成溼熱者。因腎水涸。相火熾。無所榮制。故溼熱相搏而成痛。亦有虛勞。外感溼氣。內熱不行。而成黨錮。瘀血因用力過多。墮墜折納。瘀血不行。

外感因虛襲之。

外有腎風。腎熱。腎瘧。厥陰瘧。皆腰痛。

證。失志者虛。云不足。面黑。遠行久立不能住。

鬱怒者。腹急脇脹。目視眈眈。所祈不能。意浮于外。

憂思者。肌肉濡漬。痺而不仁。飲食不化。腸胃脹滿。

房勞者。精血不足。無所榮養。經曰。轉搖不得。腎將憊矣。各骨痿。

溼熱者。四肢緩。足寒逆。腰冷如冰。冷汗精滑。肩痛。外感如太陽腰痛。引項尻

重。陽明腰痛。不可以顧。善悲。少陽如刺其皮。不可俛仰。太陰煩熱。如有橫木居

中。遺溺。少陰引脊內。厥陰如張弓弦。大抵太陽少陰多中寒。陽明太陰多燥濕。

少陽厥陰多風熱。

治。

羌活湯 治腰痛。

羌活

獨活

柴胡

防風 肉桂

當歸

如臥寒濕地。足太陽少陰血絡中

有凝血。加歸尾。蒼朮。桃仁。防己。

如濕熱痛。加黃柏。蒼朮。杜仲。川芎。如虛加

杜仲。五味。藁歸。知母。龜板。如墜撲瘀血。加桃仁。麝香。蘇木。水蛭。

腎氣丸。茴香丸。鹿茸丸。

此三方補陽之不足也。勞傷房室之人有之。

六味地黃丸。封髓丹。

此二方補陰之不足也。膏粱之人有之。

煨腎丸。治腰痛虛。
杜仲三錢炒

右一味末之。以猪腎一枚。薄批五七片。以鹽椒淹去腥水。糝藥在內。包以荷葉。用溼紙數重煨熟。酒下。

立効散。玄胡索。當歸。肉桂等分。為末酒下。

挫氣丹。治挫氣腰痛。
山查子四兩核。北茴香炒一兩

腰胯重痛

因風寒溼流注經絡。結凝骨節。氣血不和而痛。痰積趁逐經絡流注搏于血內

亦然。

治宜流溼散風寒。逐痰積。氣血自然湍流也。

除溼丹。檳榔。甘遂。赤芍藥。威靈仙

澤瀉。葶藶各二兩。乳香研。沒藥各一兩。大戟三錢炒

陳皮四兩。麵糊丸。加牽牛末丸。

禹功散。治同。

腰軟

因。腎肝伏熱。

治。宜黃柏、防己。

論餘。解休證。少氣不欲言。寒不寒。熱不熱。壯不壯。停不停。乃精氣虛而腎邪實矣。治以澤、茯、流、腎、實、地、黃、牛、膝、麥、門、冬。補精氣。

一二十四肩背痛

附腰髀痛

脈。洪大。洪為熱。大為風。

脈促上擊者。肩背痛。

脈沉而滑者。背脊痛。

因風溼乘肺。手太陰經脈氣鬱甚不行也。

證。病則頰頰腫。頸肩臑肘臂外後廉痛。汗出。小便數而欠者。皆風熱乘肺也。

便遺溺者。皆肺金虛也。

小

治。宜通經益元氣散風瀉火之藥。

通氣散

治風熱乘肺。肩背痛。

防風

藁本

獨活

羌活

活經以上通

黃芩

黃連

以上降火

人參

黃耆

耆則加之二味虛

腰髀痛

因小腸經氣。小腸心痛及臍。外有肺風。肺寒骨虛而致。

一二十五脅痛附身體痛

脈。雙弦。是兩手俱弦也。

因肝木氣實火盛。或因怒氣大逆。肝氣鬱甚。謀慮不決。風中于肝。皆使木氣大實。生火。火盛則肝急。瘀血惡血停留於肝。歸于脇下而痛。病則自汗痛甚。按之益甚。

證。痰積流注厥陰。亦使脇下痛。病則咳嗽。

外有肝中風。左脇偏痛。肝中寒。脇下攣急。飲水脇下鳴相逐。皆致脇痛。須詳之。辨非血枯證。胸脇支滿。絡氣不行。妨于食。肝脾傷。病至先聞腥臊臭。出清液。肺葉傷也。四肢清目眩。復後血。此年少脫血。或醉行房。肝傷氣竭致之故也。證治。木火盛。宜以辛散之。以苦瀉之。當歸龍薈丸。瀉青丸主之。死血宜以破血為主。潤血為佐。復元活血。當歸導痰等主之。痰積宜以去痰行氣。二陳湯加

南星、青皮、香附、青黛等主之。

龍會丸 治食積發熱、木盛脇痛。

青皮

黃連

大黃

柴胡

甘草

草龍膽

蘆薈

川芎

治水氣實加之。

治血湯

治死血。

左金丸

治肝火。

黃連六兩

茺莢一兩

導痰湯

治痰注諸痰、皆生于熱。

台芎二兩

香附八兩

陳皮

蘇葉

乾薑一兩

貼痛

芥菜子

研水

茺莢

黃上酢研

熨痛

酢炒灰熱布裏熨之。

蔥艾炒亦可。

韭汁亦可。

身體痛

脈證。傷寒太陽經表證。六脈俱緊。

陰毒傷寒。身如被打。脈沉緊。

傷寒發汗後。

身體痛。氣血未和。脈弦遲。

傷溼。溼流關節。一身盡痛。

風溼相搏。肢體重痛。

不可轉側。脈緩。

虛勞之人。氣血虛損。脈弦小。

一二十六逆痰嗽

脈。出魚際。逆氣喘息。脈弦為欬。欬而浮者。四十日已。咳而弦者。相其人強吐之而愈。欬而脈虛必苦冒。欬而沉者。不可發汗。喘欬上氣。脈數有熱。不得臥者死。上氣面浮腫肩息。其脈浮大者死。久咳數歲。脈弱者生。實大者死。上氣喘息低昂。脈滑手足溫者生。脈濇四肢寒者死。欬脫形發熱。小堅急者死。肌瘦下脫。熱不去者死。欬嗽脈沉緊者死。浮直者生。浮軟者生。小沉伏者死。咳而嘔。腹脹且洩。脈弦急欲絕者死。咳嗽羸瘦。脈形堅大者死。暴咳脈散者死。浮為風。緊為寒。數為熱。細為溼。此生于外邪之所搏。浮緊則虛寒。沉數則實熱。弦濇則少血。洪滑則多痰。此生于內氣之所鬱。因證。因風寒火滿。附腹勞痰。

風寒為病主乎肺。以肺主皮毛而司于外。傷之腠理不疎。風寒內鬱于肺。清肅之氣不利。而生痰動嗽。又寒飲食入胃。從脾脈上至于肺。則肺寒。肺寒則內外合邪。因之而欬。火之嗽病。因火盛生痰。鑠肺金也。遂成鬱遏脹滿。甚則乾嗽無

痰。或唾血痰勞而欬嗽。皆好色腎虛。則子能令母虛。氣血俱虛。陰虛則生火。肺金耗敗。而津液氣血皆化爲痰矣。痰者。礙清氣升降。滯氣而不行。遂成諸欬嗽之證。

論欬逆痰嗽分爲二。咳者。謂無痰而有聲。肺氣傷而不清而上逆。皆關于肺也。嗽者。謂有痰而無聲。脾溼動而爲痰而成嗽。皆積于脾也。蓋因傷于肺氣。動于脾溼。咳而爲嗽也。若脾無留溼。雖傷肺氣而不爲痰也。然寒暑燥溼風火。皆令人欬。唯溼痰飲食入胃。留之而不行。上入于肺。則爲咳嗽也。假令溼在心經。謂之熱痰。溼在肝經。謂之風痰。溼在肺經。謂之氣痰。濕在腎經。謂之寒痰。三因論欬者。衛氣之失。嗽者。營血之失。外傷六氣。隨風寒暑溼燥火。感其部位而察其元以表之。內傷七情。皆聚于胃而關于肺。多痰嗽也。衛氣之失。則多痰逆。營氣之失。則多痰嗽也。

張論以貧富言之。貧者謂之咳嗽外感之由也。內經曰。秋傷乎溼。冬必咳嗽是也。又曰。歲火太過。肺金受病。民病欬嗽是也。富貴者謂之涎嗽。多飲食厚味熱痰所成也。

李論皆脾弱受病。肺金受邪。飲食不化精微。留積而成痰。肺氣不利。而痰衝清道而成欬。

劉論皆脾濕入于肺而成痰。傷風而成欬。

痰嗽潮熱四證。

有痰嗽者。潮熱大體雖同。動作有異。或因虛中寒冷。則先痰嗽。嗽久而不已。血形如線。隨痰而出。惡寒發熱。右寸浮而數。外證日輕夜重。面白痰清。

因憂愁大怒。則吐血而後痰嗽。少寒多熱。左寸沉小而數。外證心下噎塞。情思不樂。飲食不下。

或蠱注相傳。死魂相逐。則先嘔血。不知來處。微有痰嗽。漸成寒熱。兩手脈弦細而數。外證飲食不為肌膚。頰紅變動不常。身體酸痛倦。及嗽損咽痛多痰。或喘或瀉則死。

先因傷溼傷寒。解利不盡。雖病退人起。飲食減少。不生肌肉。身倦無力。勞力則熱。身體酸痛。狀如勞狀。但不吐血。不發潮熱。經二三年醫無驗。此是餘毒伏在經絡。其脈弦也。再發則愈。

三因論狀。傷風欬者。憎寒壯熱。自汗惡風。口乾煩躁。傷寒欬者。憎寒發熱。無汗惡寒。不乾煩躁。傷暑欬者。煩熱引飲。口燥或吐沫。聲嘶咯血。傷溼欬者。骨節煩痛。四肢重著。洒洒淅淅。喜傷心。欬而喉中介介如腫狀。甚則咽腫喉痺。自汗咽乾咯血。此勞傷心。小腸受之。欬與氣俱失。怒傷肝。欬而兩脇下痛。不可轉側。則兩脇下滿。左脇偏疼。引少腹。此怒傷肝。膽受之。咳嘔膽汁。思傷脾。欬而右脇下痛。隱隱引肩背。甚則不可動。腹脹心痛。不欲食。此飢飽之傷胃。受之。欬而嘔。嘔則長蟲出。憂傷肺。咳而喘息有聲。甚則吐血。吐白沫涎。口燥聲嘶。叫呼傷肺。大腸受之。咳而遺矢。恐傷腎。咳而腰背相引痛甚。則嗔咳涎。寒熱引腰背。或喘滿。房勞傷腎。膀胱受之。咳而遺溺。久欬不已。三焦受之。咳而腹滿不飲食。而腹滿不飲食。咳嗽喘逆。氣短氣。分別不同。咳者。無痰有聲。喉中如痒。習習如梗。甚者。續續不止。連連不已。衝膈擊胸。外有心欬。一切血證。肺欬上逆。嗽者。有痰。外有勞瘵。喘促。嗽血。肺痿。肺癰。喘者。促促而氣急。喝喝而息數。張口擡肩。搖身攘肚。外有脚氣。

逆氣者。但脚氣上而奔急。外有肺中風。肺中暑。肺熱。肺寒。肺水。肺痺。肝熱。膽寒。心熱。腸痺。痰水。

短氣者。呼吸難。數而不能相續。似喘而不搖肩。似呻吟而無痛。外有脾中風。脾中寒。肺熱。腎虛。歷節風。憂氣。胸痞。痰飲。

治。咳嗽謂無痰而有聲。素問云。欬乃皮毛先受邪氣。以從其合。其寒飲食入胃。從

脾脈上至肺。肺寒則內外合邪。因有欬證。

肺咳。麻黃湯。大腸遺矢。赤石脂禹餘糧湯。桃仁湯。

脾咳。升麻湯。胃吐蟲出。烏梅湯。

心欬。桂枝湯。小腸氣失。芍藥甘草湯。

肝欬。小柴胡湯。膽嘔苦汁。黃芩半夏湯。

胃虛。麻黃細辛附子湯。膀胱遺溺。茯苓甘草湯。

久咳不已。三焦受之。其狀咳腹滿。不欲飲食。此皆聚於胃。關於肺。令人多涕唾。

而面浮腫。氣逆也。異功白朮散。

逆。逆謂氣上逆。肺壅而不下。上氣逆者。皂莢丸。火逆上氣。麥門冬湯。上

氣脈浮者。麻黃厚朴湯。上氣脈沉者。澤漆湯。澤漆五 桑白皮六

射干附子黃芩 白朮 茯苓四 竹茹治氣上逆

為熱所作。

治法。無痰而有聲者。以辛潤其肺。青皮以散三焦之氣壅。有痰而嗽者。治痰

為先。下氣為上。痰而能食者。下之。不能食者。厚朴湯治之。痰而熱者。柴胡

湯加石膏主之。痰而寒者。小青龍加杏仁主之。

張之治痰。以通聖散加半夏。暑嗽以白虎涼膈。火嗽以黃連解毒。溼嗽以五苓

白朮。燥嗽以木香葶藶散。寒嗽以寧神寧肺散。為上也。更分以吐汗下為佳。

方 南星 半夏 枳殼 陳皮 風痰脈弦加

通聖。熱痰脈滑。小柴胡。洪加青黛。連氣痰脈瀋。加青陳皮。溼痰脈緩。加朮。防己。

寒痰脈沉。加桂杏。小青龍。發熱加芩桔。痞加枳實。重加茯苓。氣上逆加葶藶。氣

促加參桔。浮腫加郁李仁杏仁。澤瀉。茯苓。上熱喘涌加寒水石石膏。大便秘加

大黃。能食加大承氣。不能食加朴。

利膈丸 治胸中不利。痰嗽喘促。

木香 檳榔半一錢 枳實炒一兩 厚朴三兩 大黃酒製一兩

人參 當歸錢各三

紫蘇飲子 治脾肺受寒痰涎嗽。

紫蘇子 桑白皮 青皮 陳皮 杏仁

麻黃 炙甘草 五味子 半夏 人參

干縉湯 治痰妙。半夏一兩 大皂角半兩去皮子 雄黃加之痰大治

右同入絹袋中水三升薑八片煎至半以手操洗之取清汁服。

大熱大飲凝于胸中而成溼故痰作矣宜吐之。

二陳湯加麻黃杏仁湯 治風寒行痰開腠理。

本方加麻黃杏仁桔梗。

降火導痰湯 治火 黃芩 黃連 瓜蒌 海石

勞嗽丹 四物 竹瀝 薑汁

斂肺丹 治肺脹及火鬱 訶子 杏仁 青黛

瓜蒌 半夏 香附

積痰方 南星 半夏 青黛 瓜 薑 石 碱

如肝痛疎肝氣加青皮。上半日咳多屬胃火加貝母石膏。下半日嗽多屬陰虛加知母栢川芎歸虛甚好色者加參膏青陳皮薑。

酒病嗽 白礬一兩 杏 仁一升

右水一升煎乾攤新瓦上露一宿砂礪內炒乾每夜飯後細嚼杏子十五個。

刮嗽方 五味半兩 甘草二錢 五倍子 風化硝錢各一

爲末乾嚙化。

鵝管法 治風入肺管。南星 雄黃 款冬花 鵝石

右爲末入艾中放薑片上置舌上灸吸烟入喉以多爲妙。

痰方 若或痰白作泡當于肺中瀉水。

滑石 川貝母 半夏 風化硝 白芥子

陳皮 茯苓 皂角風加 蒼朮溼加 瓜 薑潤加

枳實結加 青黛 黃芩熱加

青礞石丸 化痰。麝香丸 治痰。

勞嗽方	四君子	百合	款冬花	細辛
肉桂	五味子	阿膠	半夏	天門冬
杏子	白芍	甘草	煎食	

三因論因怒而傷者甘草。憂而傷者枳殼。喜而傷者五味。悲而傷者人參。

一二十七喘附哮喘

脈證。實喘氣實肺盛。呼吸不利。肺竅壅滯。右寸脈沉實者是。宜瀉肺。虛喘由腎虛呼吸氣短。兩脇脹滿。左尺脈大而虛者是。宜補腎。邪喘由肺感寒邪。伏于肺經。關竅不通。呼吸不利。右寸脈沉而緊。亦有六部俱伏者。宜發散。則身熱而喘定。三因狀虛實。肺實者。肺必脹。上氣喘逆。咽中塞如嘔狀。自汗。肺虛者。必咽乾無津。少氣不足以息也。因。氣虛入于肺。陰虛火起衝上。有痰。有水氣乘肺。

治。喘年深時作時止。雄猪肚一個。治如食法。入杏仁四五兩。綫縫。酢三碗煮乾。取出。先食肚。次以杏仁新瓦焙撚去皮。旋食永不發。

氣虛方 治氣虛。人參 黃柏 蜜炙 麥冬 地骨皮

血虛方 治陰虛有痰。四物 黃連 枳殼 半夏

導痰干縉湯 半夏 南星 陳皮 茯苓

皂角 枳實

刮藥方 治喘不止。甚不可用苦寒藥。可溫刮之。

椒目二錢 爲末。薑湯下。萊菔子蒸 皂角性燒存 薑汁丸噉。

大黃煨 牽牛各二兩炒

各爲末。蜜水下二錢。治熱痰暴喘欲死。

瀉白散 治陰氣在下。陽氣在上。咳喘嘔逆。

桑白皮一兩 青皮 五味 甘草 茯苓

人參 杏仁 半夏 桔梗 上二味。痰涎

嘔逆加之。

地骨皮七錢 薑煎。

神祕湯 治水氣逆行乘肺。肺得水而浮。使氣不通流。脈沉大。此人不得臥。臥則喘者是。

紫蘇 陳皮 桑白皮 生薑 人參各五錢

木香 茯苓二錢

哮喘

因哮喘主于內痰。宜吐之。

哮喘積丹 雞子略敲不損膜。浸尿缸內四五日夜。吃之有效。蓋雞子能去風痰。蘿蔔子丸薑湯送下妙。

服因證治卷二 二十七喘

脈因證治

元 金華 朱丹溪震亨撰著

鄞縣 曹赤電炳章圈點

卷二

一二十八宿食留飲附痰

脈。寸口脈浮大。按之反澀。尺中亦微而澀。故有食痰。寸口脈緊如轉索。左右無常者。有宿食。脈滑而數者。實也。有宿食當下之。脈浮而滑者。宿食下利不欲食者。宿食。脈沉病若傷寒者。宿食留飲宜下之。脈短疾而滑者。酒病。脈浮細而滑者。傷飲。因飲食自倍。腸胃乃傷。復加之則胃化遲難。故宿食留飲。飲水也。無形之氣也。因而大飲則氣逆。形寒飲冷則傷肺。病則為咳滿水泄。重而為蓄積。食者物也。有形之血也。因而食飽。筋脈橫解。腸澼為重。或嘔或吐或下利。

證治。千金云。胃中有癖。食冷物則痛。不能食。有熱物則欲食。大腹有宿食。即寒凜發熱如瘧狀。小腹有宿食。當暮發熱。明旦復止。

三因云。有飲在中脘則嘈。有宿食則吞酸。

李論戊己火衰。不能制物。食則不消。傷其太陰。填塞悶亂。兀兀欲吐。甚則心胃大痛。犯其血也。治宜分寒熱輕重。如初得上部有脈。下部無脈。其人當吐。不吐即死。宜瓜蒂散。輕則內消。縮砂炒麴等是也。重則除下。承氣湯是也。寒則溫之。半夏乾薑三稜莪朮是也。熱則寒之。大黃黃連枳實麥芽是也。飲則下行。或大飲而氣逆。或寒冷而傷肺。病則喘咳痰涎水腫。輕則宜取汗利小便。使上下分消其溼。解醒湯五苓散半夏朮枳殼之類是也。重則為蓄積為滿者。三花神祐是也。

張論飲食不消。分貧富而治之。富者乃膏粱太過。以致中脘停留。脹閉痞膈。酢心宜木香導飲丸主之。貧者乃動作過勞。飲食粗酒食傷之。以致身腹滿悶。時吐酸水。宜進食丸主之。又有重者。病證同太陰傷寒。止脈沉。可與導飲丸治之。

又論留飲蓄水而已。雖有四有五之說。止一證也。夫鬱憤而不伸。則肝氣乘脾之氣而不流。亦為留飲。肝主慮。久不決。則氣不行。脾主思。久則脾結。亦為留飲。因飲水脾胃失衰。不能布散。亦為留飲。飲酒過多。胞經不及滲洩。亦為留飲。渴飲冷水。乘快過多。逸而不動。亦為留飲。夫水者。陰物也。但積水則生溼。停酒則滿燥。久而成痰。左脇同肥氣。右脇同息貫。上入肺則嗽。下入大腸則瀉。入腎則涌。在太陽為支飲。皆內氣逆得之。故溼在上者。目黃面浮。在下者。股膝腫滿。在中者。支飲痞膈痰逆。在陽不去。久而滯氣。在陰不去。久而成形。宜治以導水禹功。調以五苓葶藶椒目。逐水為全矣。

有傷西瓜冷水羊乳寒溼之物宜

白朮二錢

川烏五分

防風一錢

丁香一枚

甘草一錢

傷羊肉麵溼熱之物宜

白朮

黃芩

黃連各七錢

大黃二錢

甘草五分

如心下痞枳實。

腹痛白芍藥一錢

腹脹厚樸。

胸中不利枳殼。

胸中寒陳皮。

渴者白茯苓。

腹中窄蒼朮。體肢沉重蒼朮。

大抵傷冷物。以巴豆爲君。傷熱物。以大黃爲君。

檳榔丸 治傷之輕者。飲食不化。心腹鼓脹。出劉。

檳榔二錢 陳皮八錢 牽牛頭末四錢

酢糊丸。梧子大。薑湯下二十丸。

雄黃丸 治傷之重。脇肋虛脹者。

雄黃另研巴豆五錢生油丸服。法同心痛。

瓜蒂散 主吐心胸卒痛悶亂。急以治之。

瓜蒂 赤小豆各三錢

細末之。每服一錢。溫酒下。

枳實丸 治傷食。

枳實半兩白朮一兩麴丸

木香 檳榔 青皮

大黃 黃芩 黃連

此三味氣滯加之。
此三味溼熱加之。

蘿蔔子 黃連 澤瀉 伏瀝痞悶加之。

梔子 病後食傷加之。

半夏 豆粉 溼麵油膩加之。

草豆蔻 稜莪 傷冷硬加之。

乾薑 傷水加之。

縮砂 丁香 心胃痛加之。

人參 傷胃加之。

解醒湯 治傷酒。

白豆蔻 砂仁 生薑 葛花各半 白茯苓

猪苓去皮 陳皮去白 人參 白朮各一兩半 青皮三錢

神麴炒 澤瀉各二錢五分 木香五分 右為末。白湯送下。

秘方 治胃中有物惡食。 二陳湯加 白朮 山查 川芎 蒼朮

神麴炒

神祐丸 治留飲懸飲脈弦。又治脈伏。其人欲自利。難利。心下續堅滿。

此爲留飲欲去故也

茯苓桂朮湯 治心下有痰飲。胸脇支滿。目眩。

茯苓 官桂 白朮 甘草

大青龍湯 治溢飲體痛。當發其汗。

麻黃七錢 官桂 甘草各二錢五分 石膏雞子大 杏仁

半夏溼加

澤瀉湯 治心下有支飲。其人苦冒眩。支飲不得息。加葶藶棗。

樸黃湯 治支飲胸痛。

大黃 厚樸各等分

二陳湯 小半夏湯 治嘔家本渴。今反不渴。心下有支飲故也。治先渴

卻嘔。水停心下。此屬飲。加茯苓。

五苓散 治瘦人臍下有悸者。吐涎沫而顛眩水也。亦治停痰宿水。

破飲丸 治五飲結爲癰瘕。支飲胸滿吐逆。心內隱痛。大能散氣。

葶 撥 胡椒 丁香 宿砂 青皮
烏梅 木香 蝎梢 巴豆去油 以青皮同巴
豆浸漿水一宿。漉出同炒青皮焦去豆。將浸水淹烏梅肉炊一熟飯。研細爲
膏。薑湯送下五七丸。

控涎丹 治患胸背手足頸項腰跨隱痛不忍。連筋骨牽釣痛。坐臥不安。
時走易。

甘遂 大戟 紅牙 白芥子 真

右粉丸。梧子大。白湯送下。

痰飲證狀。或咳或喘。或嘔或泄。眩暈嘈煩。忪悸愼懣。寒熱疼痛。腫滿攣癖。癰閉
痞膈。如風如癩。懸飲者。水飲在脇下。咳唾引痛。溢飲者。飲水流於四股。當
汗不汗。身體疼痛重。支飲者。嘔逆倚息短氣不得臥。其形如腫。痰飲者。其
人素盛今瘦。腸間漉漉有聲。留飲者。背寒如手大。或短氣而渴。四肢歷節疼
痛。脇下痛引缺盆。伏飲者。膈滿咳喘嘔吐。發則寒熱。腰背痛。目淚惡寒。振振
然。懸飲當下。溢飲當汗。支飲隨證汗下之。痰飲宜溫之。從小便去之。

一十九噯氣吞酸嘈雜附氣

因。胃中有火有痰。

三因論酢咽。夫中脘有飲則嘈。有宿食則酸。食後噯酸吞酸者。皆宿食證。俗名治方。食鬱有痰吞酸。

南星 半夏五錢 黃芩一兩 陳皮

燥飲丸 治痰飲心痛。

乾螺殼者 蒼朮 神麴爲丸。

麴朮丸 治吞酸。中脘有飲則嘈。宿食則酸。

宿砂 陳皮 蒼朮 神麴炒 麴丸。薑湯送下。

又方 治酸皆溼熱鬱。

黃連薑汁 蒼朮 茯苓 湯浸餅丸。

吐清水。 蒼朮陳壁 茯苓一錢 滑石煨 白朮五錢

陳皮五分 水煎。

論繫氣

證。夫繫飪之邪。從口入者。宿食也。其病煩痛。畏風憎寒。心腹脹滿。下利不欲食。吞酸噫宿腐氣。或腹脹泄瀉。及四肢浮腫。若胃實熱。食反留滯。其脈滑而數。宜下之愈。

若脾虛。其脈浮大。按之反濇。尺中亦微濇。宜溫消之。

木香丸

木香

硃砂

蓬朮

胡椒

半夏

乾漆

炒令烟盡
各五錢

桂心

宿砂

青皮各三錢

附子

炮去
皮臍

三稜醋炙

乾薑各一兩

右末蜜丸。梧子大。每服五十丸。薑湯下。

感應丸

肉豆蔻

川芎

百草霜各二兩

木香一兩五錢

革澄茄

丁香

三稜各一兩

巴豆百粒
去皮

蟻四兩

杏仁百粒
去皮

右除巴豆外。為末。以下別研。巴豆杏仁和勻。先將油煎蟻溶化。傾出藥末內。

和成劑。入臼內杵千餘下。丸菴豆大。每服三五丸。白湯下。
又外有酢咽。滯氣。思膈。皆同。

二十積聚

脈。來細而附骨乃積。寸口積在胸。關上積在臍傍。尺中積在氣衝。左積左。右積右。脈兩出。積在中央。

浮而毛。按之辟易。脇下氣逆。皆相引痛。名肺積。

浮而芤。上下無常處。胸滿悸。腹中熱。名心積。

弦而細。兩脇下痛。邪走心下。足腫寒。名肝積。

沉而急。苦脊與腰相引痛。飢見飽減。名腎積。

浮大而長。飢減飽見。腹滿泄嘔脰腫。名脾積。

寸口沉而結。趺而緊。積聚有繫痛。脈弦細微者。為癥橫脇下。及腹中有橫積。

脈弦。腹中急痛為瘕。脈細而沉。時直者。身有癰腫。若腹中有伏梁。脈沉

小而實者。胃有積聚。不下食。食則吐。脈沉而緊者。若心下有寒。時痛。有積聚。

關上脈大而尺寸細者。必心腹冷積。遲而滑中寒有癥。脈弦而伏。腹中有癥。不可轉也。死。脈緊強急者生。虛弱者死。沉者死。因。脛寒厥氣。則血脈凝滯。寒氣上入腸胃。所以腹脹。腹脹則腸外之汁沫。迫聚不得散。日以成積。又盛食多飲。起居過度。腸胃之絡傷。則血溢于腸外。腸外有寒汁沫。與血相搏。則氣聚而成積。又外中于寒。內傷于憂怒。氣則上逆。上逆則六腑不通。濕氣不行。凝血蘊裏。津液凝滯。滲着不去而成積。又生于陰。蓋憂思傷心。重寒傷肺。忿怒傷肝。醉以入房。汗出當風。傷脾。用力過度。入房汗出入浴。傷腎。皆臟氣不平。凝血不散。汁沫相搏。蘊結而成積矣。又有食積。酒肉積。水積。涎積。血積。氣積。皆因偏愛停留不散。日久成積塊。在中爲痰飲。在右爲食積。在左爲血積。證。蓋積聚之源則一。其在臟者。始終不移爲積。其在腑者。發痛轉移。隨氣結束爲聚。積者系于臟。聚者系于腑。癥者系于氣。瘕者系于血。

肝之積名肥氣。在左脇下。如覆盆。發咳逆痰瘧。連歲不已。其中有血。肝主血故也。

心之積名伏梁。起臍下。大如臂。上至心下。令人煩心。有大膿血。在于鬲胃之外。肺之積名息貫。在右脇下。大如杯。灑淅寒熱。喘咳肺壅。貫者貫門也。積在肺下有貫門。

脾之積名痞氣。在胃脘。大如盤。四肢不收。黃疸。飲食不爲肌。痞者濕也。食冷其人傷氣。爲濕所蓄。

腎之積名奔豚。發于小腹。上至心下。若豚狀。上下喘逆骨痠。

病在六腑。太陽利清氣。陽明泄濁氣。少陽化精氣。失常則壅聚不通。故實而不轉。虛則輪。屬陽無形。隨氣往往。在上則格。在下則脹。傍攻兩脇。如有泥塊。易於轉變。故名曰聚。又有息積者。乃氣息癰滯於脇下。不在臟腑營衛之間。積久形成。氣不干胃。故不妨食。病者脇下滿。氣逆息難。頻歲不已。名曰息積。

治法。寒者熱之。結者散之。客者除之。留者行之。堅者削之。消者摩之。鹹以溼之。苦以瀉之。全真氣以補之。隨所利而行之。酒肉食等積。以所惡者攻之。以所喜者

誘之。

五積丸 治積塊。

黃連肝腎五錢 心脾七錢

川烏肝脾五錢

人參肝肺腎二錢 心五錢

另研巴豆旋入和勻。煉蜜丸。梧子大。微溏為度。

肝積加柴胡二兩。皂角二錢五分。川椒四錢。昆布二錢。莪朮三錢五分。

心積加茯苓三錢。肉桂一錢。茯苓一錢。丹參一錢。菖蒲五錢。

肺積加桔梗一錢。紫苑一錢五分。天門冬一錢。三稜一錢。青皮一錢。陳皮一

錢。川椒一錢五分。白豆蔻一錢。

腎積加玄胡三錢。苦練肉三錢。全蝎一錢。附子一錢。澤瀉二錢。獨活三錢。肉

桂三錢。菖蒲二錢。丁香五錢。

脾積加吳萸二錢。澤瀉一錢。茵陳二錢。宿砂一錢。川椒五錢。

秋冬加製樸一倍。減芩連服。人覺熱加連。覺悶亂加桂。氣短減樸。又有虛人不

厚樸肝心脾五錢 肺胃八錢 腎

巴豆霜 五分

乾薑心肝五錢 腎

茯苓 五錢

可直攻。以蠟匱其藥。又且久留磨積。

肉積。硃砂、水銀、阿魏、酒積、神麴、麥芽、血積、虻蟲、水蛭、桃仁、大黃。

榔、木香、水積、甘遂、牽牛、芫花、涎積、雄黃、膩粉、食積、礞石、巴豆。

稜、莪朮、魚鮮積、陳皮、紫蘇、草果、丁香、桂心、寒冷成積、附、樸、硫磺。

化氣湯 治息積癖於腹脇之下。脹滿痞痛。嘔吐酸水。

宿砂 肉桂 木香錢各一 甘草炙 茴香炒

丁香 青皮炒 陳皮五錢 生薑 沉香

胡椒錢各一

右爲末。薑紫蘇湯。鹽酒調二錢一分。

散聚湯 治久氣六聚。狀如癥瘕。隨氣上下。發作有時。心腹絞痛。攻刺脇

腰。喘咳滿悶。臍脹。

半夏 檳榔 當歸錢各三 陳皮 杏仁

肉桂錢各二 茯苓 甘草 炮附 川芎

枳殼 吳萸 厚樸製錢各一 大黃加便秘

三聖膏 貼塊

石 灰未化者半斤瓦器炒令

大 黃微炒候涼入桂

又方 大 黃

桂 心半兩末略炒醋煮
樸 硝各一兩末

大蒜搗膏貼之亦佳。

張法無憂散 治諸積不化。

桂苓白朮散調之。

茶調散 治沉積水氣。

木香檳榔丸調之。

千金硝石丸 止可磨塊不令困人須量虛實。

硝 石六兩 大 黃半斤 甘 草 人 參各三

右為末以三年苦酒即好三升置筒中以竹片作三片刻先納大黃攪使微沸盡一刻乃下餘藥又盡一刻微火熬膏丸梧子大每服三十丸。

消塊丸 此必審確可用。

三稜

莪朮削堅

青皮

陳皮破氣

香

附調氣

桃仁

紅花治血

靈脂破血

甘草

牛

膝用死血

石

破痰 二陳湯多痰加之外

山

查食塊

吳茱萸五炒一錢

益智

五炒一錢

白朮等分

碱石湯下。

茶癖散 石膏

黃芩

升麻

砂糖調服。

治痰塊 苦參

半夏

瓜蒂

薑蜜丸。

破塊驗丸 吳茱萸

黃連

木香

檳榔

桃仁

郁李仁

又承氣加連、芍、川芎、乾葛湯下。又瓜蒌、半夏、黃連、貝母丸果効。

三十一消渴

脈。心脈滑。為渴。滑者。陽氣勝。心脈微小。為消瘴。脈軟散者。氣血虛。脈洪大

者。陽餘陰虧。寸口脈浮而遲。浮為虛。衛氣虧。遲為勞。營氣竭。跌陽脈浮而數。浮為風。數消穀。消瘴脈實大。病久可治。懸小堅急。病久不可治。脈數大者

生。實堅大者死。細浮短者死。

因證。膏粱甘肥之變。則陽脈盛矣。陽脈太甚。則陰氣不得營也。津液不足。結而不潤。皆燥熱爲病也。

經云。二陽結。謂之消。二陽者。陽明也。手陽明主津。病消則目黃口乾。是津不足也。足陽明主血。熱則消穀善飢。血中伏火。乃血不足也。此皆津血不足而熱也。夫因則火一也。病則有上中下三也。蓋心火盛於上。爲膈消。病則舌上赤裂。大渴引飲。論云。心移熱於肺。傳爲膈消是也。以白虎加參湯主之。

火盛於中。爲腸胃之消。病則善食。身瘦自汗。大便硬。小便數。論云。瘴成爲消中者。是也。以調胃承氣。三黃等治之。

火盛於下。爲腎消。病則煩躁。小便濁淋如膏油之狀。論云。焦煩水易虧者是也。六味地黃丸主之。

治法。熱淫所勝。治以甘苦。甘以瀉之。熱則傷氣。氣傷無潤。則折熱補氣。非甘寒不治。

李以補肺降火生血爲主。

秘丹 生血為主。總治三消。

黃連

花粉

人乳

地黃汁

藕汁

右蜜爲膏。徐徐留舌上。以白湯下。

參膏湯 治膈消上焦渴。不欲多飲。

人參

五錢

石膏一兩

知母六錢

甘草五分

水煎。或方加寒水石炒。

順氣散 治消中能食。小便赤。

川樸一兩

大黃四兩

枳殼二兩

赤芍藥一錢

茴香散 治腎消。小便如油。

茴香

苦練炒

五味

右爲末。酒下二錢。食前服。

珍珠丸 治白淫滑泄。思想無窮。所愿不得之證。

黃柏

燒一斤

真蛤粉一斤

水丸。空心酒下。柏降火。蛤鹹補腎。

又方

蘆根

瓜蒌根

麥門冬

知母

竹葉

牛乳

生津甘露飲 已下出李。

石膏

甘草之微源水

黃連

山梔

黃柏

知母補水熱

杏仁

麥冬

全蠍

連翹

白葵

白芷

歸身

蘭香潤和血燥

升麻

柴胡經行

木香

藿香取之佐

桔梗為末

酒煮黃連丸 治中暑熱渴。

太陽渴。脈浮無汗。五苓。滑石類。

陽明渴。脈長有汗。白虎。涼膈等。

少陽渴。脈

弦而嘔。小柴胡加瓜蒌。

太陰渴。脈細不欲飲。不思水。

少陰渴。脈沉而自

利者。猪苓三黃湯。

厥陰渴。脈微引水少與之。

神芎丸 已下出張。

黃連入心

牽牛逐火

滑石入腎

大黃逐火

黃芩入肺

薄荷散熱

三黃治消渴。大黃春秋二兩。夏一兩。冬五兩。黃芩春四兩。秋夏六兩。冬三兩。黃連春四兩。秋夏七兩。冬三兩。桂苓甘露飲調之。白虎湯調之。生藕節汁、淡竹瀝汁、生地黃汁相間服之潤之。寒水石、甘草、蛤粉等分濃煎麥門冬苗下二錢。

神白散 治真陰虛損。

猪肚丸 治消中。

猪肚一個

黃連五錢

麥冬去心

知母

瓜蒌

右四件末入肚縫之。蒸爛熟於砂盆內杵而丸之。如堅少加蜜。丸梧子大。每服五十丸。

葛根丸 治腎消。

葛根

瓜蒌各二兩

鉛丹二兩

附子炮一兩

蜜丸如梧子大。一日三服。春夏去附。

胡粉散 治大渴。又治腎消。

瓜蒌根二兩

胡粉五錢

鉛丹五錢

澤瀉

石膏

白石脂 赤石脂各五錢 甘草炙三兩五錢

右杵為末。任意服。痛者減服。

人參白朮湯

人參 白朮 當歸 白芍 山梔

澤瀉 大黃各五錢 連翹 瓜蒌根 茯苓各一兩

肉桂 藿香 木香各一錢 寒水石二兩 滑石

樸各半斤 甘草三兩 石膏四兩 薑煎入蜜少許。

口燥口乾口渴咽乾須詳之。

三十一一痞

因。誤下陰虛。食積痰滯。濕土虛痞。

論曰。太陰濕土為積飲痞膈。乃土來心下痞滿也。

證治。誤下多則亡陰。胸中之氣。因虛而下陷於心之分野。宜升胃氣。以血藥治之。亡陰。謂脾胃水穀之陰亡也。

痰積痞膈。胸中窄塞。宜消導之。謂之實痞。

濕土虛痞有二。大便秘能食者。厚樸枳實主之。大便利者。芍藥陳皮主之。

治法以瀉心湯。黃連為君。瀉心下之土邪。厚樸降氣。

三因論狀。心下堅滿痞急。痛如刺。不得俛仰。其胸前皮皆痛。短氣咳唾引痛。咽

塞不利。習習如痒。喉中乾燥。嘔吐煩悶。自汗時出。痛引徹背。

外有心熱而痞之痞。則滿硬。結胸則痛。屬胸脾。

大消痞丸 治濕土痞虛氣痞。

黃連炒 黃芩各三錢 薑黃一錢 白朮 半夏各一

甘草炙一錢 宿砂一錢 枳實炒 生薑各五錢 陳皮二錢

神麴炒一錢 厚樸三錢 澤瀉 猪苓各一錢

丸。梧子大。白湯送下。

木香。有憂氣結中脘。心下痞滿。肚皮底微痛加之。不則不用。

利膈丸 除痰利膈。

黃芩生兩 黃連 南星 半夏錢各五 枳殼

陳皮各三錢

白朮二錢

白礬五分

澤瀉五錢

神

麴五錢

瓜蒌丸 治胸痞或脇下逆搶心。

瓜蒌子

枳實

陳皮

取瓜蒌皮穰末熬丸。

胸痞切痛。加梔子燒存性。附子炮各二兩。

二十一 腫脹

脈遲而滑者脹。

盛而緊曰脹。陽中有陰也。故下之。

跌陽緊而浮。緊為痛而堅。

滿。浮為虛則腸鳴。

弦而遲者。必心下堅。

又肝木尅脾土。鬱結涎閉。於臟氣

腑氣不舒。胸則脹閉。

脈浮而數。浮則虛。實則數。

脈浮風水皮水皆浮。虛

緊瀋者脹。憂思結連。脾肺氣凝。大腸與胃不平而脹。

脈石水黃汗皆沉。

脈

浮而滑名風水。

浮而遲。浮熱遲濕。濕熱相搏。石水必矣。

弦而緊。弦則衛氣

不行。水走腸間。

水滿腹大如鼓。脈實者生。虛者死。洪大者生。微者死。

腹脹

便血。脈大時絕。極脈小疾者。並死。

中惡腹大四肢滿。脈大而緩者生。緊大而

浮者死。緊細而微者亦生。

因證。蓋腫脹之因。其始則一。其變則二。皆脾胃之土生焉。

水腫之因。蓋脾虛不能制水。腎為胃關。不利則水漬妄行。滲透經絡。其始起也。目窠上微腫。頸脈動。欬。陰股寒。足脛脹。腹乃大。其水已成矣。按其腹。隨手而起。如裹水之狀。短氣不得臥者。為心水。小腹急滿為小腸水。大便鴨瀉為肺水。乍虛乍實為大腸水。兩脇痛為肝水。口苦咽乾為膽水。四肢重為脾水。小便澀為胃水。腰痛足冷為腎水。腹急肢瘦為膀胱水。然此十水。謂之正水。審脈證。分經絡而治之。

風水。脈浮。惡風。歸肝。

皮水。脈亦浮。不惡風。喘渴。按沒指。歸肺。

石水。脈沉。不惡風。歸腎。

黃汗。脈沉遲。發熱而多寒。歸脾。

治法。腰以上腫。宜汗。腰以下腫。宜利小便。主治使補脾氣。實則能健運。以參朮是也。佐以黃芩、麥冬。制肝木。腹脹加厚樸。氣不運加沉香。使以通利。是必全矣。

開鬼門。潔淨府。正此謂也。

外有濕腫。用加附子。脈沉細是也。

又有腫痛。爲中寒也。加炮附是也。

脹滿皆脾土轉輸失職。胃雖受穀。不能運化精微。聚而不散。隧道壅塞。清濁相

混。濕鬱於熱。熱又生濕。遂成脹滿。

又寒濕抑遏。遏於脾土之中。積而不散而脹。卽經云。臟寒生滿病是也。

又五積痰飲。聚而不散。或宿食不化。皆成脹滿。

煩心短氣。臥不安。爲心脹。

虛喘咳滿。爲肺脹。

脇痛引小腹。爲肝脹。

善噦。四肢脫。體重不勝衣。臥不安。爲脾脹。

引背央央然。腰髀痛。爲腎脹。

腹滿胃脘痛。妨食。聞焦臭。大便難。爲胃脹。

腸鳴痛。冬寒飧泄。爲大腸脹。

小腹臌滿。引腰而痛。爲小腸脹。

小腹氣滿而氣癢。爲膀胱脹。

氣滿於膚。經經然。爲三焦脹。

脇痛脹。口苦善太息。爲膽脹。

寒氣客於皮中。鑿鑿然不堅。腹身大。色不變。按不起。爲膚脹。

腹脹身皆大。色蒼黃。腹筋起者。爲鼓脹。

寒氣客於腸外。與衛相搏。氣不得營。因有所繫。癖而內着。其大也如雞子。至其

成如懷胎。按之則堅。推之則移。月事不以時下。爲腸覃。

寒氣結於子門。閉塞不通。惡血當瀉而不瀉。血留止。日以益大。如胎。月事不時。

此生于胞中。爲石瘕。此二者皆生於女子。可道而下。

治。虛則宜補脾以養肺。流濕以散氣。治以參朮。佐以平胃茯苓。熱加芩連。血

虛四物。死血桃仁。

風寒外邪。自表入裏。寒變爲熱。而胃實滿。宜大承氣下之。

積痰宿食。宜以消導。或大黃丸下之。經云。去菀陳莖是也。

前者之外。有胃寒腸熱。腹脹而且泄。胃寒。則氣收不行爲脹。腸熱。則水穀不聚而泄。

黃連

木香

大黃

厚樸

茯苓

青皮

茱萸

又有胃熱腸寒。故痛而且脹。胃熱則善飢消穀。腸寒則血凝脈急。故痛而且脹。又有頸腫膺腫胸脹。皆氣不順。有餘於上。又有身腫而冷。胸塞不能食。病在骨節。汗之安。忌面上黑點。肺敗。掌中無紋。心敗。臍突。脾敗。脚根腫。肝敗。腹滿青筋。腎敗。

營衛俱絕浮腫者死。

唇腫齒焦者死。

卒痛面蒼黑者死。

臍腫反出者死。

陰囊莖俱腫者死。

脈絕口張腫者死。

足趺腫脹如斗者死。

變水湯 治腫脹。

白朮

茯苓

澤

瀉各二

郁李仁二錢

煎入薑汁。調以耆朮。爲建中之類。

楮實丸 治脹。

木香散 治腫。

木香

大戟

白牽牛各一

右爲末三錢。猪腎子一雙。批作片子。摻末在內。煨熟空心服。更塗甘遂末於肚上。少飲甘草水。

十棗丸 治腫脹。

五皮散 治腫皮水。

大腹皮

桑白皮

茯苓皮

生薑皮

陳皮

木香

消腫丸

滑石

白朮

木通

牽牛

茯苓

半夏

陳皮

木香

丁香

瞿麥

酒糊丸。麥門冬湯下。

中滿分消丸 治熱脹鼓脹氣脹。

黃芩

刮黃皮

黃連

一兩

薑黃

白朮

人參

猪苓 甘草各一兩 茯苓 宿砂 陳皮各三錢
枳實 半夏各五錢 厚樸一兩

廣茂瀆堅湯 治脹有積塊如石。上喘浮腫。

厚樸 草豆蔻 歸尾 黃芩 益智各五錢

甘草 黃連 白朮 柴胡 神麴

澤瀉各三錢 吳茱萸 青皮 陳皮各二錢 半夏七錢

桃仁 蘇木 木香 紅花各一錢

海金沙丸 治腫。

牽牛半兩 甘草 遂半兩 金砂三錢 白朮一兩

煎服。

木香塌氣丸 治脹。

胡椒 草薢裏 木香各三錢 蠍稍分三錢去毒

大補中氣行濕散氣湯

秘傳十水丸 後用尊重丸退餘水。

炒甜葶藶

澤瀉

巴豆去油

酢漿大戟

芫花醋炒

甘遂醋炒

桑白皮

漢椒

茯苓

雄黃

每三錢五更水下以肉壓之免惡心。

車水葫蘆丸 止用一掃光為貴。

木香

丁香各三錢

沉香

黑白丑各二錢

枳殼

烏藥

白芷

當歸各一錢

茶丸

尊重丸 治蠱脹腹大水腫。氣逆喘乏小便澀大便閉。虛危甚效。

沉香

丁香

人參

檳榔

木香

青陳皮

枳實

白牽牛

木通

車前

苦葶藶

赤茯苓各四錢

胡椒

海金砂

白豆蔻

蠍尾

滑石各二錢五分 蘿蔔子六錢

白丁香一錢

郁李仁兩半去皮

薑汁糊丸。薑湯下。

氣分與胸痺中滿皆相類。中滿為氣虛。胸痺為氣實。氣分挾痰飲。營衛不利。腹滿脇鳴相逐。氣轉膀胱。營衛俱勞。陽氣不通則身冷。陰氣不通則

骨疼。陽前通則惡寒。陰前通則痺不仁。陰陽相得。其氣乃行。大氣一轉。其氣乃散。實則失氣。虛則遺溺。名曰氣分。寸口遲而濇。遲則氣不足。濇則血不足。氣寒凝結。水飲所作。

婦人經水前斷後病。名曰血分。先病水。後經斷。名曰水分。

類別相似

濕腫類多。自正水之餘。有風水、皮水、石水、黃汗等。入水門。如脾氣橫泄。脚氣、皮滿、膚脹、腸覃、石瘕、氣分、血分皆相似也。

類分臃脹

有胃中風。脾中寒。中濕。心痺。肝虛。脾傷。脾熱。飲聚。女疸。
小腹脹。有腎熱。三焦虛寒。腸癰。女勞疸。面腫。肺中風。腎中風。
胃寒。肺水。

有論臃腫七證

有肺氣隔於膜外。運行不得。遍身浮腫。脈浮。治宜調肺通氣。
有男臟虛。女血虛。傷於冷毒之物。成積礙氣。道不通。腹急氣喘。亦有四肢不腫。

只肚鼓脹。脈弦。治宜化積。有脾寒。久年不愈。傳為浮腫。且云。內有伏熱。因而瀉利。及其熱乘虛入脾。至胸腹急脹。脈數。治宜解熱。有脾主肌肉。肉如泥。按之不起。土濕病也。脈沉。治宜燥脾。

有脾虛不能制腎水。脾濕如泥。脈沉遲。治宜緩脾元。利水道。

有傷風濕而腫。或傷冷濕而腫。氣血凝滯。脈浮緩。治宜發散風濕也。

有久病氣虛面浮。手足虛。氣妄行者。婦人產後。或經事後。有此一證。是氣虛也。脈虛弱。治在調氣補血。

結陽者。腫四肢。夫熱勝則腫。四肢為諸陽之本。陽結於內。不得行於陰。熱邪則菀於四肢。大便閉澀。是熱也。非水也。宜服

犀角

玄參

連翹

升麻

麥門冬

木通

芒硝

有脇支滿。或腹滿痛。或胸脹。亦有經氣聚而不行。如脇支滿。少陽經氣不行也。餘皆倣此。有頭腫。膺腫。胸脹。皆氣不順。有餘於上。

有身腫而冷。胸塞不能食。病在骨節。汗之安。

三十四嘔吐噦

脈。形狀如新臥起。脈弱而嘔。小便復利。身有微熱。見厥者死。跌陽脈浮。胃氣虛。嘔而不食。恐怖死。寬緩生。寒氣在上。暖氣在下。二氣並爭。但出不入。嘔家有癰膿者。不可治。膿盡自愈。先嘔却渴。此為欲解。先渴却嘔。為水停心下。屬飲。嘔本渴。今反不渴。有支飲。嘔多雖有陽明證。不可下。蓋邪氣不在胃口。脈數。反吐汗。令陽微。膈氣空虛。數為客熱。不能消穀。胃中虛冷。故吐也。陽緊陰數。食已則吐。陽浮而數亦然。或浮大。皆陽偏勝。陰不能配之也。為格主吐逆。無陰故嘔。寸口脈緊而芤。緊為寒。芤為虛。虛寒相搏。脈為陰結而遲。其人則噎。關上脈數則吐。脈弦者虛也。胃氣無餘。朝食暮吐。變為胃反。寸緊尺濇。胸滿不能食而吐。吐止者。為下之未止者。為胃反也。跌陽脈微而濇。微則下利。濇則吐逆。穀不得入。或浮而濇。浮則虛。虛傷脾。脾傷則不磨。朝食暮吐。名胃反。寸口脈微而數。微則血虛。血虛則胸中寒。脈緊而濇者難治。嘔吐思水。

者易解。關上脈浮大。風在胃中。心下澹澹。食欲嘔。關上脈微浮。積熱在胃中。嘔吐蚘蟲。關上脈緊而滑者。蚘動。脈緊而滑者。吐逆。脈小弱而濇。胃反。

證。嘔吐噦各有所辨。

吐屬太陽。有物無聲。乃血病也。有食入則吐。食久則吐之別。

嘔屬陽明。有物有聲。氣血俱病。

噦屬少陽。無物有聲。乃氣病也。

治。因胃口有熱。膈上有痰。故嘔吐。亦有寒氣客於腸胃。厥逆上出。故痛而嘔。

因胃中虛。膈上熱。故噦。亦有痰水滿塞而噦。因胃氣虛。陽火上衝。故嘔逆。

亦有痰熱在胃。中氣不降而呃。

李論寒客胃中。物盛上溢。故嘔。清厥甚則痺。食而吐。寒氣與新穀氣俱還於胃

中。新故相亂。真邪相攻。故噦。三者雖殊。皆因脾胃虛弱。亦因寒氣寒胃。加之飲

食所傷而致。宜以丁香、藿二香、半夏、茯苓、陳皮、生薑之類主之。又有痰飲者。必

下之。

又論皆氣衝之火逆。胃之脈反上而作。治宜降火。呃者氣逆也。陰火炎上也。氣自臍下爲火。直衝上出于口而作聲也。

又火結痰氣而上升。衝出於口也。治宜降火行氣導痰而自安。

劉論吐有三氣。積寒也。

上焦吐者。皆從於氣。氣者天之陽也。脈浮而洪。其證食已暴吐。渴欲飲水。大便秘結。氣上衝胸而發痛。治宜降氣和中。

中焦吐者。皆從於積。食與氣相假爲積而痛。脈浮而匿。其證或先吐而後痛。或先痛而後吐。治法以毒藥行其積。木香、檳榔去其積。

下焦吐者。從於寒也。脈沉遲。其證朝食暮吐。暮食朝吐。小便清利。大便不通。治法毒藥通其閉塞。溫其寒氣也。

三因論有寒嘔、熱嘔、痰嘔、食嘔、血嘔、氣嘔。

寒因胃寒傷食。四肢厥冷。脈弱。宜四逆湯。

熱食入即出。煩躁。脈數。柴胡湯。

痰昔肥今瘦。腸間有聲。食與飲並出。宜半夏人參主之。

食嘔因胃虛。寒氣在上。暖氣在下。朝食暮出不消。養胃湯主之。

血因瘀蓄。冷血聚於胃口。因憂怒氣攻。血隨食出。宜茯苓湯主之。

氣胃者陽明合榮於足。今隨氣上逆。心膈脹。嘔卻快。宜茱萸湯主之。

方論嘔逆。切忌熱藥。丁香類。病皆胃虛陰火所乘。宜參朮大補之類。如痰實者。

察其病因。形氣俱實。以人參蘆吐之。有傷寒差後嘔者。當去餘熱。有酒家

嘔。解酒治之。有脚弱脾疼而嘔者。此脚氣內攻。依脚氣門治。有中毒而嘔

者。解毒治之。有懷孕惡阻者。依惡阻治之。有心中風。心中寒。肝中風。中濕

脾痺。有漏氣。有走哺。女子患嘔吐甚者死。其陰在上故也。

論皆屬於火。嘔而心下痞。半夏瀉心湯。乾嘔而利者。黃芩半夏湯。嘔吐

穀不得入。小半夏湯。嘔吐病在膈上。猪苓湯。食已即吐者。大黃甘草湯。

胃反吐而渴。茯苓澤瀉湯。似嘔不嘔。如噦不噦。無奈薑汁半夏湯。噦逆上

氣者。陳皮竹茹湯。陳皮參草竹茹。

桔梗湯 治上焦氣熱所衝。食已暴吐。脈浮而洪。已下出劉。

桔梗

白

朮各一兩 半夏

神二兩 陳皮

枳實炒

茯苓

厚樸製一兩

水煎。下木香、檳榔末各一兩。如大府燥結，加承氣湯。

荊黃湯 治前證熱氣甚者。

荊芥穗一兩

人參五錢

大黃三錢

甘草五錢

調下木香、檳榔末各二錢。

清鎮丸 治前證頭痛有汗脈弦。

柴胡二兩

黃芩五錢

半夏

甘草各五錢

青黛五錢

人參五分

右薑汁浸，炊餅丸。梧子大。食後薑湯下。

紫沉丸 治中焦吐食，積與寒氣相假，故吐而痛。

半夏

神麴

烏梅去核

代赭石

宿砂各三錢

杏仁去皮

沉香

木香各一錢

陳皮半兩

檳榔

丁香各三錢

白豆蔻五分

白朮一錢

巴霜另入

右酢糊丸，米大。薑湯下五十丸。

木香白朮散 治前證。腹中痛。是脾實繫強。宜和之。

木香八兩 白朮半兩 半夏 神麴一兩 檳榔五分

茯苓半兩 甘草四錢

右濃煎。芍藥薑湯下二錢。有積而痛。手不可按。無積者宜之。

附子丸 治下焦朝食暮吐。暮食朝吐。大便不通。

附子錢五 巴豆霜一錢 砒另研

右黃蠟丸。如梧子大。每二丸。冷水下利為度。更服紫沉丸。不令再閉。

安胃散 李先生方 治嘔吐噦。以胃寒所致。

丁香五分 茱萸 草薢 人參各一 炙甘草五分

黃耆一錢 柴胡五分 升麻七分 黃柏三錢 陳皮五分

當歸一錢 蒼朮一錢 半夏 茯苓 陳皮

末三味。治嘔吐痰涎。痰飲為患。加之。寒則否。煎稍熱服。

秘方 治痰嘔吐。二陳湯。

山梔炒 黃連炒薑汁 香附 虛加蒼朮

嘔逆因寒則可用。此世俗之劫亦可戒。

丁香

柿

蒂各一

竹茹

煎熱服。

有惡心吐蟲數條後。乃頻作服殺蟲藥。則吐蟲愈多。六脈皆細。非蟲脈也。乃臟寒而不安矣。

有嘔。飲食皆不得進。治嘔愈嘔。此胃風也。

論吐有三證

冷吐先覺咽酸嘔。然後吐食。脈小滑者是。王叔和云。關胃寒。不下食。傷寒汗下過多。胃中虛冷。食久反吐。亦屬於寒。

胃熱而吐者。聞穀氣則嘔。藥下則吐。或傷寒未解。胸中有熱。關脈洪。宜涼之。胸中有宿食。或痰飲。或停水。關沉而伏者。宜吐之。

三因論嘔吐出於胃。故有寒熱食痰血氣。同上條。

論嘔逆則咳逆也。大率胃實則噫。胃虛則噦。此因胃中虛。膈上熱也。故噦至八九聲相連。收氣不同驚人者。若傷寒久病。得此甚惡。內經所謂壞府是也。亦有噦而心下堅痞眩悸者。以膈間有痰水。非虛危比也。痰半夏湯主之。噦

虛橘皮竹茹湯主之。

論漏氣

病者身背皆熱。肘臂牽痛。其氣不續。膈間厭食。食則先吐而後下。名曰漏氣。此由上焦傷風。開其腠理。經氣失道。邪氣內着。麥門冬湯主之。

麥門冬	生蘆根	竹茹	人參	茯苓
白朮	甘草	陳皮	薤白	姜亦可

論走哺

病者上焦實熱。大小便不通。氣逆不續。嘔逆不禁。名曰走哺。人參湯主之。前方加黃芩、知母、石膏、山梔。去竹茹、麥冬。

三十五噎膈

脈。瀦小血不足。大而弱。氣不足。因血虛。血陰血也。主靜。內外臟腑之火起。氣虛。制火則不起。臟腑之火熾。而或因

金水二氣不養。或陰血不生。腸胃津涸。傳化失宜。或因痰膈妨礙升降。氣不交通。皆食入復出。謂之膈噎。即翻胃也。噎病也。

大概因血液俱耗。胃脘亦槁。在上近咽之下。水飲可行。食物難入。間或可食。入亦不多。名之曰噎。其槁在下與胃爲近。食雖可入。難盡入胃。良久復出。名之曰膈。亦名翻胃。大便秘少如羊矢。名雖不同。而病本一也。

張論三陽結謂之膈。三陽大腸小腸膀胱也。結者結熱也。小腸結熱則血脈燥。大腸結熱則後不通。膀胱結熱則津液涸。三陽既結則前後閉。則反而上行。此所以噎食不下。縱下而復出也。宜先潤養。因而治下。或涎痰上阻。用苦酸微微涌之。

證。三因有五噎。

氣噎者。心悸上下不通。噫噦不徹。胸背痛。

憂噎者。遇天陰寒。手足厥冷。不能自溫。

勞噎者。氣上膈脇下支滿。胸中填塞。故背痛。

思噎者。心怔悸。喜忘。目視眈眈。

食噎者。食無多少。胸中苦塞痛。不得喘息。

五隔

憂隔者。胸中氣結。津液不通。飲食不下。羸瘦短氣。
思隔者。中脘食滿。噫則酸心。飲食不消。大便不利。
怒隔者。胸膈逆滿。噎塞不通。嘔則筋急。惡聞食臭。
喜隔者。五心煩熱。口舌生瘡。四肢倦重。身常發熱。胸痛引背。食少。
恐隔者。心腹脹滿。咳嗽氣逆。腹中苦冷雷鳴。繞痛不能食。

治法。宜以潤養津血。降火散結。萬藥萬全。

有人血耗。便如羊矢。病反胃。半年。脈澁而不勻。不大便八九日。先以甘蔗汁煎

六君子湯。加附子、大黃。與之。伺便潤。令以牛乳服之。

方 四物湯加陳皮去白

紅花酒浸 驟尿成其

秘方 治膈噎

童便 牛羊乳 韭汁 竹瀝 甘蔗汁解毒

酒

胡荽丹 治反胃氣。

烏雞令一隻 胡荽子入雞縫之。煮熟食之。漸盡。不得再一隻雞妙也。

二十六瘡瘍

脈沉實。發熱煩躁。外無炊火赤痛。其邪深在內。故先疏通以絕其源。

脈浮大數。微腫在外。當先托裏。恐邪入於內。

脈不沉不浮。內外證無知。其在經。當和營衛。

浮者太陽。長者陽明。弦者少陽。浮者在表。宜行經。沉者在裏。宜疎利

臟腑。緩者身重。除濕。緩者濕勝。故重。脈大。心躁乍熱。大者心肺有熱。脈

弦。眩運有風肝脈。澁者氣滯乏津。瀉氣補血。瀉者血虛。脈弦細。便溺多。

弱寒水。脈細。為膀胱之寒水。

因火之屬。

濕熱相搏。肌肉敗壞而為膿。營氣不從。逆於肉裏。乃生癰腫。營氣運氣也。逆而不行。其源在經。濕氣外傷。害人皮肉。皆營氣之不行也。其源在外。盛則內

行。膏梁之變。足生大疔。皆營氣逆行。凝於經絡。其源在裏。發於表也。

證。瘡瘍諸症。皆營氣盛。偏助火邪而作。隨虛而出於經絡也。

如太陽經虛。從背而出。少陽虛。從鬚而出。陽明虛。從髭而出。腎脈虛。從

腦而出。微熱則痒。熱甚則痛。血虛則痛甚。熱甚則腫甚。

治法。外者。宜以辛涼發散之。通聖涼隔解毒是也。

內者。宜以苦寒下之。三黃湯玉燭散是也。

中者。宜以調經涼血等是也。

腫瘍。宜解毒下之是也。潰瘍。宜托裏補之是也。如溫經。加通經之藥妙矣。

夫邪氣內畜。腫熱。宜砭射之也。氣勝血聚者。宜石而泄之。如腫瘍年壯。謂伏

熱在心。可降其火。如潰瘍年老。發嘔不食。謂虛大補。病瘡腰脊痠癢者。死。

內疏黃連湯 治嘔哕發熱。脈沉而實。腫硬色不變。根深臟腑秘澀。

黃連 白芍 當歸 木香 檳榔

黃芩 山梔 薄荷 甘草 桔梗

連翹 二兩 大黃 便秘加之行經黃芩黃連連翹
人參 木香 檳榔 黃柏 澤瀉

在腰已上至頭者枳殼。疎利臟腑用前藥中加大黃。痛者當歸黃耆止之。

傷煎散

治腫掀於外根盤不深。脈浮邪氣盛。則必侵于內。宜熱之。

地骨皮

黃耆

白芍

黃芩

白朮

茯苓

人參

當歸

肉桂

甘草

防己各一兩

防風二兩

右以蒼朮一升。水五升。煎至半。去渣。入藥煎服。便秘加大黃。熱加黃連。

黃連消毒湯 治一切瘡疽背腦

黃連一錢

黃芩

黃柏

地黃

知母各四錢

羌活

獨活

防風

藁本

歸尾

桔梗

連翹各四錢

黃耆

人參

甘草各三錢

蘇木二錢

防己五錢

澤瀉二錢

連志酒

忍冬酒

不問腫潰皆有奏捷之功。然二酒有補性。歸心歸血之効。

金銀花湯 治痛。色變紫黑者。同瘡。

金銀花并枝 甘草各二兩 黃耆四兩

酒一升。閉口重湯煮。酒煮皆可。

乳香散 治痛瘡口大。

寒水石煨 滑石各一兩 乳香

沒藥五錢 腦子少許

末糝口上。

雄黃散 治惡肉不去。

雄黃一錢 巴豆皮尖去 乳香

沒藥少許

細和勻敷肉上。

木香散 治久不收口。

木香 檳榔 當歸各一錢 黃連二錢

爲末糝之。

出刺骨 血竭罨之。骨自出。

治漏瘡刺骨 青橘葉 地錦草

右二件杵成膏。先淨瘡口。用杜牛根內入瘡中。以膏敷之縛定。

一上散 治瘡疥癬。

雄黃另 硫黃另各五錢 斑蝥三個去足另 黑狗脊另 寒水石

蛇牀子炒各五錢

右細末。同勻油調搽上。加法隨病。

金絲。其狀如繩綫。巨細不一。上下行至心即死。可於瘡頭上截經刺之出血。後嚼萍草根塗之立安。

治疔瘡劉先生方

烏頭尖 附子底 蝎梢 雄黃各一錢 蜈蚣一兩

礞砂 粉霜 輕粉 麝香 乳香各五分

信石二錢五分

右末。先破瘡口出血。函以草杖頭。用紙滯於內。以深為妙。

疔瘡毒氣入腹。昏悶不食。

紫花地丁 蟬退 貫衆各半兩 丁香 乳香

溫酒下二錢。

治疔瘡李先生方

歸尾

沒藥

白芨

乳香

杏仁

黃丹

草薢

粉霜

巴豆

木鱉子

芝蔴油

桃柳枝

右煎如法。白菊花紫莖者。汁服。查敷之。苦草根葉亦可。

疔瘡先痒後痛。先寒後熱。熱定則寒。四肢沉重。頭痛心驚。眼花嘔逆。則難治。

貼杖瘡

虎骨

黃柏

黃連

黃芩

苦參

以五味煎。入油紙煎又數沸。次以紙貼上。

惡瘡

霜後凋蕉葉乾末。傅香油調油紙掩。先用忍冬藤、蔥、椒、金絲草洗。

松上白蟻泥、黃丹炒黑。香油調敷。外用油紙夾上。日換後。用龍骨末藥於口上收肉。黃丹入香油煎。入樸硝抹瘡上。

口瘡神方

焰硝

鵬砂

含口不開。以南星於湧泉酢敷之。

飲酒人口糜 導赤散 五苓散

風寒遏絕。陽氣不伸。聲不出。

半

夏雨制一

烏頭

肉

桂錢各一

煎服。

赤口瘡 白 礬 飛

沒 藥

乳 香

銅 綠 末 糝。

白口瘡 雄 黃

沒 藥 各一

輕 粉 五分

巴 豆 末 糝。

唇緊燥裂生瘡用 青

皮 燒 灰

猪脂調敷。夜臥頭垢亦可。

口痛瘡 五味子 一兩

黃 柏 蜜 炙

滑 石 錢各五

銅綠加糝。白 薔

薇汁嗽之良。

有口瘡不下食。衆以狐惑治之。必死。末若以礬湯於脚上浸半日頓寬。以

黃栢蜜炙。礬蠶灼末傅。立下乳而安。

一方神效

西瓜外皮燒灰

黃 栢

黃 連

硃 砂

孩兒茶蓬砂爲末。水調抹效。

手痴瘡 皂 角

枯 礬

輕 粉

黃 連

黃 栢

沙瘡 柵地藤燒灰。

足上毒瘡 蜜陀僧 黃連傳法 旱蓮草鹽炒 桑白皮打細作餅

蓋乾易之 杜牛膝 無名異 金星草俱可。

治脚 五倍子研 牛脚髓同調厚樸。

治陰瘡 臘茶 五倍子等分 膩粉少許 孩兒茶炒。

又方 降真香磨水抹效。

三十七癰疽

脈數。身無熱。內有癰也。脈數。必當發熱。而反惡寒。若有痛處。當發其癰。脈數而虛。咳唾涎沫為肺痿。脈數而實。或滑。或則胸中隱痛為肺癰。脈緊而數。膿為未成。緊去但數。膿為已成。脈滑而數。小腹堅滿。小便或澀。或汗或寒。為腸癰。設脈遲緊。聚為瘕血。下血則愈。設脈洪數。膿為已成。腸癰脈滑為實。數為熱。衛數下降。營滑上升。營衛相干。血為敗濁。皆濕熱之所為也。死之地分。伏兔 腓脛 背 臑 項上 腦 髭 鬢 頤 因。火之毒氣結之。毒從虛而出也。薄處先穿之。義師全用補。蓋厚味之火。氣鬱之。

結。壅滯經絡。或引痰飲。血爲之滯。氣爲之亂。積久從虛而出其經也。夫陰滯於陽。則癰。陽滯於陰。則疽。氣得於滯而鬱。津液稠粘。爲痰爲飲。而久滲入肺。血爲之濁。此陰滯於陽也。血得邪而鬱。隧道阻隔。積久結痰。滲出脈外。氣爲之亂。此陽滯於陰也。

肺痿熱在上焦。

肺癰乃風傷於衛。熱過於營。血爲凝滯。蓄結成癰。

囊癰乃

濕熱下注也。有作膿者。此濁氣順下。將流入滲道。因陰氣虧。水道不利而然。膿盡乃安。骨疽因厚味及酒後涉水得寒。故熱邪深入髀樞穴左右。積痰老血相搏而成也。內疽因飲食之火。七情之火。相鬱而發。在腔子而向裏。非于腸胃盲膜也。以其視之不見。故名之曰內。

證。肺痿病多涎唾。小便反難而數。大便如豚腦。欲欬不欬。欬出乾沫。唾中出血。上

氣喘滿。或躁而渴者。寸口脈數而虛。按之濇。

肺癰病。欬逆上氣濁。吐出如粥膿血。胸中隱痛。又欬膿血。口燥。或喘滿不渴。唾

沫腥臭。時時振寒。寸口脈數而實。按之滑。

腸癰病。小腹重。強按則痛。堅滿如腫。小便數似淋。或漩。或自汗。復惡寒。又身

甲錯。腹皮急。按之濡如腫狀。腹如聚積。按之痛如淋。小便自調。甚則腹脹大。轉側聞水聲。或繞臍生瘡。或膿從臍出。背癰。脈數。身無熱而反惡寒。若有背痛處。發其癰。附骨疽。與白虎、飛尸、歷節皆相似。歷節走注不定。白虎飛尸痛淺。按之便減。亦能作膿。附骨疽着骨而生。痛深。按之無益。

治法。宜補氣血。瀉火散氣。初覺可清熱拔毒。已潰則拔毒補氣。用分經絡氣血多少。可補可驅毒。如少陽分。少血多氣宜補。

千金內托散 內托之名。使氣充實。則膿如推出也。

羌活	獨活	藁本	防風	歸梢
身四錢	連翹三錢	黃芩酒炒	黃耆	人參
甘草生用五錢半	陳皮	蘇木	五	味各五
黃柏酒炒	知母酒炒	生地酒製	黃連酒製各一	
漢防己酒製	桔梗各五	山梔二錢	猪苓二錢	麥冬二錢
大黃酒製	作二服煎			

驗方 有婦人年七十。性好酒。形實性急。腦生疽。脈緊急。切之瀋。

錦紋大黃酒炒 人參酒熟 每一錢薑汁煎服。

驗方 有人年五十。形實色黑。背生紅腫。近骨下痛甚。脈浮數而洪緊。食亦大嘔。時冬月。

麻黃 桂枝冬月 生附脈緊 黃柏酒炒 瓜蒌

甘草節 羌活 青皮 半夏 人參

黃耆 薑煎。

驗方 治初生一切瘡癰癰疽發背。服之殊效。亦能下死血。

大黃 甘草 辰砂 血竭 酒下。

解毒丹 治一切發背癰疽金石毒。

紫背車螯大者。鹽泥固濟。煨紅出火毒。甘草膏丸。甘草湯下惡物。用寒水石。煨紅入甕沉井中。臘猪油調傅。

又方 以輕粉為佐。又以燈草為佐。散腫消毒。輕者可杖。

清涼膏 治發背。

當歸

白芷

木鱉肉

白芨

白

欽各一

乳香

膩粉少許

白膠少許

黃丹五兩

麻

黃七兩

右煎前六味。候紫色去之。入槐柳枝各七寸。再煎入丹。臨時入下。

三生散

治漫腫光色。附骨癰如神。

露蜂房

蟬退

頭髮各等

燒灰存性三錢。研細酒下。

曾用五灰膏敷一宿。待惡肉腐。以刀去之盡。以香油蘸在錦上。紐乾覆之。待好肉如岩合盪狀。方可以收口。用龍骨白。欽乳沒等藥傅之。

內疽用四物湯加減服之。有人性急味厚。在脇下一點痛。每服熱燥之藥。脈輕則弦。重則芤。知其痛處有膿。因作內疽病治之。

甘草乾薑人參 治肺痿

甘草四兩

乾薑二兩

人參一兩

大棗三箇

煎服。

小青龍湯

治肺癰。先解表之邪也。此治腫瘍之法也。

葶藶大棗瀉肺湯 治癰疽喘不得臥也。

葶藶炒黃研。丸彈子大。水三升。入棗先煎二升。去棗。入葶藶煎至一升頓服之。先進小青龍湯三服。後進此。

桔梗湯 治咳胸滿。唾如米粥。當吐膿血。

甘草 桔梗各一

葦葉湯 治咳有微熱。胸中甲錯。此治潰瘍之法也。

葦葉二升 瓜瓣仁 薏苡仁各半 桃仁十五箇 煎服。

又方 瓜萸連穰不煎。

薏苡附子敗毒散 治腸癰身甲錯。腹皮急脹。本無積聚。身無熱。脈數者。

附子炮 敗醬各二 薏苡仁十箇 水煎。

大黃牡丹湯 治腸癰小腹。或偏在膀胱左右。大如掌。熱。小便自調。時自

汗。脈遲緊。未成不可下之。膿成不可下。

大黃四兩 牡丹皮三兩 芒硝二兩 瓜子一箇 桃仁五十

水煮頓服。

雲母膏 如有腹痛。百分不治。脈滑數。腹微急。脈當沉細。今脈滑數。以雲

母膏下之。

雲母膏丸梧子大一百丸。

阿膠烱入酒下之。下膿血爲度可止。

青皮當歸湯 李先生方

治便癰。

青皮 防風

當歸

甘草梢

空心煎服。

桃仁承氣湯 張先生方

治便癰。

驗便毒方 葫蘆巴末服。

川練灰亦好。

附骨疽方 青皮

黃柏

桂枝冬加

黃芩夏加

牛膝虛加 甘草

薑汁

麻黃動發不加

又防風通聖去硝黃入生犀角浮萍末。治骨疽。

癰狀多着肩背。如堅硬不可移。名石癰。皮色不變。名肉癰。如筋脈露結。

名筋癰。赤脈交錯。名血癰。隨憂愁消長。名氣癰。

瘤狀隨氣凝結。有骨筋肉膿血之瘤。

脈因證治

元 金華 朱丹溪震亨撰著

鄞縣 曹赤電炳章圈點

卷四

三十八乳癰

證。乳房爲陽明所經。乳頭爲厥陰所屬。

因厚味濕熱之痰。停蓄膈間。與滯乳相搏而成。

滯乳因兒口氣吹噓而成。有怒氣激其滯乳而成。凡病皆陽明經也。淺者

爲癰。深者爲岩。不治。

治。宜疏厥陰之滯。清陽明之熱。行汚血。散腫結。

方

煨石膏明清陽

橘皮

瓜蒌子消腫

甘草節行血

蜂房

台芎

香

附二味鬱青

皮疎厥陰

葛根

酒薑汁飲。

又方

大黃

天花粉

當歸一兩

甘草節已下五分瓜蒌子

穿山甲陳壁炒

酒丸服。

三十九瘰

因。大抵食味之過。鬱氣之積。曰毒。曰風。曰熱。皆此三端。變化引換。須分虛實。實者易治。虛者可慮。夫初發於少陽一經。不守禁戒。延及陽明。蓋膽經至主決斷。有相火而且氣多血少。

神效方 牡蠣粉五錢。和雞膽為膏貼之。 又用活石一兩。肉桂五錢。調湯服之好。

證。外有蝦蟆瘰。無核但腫。

瘰在陽明少陽經結核。按之走痛。

瘰或隱僻處。

勞瘵結核連數箇。在耳邊或聚或散也。

瘤等亦同。

治。宜瀉火散結。虛則補元氣。實則瀉陰火。補則十全散。下則玉燭散。化堅湯。

升麻一錢

葛根五分

漏蘆足陽

牡丹皮三錢去

當歸	地黃	連翹	黃耆
芍藥	肉桂	胡人	黍粘
羌活	防風	獨活	昆布
三稜	廣朮	人參	厚樸
黃連	陳皮	木香	大黃
大黃湯	大黃	皂角	甘草

歸三錢散
 生熟各三錢
 一錢生
 皮一錢護
 活一錢
 散結寒因三錢柴
 胡八錢
 散各五分
 樸腹脹
 黃便秘
 草炙

煎服。以麝香瓜蒌仁傅之。

法。未破核者。用火針針其上。即用追毒膏。點芋綫頭內針孔中。

又用杜牛膝搗傅縛其上。一日一易。如膿將盡。又用生玄參、地榆、滑石、寒水石、大黃等末。傅縛其瘡。又用白厄菜、墨草同縛其瘡。以寒水石、大黃、硝、龍骨、木香、檳榔末收口。後又用竹茹亦能長肉。白膏藥收後。紅不退。用北蠟蟾窠傅。如已潰久不收口。須用香附、燈燒鐵鉗。烙其腐處。盡後。依前治之。

方

五倍子

香白芷

為末。蜜調傅。

猴鼠糞 以黃泥爐煨。

去癰癰毒 皂角子五兩

大黑豆一斤

甘草二兩

冬青葉汁一斤

右煮汁乾爲度。常食不過二料。

四十發癰

因治。屬表者。因風挾熱痰。通經微汗之下之亦可。

屬裏者。因胃熱助手少陰心火入於手太陰肺也。故紅點如斑。生於皮毛之間耳。白虎瀉心調胃承氣從長而用之。

四十一丹疹

因熱與痰血熱也。夫斑痘疹丹皆惡毒血熱蘊蓄於命門。遇相火合起則發也。外有赤遊風天蛇漠丹疹癰斑其狀不同。因則一也。治。張歸之少陽相火。如遇熱之時以通經辛涼解之。如在寒之時以葛根升

麻。辛溫解之。如遇瘡癰黑陷。腹內喘滿者。熱而氣虛也。急以白虎解之。熱加參。參主喘也。主之。全以涼膈調之。

消毒湯

升麻根

羌活

藁本

細辛

柴胡

葛根

黃芩酒炒

生地黃

黃連

黃柏

連翹

紅花

當歸

蘇木

白朮

蒼朮

陳皮

吳茱萸

防風

甘草

又方

紫草

紅花子

白芍

胡荽

當歸

附方

剪刀草汁。調厚蠶沙傅之。

龍腦丸

治斑瘡倒靨。

猪心血調腦子成膏。以紫茸湯化。無腦用辰砂。

四十二金瘡

附油火刀
犬等傷

脈。金瘡出血太多。脈沉細者生。浮數實大者死。
治。沒藥散 治刀箭傷止血住痛。

定粉 風化灰各一 枯白礬三錢 乳香另研

沒藥一字即二分半也一銅 另研和勻糝之。

聖愈湯 治出血太多。

四物湯 人參 黃耆 煎服。

金瘡刀傷見血方 降真香末細貼之。石灰和人血作餅。旋乾貼之。

煨大黃石膏細研。桐油二分。水一分拌抹上。又淹灰搽傅亦良。

救苦散 治熱油刀斧傷火傷犬咬傷。

寒水石 油調塗上。

四十二傾仆

脈。傾仆內有血。腹脹滿。脈堅強者生。小弱者死。
證。瘀血爲病。或痰涎發於上。

治。同中風證。惡血歸內。留於肝經。脇痛自汗。治宜破血行經。

張論墜墮。使生心恙。痰涎發於上也。治宜補之。

凡杖打閃肭疼痛。皆血滯證。可下之。忍痛則傷血。

神應散 治瘀血大便不通。

大黃酒浸一兩

桃仁

紅花二錢

當歸三錢

瓜蒌根二錢

炮穿山甲二錢

柴胡引經

麝香透

熱酒下。

紫金丹 治骨節折傷疼痛。

炮川烏

炮草烏各一兩

五靈五錢

木鱉子去殼

黑牽牛錢各五

威靈仙

金毛狗脊

骨碎補

沒藥

麝香

紅娘子各二錢五分

地龍

烏藥

青皮

陳皮

茴香各五分

防風

自然銅燒碎四兩

禹餘糧碎四兩

酢糊丸。梧子大。每十九丸酒下。

脈因證治 卷四 四十四百藥中傷 四十五癲狂

人

三聖散吐之 治痰壅。

四十四百藥中傷

脈。浮。澀。而。疾。者。生。 微。細。者。死。 洪。大。而。遲。者。亦。生。
治法。在。上。吐。之。

解毒丸 治食毒物救人於必死。

乾板藍根 四兩

貫衆 衆去土一兩

青黛

甘草

蜜丸青黛良。

秘傳方

續隨子

甘草

五味子

茶清下一二碗。

四十五癲狂

脈。大。堅。疾。者。癲。病。 脈。大。滑。者。自。己。 脈。小。急。實。者。死。 循。衣。縫。者。死。 虛。而。弦。
急。者。死。 脈。虛。弦。爲。驚。 脈。沉。數。爲。痰。熱。

因痰火驚。血氣者。身之神也。神既衰乏。邪因而入。夫血氣俱虛。痰客中焦。妨礙不得運用。以致十二官各失其職。神聽言動。皆有虛妄。宜吐之而安。肺入火為譫語。肺主諸氣。為氣所鼓舞。火傳於肺。為之尋衣撮空。胃中大實。熱熏于心肺。亦能譫語。宜降火之藥。驚其神。血不得寧也。痰積鬱熱。隨動而迷亂。心神無主。有似邪鬼。可先吐之。後以安神丸主之。佐以平肝之藥。膽主驚故也。證。狂言譫語。鄭聲辨。

狂者開目。與人語。語所未嘗見之事。為狂也。譫語者。合目。自言。日用常行之事。為譫也。鄭聲者。身動無力。不相接續。造語出於候中。為鄭聲也。又蓄血證。則重複語之。

治痰者吐之。三聖散。火者下之。承氣湯。驚者平之。安神丸。

方總治 黃連 辰砂 二味降火 瓜 薑 南星

半夏 三味行痰 青黛 柴胡 川芎 三味平肝

桃仁承氣湯 治熱入血室發狂。

犀角地黄湯 治瘀血狂妄。因汗不徹。吐衄不盡。瘀血在內。面黃唇白。便黑脚弱氣喘。甚則狂悶。

犀角一兩 生地八兩 白芍三兩 丹皮

大黃二兩

脈大遲。腹不滿。為無熱。減之。煎服。

洪長伏三脈。諸癰發狂。以局方妙香丸。以針透眼子。冷水浸服之。弦細緩三脈併癰。李和尚五生丸。

治癰方 黃丹 白礬等分 研細。用楊樹火煨過。曲丸。

又方 川芎二兩 防風一兩

皂角 鬱金各一兩 礬一兩 黃赤脚蜈蚣各一

細末。蒸餅丸。梧子大。空心茶清下十五丸。

四十六驚悸

脈。寸口脈動而弱。動為驚。弱為悸。跌陽脈微而浮。浮為胃氣虛。微則不能食。此

恐懼之脈。憂迫所作也。寸口脈緊。跌陽脈浮。胃氣則虛。是以悸。肝脈驚暴。有所驚駭。

證。悸有三。驚悸。忪悸。痰飲閉於中脘。其證短氣自汗。四肢浮腫。飲食無味。心虛煩悶。坐臥不安。悸。心築然而動。

治。因血虛。肝主血。無血養則不盛。故易驚。心神忤亂。氣與涎結。遂使驚悸。血虛。治

宜硃砂安神丸。氣涎相結。宜溫膽湯。在心膽經。小兒驚搐。涎潮如死。乃母

胎時受怖。為腹中積熱。可墜其涎。鎮火清心等是也。悸因失志。氣鬱涎聚在心

脾經。治宜定志丸。失志者。或事不如意。久思所愛。

少陰心悸。乃邪入於腎。水乘心。唯腎欺心。火懼水也。治在於水。以茯苓導其濕。

四逆散調之。枳實、柴胡、芍藥、甘草是也。與驚悸不同。名亦謂之悸。故書以別之。

發搐痰飲為證。脈必弦澹。皆用下之。

外有肝痺。心肺瘧。言虛寒。皆驚。

硃砂安神丸 治血虛驚悸。

硃砂另研

黃連二錢

當歸五分

甘草五分

生地三錢 炊餅丸。

湯膽湯 治心膽性易驚。

半夏 竹茹 枳實二兩 茯苓五錢 陳皮三兩

甘草一兩

寒水石散 治因驚心氣不行。鬱而生痰。結為飲。

寒水石煨 滑石一兩飛各 甘草一兩 龍腦少許

熱則水下。寒薑下。

四十七疝癰

脈。寸口弦緊為寒疝。弦則衛氣不行。衛氣不行則惡寒。緊則不欲食。寸口遲緩。

遲則為寒。緩為氣之虛。虛寒相搏而痛。脈沉緊豁大者為虛。脈滑為疝。

急為疝。搏為疝。見於何部而知其何臟。

因證。蓋全在肝經。因濕熱在經。抑遏至久。又感外寒。濕被鬱而作痛。或大勞則火起于筋。醉飽則火起于胃。房則火起于腎。大怒則火起于本經。

火鬱之甚。濕熱便盛。濁液凝聚。并入血隧。流于肝經。爲寒所束。宜其痛甚。因痰飲積。流入厥陰。聚結成核。因瘀結其本經。因虛而感。或內火外寒鬱之。肝經與衝任督。所會聚於陰器。傷於寒則陰縮入。傷於熱。縱挺不收。屬木性速急。火性暴。而痛亦暴矣。

張論七疝。

寒疝因濕地雨水風冷處。使內過多。其狀囊結硬如石。陰莖不舉。或控睪丸而痛。宜以溫劑下之。久而無子。

水疝因醉過內。汗出遇風濕之氣。聚於囊中。其狀腎囊腫痛。如水晶或痒。搔出黃水。小腹或按之作水聲。陰汗。治宜逐水。

筋疝因房勞及邪術所使。陰莖腫或潰膿。或痛而裏急。筋速縮。或挺不收。或白物如精。或莖痛之極則痒。宜降火下之。

血疝因使內氣血流溢。滲入睪囊。留而不去。結成癰膿。多血。狀如黃瓜。在小腹兩旁橫骨約中。俗云便癰。治宜和血。

氣疝因號哭忿怒氣鬱而脹。哭怒罷則散。其狀上連腎區。下及陰囊。宜以散氣。

藥下之。小兒有此。因父精怯。故不治。

狐疝與氣疝。大同小異。狀如仰瓦。臥則入小腹。行之則出入囊中。宜逐氣流經之劑下之。

癰疝。因地卑濕。江淮間所生。其狀如升斗。不痒不痛。宜去濕之藥下之。女子陰戶突出。雖相類。乃熱不禁固也。

三因有四癰。

腸癰。因房室過度。元臟虛冷。腸邊腎系不收。墮入癰中。上下無定。此難治。

氣癰。因七情臟氣下墮。陰癰腫脹急痛。易治。

小癰。因濕氣得之。則腫脹其陰。易治也。

卵癰。因勞役坐馬。致卵核腫脹。或偏有大小。上下無常。此難治也。

外有婦人陰門挺出。亦名癰病。

丁香練實丸 已下出李

當歸酒制

炮附

川練

茴香已上各

剉好酒三升。同煮酒盡。焙乾作末。入下藥。

丁香

木

香各五

全

蝎個十三

玄胡索五錢

右同爲末。酒糊丸。梧子大。每服三十丸。至百丸。溫酒下。

參朮湯 治虛疝。脈豁大者是。

人參

白朮

山梔

香附

倉卒散 治寒疝入腹卒痛。小腸膀胱氣絞。腹冷重如石。出白汗。

山梔燒四十九個 生附子

酒煎二錢。

又一方 烏代附。

神應散 治諸疝心腹絞痛不忍。此方能散氣開結。

玄胡索

胡椒

或加茴香。酒煎二錢。

牡丹丸 治寒疝心腹刺痛。及血。

川烏炮去

牡丹皮四兩

桃仁炒去

桂枝各五兩

青皮一兩 蜜丸酒下。

桃仁湯 治癰疝。

大桃仁如法

茱萸

桂枝

蒺藜

青皮

白茯苓

檳榔

木香

海藻

三稜

莪朮任意加減

張用導水禹功猪腎通經等散下之。

秘方治諸疝。

枳實治痛

山梔

茱萸

橘子

山查去核積

桃仁加燕血

川烏同梔

桂枝必不用

荔枝核濕則加之

青皮

守丸

治癰要藥不痛。

蒼朮

南星

半夏

白芷散水 川芎

枳實

山查

應痛丸

治敗精惡物不出。絕成疝痛不忍。

阿魏二兩

酢和蕎麥麵裏火煨熟。

檳榔大者二個。刮空。滴乳香滿盛。將刮

下末用蕎麥拌作餅。慢火煨。

右細末。入硃砂一錢。赤芍一兩。同爲末。麵糊搜和丸。如梧子大。鹽酒下。

雄黃散 治陰腫大如斗。核痛不治。

雄黃一兩 明礬五錢 甘草五錢 煎洗。

又方 天蘿筋燒灰治疝妙。

四十八脚氣

脈。浮弦者風。濡弱者濕。洪數者熱。遲澁者寒。微滑者虛。牢堅者實。

結則因氣。緊則因怒。細則因悲。

入心則恍惚妄謬。嘔吐食不入。眠不安。左寸脈乍大乍小者死。

入腎則腰脚俱腫。小便不通。呻吟目額皆黑。衝胸而喘。左尺脈絕者死。

因濕之病。南方之人。自外而感。北方之人。自內而致。南方之人。當風取涼。醉房。久

坐濕地。或履風濕毒氣。血氣虛弱。邪氣併行。虛腠。邪氣盛。正氣少。故血氣澁澁。

則脾虛。虛則弱。病發熱。

四肢酸痛煩悶者。因暑月冷濕得之。

四肢結持弱者。因寒月冷濕得之。

北方之人。因漚醪醇酒之濕熱下注。積久而成腫滿疼痛也。治宜下藥。泄越其邪。

證治。因病脛腫。小腹不仁。頭痛煩心。痰壅吐逆。時寒熱。便洩不通。甚者攻心而勢迫。治之不可後也。

此壅之痰壅未成。當宜通之。調以黃柏、蒼朮類。

壅既成。當砭惡血。而後以藥治之。

攻心脚氣。乃血虛而有濕熱也。治宜四物加柏。

筋動轉而痛者。乃血受實熱也。治加桃仁、芩、連。

有痰疏注。加竹瀝、薑汁。南星是也。

李曰。濕淫所勝。治以苦溫。以苦辛發之。透關節勝濕爲佐。以苦寒泄之。流濕清熱爲臣。故主當歸拈痛湯。一方治之。

中脚膝論。自內喜怒憂思。寒熱邪毒之氣。注於脚膝。狀類諸風。謂之氣脚也。自外風寒暑濕。皆有不正之氣。中於脚膝。謂之脚氣也。實者利之。虛者益之。六淫隨六法以治之。七情隨六氣以散之。

三因論。乃風寒暑毒氣襲之也。風則脈浮。寒則脈緊。濕則脈細。表則脈浮。裏則脈沉。寒則痛。濕則重。暑則煩。風則行。隨其所中經絡而治之。太陽經則頭項腰脊背痛。六淫中之論同前。宜以麻黃左金湯。

麻黃 乾葛 細辛 白朮 茯苓

防風 防己 羌活 桂枝 甘草

陽明則寒熱呻欠。鼻乾腹脹。膝臘蹇。中腹外皆痛。六淫亦然。宜大黃左金湯。

大黃 細辛 茯苓 防己 羌活

黃芩 前胡 枳殼 厚樸 杏仁

少陽則口苦脇痛面垢。體無膏澤。頭目領銳痛。六淫亦同。宜半夏左金湯。

半夏 乾葛 細辛 白朮 茯苓

桂枝 柴胡 麥冬

三陽合病。寒熱關節重痛。手足拘攣冷痺。上氣嘔吐。下利。脈必浮弦緊數。合前三方以發之。

太陰腹滿。咽連舌急。胸膈痞滿。骨節煩疼。四肢拘急浮腫。宜六物附湯。

炮附 桂枝各四兩 甘草二兩 茯苓三兩 防己四兩

白朮三兩

少陰上氣喘急。小腹不仁。腰脊足心臑膈皆痛。六淫亦然。宜八味丸主之。

牡丹皮 澤瀉 茯苓 桂枝 香附

山藥 山茱萸 熟地黃

厥陰脇腰偏疼。陰器抵小腹夾臍諸處脹痛。一如中風。宜神應養真丹。

當歸 天麻 川芎 羌活 木瓜

熟地 芍藥

三因元併藏府不同故也。

當歸拈痛湯 治濕熱肢節煩痛。肩背沉重。胸膈不利。身痛胛腫。

羌活 炙甘草 黃芩酒炒 茵陳葉酒炒 當歸各五錢

人參 苦參酒洗 升麻 葛根 蒼朮各二錢

知母酒洗 防風 澤瀉各三錢 猪苓 白朮各五錢

煎服。

羌活導滯湯 治前證便溺阻隔。先以藥導之。服前方及此方。

羌活 獨活錢各五 防己三錢 大黃酒煨一兩 當歸三錢

麩炒枳實三錢

除溼丹 治諸溼。

檳榔 甘遂 赤芍 威靈仙 葶藶

澤瀉各一兩 乳香另研 沒藥各五錢 黑丑炒三錢 大戟半兩炒

陳皮二兩

脚氣方 治溼熱。

生地 黃柏酒炒 蒼朮鹽酒炒 白朮 川芎

防己 檳榔 犀角 甘草 木通

黃連 黃芩二味熱 竹瀝 薑汁二味痰 石膏熱時加

桃仁便實加 牛膝瀉加

食積流注方

蒼朮 黃柏 防己

南星 川芎 白芷 犀角 檳榔

龜板加血虛

血積轉筋方見論治攻心脚氣。

阮氏方 治膝痛脚骨熱。或赤腫行步難。

蒼朮四兩。泔浸一日夜。鹽炒黃柏四兩。酒浸一日夜。炙焦咬咀服。

四十九蟲附狐惑

脈。匿蟲蝕陰疔。脈虛小者生。急緊者死。

因證濕熱之生。臟腑虛則侵蝕。腹內熱。腸胃虛。蟲行求食。上唇有瘡曰惑。蟲

食其臟。下有瘡曰狐。蟲食其疔。亦有口瘡。非狐惑也。

治。集效方 木香 鶴虱炒 檳榔 訶子煨

蕪荑炒 炮附 乾薑各七錢 大黃五錢

烏梅或加連栢

右蜜丸。陳皮湯酢湯任下。

化蟲丸 治蟲即化水。

硫黃一兩 木香五錢 蜜陀僧三錢 炮附一箇

右先附末酢一升熬膏入藥和丸。菴豆大。荊芥茶清下二十丸。

秘方 治吐蟲 黑錫炒成 檳榔末 茶飲下。

又方 川椒 酒糊丸治蟲。

又方 炒鷄子 白蠟塵 治寸白蟲。酒糊丸妙。

瀉心湯 治惑 苦參湯洗之 治狐。

五十喉痺

因熱內結。雖有蛾閉、木舌、纏喉、走馬之名。火則一也。論咽與喉。會厭與舌。同在一門。而用各異。喉以候氣。故通于天。咽以納食。故通于地。會厭管乎其上。以司開闔。掩其咽。其食下不掩之。其喉錯。必舌抵上齶。則會厭能閉其咽矣。四者相交。爲用缺一則飲食廢而死矣。及其爲病皆火也。夫手少陰君火。心主之脈。手少陽相火。三焦之脈。二火皆主脈。並絡于喉。氣熱則內結。結甚則腫脹。腫脹甚則痺甚。痺甚則不通而死矣。至如噤乾痛。咽領腫。舌本強。皆君火之爲也。唯喉痺

急速。相火之爲也。

證。咽喉物之處。咽腫則不能嚥。或嘔吐咯傷。或多飲啖。痰熱皆至。咽系乾枯也。

喉聲音出入之處。藏熱則腫。其發暴腫閉塞。或心虛寒。有懸癰生在上齶。俗名鵝也。咳而聲嘶。喉破。俗名聲散也。

治法。微以鹹栗之。甚以辛散之。痰結以苦吐之。否則砭出血。人火以涼治之。龍火以火逐之。涼劑以熱服之是也。宜刺少商出血。

秘方

樸硝

牙

硝各研

青魚膽

右以膽放二硝上。乾方研爲末。竹管吹入喉中。痰出卽愈。

五匙散 治風熱喉痺及纏喉風。

樸硝五錢

礞砂

五錢

腦

子三錢

僵

蠶

以竹吹末入喉中。

神効散 治熱腫語聲不出。

荊芥穗

荳

麻生去皮另

蜜丸。皂子大。嚙含化。

雄黃解毒丸

治纏喉風及喉痺。倒仆失音。牙關緊急。不省人事。

雄黃一錢 鬱金 巴豆去皮油

酢糊丸。菉豆大。熱茶清下一丸。吐則止。

蜜附子 治腑寒。咽門閉不能嚥。

大附去皮臍切大片。蜜塗炙黃。含嚥津。

又方 龍膽礬包烏梅肉內。以綿裹含。

龍火拔毒散 治纏喉急證。先以鍼出血為上策。緩以丹敷。

陽起石煨 伏龍肝各三錢 新水埽之。

又方 白瑞香花根。研水灌之。

秘方治痰。其證皆因痰也。以鵝毛刷桐油探吐之。皂莢灰亦可吐。 殭蠶研薑

服亦可。 生艾汁亦可。

五十一口

因證。脾熱則甘。 膽熱則苦。 口苦亦有肝虛寒者。

治三黃丸治甘。 柴胡湯治口苦。及謀慮不決。

柴胡湯加麥冬、棗仁、地骨皮、遠志。

五十一舌

脈。心脈系舌根。脾脈係舌旁。肝脈腎脈絡舌本。

因證。因風寒所中。則舌卷縮而不言。七情所鬱。則舌腫滿不得息。肝壅則血

上湧。心熱則裂而瘡。脾熱則滑胎。是虛熱。心經飛揚上竄。脾閉則白胎

如雪。脾熱則舌強。舌卷而卵縮者。厥陰絕也。死。

治。金沸草散 治風寒傷心脾。令人寒熱齒浮舌腫。

金沸草 荆芥四兩 前胡 麻黃各三 甘草

半夏一兩

升麻柴胡湯 治心脾虛熱上攻。舌上生瘡。舌本強。兩頰腫痛。

升麻 柴胡 白芍 山梔 木通一兩

杏子 大青 黃芩三錢 煅石膏二兩

舌腫破 鍋底煤即鍋底烟酢鹽傅。

出血如泉。
白胎語澁。

白膠香
薄荷汁

五倍子
白蜜

牡蠣
薑片搗傅之。
末糝。

五十三日

因風熱。血少。經曰。目得血而能視。肝血不上榮也。神勞。目者。神氣之主。勞則

魂魄散。不能相得。腎虛。水精不上奉也。

證治。在腑則爲表。當除風散熱。在臟則爲裏。宜養血安神。如暴失明。昏澁翳膜

眵淚。斑入眼。皆表也。風熱也。宜發散以去之。

如內障。不欲視物。內障見黑花。瞳散皆裏也。血少神勞。腎虛也。宜養血補水安
神以調之。

斑入眼。此肝氣盛而發在表。瞳子散大。皆辛熱之爲也。辛主散。熱乘之。當除風
熱涼血益血。以收耗散之氣。以芩連苦寒。除邪氣之盛。爲君。歸身地黃養血涼
血爲臣。五味酸寒。體浮收瞳散。地骨皮。天冬。瀉熱補氣。
凡目暴赤腫。以防風。黃芩爲君。以瀉火。黃連。當歸。爲佐。以和血。

凡目疾暴赤腫。以防風、羌活、柴胡、升麻、白芷、芩、連、甘草、當歸、白睛紅。加白豆蔻少許。

凡日久病昏闇。以熟地、歸根爲君。以羌活、防風、甘菊之類雜佐之。

撥雲湯

羌活

防風

半錢

藁本

川芎

荊芥一錢

葛根

細辛

柴胡

升麻五分

知母

歸身

川柏

甘草

黃耆各一兩

內障是脾虛火盛。上加下藥

人參

五味

白芍

茯苓

白朮

濕熱加下藥。

黃連炒

黃芩

生地

睛痛加歸地黃。

胸中不利。加槐子。

赤翳加羚羊。

府祕加大黃。

百點膏

黃連水一大碗。煎至半。加歸六錢。麝

仁去皮尖

防風八錢

右熬滴水不散。加蜜少許點之。蔓荊

椒眼

地黃

甘草

荊芥

麻黃

升麻

隨所長加之。

春雪膏 點眼。

礬硝置生腐上蒸待流下。瓦器接之。

地黃丸 治不能遠視近視。此大除風熱。

生地

天門冬各四

炒枳殼

甘

菊各二

蜜丸。茶酒任下。

局方定志丸 治不能近視。反能遠視。

人參

遠志

菖蒲

白茯苓

蜜丸。

瀉青丸

治風熱。

熟乾地黃丸

治血少安神。

駐景丸

補腎水。

車前子

兔絲子

熟地黃

各五

槐子散

治體肥氣盛。風熱上行。目昏澁。

槐子

黃芩

木賊

蒼朮

末之茶下。

桔梗丸

治太陽衛虛血實。瞳人腫痛眼黑。肝風盛。

桔梗一斤 牽牛頭末三兩 蜜丸水下。

神仙退翳丸 治一切翳暈內外障。昏無睛。累効。

當歸酒洗 川芎 犀角屑 枳實 川連

蟬退 瓜蒌根 薄荷 甘菊 蛇退

蜜蒙花 荆芥與甘草煎三味 地骨皮洗三錢 炒白蒺藜 羌活

地黃用乾酒一兩 木賊便一兩半去節童

右末。煉蜜丸。米飲下。婦人氣旺者。木香湯下之。

家珍方 治眼梢赤。

川連 白礬三錢 銅綠五分 蜜陀僧一錢 輕粉少許

末貼之。

又方 黃丹 白礬

驗方 治痘後目上翳。

穀精草 蛇殼 菴豆殼 天花粉

右等分末。粟米泔浸煮。蜜柿乾爲度。食之。

羊肝丸 治一切目病。不問障盲。

白乳羊肝一具。竹刀刮去膜。

黃連一兩

甘菊

防風

薄荷去梗 荊芥

羌活

當歸

川芎 各三錢

右爲末。羊肝搗丸。漿水下。

爛翳驗方

茜根燒灰。燈草點之。須臾大痛。以百節草刮去之。

七寶膏

珍珠

珊瑚

甘

石 三味煨以連

石沙

腦子

麝香

麝仁 去殼各一錢

研細點之。

五十四耳

因風熱氣虛火升。

腎寄竅於耳。

證治。風毒耳痛。

全蝎一兩

生薑二兩

切作四方塊同炒。去薑末

之。湯點停耳。

耳膿出用

桑螵蛸 火炙

麝香 五厘

糝之。又加枯礬吹之良。

蟲入耳中

麻油灌 又

貓尿灌耳內好。

五十五鼻

因證。鼻為肺之竅。同心肺上病而不利也。有寒有熱。寒邪傷於皮毛。氣不利而壅塞。熱壅清道。

酒鼓鼻乃血熱入肺。鼈鼻息肉乃肺氣盛。鼻淵。膽移熱於腦。則辛額鼻淵。治寒邪傷者宜先散寒邪。後補衛氣。使心肺之氣交通。宜以通氣湯。

羌活

獨活

防風

葛根

升

麻錢各三

川芎一錢

蒼朮

炙草錢各三

黃耆四錢

白

芷一錢

黃連

黃柏

酒鼓鼻方

四物湯

黃芩酒炒

紅花

水煎服

又方

乳香

硫黃內以蘿蔔

輕粉

烏頭尖

酥調傅

又方

鴨嘴膽礬傅

鼈鼻息肉

枯礬研為面脂。綿裹塞鼻。數日自消。

又方

瓜蒂末綿囊裹塞亦可。

木通

細辛

炮附子

蜜和綿裹內鼻中亦可。

防風通聖散加好三稜

山萸肉

海藻並用酒浸炒末每一錢五分。

鼻淵

薄荷

黃連二錢

通聖散一兩

孩兒茶服。

五十六齒

因證。夫齒乃腎之標。骨之餘。

上齦隸於坤土。足陽明之貫絡也。下齦隸於庚金。手陽明之貫絡也。

手陽明惡寒飲而喜熱。足陽明喜寒飲而惡熱。腎衰則豁。腎固則堅。

大腸壅。齒乃爲之浮。大腸虛。齒爲之宣露。熱甚則齒動齦脫。作痛不已。寒

邪風邪客於腦。則腦痛。項筋急。粗露疼痛。蚘餌則缺少而色變。痒痛。

治。

羌活散

麻黃去根

羌活半錢

防風半錢

細辛五分

升麻

柴胡五分

當歸

蒼朮五分

白芷三錢

桂枝

黃連

骨灰三錢

右先以湯嗽口淨擦之。

牙疼方

土蒺藜半兩

青鹽三錢

漿水二碗煎熱服。

又方

烏頭

熟艾

葱三株

川

椒十數粒

右濃煎嗽。有膿痰出而安。

治

蟲散氣

草蓐撥末

木鱉肉

右同研搗鼻。

治

風氣走疰痛。藁本

剪草

細辛

熱嗽愈。

治

骨槽風

皂角不蚰子

杏仁燒存性

右每味一兩。入青鹽一錢。搗用。

治

風蚰牙

以北棗一枚去核。入巴豆一粒。合成。文武火炙如炭。放地上良

久。研細。以紙撚入蚰孔十次。

五十七結燥

因。火邪伏於血中。耗散真陰。津液虧少。夫腎主大便。腎主津液。液潤則大便如常。證。小腸移熱於大腸。為虛瘕。為沉虛瘕。是便澀閉也。

脈治熱燥。有云脾脈沉數。下連於尺。臟中有熱。亦有吐瀉後。腸胃虛。服燥熱

藥多者。宜承氣湯下之。

風燥。有云右尺浮也。內肺受風。傳入腸中。宜麻仁丸。

陽結。脈數大而實。宜苦寒類治。

陰結。陰燥欲坐井中。二腎脈搖之必虛。或沉細而遲者是也。

如有陰證。煩躁脈堅實。陽藥中少加苦寒。以去熱燥。有年老氣弱。津液不足而

結。有產婦內亡津液而結。二證並宜地黃丸。

大便閉。小便澀數。謂之脾約。約者脾血耗燥。肺金受火無所攝。脾津液故竭。理

宜養血潤燥。

有產婦便秘。脈沉細。服柏知母附子而愈。

外有脚氣。虛寒氣實皆相似。亦大便不通。

腎惡燥。急食辛以調之。結者散之。如少陰不得大便。以辛潤之。太陰不得大便

以苦瀉之。如食傷腹滿。腹響是也。陽結者散之。陰結者熱之。

潤腸丸 麻仁 桃仁去皮尖 羌活 歸尾

大黃煨各半兩

除二仁。別研餘味。共搗火枯蜜丸。梧子大。湯下。

如不大便。邪氣盛急。加大黃酒制。

如血燥而大便乾燥。加桃仁、大黃酒制。

如風結燥。大便不行。加麻仁、大黃。

如風瀼。加皂角仁、秦艽、大黃。如脈瀼身

覺有短氣。加郁李仁、大黃。

如陰結寒證。加乾薑、附子。有云大便不通有五證。

熱、冷氣、風濕、尺脈伏也。宜溫補之。

風寒人產婦秘有實。能飲食。小便赤。為實。實者秘物也。麻仁七宣等主之。見前

不能

飲食。小便清。為虛。虛者秘氣也。厚朴湯主之。

厚朴 半夏

神麴

甘草三兩

白朮五兩

枳實

陳皮一兩

五十八痔漏

因證。因蟲就燥也。乃木乘火勢而侮燥金。歸於大腸為病。皆風熱燥濕為之也。

蓋腸風痔漏總辭也。分之則異。若破者。則謂之漏。大便秘澀。必作大痛。此由風熱乘食飽不通。氣逼大腸而作也。受病者燥氣也。為病者胃濕也。胃刑大腸則

化燥。化以乘燥熱之實。勝風附熱而來。是風燥濕熱四氣而合。故大腸頭成塊。濕也。大痛者風也。結燥者主病兼受火邪也。不通者熱也。治法以苦寒瀉火。辛溫和血。潤燥疏風止痛。

祕方 涼血為主。

四君子

四物

黃

芩涼大腸

枳

殼寬大腸

槐

角涼血生血

升麻

秦艽白朮丸

秦

艽去蘆

皂

角各一兩去皮燒存性

白

朮五錢

當

歸半兩酒洗

桃

仁一兩去皮尖

榆破三錢

枳

實熬炒

澤

瀉各半兩

大

黃四錢

麵糊丸。米湯下百丸。空心服。以膳壓之。

氣

滯加檳榔。木香。濕熱勝加黃柏。

一云。凡痔漏。蒼朮防風為君。甘草白芍為佐。

蒼朮澤瀉丸

蒼

朮四兩

枳

子

澤

瀉各二兩

地

榆

皂

角

飯丸。

淋洗用。

天仙子

荊芥穗

川

椒

蔓荊子

煎洗秘方。

五味子

樸硝

蓮房

桑寄生

先薰後洗。

傅腫。

木鱉子

五味子

為末調傅。

腸風塞藥。

爐甘石

牡蠣粉

痔漏方

好臘茶

腦子

同研津調。紙花貼上。除根用

後方。

又方

白

礬生枯二錢乳

香三錢

真香油同研為膏。紙花貼。

如便秘。枳實當歸湯下三黃丸。

皂角散

治痔漏脫肛。

黃牛角鯁

一個

蛇退一條

皂

角五個

川山甲

右並切。入甕瓶泥固濟候乾。先以火燒烟出。方以大火煨紅。出冷研細。胡桃

酒下。臨臥引出蟲。五更却以酒下二錢。

脈痔方

血自肛門邊另作竅。

烏

頭炮去

黃

連各一

又方亦妙。

槐花

荆芥

石菖蒲

各一

酒痔連丸 黃連一味。酒浸。酒煮。酒丸飲下。

腐痔核即爲水。 礬 砂 煨 輕 粉

爐甘石 煨

右以朴硝淬洗辰砂。或加信煨。傅外四圍。點核上。

貼痔 麝香、樟腦、朱砂研入山田螺內。待成水。抹頭不拘遍數。以乾爲度。

治酒痔下血不止 乾絲瓜一枚。連皮子燒存性爲末。酒下二錢。

痔血不止。檢漆根灰。空心下。

木槿散 治痔專封口。能乾。木槿花。八九月採陰乾。用葉杵傅亦可。

又方 當 歸 一 兩 黃 連 二 兩 烏 龜 一 個 酒 煮 乾 日 乾

爲末。蜜丸。皂子大。

治脫肛方 理省藤 桑白皮 白 礬 煎洗自收。因

治玉莖挺長。亦濕熱。小柴胡加黃連。有塊加青皮。外用熱絲瓜汁調五味子傅。

五十九婦人產胎

脈。平而虛者。乳子。陰搏陽別者。姙子。搏者近於下。別者出於上。血氣和調。陽施

陰化也。

少陰脈動甚者妊。少陰心脈也。尺中按之不絕者妊。三部脈浮沉正等。按之無絕者妊。妊娠初時。寸微小。呼吸五至。三月而尺脈數。脈滑疾重以手按之散者。蓋三月也。脈重手按之不散。但疾不滑者。五月也。寸微關滑尺帶數。流利往來并雀啄。是妊。左沉實疾大。皆為男。縱者主雙。右沉實疾大。皆為女。橫者主雙。脈浮腹痛。痛引腰脊。為欲生也。脈一呼三至。曰離經。沉細而滑亦同。尺脈轉急如切繩者。皆便生也。妊三月而渴。脈反遲。欲為水分。復腹痛者。必墮。妊五月六月。脈數必壞。脈緊必胞滿。脈遲必水壞為腫。妊六七月。脈弦發熱惡寒。其胎踰腹。腹痛。小腹如扇。子臟開故也。當溫之以附子。妊六七月。暴下斗餘水。必倚而墮。妊七八月。脈實大牢強弦者。生。沉細者死。妊十月。足身熱。脈亂者吉。少陰脈浮而緊。緊則疝瘕腹中痛。半產而墮。傷浮則亡血。絕產惡寒。脈微澁為無子。脈弦大為無子。血氣虛不足之故也。新產脈沉小滑者。生。實大強急者。死。沉細附骨者。生。炎疾不調死。新產因得熱病。脈懸小。四肢溫者。生。寒清者。死。新產因傷寒中風。脈實大浮緩者。生。

小急者死。脈得浮緊。當身痛。不痛腹鳴者。當陰吹。寸口浮而弱。浮爲虛。弱無血。浮短氣弱有熱。跌陽浮而濇。浮氣喘。濇有寒。少陰微而弱。微少血。弱生風。微弱相搏。陰中惡寒。胃氣不泄。吹而正喧。此穀氣之寒也。膏髮導之。少陰滑而數。陰中必瘡。少陰脈弦。白腸必挺核。少陰浮而動。浮虛動痛脫下。因證治。胎墮。因虛而熱。轉胞。乃血虛有痰。胎漏。逼胞致小便不利。溺出不因。知時因痰。胎避而下。因血氣不能升。四物加貝母滑石。痰加二陳。惡阻因痰血相搏。半夏湯主之。妊娠腹脹。乃氣不利。而虛有熱。炒枳殼、黃芩、白朮。妊娠寒熱。小柴胡去半夏。胎痛乃血少。四物香附紫蘇湯。安胎大妙。胎衣不下。或子死胎中。或血衝上昏悶。或暴下血胞乾不生。半夏一兩半。肉桂七錢半。大黃五錢。桃仁三十粒。去皮尖。先服四物三兩。次服煎湯。薑煎不效。再服。又半夏白蘇丸之。

下死胎 肉桂二錢 麝香五分
又方 朴硝半兩 童便下

欲墮方 肉桂一兩 瓜蒌二錢兩 牛膝一兩 瞿麥半兩

絕產方 蠶種紙一尺燒灰。酢湯調服。永不孕產。

難產乃敗血裹其子。麝香一錢 鹽豉一兩 青布裹燒令

紅。槌爲末。秤錘燒紅。淬酒下一錢。

又 百草霜 香白芷 伏龍肝單用 童便酢調下。

未下再服。 貝母 白疾藜 活石 葵子

並治之。

產後陰脫。乃氣血下溜。 四物 蝟皮各半 牡蠣煨

黃芩二兩 或加升麻飲下。 蛇床子布裏熨妙。 烏賊骨

硫黃 五味子 共末糝患處。

產後血暈因暴虛。素有痰飲。 瘀血隨氣上攻。

芎歸湯 治暴虛。童便下。 治瘀血。荆芥下。

清塊散 治虛。 澤蘭葉 人參一兩 荆芥一兩

川芎 當歸半兩 溫酒灌下。

五靈脂

荊芥

童便下。

鹿角灰 酒下。

半夏茯苓湯 治痰飲。

牡丹散

牡丹皮

大黃_蒸

芒硝一兩 冬瓜子_{半合}

桃仁_{二十}

水煎服。

浮腫是胎前宿有寒濕。

茯苓

白朮

白芍

當歸

陳鯉魚

如法。

又名胎水。俗名子腫。如腫滿狀。

產後因敗血化水。或血虛氣滯。

喘急因營血暴竭。衛氣無主。獨聚於肺。此名孤陽絕陰。必死。因敗血上薰於

肺。奪命丹主之。因傷風寒者。旋覆花湯主之。

產後不語。因敗血迷心竅。產後口鼻黑氣起及衄。因胃氣絕肺敗。氣消血散。

亂入諸經。却還不得死矣。

子煩二火爲之。病則苦煩悶。

麥門冬

茯苓

黃芩

防風

竹葉

心痛。因宿寒搏血。血凝其氣。

五靈脂

蒲黃

醋下。

子癇缺

漏阻。因事下血。胎乾不動。奔上搶心。腹中急迫。

返魂丹

達生散

天仙方

產婦臨月未誕者。凡有病。先以黃芩、白朮安胎。然後用治病藥。肌熱者。黃芩、

黃連、黃耆、人參。腹痛者。白芍藥、甘草。感冒依解利。

產後諸病。忌用白芍。以黃芩、柴胡主之。內惡物上衝。胸脇痛者。大黃、桃仁。

血刺痛者。當歸。內傷發熱者。黃連。渴者。茯苓。一切諸病。皆依前法。唯渴

者。去半夏。喘咳去參。腹脹忌甘草。產後身熱血證。一同傷寒。若傷寒

內有痛處。脈弦而健。宜解傷寒。血虛無疼。脈弱而濇。宜補其血。

六十帶下

脈因。濕熱結於肺。津液涌溢。入小腸爲赤。入大腸爲白。然任脈自胞上過。帶脈貫於臍。上衝任督三脈。同起而異行。一源而三歧。皆絡帶脈。統於篡戶。因餘經往來遺熱於帶脈之間。熱者血也。血積多日不流。從金之化。卽爲白淫。治法同濕

證。以十棗、禹功降火流濕之劑良矣。

因痰積下流。滲入膀胱。肥人多有之。二陳湯加升提為主。

證。治三陽其氣俱欲竭。血海將枯。滑物下流。其有一切虛寒之證。脈洪大而澀。按

之全無。宜以溫養之。

李先生之酒煮當歸丸。治此證。血虛多加四物。氣虛多加參朮。滑甚者。以龍骨、

赤石脂澀之。

外有蟲。唇瘡。亦淋露白汁。

小胸丸 治濕熱帶下。下之。苦練丸調之。

苦 練酒浸 茴 香炒 當 歸等分

酒糊丸。梧子大。酒下。

腰腿痛加四物四兩。羌活防風一兩。虛加人參、黃耆、甘草。或加白芍。

酒煮當歸丸 治一切虛證。上中下元氣俱竭。噦嘔不止。胃虛之極。脈洪

大無力。按之空虛。或不鼓。皆中寒之證。

當 歸一兩 茴 香兩半 黑 附炮 良 薑各七

右四味剉細。以酒一升半。煮至酒盡。焙乾炒黃。

鹽 丁香 苦 練生 甘草 炙各 全 蝎 三錢

柴 胡 二錢 升 麻 一錢 木 香 一錢 玄 胡 四錢

右九味。同前酒煮。四味俱末。酒煮麵糊丸。空心淡酢湯送下。

固真丸 治臍腹冷痛。目中溜火。此皆寒濕乘其胞內。汁輕伏火。

白石脂 一錢 飛研細末 白 龍 骨 一錢 以二味 乾 薑 炮四錢

黃 柏 半錢 因柴 胡 一錢 本經使 當 歸 一錢 和 白 芍 半錢 導之

人 參 黃 耆 加甚

右白石、龍骨水飛研細。外餘同極細。水煮麵丸。鷄頭大。日乾。空心湯下。以饅

壓之。忌生冷油膩濕麵。血海將枯。加白葵花七朵。郁李仁潤躁而滋液津。

不思飲食。加五味子。

衍義方 治白膿帶下。此腸胃有膿也。去盡膿自安。

紅 葵 根 白 芷 赤 芍 藥 白 礬 蠟 丸 米 飲 下

又方 治白帶白濁。以黃荊子炒焦為末。酒下。

張用瓜蒂散。吐寒痰升氣。導水丸。下濕熱。甘露散調之。利濕熱。

燥濕痰方 治肥人。

海石 半夏

南星 治痰

黃柏 治涇

蒼朮 燥涇

川芎 升之 椿皮

香附 調氣

牛膝 風痛

刮熱方 治瘦人。

黃柏 相火 滑石

椿皮

川芎

黃連 性燥

滑者。加龍骨。加石脂。滯者。加葵花。血虛。加四物。甚用吐下。吐用二陳加蒼朮。下用白朮。調治神祐丸。

六十一經候

脈。經脈不行者。血生於心。因憂愁思慮則傷心。心氣停結。故血閉不行。左寸沉結。宜調心氣。通心經。使血生而自通。或因墮胎。或產多。其血先少而後不通。此為血枯。脈兩尺弱小。宜生血。因證。血隨氣行。結為塊。日漸長。宜散之。

久發盜汗。致血脈乾枯。而經不通。宜補血。是汗出於心。血生於心。血與汗出也。久患潮熱。則血枯燥。蓋血爲熱所消。寒熱去。則血自生。脾胃不和。飲食減少。則血不生。血者。飲食所化。經云。二陽之病發心脾。女子不月。血爲氣引而行。血之來而先有病。皆氣之患也。來而後有病者。皆血之虛也。病出意外。皆血之熱也。治。將來作痛。乃氣實也。桃仁、紅花、香附、枳殼、川連。不及期者。乃血熱也。四物加川連。過期有二。乃血少與痰多也。血少。芎歸參。紫黑成塊。加連。痰多色淡也。肥人多有。二陳加蒼朮、香附、川芎。閉而不行。乃虛而熱。來成塊。乃氣之滯。錯經妄行。乃氣之亂。

六十一山崩漏

脈。洪數而疾。漏血下赤白。日下數升。脈急疾者死。遲者生。緊大者死。虛小者生。因治。熱血熱則流。虛虛則下溜。蓋陰虛陽搏謂之崩。由脾胃有虧。氣下陷於

腎與相火相合。濕熱下迫。脈洪而疾。先見寒熱往來。心煩不得眠。治宜大補脾胃而升其血氣。蓋心氣不足。其火大熾。在於血脈之中。致脾胃有虧。火乘其中。形容似不病者。此心病也。法治同前。微加鎮墜。心火之藥。補陰瀉陽。經自止矣。蓋腎心真陰虛。不能鎮守。包絡相火。故血走而崩也。是氣血俱虛。爲大寒之證。輕手其脈數疾。舉指弦緊。或澁。皆陽脫也。陰火亦云。或渴。此皆陰燥。宜溫之補之。升之。

脾胃者。血氣之根本。周榮滋身。心者血之府。脈者人之神。俱不足則生火。故也。治。升陽散火。除濕。羌活。防風。升麻。柴胡。川芎。

涼血瀉相火。生地。黃連。黃柏。黃芩。知母。

和血補血。酒洗當歸。黃耆。

胃口客寒。當心痛。加草豆蔻。炒麴。氣短。加參朮。冬寒。加麻黃。桂枝。

血氣俱脫。大寒證。加附子。肉桂。

不止。加阿膠。艾葉。或加丁香。乾薑。

四物加荊芥穗。髮灰。治血不止如神。單味蒲黃炒黑亦妙。

治標方 治其標。凡藥須炒黑。血見黑則止。白芷湯調棕櫚灰。後用

四物湯加薑調治。五靈脂末亦可。凌霄花末酒下。

治本方 四物湯。黃連熱則加之。參耆虛加之。乾薑寒則加之。

黃芩熱則加之。

胎漏方 血虛有熱。

地黃生一兩 白朮一兩 黃芩炒

枳殼兩各半 煎湯調下地黃末。

六十三小兒證

脈入至者平。九至者傷。十至者困。緊為風癰。沉為乳不消。弦急客忤氣。

沉而數者。骨間有熱。脈小。大便赤青。飧泄。手足溫者生。寒者難已。

證有四。曰驚。疳。吐。瀉。病其頭毛皆上逆者死。汗出如珠。着身不流者死。

因治有二。曰飽煖。小兒十六歲前。稟純陽氣。為熱多也。

小兒腸胃常脆。飽食難化。食則生積為痰。肝則有餘。腎尚不足。肝病亦多也。

張皆歸之濕熱。常以牽牛。大黃。木通為丸。以治諸病。驚因熱痰。主急當瀉。降

火痰丸。養血湯下。因脾虛。主慢當補。朱砂安神丸。參朮湯下。

疳因土熱也。

川連

去熱二錢

胡黃連去果半錢

阿

魏去肉積酢

神

麴錢各一

丸如米大

啼因肝熱。薑汁炒川連甘草竹葉。煎服。

吐瀉脾虛。斑疹是火。與前丹疹條下同。

夫惡血留於命門。伏於一隅。待氣虛血虛。脾損相火生焉。二火交熾。煎熬太陰。

其證呵欠寒熱噴嚏。手足梢冷睡驚。俱屬少陽相火。少陰君火顯證。目吐吐瀉。

者邪出也。即吉。宜消毒解火。大便不利。當微利之。身溫者順。身涼者逆。

痘同疹論。切忌熱藥。亦勿泥。

宜分氣血。虛則補之。氣虛四君。血虛四物。吐瀉少食。為裏虛。陷白。

倒靨。面灰白。為表虛。不吐瀉能食。為實。宜解毒芩連等是也。實則更補。必結。

癰膿也。

解毒方

絲瓜

升麻

白芍

甘草

糖

黑豆

犀角

朱砂

單用絲瓜煮

湯亦可。

血痢三黃湯。食積利用

炒麴

蒼朮

白芍

黃芩

白朮

甘草

陳皮

茯苓

下保和丸。

治下兒蟲。用胡黃連

川連

蕪夷

山查

神麴

青陳皮

蘆薈和丸。

急慢驚風 辰砂一顆

全蝎一枚

生犬血快研服。

六十四雜證

濕熱相火病多。土火病多。

氣常有餘。血常不足。

肥人血多濕多。

瘦人氣實

熱多。

白者。肺氣弱。血不足。

黑者。腎氣有餘。忌黃耆。

熱傷血。不能養筋。故

為拘攣。

濕傷筋。不能束骨。故為痿弱。

氣屬陽。無寒之理。下用補相間。勞病忌寒藥。此東垣之旨也。

寒不得熱。是無火

也。

熱不得寒。是無水也。

肺癰非吐不可。

辛苦饑飽疼痛。皆傷血。服藥之力峻。須用酸收。指甲捲。是血少不養筋。身如被打。濕傷血也。亦有血虛而痛。臍病責臟用。臟病責腑用。氣血弱。遠枳殼。以其損氣也。血盛。忌丁香。以其益氣也。

治病先調氣。病分氣血陰陽。晝增夜靜。是陽氣病。而血不病。夜增晝靜。是陰血病。而氣不病。夜靜日惡寒。是陰上溢於陽。日夜並惡寒。是陰部大盛。兼有其陽。當瀉其寒。峻補其陽。夜靜日熱。是陽盛於本部。日靜夜惡寒。是陰盛於本部。日安夜躁煩。是陽氣下溜於陰中。當瀉其陽。峻補其虛。日惡寒。夜煩躁。為陰陽交。飲食不入必死。傷寒中暑。與傷飲食一般。人火正治。龍火反治。

諸病有鬱。治之可開。惡心。有熱有痰有虛。悲者。火乘金。陽絕則陰虧。陰氣若盛。陽無暴絕之理。虛勞不受補者死。諸病發熱者。風寒暑濕燥火七情。皆能發熱。寒濕同性。火燥同途。非也。寒宜溫之。濕宜燥之。火宜降之。涼之。燥宜潤之。諸病尋痰火。痰火生異證。

診脈觀形察證。三者殊途。不可執一。諸病先觀胃氣。

六十五雜治

惡寒。有濕痰積中。脈沉緩。抑遏陽氣。不得外泄。身必惡寒。宜江茶入香油薑汁。吐其痰。以通經散。去麻、硝、黃。加歸地黃。伏脈有熱。甚而血虛。亦惡寒。脈沉而瀋。宜四物倍地黃。朮、耆、柏、參、甘草。

戰慄有熱。一陽發病。少氣善咳。善泄。其傳為心掣掣動也。子母傳故泄。理中主之。勞風法在肺下。使人強上冥視。勞生熱。唾出若涕。感風惡風而振寒。肺主皮毛。宜通經散。加半夏歸。

痺氣乃陰氣盛而血不榮。故身寒如水中。皆虛寒之證。宜薑附。五寶五虛。脈盛脈細心。皮熱皮寒。肺。腹脹飲食不入。脾。悶瞖氣少。肝。

前後不通。泄利前後腎。

陰滯於陽。有作勞而冷飲酒醉。次日膈痛似飢。過飽。遂成左脇痛有塊。脈細澀。沉數。服韭汁、桃仁、童便等安。又有如前左乳痛有核。服石膏、白芷、乾葛、瓜薑、蜂房等。

陽滯於陰。有事不如意。紐如注。脈浮數。重而大且芤。四物加萱草薑汁飲之。有逃難飲食下血。脈沉澹似數。以鬱金、芎、芷、蒼、芍、葛、香附。右腎屬火。補之以巴戟、杜仲之類。左腎屬水。補之以地黃、山茱、黃柏之類。

六十六臟證

肝胃脘當心而痛。上支兩脇。肝經膈咽不通。飲食不下。土衰病甚。則耳鳴眩轉。目不識人。善僵啞仆。裏急續戾。脇痛嘔泄。令人善怒也。虛則目無所見。耳無所聞。善恐。如人將捕之。

心胸中熱。噤乾。肱滿。皮膚痛。寒熱咳喘驚。或狂妄。一切血證。胸中痛。脇支滿。膺背肩胛間痛。虛則胸腹大。脇下與腰背相引而痛。

脾跗腫骨痛。陰痺。腰脊頭項痛。大便難。積飲痞膈。霍亂吐下。飧泄腸鳴。脾熱之主虛。

肺骨節內變。右肱脇痛。寒侵於中。驚漉。心脇滿引小腹。不可反側。噤乾面塵脫色。丈夫癰疔。婦人小腹痛。實則欬逆肩背痛。虛則少氣不能報息。耳聾咽乾。

腎腰腿痛。大關節不利。屈身不便。腹滿痞堅寐汗。實則腹脛腫身重。虛則胸中滿。大小腹痛清厥。

六十七情證

怒爲嘔血飧泄。煎厥薄厥。胸滿脇痛。食則氣逆而不下。爲喘渴煩心。爲消脾肥氣。

目暴盲。耳暴閉。筋緩。怒傷肝。爲氣逆。悲治怒。

喜爲笑。毛革焦。傷氣不收。甚則狂。喜傷心。爲氣緩。恐治喜。

悲爲陰縮筋攣。肌痺脈痿。男爲數洩。女爲血崩。酸鼻辛額。泣則臂麻。悲傷肺。爲氣消。喜治悲。

驚爲痰涎。目震吐。痴癇不省人事。驚傷神。爲氣亂。習治驚。

勞爲咽噎。喘促嗽血唾血。腰重痛骨痿。男少精。女不月。勞傷血氣耗。逸治勞。

思爲不眠好臥。昏瞢。三焦痞塞。咽喉不利。嘔苦。筋痿白淫。不嗜飲食。思傷脾。爲氣結。怒治思。

恐傷腎。爲氣不行。思治恐。

六十八雜脈

寸口脈但實者。心勞。

寸口脈沉。胸中氣短。

浮而絕者。氣辟。大而滑。中有短氣。

數而不加。六至者爲滑。

微弱者。少氣。

尺脈沉滑者。寸白蟲。

男女皆當以左手尺脈常弱。右手尺脈常盛。爲平。陽盛陰虛。下之安。二寸實大尺短少。此傷寒之邪。乘其裏虛。而入於腑者是也。如尺脈弱寸強。則陰不足。陽往乘之。下之安。汗之死。餘以類推。

脈俱弦。指下又虛。脾胃虛弱。證食少而渴。痞腹中痛窄狹。二便不調。

脈俱沉緊。按之不鼓。膀胱勝小腸也。或瀉利不止而腹脹。或純白赤。或雜血便多。不渴。精神少。或面白脫色。此失血之故。或面黃而氣短。此元氣損少之故。是丙

火小腸。爲壬膀胱所克而外走也。屯火投於水。大寒之證。宜溫之則愈。薑附各半兩。赤石脂四錢半。朱砂一兩。茯苓湯下二三十丸。脈諸按之不鼓爲虛寒。二寸短少。謂之陽不足。病在下。脈諸搏手。爲寒涼或寒藥治之。脈虛亦薑附。脈二手相似。而右爲盛。皆胃氣虛。二

寸求之脾胃。當從陰引陽。

脈中少有力。盛甚則似止。胸中元氣不及。

脈貴有神。神者不問遲數之病。中外有力者。爲神也。

脈諸短爲虛。二關脈實。上不至發汗。下不至利大便。

脈諸大爲虛。二關脈沉細。純虛也。宜補之。

脈瀋與弦而大。按之有力爲實。無力爲虛。

脈沉遲。寸微滑者爲實。

二尺不見或短少。乃食塞。當吐之。

凡脈盛大以瀋。外有寒證。名寒中。乃寒獨留。血脈泣。故大也。

脈大而實。不可益氣。滑脈關以上見。爲大熱。關以下見。爲大寒。火併于上以丙火

化。火併于下。以壬水化。

雜病。脈沉者。多屬痰。宜吐。

傷寒。寸脈浮滑者。有痰。宜吐。

勞熱。脈沉細無火者。死。

陽脈浮。陰脈弱者。則血虛。血虛則筋急。

凡有者為實。無者為虛。假令脈浮。則為陽盛。陰虛。脈沉。則為陰盛。陽虛。此有則彼

無。彼有則此無。又如弦則木實。金虧。土虛。

浮診見者。為腑。為上部。為陽。

按之見者。為臟。為下部。為陰。

脈來者為陽。為氣。去者為陰。為血。假如脈來疾去遲。為陽有餘。而陰不足也。故曰

外實內虛是也。出以候。外疾為實。入以候。內遲為虛。寸微尺緊。為虛損。陰盛陽微

之故也。

諸浮脈無根死。臟府無根故也。

長病脈。

虛而濇。

虛而滑。

虛而緩。

虛而弦。

微而伏。

浮而結。

浮而滑。實而大。實而滑。細而軟。如蛛絲。羹上肥。如屋漏。

如雀啄。如霹靂。如貫珠。如水淹。

已上此脈得之則生。反之則死。脈一本如水滴之下注曰皆死脈也無已上此

卒病與長病條下。反之則死。

人病甚。脈不調難差。脈洪者易已。

形脈相應。肥人脈細欲絕者死。瘦人脈躁者死。身溫脈滑者死。身滑脈

澁者死。身小脈大者死。身大脈小者死。身短脈長者死。身長脈短者

死。

六十九察視

黑氣起於耳目鼻上。漸入口者死。白色者亦然。赤色見於耳目頰上。五日死。

張口如魚。出氣不反者死。循衣摸縫者死。無熱妄語者死。遺尿不知

者死。爪甲青者死。爪甲肉黑者死。舌卷卵縮者死。眉傾髮直者死。

唇反人中滿者死。陰陽俱閉失聲者死。神氣不守聲嘶者死。汗出不流

者死。口臭不可近者死。目直視。肩息者死。齒忽黑色。面青目黑。面青目黃。面青目白。面青唇黑者。皆死。面白目黑。面白目白。皆死。面赤目黃。面赤目白死。面黑目白死。面黑脇滿。不能反側者死。面黑唇青死。面黑目青死。面黃目白。面黃目青。面黃目黑死。已上黑如燃。白如枯骨。赤似血。青似草。方爲死候。心絕。肩息。同盼目直。一日死。肺絕。氣去不快。口如魚。三日死。骨絕。腰脊痛不可反側。五日死。脾絕。口冷。足腫脹泄。十二日死。腎絕。大便赤澀下血。耳乾脚浮。舌腫者。六日死。筋絕。魂驚虛恐。手足爪甲青。善呼罵不休。九日死。腸絕。髮直汗出不止。不得屈伸。六日死。肝絕。恐懼伏臥。目直面青。八日死。又卽時死。胃絕。齒落目黃者。七日死。

七十汗

脈沉微細弱。不可汗。沉細爲在裏。微弱氣血虛。浮而緊。法當身痛。當以汗解。假令尺脈遲者。不可汗。此血微少故也。陰病脈細沉數。不可汗。病在裏之故也。

傷寒風濕。素傷於風。復傷於熱。四肢不收。頭痛身熱。常汗不解。治在少陰。厥陰。不可汗。汗之譫語內煩。不得臥。善驚。目亂無精光。傷寒濕溫。素傷於寒。因而中暍。苦兩脛冷。腹滿。頭目痛。妄言。治在足太陰。不可汗。汗出必不能言。耳聾。不知痛所在。身青面變死。傷寒頭痛。形象中風。常微汗出。又自嘔者。心懊懣。發汗則瘥。傷寒脈弦細。頭痛而反熱。此屬少陽。不可汗。太陽與少陽併病。頭項強痛。或眩冒。心下痞堅。不可汗。少陰病。欬而下利。譫語者。此強汗之故也。咽中閉塞。不可汗。汗之則吐血。厥陰不可汗。汗之聲亂咽嘶。亡血家不可汗。汗之則寒慄。衄不可汗。汗之必額陷直視。淋家不可汗。汗之必便血。瘡家不可汗。汗之則瘡。汗家不可重汗。汗之必恍惚。脈短者死。冬時發其汗。必吐利口瘡。下利清穀。不可汗。汗之必脹滿。欬而小便利。或誤汗之則厥逆。諸逆發汗微者難愈。劇者言亂睛眩者死。動氣在不問左右上下。一切不可汗。

脈浮大可汗。問病者。設利爲虛。而不可汗也。浮而緊。可汗。太陽病。脈浮弱。可汗。浮而數者。亦可汗。脈遲。汗出多。微惡寒。表未解。可汗。熱如瘧。此爲陽

明。脈浮虛。可汗。身痛清便有調。可汗。

脈因證治終

脈因證治 卷四 七十汗

脈因證治卷四 七十汗

六四

〔明〕

韓

悉

著

韓氏醫通

中國醫學大成

韓氏醫通提要

明韓忭撰。忭字天爵。別號飛霞子。嘉靖時人。其卷上。列緒論章第一。六法兼施章第二。脈訣章第三。處方章第四。家庭醫案章第五。其卷下。列懸壺醫案章第六。藥性裁成章第七。方訣無隱章第八。同類勿藥章第九。集家傳有效方案。乃補葺分九章。凡九十五則。釐爲上下兩卷。首明醫理。次詳診斷。爲六法兼施。次詳脈法。次別處方。次列醫案。次辨藥性。次列韓氏有效方。皆集醫家心法要訣。卷頁雖少。然皆切合實用。故亟爲專校。本書係周氏刻本。參校六醴齋叢書本印行之。

韓氏醫通提要

自序

醫通草成。幾欲焚去。今年家兄命謂。先君序集有效方手澤。豈容勿傳。乃補葺分九章。凡九十五則。釐爲上下二卷。讀且數過。心動顏汗。向兄不能語者久之。而後語曰。人有定壽。醫善折之。聖智不能加多也。病有氣機。醫每失之。造化不容有鑿也。兄謂弟誠能醫乎哉。夫孔門學農圃者小之。而老氏妄言罔象。又奚醫之爲也。是編聊爲醫之徹上徹下語而已爾。

嘉靖改元壬午六月朔飛霞子韓忭天爵自序

韓氏醫通自序

韓氏醫通目錄

卷上

緒論章第一	一
六法兼施章第二	五
脈訣章第三	九
處方章第四	一二
家庭醫案章第五	一四

卷下

懸壺醫案章第六	一
藥性裁成章第七	五
方訣無隱章第八	一一
三子養親湯	一二
霞天膏	一二
鹿峻丸	一三
斑龍宴	一四
內鹿髓丸	一四
外鹿髓丸	一五

黃鶴丹	一五
青囊丸	一五
天一丸	一六
異類有情丸	一七
女金丹	一七
駐陽小丹煉法	一八
固本丸製法	一九
枳朮方燒飯法	二〇
五瘟丹	二〇
滇壺丹	二一
八仙茶	二二

小刀圭	二二
長松酒方	二三
枸杞酒	二四
水火煉蜜法	二四
七味保嬰湯	二五
同類勿藥章第九	二五

韓氏醫通

明 飛霞子韓 忭天爵著

鄞縣曹赤電炳章圈點

卷上

緒論章第一 凡一十一則

飛霞子曰。天地萬物。氣成形也。不位不育。病之時也。人之養氣踐形而致中和者。醫之道也。失而至於鍼砭藥餌。第二義矣。易无妄九五曰。无妄之疾。勿藥有喜。孔子曰。无妄之藥。不可試也。此最上義也。得醫之最上義者。氣之冲。神之化。皆此身之真息以踵也。盧扁指堅子。華佗剖腸腑。白玉蟾呵腎癰。藥餌云乎哉。鍼砭云乎

哉。

土爲冲氣。脾胃爲穀氣。冲氣寄旺。穀氣輔運。無一刻之停。此所謂真息也。而以踵焉。至虛之地。氣之樞而神之舍也。故曰。萬物負陰而抱陽。冲氣以爲和。夫然後知醫之造化裁成。胥此焉出矣。易曰。神而明之。存乎其人。

神農嘗百草。雖非經見。理或有之。軒岐尹咸多古書。要難盡信。周禮大司巫掌醫卜。則醫之爲道也。技焉爾矣。

秦漢以前。有說無方。故內經諸書。鄭重覲縷。亦多累世附會竄雜之言。漢魏而下。有方無說。非無說也。言愈多而理愈晦也。自張劉戴李諸君子出。立法分類。原病處方。而後經旨燦然。丹溪朱彥修乃集名醫之大成。尊素難如六經。以諸子爲羽翼。醫之爲技。庶乎其顯著矣。今之日諸書充棟。學者望洋。安得起羣公而就正。刪述一番。有經有傳有史。俾醫道不淪于遠泥。而有以達中和極致之功。然後爲快。

耶。

人在氣交中。如魚在水。氣能令人病不病。如水能令魚嘉與餒也。故醫運化機。天地且不能違矣。況於人乎。況於鬼神乎。

五運六氣。雖準節令。久之歲差。一日之間。四序實寓。學者善識天時。則一時有一時之運氣。豈惟歲哉。

風土異宜。自然氣隔。古分南北二政。自今輿圖。以河界南北。而江之東。關之西。可類從矣。南北云者。陰陽之軌。四方之轂。八風之輻湊也。

熱生風。寒生溼。風生火。溼生痰。火生暑。痰生燥。乃人身中之五運六氣。一息不停者。金形白色洪聲宮音之類。又身之風土。而父子不能相易者。故人之稟賦。三天兩地。一氣流行而已。氣失其平之謂疾。疾甚之謂病。三才相因之謂機。機動之謂時。陰符經曰。天發殺機。移星易宿。地發殺機。龍蛇起陸。人發殺機。天地反覆。又曰。

食其時。百骸理。動其機。萬物安。又曰。三才既宜。三盜既安。嗚呼。此可以契醫之三昧矣乎。

醫之理。可比周易。鍼砭藥餌。卽卜筮法也。丹溪云。冷生氣。高陽生之謬言。予謂冷生氣。是復卦。☳熱生風。是姤卦。☴卽天根月窟之化機。內經所謂亢則害承乃制者也。故王安道論曰。易者造化之不可常者也。惟其不可常。故神化莫能以測。易曰一陰一陽之謂道。陰陽不測之謂神。世之工醫卜而自小焉者何也。

自開闢來。五氣秉承。元會運世。自有氣數。天地萬物舉不能逃。近世當是土運。是以人無疾而亦疾。此與勝國時多熱不同矣。如俗稱楊梅瘡。自南行北。人物雷同。土溼生黴。當曰黴瘡。讀醫書五運六氣南北二政。何以獨止于一年一時。而頓忘世運元會之統耶。


宋儒謂爲人子者不可不知醫。又謂不爲良相。當爲良醫。惜人不能以皆能也。則


東坡蘇氏有言。擇醫之特出者。先告以病狀。然後使脈以合之。吾但欲愈吾之病爾。何必考其術。此深得用醫之法。然醫書有望聞問切之說。被近世熊宗立者妄注。予乃爲六法兼施之案。庶幾盡神聖工巧之用云。

六法兼施章第一 凡四則


式云某處有某人某年月日填醫案一宗

望形色





聞聲音



問情狀

何處苦楚 何因而致 何日爲始 晝夜孰甚 寒熱孰多 喜惡何物
曾服何藥 曾經何地

切脈理

左部

寸 浮本位

中取

沈候

關 浮取

中候

沈本位

尺 浮候

中取

沈本位

右部

寸 浮本位

中候

沈取

關 浮取

中本位

沈候

尺 浮應上焦

中應右關沈應肝腎

論病原

某人素稟孰盛

其病今在何類

標本孰居

畢竟何如按此句是論吉凶

服藥宜如何將息 病疾疣疴痼今在何際

治方術

主治用何法 先後用何方

六法者。望聞問切論治也。凡治一病。用此式一紙爲案。首填某地某時。審風土與時令也。次以明聰望之聞之。不惜詳問之。察其外也。然後切脈。論斷處方。得其真也。各各填注。庶幾病者持循待續。不爲臨敵易將之失。而醫之心思旣竭。百發百中矣。

予旣立兼施式。有刑名家過而言曰。望聞卽兩造具備。察言觀色之時。問而筆之。供詞也。切則考鞫親切。而論治爲招判發落矣。其言雖謔。足以解惑云。

或曰。六法兼施。得無瑣瑣乎。予應之曰。醫藥人之司命。爲謀弗忠。非仁術矣。病有不治之條。醫有刲股之念。誠如是而不救焉。彼雖命爾。吾猶以爲未精吾技而誤。

于人人也。若夫輕疾小恙。雖不填案可也。畏其瑣而併棄之。非予志矣。

脈訣章第二凡十則

脈訣。左寸下指法如六菽也。

大豆

之重。

肥仍以其人之

爲心本位。

在指節爲陽爲小腸餘

此皆倣

五菽以下。七菽以上。皆心與小腸絡脈也。關以十二菽爲肝膽本位。尺以至

骨爲腎膀胱本位。右寸三菽爲肺大腸本位。關以骨肉之間爲脾胃本位。尺以盛弱分男女。而以浮中沈分上中下三焦也。皆本脈也。餘絡脈。並倣前例推之。

浮大而散。心之平。弦而長。肝之平。按至骨。舉指來疾而實者。腎平也。肺平浮濇短。脾胃平緩而滿指。凡下指本位不平。便可尋詳病情矣。

切脈至右尺部。必兩手並診消息之。取三焦應脈。浮爲上焦。與心肺脈合。中爲中焦。與脾胃合。沈爲下焦。與肝腎合。不合。則氣必亂而脈不真。須再切也。蓋此部命

門之火。繫於心包。而三焦之位。實在五臟部位之中虛處。一氣流行。綿綿不息。所謂呼吸之根。性命之蒂也。男子喜滿指沈實。似弱而無數滑。女人喜滿指浮泛。似盛而不伏瀋。故云女人反此背看之。尺脈第三同斷病。

高陽生五代時人。著爲脈訣歌括。託爲王氏叔和。而今本雜以潔古傷寒脈入式歌。又被熊宗立妄注。大爲俗學之疑。叔和晉人。自有脈經。猶復牴牾。大段古書難盡信也。脈家書甚多。要不出七表八裏九道之外。求脈之明。爲脈之晦。獨滑伯仁診家樞要。以浮沈遲數滑瀋六者爲提綱。予補以有力無力二者。丹溪以血氣痰水爲病之提綱。則脈滑在血分。而有餘爲痰。凡有形者從之。瀋在氣分。而有餘爲火。凡無形者從之。浮在表。沈在裏。此非三部九候之浮沈遲爲寒。數爲熱。有力爲實。無力爲虛。執此提綱。脈可得而明矣。

入式歌括。是以傷寒脈爲例而作。不然。陽弦頭痛定無疑。凡弦脈皆頭痛乎。

脈經謂性急人脈急。緩人脈緩。夫脈者。氣血之運行于呼吸者也。血稟偏勝必多緩。陰之靜也。氣稟偏勝必多急。陽之躁也。以此論其血分氣分孰爲不足可也。豈情性之謂哉。

重大之病。一日三脈多變。難治。疔疳日日脈不移。難治。痼疾歲月不改。難治。本脈皆平。絡脈否者。宜攻擊之。卻未有本脈病而絡脈獨平者也。

伏經脈最難求。如積熱之久。脈反沈細而外證又寒。苟非兼施之法。何可得也。世俗諱病試醫。醫復諱情妄臆。而豪貴婦女。往往不得望聞。豈不大錯。

初學切脈。覆藥羅。畫三部於絹上。教者觀以琴絃驗弦。以小栗驗滑。以括竹痕驗澹。以截葱管驗芤。以敗絮驗濡。任意手法。令學者輕重按之。消息尋取。久之自真。脈訣七表八裏圖形是也。

齊有褚氏遺書。謂女脈逆行。右尺爲心。左爲肺。蓋以地道右轉。女生于申。推論其

意爾。夫天地男女氣而已。氣有動靜。故有遲速順逆左右之別。其實非二也。諸脈書皆無此說。夫有所授之耶。抑丹溪諸公未見其書耶。

處方章第四 凡七則

男八歲至六十四。女七歲至四十九。卽大衍自然之數。有病者主精血。過此以往。有消無息。是爲老人。宜專調氣。不可以病例治矣。然自澆漓以來。男尤先涸。故四十五十。卽中壽之年。雅宜補劑。壯年色勞者。惟退熱不必補。嬌尼不能無情。怨曠多情。先散其鬱。而凡病久者。必循行經絡。反從其邪。然後對症。此皆病情之肯綮。處方之心印也。

論病必分兼經專經錯經伏經。始有賓主而後分標本。以處方。兼經併發。如兩感。專經獨發。如太陽表證。錯經亂發。如狐惑。伏經反發。如熱極似冰。

諸病處方遵古法。仲景外感。東垣內傷。河間攻擊。丹溪之大成。以爲典要。以運氣風土稟賦爲之權衡。且如朔漠之人。有惠民局方。多辛熱腦麝之劑。此人本氣自寒。食專腥羶。與之宜也。丹溪僻處東南。辨論不置。予嘗比病爲易卦。方爲爻詞。占者有吉凶悔吝之殊。夫然後醫不執方之義明矣。

閱古方。必如親見其人稟賦與當時運氣風土。始可以得作者之意。有可爲典要者。處方之律令也。有一時權衡者。處方之參攷也。全在真知藥性。灼見病情。予每以夜央跏坐。爲人處方。有經旬不能下筆者。

病如橐。方如龠。萬龠一橐。反爲橐害矣。世有經驗一方。而遞相偶中者。遂不自審度而輕用之。何也。

君臣佐使之外。有一標使。如劑中合從辛以達金。則取引經一味。辛者倍加之。故其效速。

處方正不必多品。但看仲景方。何等簡淨。丹溪謂東垣多多益善。豈醫固有材耶。

家庭醫案章第五 凡五則

先府君自成化丁酉征蠻。感雪。致脚氣。夏亦煖轡。宏治戊午任東路將臺。有先夫人之哀。增劇。兒忝始留心醫學。師表舅氏華恆岼金華王山人。以事吾親。以自差胎病。以施試于衆人。僦若有得。一日府君命史錄日常湯藥之方成集。賜名曰韓氏有效方。親爲之序。兒謹藏之。歲己巳。兒孤矣。荏苒星霜。兒忘哀矣。手澤之悲。天荒地老。戊寅之夏。伯兄蒼雪翁偶見而復序之。且併兄嫂試嘗方集續爲三卷。仍舊名。繕本藏于家。竊伏自念忝之不肖。事親從兄。不能立乎其大者。而區區偶然。重蒙賜錄如此。悲感何勝。謹奉移文序于左。而略其方云。

韓氏有效方序

愚稟質氣弱。自幼多病。竊祿三十餘載。雖蠻煙瘴地。無不供事。迨宏治丙辰齒落。至今去者其五。自是而後。鬚髮漸白。衰弱愈侵。已嘗陳情告休。第當途者不允。今雖勉強視政。奈何精神不逮。次子忭隨在邊任。專湯藥之侍。以其用藥粗知。乃請瀘衛華正科來宦邸診脈。或製丸。或咀散。吞之飲之。無不療。厥後華聞父憂歸去。忭自爲之製咀。疾但舉發。湯藥之飲。無有不效。則忭專志醫道。吾之衰朽賴焉。宏治庚申七月八日。疾又大作。不能視政。忭遠遊小河。軍醫庸劣。不能知其藥味。恐君臣佐使失宜。反遭其害。吾在病榻中。以所患病症書報與忭。且備說與第五子恕。檢忭平日所註方藥。依法修製。初服二貼。二服三貼。三服一貼。減去琥珀。四服初服之劑一貼。大覺十過八九。七月二十九日。忭得書。知病欲走不及。先具藥方。曰加味六黃湯。曰清氣飲子。曰參扶半夏湯。曰加減三和散。曰醒脾湯。曰瀉白散。曰齒疼噙藥。曰歸苓分痛散。其製法加減數目分兩。一分備錄。憑首服加味六黃

湯連三貼。愈加大好。至八月初九日。又服歸苓分痛散。歷歷有效。以地方爲慮。於十一日視政。噫。仰戴覆載之恩。育養之仁。殘喘多病。幸有子職湯藥。得以調攝。不泯用藥有效之功。編錄成集。名曰韓氏有效方。併以記歲月云。時宏治庚申仲秋之吉。石隱翁書于小河將臺。

書有效方後

舍弟忭遠遊。予親藥裹。檢醫書。偶見先總兵府君在東路日集忭所呈方。自序于前。標抹有手澤焉。涕泗交下。連日不成寢食。嗚呼。醫之術欲以壽人也。而愚兄弟不能壽吾二親。易簣日以場屋。以此恩不在側。嗚呼。尙何醫之爲也。尙何醫之爲也。然先人手澤。不可泯也。謹命弟恕念編次。列爲上卷。取嘗集治愚夫婦并奇效方。附其中下。刊以傳之。忭在羣子弟中。最爲明敏。受胎時。先夫人病瘧。生甚羸。辛酉。病痰薶舍下。學醫榮昌華氏金華王氏。得武夷仙翁黃鶴老人啓其精微。北邙

時。變易姓名爲白自虛。號飛霞子。遊走半天下。醫頗馳名。白飛霞云。正德戊寅六月之吉。四川都司署都指揮僉事致仕韓恩書。

兄雪翁素稟脾燥肝偏。脈多弦長。左大而右弱。非卽事親治家。兩居患難。頻切喪哭。故年四十。始仕已衰。戎馬六年。食祿纔四年。有奇爾。歲丙子。乞骸旋里。而悉亦歸自遠遊。侍病火湯藥。有間。復遭誣獄。忿恚。背發疣如豆。幾至危頓。小丹人乳。疣無虞。今年忽被詔起。乃上疏云。賴弟韓忭折肱成醫。百般救療。嫂淑人素苦不育。血甚虛。甲子歲。忭侍亡陽之疾之時。兄嫂儲子子爲嗣。客尙有爲是危言阻止者。不意翁頃歲著直說二條。將以刊先君賜集也。祇今二老眉壽。兩郎玉立。固德徵爾。弟何預。弟何預。用錄所著于此。備醫案云。

直說

三弟喪。予哭之哀。成疾。飲食全絕。筋骨百節皮膚無一處不痛。而腰爲甚。一醫云。

腎虛宜補。一醫云風寒宜散。四弟告吾妻曰。兄亦危矣。其脈瀦。正東垣先生所謂非十二經中正疾。乃經絡奇邪之疾。必多憂愁鬱抑而成。若痰上殆矣。補則滯其氣。散則耗其氣。決不保。小子專主清燥湯。惟嫂張主。吾妻誓曰。叔非誤兄者。遂連進三甌。不以告予也。予遂困。睡至五更。無痰。覺少解。自恐不保。謳詩留別。弟聞聲。請曰。何如。予曰。似解。脈之。果去十之三。專主清燥湯而加減之。十劑而愈。予平賊後。在官守。但覺頭重眼昏耳聾牙痛。便脚如不著地。絕無知爲何疾者。致仕歸。四弟亦自北歸。一日。予梳洗畢。腹痛。少間。手足俱不能舉。弟脈。驚曰。兄素無此疾。何以致此。蓋平生心勞。近數年從征。形亦勞矣。此火症也。檢玉機微義。余始一一知之。期辛散之。劑十貼。第恐有消渴痿痺瘡瘍之患。移居江園。弟每夜半自煮藥。候予醒。進之。屏誼譁靜坐。果十劑。耳如人呼。體如蟻虱發癢。成疙瘩。然後知頭在我而脚踏地。亟入山靜養之。偶以不得致仕文移。怒火一發。遂渴。如欲狂者。一日瓜

梨泉水無計。弟告曰。此非草木之藥可扶矣。不恤物議。徧求人乳。日進十盞。旬餘渴減。又偶以家事發怒。手足不舉。如一輓物。臥四日。乃服乳無算而瘥。脈之心經瀦。曰瘡作矣。幸不生大毒。患馬眼膿疥。入閱月乃止。能徒步登山。再以駐顏小丹助之。遂復完如少時。近年惟脾胃不壯。又以冲和丸。食後呷。可悲哉。非舍弟。吾死矣。夫。因念士夫中多心勞。有如區區火證者。此藥方不可不知也。遂表集以傳云。

正德戊寅端午日。雪翁識。

山妻年三十餘。十八胎。九殯。八夭。會先君松藩難作。賤兄弟皆西奔。妻驚憂過甚。遂昏昏不醒人事。口脣舌皆瘡。或至封喉。下部虛脫。白帶如注。如此四十餘日。或時少醒。至欲自縊。自悲不能堪。醫或投涼劑解其上。則下部疾愈甚。或投熱劑及以湯藥熏蒸其下。則熱暈欲絕。四弟還。脈之。始知爲亡陽證也。大哭曰。宗嗣未立。幾誤殺余嫂。卽以鹽煮大附子九錢爲君。制以薄荷防風。佐以薑桂芎歸之屬。水

煎入井。冰冷與之。未盡劑。鼻熟睡通宵。覺卽能識人。時止一嗣子二女。相抱痛哭。疏戚皆悲。執友趙憲長驚曰。君何術也。弟曰。方書有之。假對假。真對真耳。上乃假熱。故以假冷之藥從之。下乃真冷。故以真熱之藥反之。斯上下和而病解矣。繼後主以女金丹。錯綜以二三方。不但去其病。且調治元氣。庚午生一子。今應襲矣。壬申生一子。去年又患瘧疾十三日。亦主以養元氣調生氣。待飲食大進。然後卻以毒藥吐下塊物甚多。授以附子湯三錢而愈。不責效旦暮間。其用女金丹。卽勝金丸也。得之異人。倍加香附。而視氣血之偏者。又加薑黃條芩倍川芎之屬。取效甚多。予念無子者。往往有之。翻思予得子之難。其苦何如。乃次第錄其方。併女金丹。以濟人云。雪翁識。

韓氏醫通

明 飛霞子韓 忭 天爵 著

鄞縣曹赤電炳章圈點

卷下

懸壺醫案章第十六凡一十五則

予在胎。爲女醫誤。生來略具人形。無病不歷。無日不藥。太夫人姓瘡。多病。早棄養。固不孝之奉累也。歲辛酉。病作蓆舍。死而復甦。父兄乃訴罷生員業。旣而走家難。技醫給旅。重游南北。慨惟病軀。又爲人謀夫康寧。亦罔也。職此之由。得尙友天下。而縉紳人豪。往往恕予疎狂。與之詩酒藥物。似未爲此生之不遇矣。或曰。子之醫

道。市井尋常間。恐未盡解。惟士大夫孰無慎疾之心。而亦有感子之愈其親活其幼者。何必孜孜入山之念也。予不對。然予素貧。凡贖藥之餘。僅了婚嫁。嘗思厚祿故人恆饑稚子之歎。固與城都賣卜道旁賣履者有間矣。是以懸壺醫案滋多。今始記其要領于後。

三士人求治其親。高年咳嗽。氣逆痰痞。甚切。予不欲以病例。精思一湯。以爲甘旨。名三子養親湯。傳梓四方。有太史氏爲之贊曰。夫三子者。出自老圃。其性度和平。芬暢。善佐飲食奉養。使人親有勿藥之喜。是以仁者取焉。老吾老以及人之老。其利博矣。詩曰。孝子不匱。永錫爾類。此之謂也。

兩在北方。遇夏秋久雨。天行咳嗽頭痛。用古方益元散。滑石五兩薑蔥湯調服。應手效。日發數十斤。經以徹夜。此蓋甲巳土運濕令。痰壅肺氣上竅。但洩其膀胱下竅而已。不在咳嗽例也。

戊年楚春瘟。人不相弔。予以五瘟丹投泉水。率童子分給。日起數百人。

朝貴有東南人。素畏熱藥。病痰。輒云火痰。加芩連。一日冬雪寒冽。眩嘔以死。予以黑附子一片。砒一分。舂入薑汁劫之。大吐。又服煖藥一劑而愈。此蓋地氣束人。豈可拘執自誤。況痰生于濕。濕生于寒乎。

一士人肥形白色。因明醫雜著所載補陰丸。以爲人皆陰不足。服至數年。胖至短氣。予反之以霞天膏。入辛熱劑。決去滯餘。而燥其重陰。然後和平無恙。此則未達方書。而往往自誤。不可不戒也。

貴人鼻中肉贅。臭不可近。痛不可搖。束手待斃。予但以白礬末加礪砂少許吹其上。頃之。化水而消。與勝溼湯加瀉白散。二貼愈。此厚味擁溼熱。蒸于肺門。如雨霽之地。突生芝菌也。治此等病頗多。人每稱奇。不知只此理耳。

凡沈疴痼疾。癩狂風癰。痞積瘡瘍。一切有形之病。及婦人癥瘕。皆用霞天膏。投所

宜煎劑。汗吐下攻去污敗蟲物。無不成功。頗有獨得之妙。如斲輪云。

癰瘰癧證。年淺元氣未盡傷者。亦以霞天膏入兩證煎劑攻治。湖海中曾起十餘人。近時黴瘡。亦以膏入防風通聖散治愈。別著楊梅瘡論治方一卷。滇壺簡易方一紙。爲遠近所傳。用者輒效。

治色勞。先以古方地仙散。薄荷葉地骨皮防風甘草梢烏梅肉各等分煎劑退潮熱。次以外鹿髓丸摩其腰。漸以內鹿髓丸或鹿峻丸復其元。其功頗烈。奈何鹿品難辦。不過循葛可久十藥神方而斟酌之耳。

八歲以下小兒。予戒投藥。有疾。但以所宜藥爲細末。調香油。令人熱醺。按摩患處。或水調成膏貼之。或煎湯。用絹帛染拭。任意活法。但使藥氣由毛孔穴絡薰蒸透達。如不能檢方用藥。以油潤手按摩牽引。手舞足蹈。未嘗不愈其疾也。

將養小兒製七味保嬰湯。以應湯飲。家兄刊而論曰。幼幼之心。人所易發。老老之

心。人或昧焉。長長者宜乎寡矣。使愛親如子。信人子盡曾參矣。又如司馬君實愛兄如父焉。子不能不三歎乎著方之餘也。

懸壺輕齋。百病黃鶴丹。婦人科青囊丸。小兒科天一丸。隨宜引用。人見小效。疑有異常。探索不已。殊可笑也。今並著他章。用之者。當思法外意云。

古針法。似與今者不同。予有志而無師授。而今者未之學焉。古砭無傳。今之灸。賴有精者。予常加藥末入艾爲炷。且以人氣煨養灸痕。恐不可爲典要。故不著。曾見貴人有木拐按節法。其亦砭之遺意與。

治殊方白虎歷節風。久臥尙巫而不能藥者。以霞天膏和白芥子末作墨書字。入水頓服一缶。吐利交作。去膠涎臭汁數斗而起。謂予之符水有神。因思古有祝由科。全賴巫覡。莫亦仁人出奇以活人。而遂失真者耶。併記吾過于此。

藥性裁成章第十七凡十二則

藥有成性。以材相制。味相洽而後達。夫藥性古書備本草。括湯液珍珠諸篇。予不能悉記也。而二五之升沈。鹹苦酸辛甘者。觸物在焉。姑列凡數。可推其餘。

標病攻擊。宜生料。氣全力強。本病服餌。宜製煉調劑。大凡病在元氣。宜醇澹。味性純一。醇也。出五味外。澹也。太羹元酒。疑文有

人參煉膏。同元氣於無何有之鄉。王道也。黑附子回陽。霸功赫奕。甘草調元。無可無不可。

當歸主血分之病。川產力剛可攻。秦產力柔宜補。凡用。本病酒製。而痰獨以薑汁浸透。導血歸血之理。熟地黃亦然。血虛以人參。石脂爲佐。血熱以生地黃。薑黃。條芩。不絕生化之源。血積配以大黃。婦人形肥。血化爲痰。二味薑浸。佐以利水道藥。要之。血藥不容舍當歸。故古方四物湯以爲君。芍藥爲臣。地黃分生熟爲佐。川芎爲使。可謂典要云。

香附主氣分之病。香能竄。苦能降。推陳致新。故諸書皆云益氣。而俗有耗氣之訛。女科之專非也。治本病略炒。兼血以酒煮。痰以薑汁。虛以童便浸。實以鹽水煮。積以醋浸水煮。婦人血用事。氣行則無痰。老人精枯血閉。惟氣是資。小兒氣日充。形乃日固。大凡病則氣滯而餒。故香附於氣分爲君藥。世所罕知。佐以木香。散滯瀉肺。以沈香。無不升降。以小茴香。可行經絡。而鹽炒則補腎間元氣。香附爲君。參耆爲臣。甘草爲佐。治氣虛甚速。佐以厚朴之類。決壅積。莪朮之類。攻其甚者。予常避諸香藥之熱。而用檀香佐附。流動諸氣。極妙。

痰分之病。半夏爲主。脾主濕。每惡濕。濕生痰。而寒又生濕。故半夏之辛。燥濕也。然必造而爲麴。以生薑自然汁生白礬湯等分。共和造麴。楮葉包裹。風乾。然後入藥。風痰。以猪牙皂角煮汁去渣。煉膏如錫。入薑汁。火痰黑色。老痰如膠。以竹瀝或荆瀝入薑汁。濕痰白色。寒痰清。以老薑煎濃湯。加煨白礬三分之一。如半夏三兩俱煨礬一兩俱

造麴如前法。予又以霞天膏加白芥子三分之二。薑汁礬湯竹瀝造麴。治痰積沈痼者。自然使腐敗。隨大小便出。或散而爲瘡。此半夏麴之妙也。古方二陳湯。以此爲君。世醫因辛反減至少許。而茯苓滲濕。陳皮行氣。甘草醒脾。皆臣佐使。而反多其銖兩。蓋不造麴之過。觀法製半夏。以薑礬制辛。即能大嚼是也。佐以南星。治風痰。以薑汁酒浸炒。芩連及瓜蒌實香油拌麴略炒之類。治火痰。以麩炒枳殼枳實。薑汁浸蒸。大黃海粉之類。治老痰。以蒼朮白朮俱米泔薑汁浸炒。甚至乾薑烏頭。皆治濕痰。而常有脾洩者。以肉豆蔻配半夏麴。加神曲麥芽作丸。尤有奇效。厚養之人。酒後多此。而苦痰爲病者。十常八九也。方書謂天下無逆流之水。人身有倒上之痰。氣亂血餘化而爲痰。故治痰以行氣殺血爲要。

火分之病。黃連爲主。五藏皆有火。平則治病。則亂。方書有君火相火邪火龍火之論。其實一氣而已。故丹溪云。氣有餘便是火。分爲數類。凡治本病。略炒以從邪。實

火以朴硝湯。假火酒。虛火醋。痰火薑汁。俱浸透炒。氣滯火以茱萸。食積洩黃土。血癥瘕痛乾漆。俱水拌同炒。去萸土漆。下焦伏火以鹽水浸透拌焙。目疾以人乳浸蒸。或點或服。生用爲君。佐官桂少許。煎百沸。入蜜。空心服。能使心腎交于頃刻。入五苓、滑石。大治夢遺。以土薑酒蜜四炒者爲君。使君子爲臣。白芍藥酒煮爲佐。廣木香爲使。治小兒五疳。以茱萸炒者。加木香等分。生大黃倍之。水丸。治五痢。以薑汁酒煮者爲末。和霞天膏。治癩癰諸風眩暈瘡瘍。皆神效。非彼但云瀉心火。而與芩、柏諸苦藥例稱者比也。

予治沉疴。先循經絡者。卽諸古書所載引經報使藥。貴識真爾。如心經。以人參益氣。石脂補血。硃砂鎮火。天竺黃去痰。澤瀉瀉熱。而蓮肉、茯神、赤茯苓、遠志、益智、酸棗之類。利心竅以安神識。中間製煉。如以焦苦之味達本經。鹹引所畏。辛避所勝。酸益其母。而甘洩其子。皆裁成藥性之道。

粳米造飯。用荷葉煮湯者寬中。芥菜葉者豁痰。紫蘇葉者行氣解肌。薄荷葉者清熱。淡竹葉者避暑。造粥則白粥之外。入茯苓酪者清上實下。薯蕷粉者理胃。花椒汁者解嵐瘴。薑葱豉汁者發汗。與夫古方猪腎、羊腎之類。無非藥力也。一人淋。素不服藥。予教以專啖粟米粥。絕他味。旬餘減。月餘痊。此五穀治病之理。

梨汁疏風豁痰。蒸露治內熱。藕汁研墨止吐血鼻衄。研桃仁調酒破血積。胡桃仁佐破故紙鹽水糊丸。治腰濕痛如神。大棗煮汁去渣煉膏。救小兒脾虛胃寒不能食者。蓮肉作末。麤噤口痢。柿蒂加杵頭糠。止轉食。凡此予以應驕習之家。亦五果治疾之理。

韭白愈淋。子瀝精。大葱汁和五倍子末。瀝虛脫之痢。非虛脫不可用。莧煮汁愈初痢。蘿蔔風乾愈傷食嗽。白扁豆益脾清暑。蒜汁煮香附。加葶撥、大黃。治瘴鄉中毒。諸菜俱能治病。貴專啖爾。

黃牛肉補氣。與綿黃耆同功。羊肉補血。與熟地黃同功。猪肉無補。而人習之化也。惟連貼于脾。肚于胃。腰子于腎。脊髓于骨。心于血。可引諸藥入本經。實非其術。鹿則全體大補。異時每欲以肉汁煉膏。如霞天膏小刀圭之法。恨不多得。黃牛連貼。用朴硝作脯。消痞塊。骨髓煎油擦四肢之損。禽則鵝善疏風。雞稚補損。老作羹起衰。蟲則蜣蜋裹燒熟。與兒食。治疳。蚘皮作丸。大治驚癇疳痢。以上予治厚養之人多用之。亦從其化也。獨犬之壯陽。俗夫所尙。古方戊戌酒。蓋爲虛寒病設爾。或云士無故不殺犬豕。則古人以羞于珍矣。意者黃黑二色。足補脾腎。亦可如小刀圭法爲之。以治虛怯勞瘵。而戒恣慾之非。價廉工省。可濟貧乏云。按蜣蜋當是蜣螂。蚘皮當是蚘皮。

史惠生按。小兒疳積。腹大便瀉。當以蜣螂炒香與食。頗效。

方訣無隱章第八 凡二十二則

三子養親湯

紫蘇子主氣喘咳嗽

白芥子主痰

蘿蔔子主食痞兼痰

右三味各洗淨。微炒。擊碎。看何證多。則以所主者爲君。餘次之。每劑不過三錢。用生絹小袋盛之。煮作湯飲。隨甘旨。代茶水啜用。不宜煎熬太過。若大便素實者。臨服加熟蜜少許。若冬寒。加生薑三片。

霞天膏

此方卽倒倉法。傳自西域。有人指予投煎劑治痰。而遂推廣之。

黃牯牛一具選純黃肥澤無病纔一二歲者

右洗淨。取四腿項脊。去筋膜。將精肉切成塊子。如栗大。秤三十斤。或四五十斤。於靜室。以大銅鍋。無則新鐵鍋加長流水煮之。不時攪動。另以一新鍋煮沸湯。旋加。常使水淹肉五六寸。掠去浮沫。直煮至肉爛如泥。漚去渣。卻將肉汁。以細布漉小銅鍋。

用一色桑柴文武火候。不住手攪。不加熟水。只以汁漸如稀餚。滴水不散。色如琥珀。其膏成矣。此節火候最要。小心不然壞矣。大段每肉十二斤。可煉膏一斤。爲度。磁器盛之。是名霞天膏也。用調煎劑。初少漸多。沸熱自然溶化。若用和丸劑。則每三分。攪白麵一分。同煮成糊。或同煉蜜調勻。寒天久收。若生黴。用重湯煮過。熱天冷水窖之。可留三日。

鹿峻丸 以下四方王師祕授。

峻音催尊雖切赤子陰也見老子

鹿稟純陽。一名斑龍。峻者。天地初分之氣。牝牡相感之精也。醫書稱鹿茸角血髓。大補益於人。此峻則入神矣。其法用初生牡鹿三五隻。苑囿馴養。每日以人參煎湯。同一切藥草。任其飲食。久之。以硫黃細末和入。從少至多。燥則漸減。周而復始。大約三年之內。一旦毛脫筋露。氣勝陽極。卻別以牝鹿隔苑誘之。欲交不得。或洩精于外。或令其一交。卽設法取其精。收置磁器。香粘如餚。是爲峻也。隨人所宜。

補藥。古方如八味地黃丸、補陰丸、固本丸之類。以此峻加煉蜜三分之一。同和丸劑。或以和鹿角霜一味爲丸。空心鹽酒送下。用起虛療危疾尤捷。予之胎羸。賴此再造。願與人人共之。

斑龍宴

此鹿不拘初生。但馴養牡鹿。或一二隻。每日煎人參一兩湯飲之。渣和草料飼之。每用預夜減食。次晨空心。以布縛鹿于牀。首低尾昂。用三稜鍼刺眼大眥前毛孔。名天池穴。銀管三寸許。插向鼻梁。吮其血。和以藥酒。任意或入珍散。加沈香木香。貴者盡量。月可一度。鹿無恙。若有屠刺鹿血。乘熱和酒一醉。亦妙。

內鹿髓丸

峻與宴之鹿。腦髓骨髓脊髓盡取。同煎成油。漉淨。稱每一兩加煉蜜二兩。又煉相得。磁器封收。每服補藥。不拘何方。用以和劑。如鹿峻法。

外鹿髓丸

不拘獵家屠市所有鹿之脰骨髓煎作油。漉淨加蜜。如前煉法。每用和古方摩腰膏。九陽丹之類。老薑湯化少許。以擦摩腎俞。大補元氣。凡骨節痛。屬虛寒者。其效如神。

黃鶴丹

此方銖衣翁在黃鶴樓所授。懸壺輕賈。故名。

香

附此氣失其平則為疾
此為君此為用矣

黃

連凡疾之所在為邪火單用
生心固非為心火例矣

二味香附為主。黃連減半。俱洗擇淨料。共製為極細末。水糊為丸。梧子大。假如外感。薑葱湯下。內傷。米飲下。血病。酒下。氣病。木香湯下。痰病。薑湯下。火病。白湯下。餘可類推。

青囊丸

此方邵真人禱母病。感方士所授。予則受于女醫某。

香附子略炒不拘為主烏藥略泡減附三分之一

右爲細末。水醋煮和爲丸。梧子大。隨證用引。如頭痛茶下。痰薑湯之類。多用酒下爲妙。

天一丸 此方自製。

燈心取出十斤以米粉漿染曬乾研末入水澄之浮者爲燈心

赤白茯苓去皮兼用茯

滑石水飛過猪苓去皮

澤瀉去鬚人參一斤去蘆切片煮濃湯去渣瀝

一方人參用六兩。白朮六兩。甘草四兩。同熬膏亦妙。

右燈心等五味各爲細末。以人參膏和成丸如龍眼大。硃砂爲衣。貼金箔。每用一丸。任病換引。大段小兒生理向上。本天一生水之妙。凡治病。以水道通利爲捷徑。

也

異類有情丸 此方自製。

鹿角霜

鹿茸

龜

板入字文具者醇酒
浸七日酥炙透黃

虎脰骨

新而真者長流水浸
七日蜜酥和炙透

右霜板各三兩六錢。茸脰各二兩四錢。重羅極細。用水火煉白蜜。入獐猪脊骨髓九條。同春劑爲丸。如梧子大。每空心鹽湯下五七十丸。周而復始。丈夫中年覺衰。便可服餌。此方。鹿純陽也。龜純陰也。血氣有情。各從其類。非金石草木例也。如厚味善養之人。可加猪膽汁一二合於和劑中。以寓降火之義。

女金丹

此古方勝金丸。武夷翁授予配製之法。

蘼本

當歸

石

脂赤白

白芍

人參

白微

川芎火不見

牡丹皮

桂心

白芷

白朮

白茯苓

元胡索

沒藥

甘草

以上各一兩。

十五味。除石脂、沒藥另研外。餘皆以醇酒浸三日。烘晒乾。爲細末。足十五兩。

香附子

去皮毛以米醋浸三日略炒爲細末足十五兩

右十六味。和合。重羅數過。煉蜜丸如彈子大。磁器封收。每取七丸。虔心雞未鳴時服一丸。先以薄荷湯或茶灌漱咽喉。後細嚼。以溫酒或白湯送下。食物乾果壓之。服至四十九丸爲一劑。以癸水調下。受妊爲度。妊中三日一丸。產後二日一丸。百日止。盡人事而不育焉。天矣。人爲一鹵莽。諉曰天之命。予滋爲世之乏嗣者惜焉。

駐陽小丹煉法

此本古方。主爲鬚不驗。方外一衲。因子小惠。報以煉法。

茯神四兩去心

赤石脂火煨存性四兩

辰砂二兩飛

乳香二兩燈心研

川椒二兩淨以炭燒黃土地至通紅掃淨置椒於上以瓦缶掩之令爲出汗

右五味爲細末。以人乳和稀劑。入鵝鴨蛋殼內。糊封完固。加以絳袋。令體潔。婦人帶于胸乳之間。四十九日。日夕不離。取出乾透則成。否則壞。再研。用棗肉和爲丸。棗豆大。每日空心人乳送下。或人參麥門冬湯代之。臥時酒下亦可。凡心血不足。怔忡健忘等疾皆宜。

固本丸製法

此方多謂效遲。而有痰者。往往泥隔。遂生厭心。殊不知古人製方。真有口訣。

生地黄懷慶新肥者竹刀切麥門冬去心二味各一斤半酒

熟地黄

天門冬去心膜二味各一斤半生薑

右四味。但不犯鐵。浸足。同磨。或搗。以渣盡爲度。旋加水。亦如造漿粉之法。少加杏

其澄底藥泥。曬乾。乳鉢成末。加麵。取淨一斤。用人參另爲細末四兩。五味共加煉蜜爲丸。常服酒下。

枳朮方燒飯法

易水張氏製此方。東垣晚年始悟。用荷葉中虛之義。詎意東南人不識北方炊飯無甑。類呼爲燒。遂訛爲荷葉包飯。入灰火燒煨。雖丹溪亦未之辨。古詩云。瓶中有醋堪燒菜。是也。

白朮君去梗及枳

實臣用鵝眼者以冷水浸軟切片略炒四兩

右爲末。先用新碧荷葉數十。煮湯去葉。入粳米。亦如尋常造飯之法。甑內以荷鋪蓋。北方無甑。亦隨宜用。但米入湯。自然透綠。方全氣味。飯成。乘熱以藥末揉拌成劑爲丸。食後任引下。

五瘟丹 此方自製。冬至日修合。

黃 芩乙庚之

黃 山梔丁壬

黃 柏丙辛

黃 連戊癸

甘 草甲巳

此五味各隨運氣。為君者多用一倍也。餘四味又與香附、紫蘇為臣者減半也。右七味皆生用。為細末。用錦文大黃三倍煎成湯。去渣熬膏。和丸如雞子大。用硃砂、雄黃等分為衣。貼金。每用一丸。取泉水浸七碗。可服七人。凡天行瘟病去處。有力之人。合以施給。陰德無量。

滇壺丹

夢感滇人相授。治黴瘡甚驗。

白殭蠶略炒

全

蠍一錢五分 酒洗瓦焙 大

黃生用

右為細末。雞未鳴時。蜜湯調下三五匙。午後粥補。明日又服。以蟲出瘡乾為度。以蜜湯旋和末為丸亦可。

八仙茶 此得之武當山人。

粳米

黃粟米

黃豆

赤小豆

萊

豆五者炒香 茶一斤

脂淨五

花椒淨一

小茴香淨二

乾白薑泡一

白鹽炒一

以上十一味俱爲細末。和合一處。外加麥麵炒黃熟與前十一味。等分拌勻。磁罐收藏。胡桃仁、南棗、松子仁、瓜仁、白砂糖之類。任意加入。每用二三匙。白湯點服。

小刀圭 此方士所授。與古方小異。

黃牛犢一隻。用未知陰陽者。肥嫩純黃色。先期辦後開藥料。至臘月初八日。或本月戊己日。宰取血。擣毛留皮。碎切。臟腑分寸不遺。用長流水大鍋煮至半熟。加後項藥。用鹿代之更妙

人參約牛十斤 茯苓去皮約牛十

苓斤

黃耆刮淨用五約牛十

良薑去梗 肉桂去粗皮用五錢 陳皮留白約牛五

甘草去皮約牛十斤用一兩 花椒去目約牛十斤用一兩

白鹽臨澆時斟酌用 醇酒二斗上下

右件同牛文武火煮。旋添熟水。當以八分爲節。取牛肉爛如泥。槌骨內之髓。煎化入汁中。漉去滓。但存稠汁。有如稀錫。待冷。入密甕。掘黃土坑。埋齊甕口。封固。凡早食不拘何樣飲食。加此數匙調和。人事勞苦并房慾之後。醇酒調服。造酒至醇來之日。加此甚佳。曾見飛霞先煉蜜候膏成入蜜攪勻纔收甕內

長松酒方 此方廬山休休子傳。

長松此酒中聖藥產太行西北支 黃耆蜜炙 生地黃各七錢

熟地黃與生地俱入錢 蒼朮三錢米泔浸 陳皮去白七錢 枳殼四錢

當歸身五錢 白芍藥煨五錢 半夏薑製三錢 厚朴五錢

菊花五錢

天門冬三錢

麥門冬三錢

砂仁三錢

木香二錢

人參四錢

點椒二錢

酥七錢

黃柏五錢

黃連二錢

胡桃仁去皮二錢

小紅棗去核八個

老米一撮

燈心五寸長一百二十根

一料分十劑。絹袋盛之。凡米五升。造酒一樽。煎一袋。審久乃飲。

枸杞酒

此爲家兄火證製。酒性熱。三藥製之。可通用。煮如前法。

枸杞子五錢

黃連炒三錢

萊豆一錢

水火煉蜜法

金華師最惡以鍋煎煉。非古法。授此。以白砂蜜一斤。大磁碗盛。重湯煮。不住攪。文武火。湯乾加水。以蜜滴水不散爲度。大率一斤煉成半斤。罐埋土七日。凡和丸劑。

止以藥末一半。入蜜。舂萬杵。乾再糝。以布包裹。入甌內蒸。輒又加未盡之末如此三次。則丸劑可以久收。不復回潤。

七味保嬰湯說見第六章

老大米主清胃

黃土養脾炒

苦竹葉去熱

蘿蔔子去食積

薄荷葉去熱

燈心主夜啼

麥芽和脾胃

右隨證所主者多用。其餘次之。每服不過三錢。袋盛煮湯。任意渴飲。或加蜜少許。

同類勿藥章第九凡九則

參同契云。同類易施功。非種難爲巧。雖云丹法。移之治病。雅有神化。予嘗考古今養生家。千條萬訣。莫要於人壞人補之一語。卽內經形不足者溫之以氣也。漫述數條。勿藥有喜。庶醫之完技云。

凡肩背肢節骨腕筋會之處注痛。多屬痰凝氣滯。不拘男女。但取神旺氣長者。令以口對患處。隔絹綿進氣。不呵不吹。極力努氣。使入透。覺煖至熱。又易一人。以愈爲度。

多病善養者。每夜令僕擦足心。至極熱。甚有益。三里腎俞。皆不可缺。

腎虛腰痛。令少陰掌心摩擦。每至萬餘。或令進氣於腎俞之穴。丹田冷者。亦摩擦而進於臍輪。其功尤烈。

有痿痺疾者。偃臥患處於壯陰之懷。久之生氣和浹。病氣潛消。

老人尤宜與少艾偃臥。予戚有喻千戶者。行此年九十餘。康健。

凡小疾有痛處。卽令壯夫揩擦至熱。或按之拿之。令氣血轉移。其疾可却。

服人乳。大能益心氣。補腦。治消渴證。治風火證。養老尤宜。每用一吸。卽以指塞鼻孔。按脣貼齒而漱。乳與口津相和。然後以鼻內引上吸。使氣由明堂入腦。方可徐

徐咽下。凡五七吸爲一度。不漱而服。何異。止于腸胃耳。

丹溪云。房中補益之術。非聖賢之心。神仙之骨。不能行也。蓋言聖賢能以理制欲。神仙天性。對景忘情耳。世有以此。實恣淫慾。爲泥水金丹。而祕相授受。卒至喪亡者。深可惡也。深可惡也。

韓氏醫通終

韓氏醫通卷下 同類勿藥章第九

〔清〕

王清任

著

醫
西
林
改
錯

中
國
醫
學
大
成

醫林改錯提要

清王清任字勳臣。玉田縣人。清任嘗疑中國醫學。臟腑經絡穴道之說。雖創自上古。究竟是否。未得真相。嗣西醫入中國。講解剖亦不無疑似之處。乃按照古人所述一一而對證之。如此者十年不輟。嘉慶二年丁巳四月初旬。游於灤州之稻地鎮。其時彼處小兒正染瘟疹痢疾。十死八九。無力之家。多半用席裹埋。彼處鄉風。更不深埋。故各義塚中。破腔露臟之兒。日有百餘。每日壓馬過其地。無不掩鼻。後因念及古人錯論臟腑。皆由未嘗親見。遂不避污穢。每日清晨。赴義塚就羣兒之露臟者。細檢視之。犬食之餘。大約有腸胃者多。有心肝者少。互相參看。十屍之內。看全不過三人。連視十日。看全不下三十餘人。始知醫書中所繪臟腑形圖。與人體全不相合。即數之多寡。亦不相符。惟胸中膈膜一片。其薄如紙。最關緊要。惟看時。皆已破壞。未能驗明。在心上心下。是邪是正。最爲遺憾。至嘉慶四年六月。清任在奉天。有遼陽州一婦人。年二十六歲。因瘋疾打死其夫與翁。解省擬劊。跟至西關。忽然醒悟。以彼非男子。不忍近前。片刻。行刑者提其心與肝肺從面前過。細看

與前次所檢相同。嗣至嘉慶庚寅。有打死其母之剛犯。行刑於北京崇文門外吊橋之南。近前見其臟腑。膈膜已破。仍未見得。道光八年五月十四日。剛犯張格爾。及至其處。不能近前。自思一簣未成。不能中止。道光九年十二月十三日夜間。有安定門大街板廠胡同恆宅。請余看病。因談及膈膜一事。留心四十年。未能審驗明確。內有江寧布政使恆敬公言。伊曾鎮守哈密。領兵打喀什格爾。所見誅戮逆屍最多。於膈膜一事。知之甚悉。余聞言喜出望外。即往拜扣而問之。恆公見之。細說明形狀。於是臟腑一事。訪驗四十二年。方得的確。繪成全圖。惟恐後人未見臟腑真相。意欲刊行於世。復慮後世業醫相沿。受禍又不知幾千萬年。細思黃帝慮生民疾苦。平素以靈樞之言。下問岐伯。鬼臾區等。互相對答。故名素問。二公如知。之的確。可對君言之。知之不確。須待參考。何得不知而妄對。遺禍後世。繼而秦越人著難經。張世賢割裂河圖洛書。爲之圖註。謂心肝肺以分兩計之。每件重幾許。大小腸以尺寸計之。每件長若干。胃大幾許。容穀幾許。其言彷彿似真。其實臟腑未見。以無憑之談。作欺人之事。利己不過虛名。損人却屬實禍。千百年後。豈無知者。今刻此圖。並非獨出己見。評論古人之長短。非欲後人知我。亦不避後人罪。

我。惟願醫林中人。一見此圖。胸中雪亮。眼底光明。臨證有所遵循。不致南轅北轍。出言含混。病或少失。則余有厚望焉。此清任自序之原委也。至先生立方治疾。大抵皆以約治博。上卷論臟腑之外。辨五十種血瘀之症。以三方治之。下卷論半身不遂。以一方治之。並審出未病以前四十種氣虛之形症。非心細曷克臻此。論吐瀉轉筋。治分攻補兩途。方由試驗中來。論小兒抽風。非中風。以大補元氣一方治之。以不能言之兒。查出二十種氣虛之形症。平素心細。不問可知。論痘非胎毒。痘漿非血化。以六方治。古人不治之六十種逆痘。頗有效者。清任之書。實是補前人所未備。於氣虛血瘀之症。尤能獨創新見。嘉惠後學。其功誠不可沒也。

醫林改錯提要

張序

醫仁術也。乃或術而不仁。則貪醫足以誤世。或仁而無術。則庸醫足以殺人。古云。不服藥爲中醫。蓋誠慮乎醫之仁術難兼也。至於稍讀方書。即行市道。全無仁術。奚以醫爲。余來粵數年。目擊此輩甚衆。輒有慨乎其中。每遇救急良方。不惜捐貲購送。今於癸丑四月。適聞佛山友人有幼子患症。醫以風藥投之。竟至四肢抽搐。口眼歪斜。命垂旦夕。忽得一良方。一劑稍愈。三服霍然。又有人患半身不遂者。十餘年得一良方。行走如故。余甚奇之。再四訪求。始知二方皆出自醫林改錯一書。遍求得之。歷試多驗。因於公餘沉潛反覆。頗悟其旨。竊歎此書之作。直翻千百年舊案。正其謬誤。決其瑕疵。爲希世之寶也。豈非術之精而仁之至哉。余不忍祕藏。立刊佈以公於世。使今人得悉臟腑經絡之實。而免受庸醫之誤。亦不負王勳臣先生數十年濟世之苦心矣。願同志君子勿視爲尋常善書。幸甚幸甚。

咸豐癸丑仲夏順天張潤坡識

醫林改錯 張序

劉序

丁未之秋。寄跡吳門。適同鄉焦子濬文來。手執臟腑全圖。乃勳臣王先生醫林改錯之稿也。臟腑圖漢魏以來。醫家所習見。何異乎爾。異乎勳臣先生所繪之圖。與古人殊也。臟腑人人皆同。勳臣背古以傳圖。得毋炫奇立異乎。曰否。不然也。古人之圖。傳其誤。勳臣之圖。傳其信。天下物理之是非。聞虛而見實。寡見猶虛。多見爲實。古人竊諸刑餘之一犯。勳臣得諸親見之百人。集數十載之精神。攷正乎數千年之遺誤。譬諸清夜鐘鳴。當頭棒喝。夢夢者皆爲之喚醒焉。醫書汗牛充棟。豈盡可徵。然非善讀書者。獨具隻眼。終爲古人所牢籠。而潛受其欺。孟子曰。吾於武城取二二策。武城周書也。孟子周人也。當代之書。猶且不可盡信。况遠者乎。是書繪圖立說。定方救逆。理精識卓。絕後空前。可爲黃帝之功臣。即可爲長沙之畏友。抑又聞之。葉氏指南。有久病入絡之說。徐氏非之。不知入絡卽血瘀也。今勳臣痛快言之。而指南入絡之說益明。坊友汪子維之。見而悅之。開雕梨棗。以公諸世。斯真能刊錄善書者也。是爲序。

醫林改錯 劉序

道光戊申中秋日上元後學小窗氏劉必榮識

知非子序

余讀勳臣先生醫林改錯一書。而嘆天下事。有人力爲之者。有天意成之者。先生是書。功莫大於圖繪臟腑諸形。其所以能繪諸形者。則由於親見。其所以得親見者。則由於稻地鎮之一遊也。此豈非天假之緣。而使數千載之誤。由先生而正之哉。惟膈膜一事。留心三十年。未能查驗的確。又得恆敬公確示一切。而後臟腑諸形。得以昭晰無疑。此非有天意玉成其間哉。至先生立方醫疾。大抵皆以約治博。上卷著五十種血瘀之症。以三方治之。下卷半身不遂。以一方治之。並審出未病以前四十種氣虛之形症。非細心何能至此。論吐瀉轉筋。治分攻補兩途。方由試驗中來。論小兒抽風。非中風。以大補元氣一方治之。以不能言之兒。查出二十種氣虛之形症。平素細心。不問可知。論痘非胎毒。痘漿非血化。以六方治。古人不治之六十種逆痘。頗有效者。先生之書。大抵補前人之未及。而在氣虛血瘀之症。爲多。今特揭諸篇首。

知非子書

醫林改錯知非子序

自序

余著醫林改錯一書。非治病全書。乃記臟腑之書也。其中當尙有不實不盡之處。後人倘遇機會。親見臟腑。精察增補。抑又幸矣。記臟腑後兼記數症。不過示人以規矩。令人知外感內傷。傷人何物。有餘不足。是何形狀。至篇中文義多粗淺者。因業醫者學問有淺深也。前後語句多複重者。恐心粗者前後不互證也。如半身不遂內有四十種氣虧之症。小兒抽風門有二十種氣虧之症。如遇雜症。必於六十種內互考參觀。庶免謬誤。望閱是書者。須詳審焉。玉田王清任書。

醫林改錯自序

醫林改錯目錄

卷上

醫林改錯臟腑記敘	一
古人臟腑圖	六
親見改正臟腑圖	七
會厭左氣門右氣門衛總	
管榮總管氣府血府記	一
津門津管遮食總提瓏管	
出水道記	四
腦髓說	六
氣血合脈說	七
心無血說	一〇

方敘	一
通竅活血湯所治症目	一
頭髮脫落	一
眼疼白珠紅	一
糟鼻子	一
耳聾年久	一
白癩風	一
紫癩風	一
紫印臉	一
青記臉如墨	一
牙疳	一
出臭氣	一

婦人乾勞	二四
男子勞病	二四
交節病作	二五
小兒疳證	二五
通竅活血湯	二六
血府逐瘀湯所治症目	二七
頭疼	二七
胸疼	二八
胸不任物	二八
胸任重物	二八
天亮出汗	二八
食自胸右下	二九
心裏熱名曰燈籠病	二九
脊悶	二九

急躁	二九
夜睡夢多	三〇
呃逆俗名打咯忒	三〇
飲水即噎	三〇
不眠	三〇
小兒夜啼	三〇
心跳心忙	三一
夜不安	三一
俗言肝氣病	三一
乾嘔	三一
晚發一陣燒	三一
血府逐瘀湯	三一
隔下逐瘀湯所治症目	三一
積塊	三一

卷下

小兒痞塊·····	三三
痛不移處·····	三三
臥則腹墜·····	三三
腎瀉·····	三三
久瀉·····	三四
膈下逐瘀湯·····	三四
半身不遂論敘·····	一
半身不遂論·····	二
半身不遂辨·····	四
半身不遂本源·····	五
口眼歪斜辨·····	六
辨口角流涎非痰飲·····	七

辨大便乾燥非風火·····	七
辨小便頻數遺尿不禁·····	八
辨語言蹇澀非痰火·····	八
辨口噤咬牙·····	九
記未病以前之形狀·····	九
論小兒半身不遂·····	一〇
癱痿論·····	一一
補陽還五湯·····	一一
瘟毒吐瀉轉筋說·····	一二
解毒活血湯·····	一四
急救回陽湯·····	一四
論抽風不是風·····	一五
可保立甦湯·····	一七
論痘非胎毒·····	一七

論痘漿不是血化	二〇
論出痘飲水卽噎	二一
論七八天痘瘡作癢	二一
通經逐瘀湯	二二
會厭逐瘀湯	二三
止瀉調中湯	二四
保元化滯湯	二四
助陽止癢湯	二五
足衛和榮湯	二五
少腹逐瘀湯說	二六
少腹逐瘀湯	二七
懷胎說 <small>兼記難產胎衣不下方</small>	二八
古開骨散	二九
古沒竭散	二九

黃耆桃紅湯	二九
古下瘀血湯	三〇
抽葫蘆酒	三〇
蜜葱猪膽湯	三〇
蝟蝟皮散	三一
小茴香酒	三一
痺症有瘀血說	三一
身痛逐瘀湯	三二
礪砂丸	三二
癲狂夢醒湯	三三
龍馬自來丹	三三
黃耆赤風湯	三四
黃耆防風湯	三五
黃耆甘草湯	三五

木耳散……………三五
五龍膏卽勝玉膏……………三五

辨方效經錯之源論血化
爲汗之誤……………三六

醫林改錯目錄

醫林改錯

清 玉田 王勳臣清任著

鄞縣 曹赤電炳章圈點

卷上

醫林改錯臟腑記敘

古人曰。既不能爲良相。愿爲良醫。以良醫易而良相難。余曰不然。治國良相。世代皆有著書。良醫無一全人。其所以無全人者。因前人創著醫書。臟腑錯誤。後人遵行立論。病本先失。病本既失。總有繡虎雕龍之筆。裁雲補月之能。病情與臟腑。絕不相符。此醫道無全人之由來也。夫業醫診病。當先明臟腑。嘗閱古人臟腑論。及所繪之圖。立言處處自相矛盾。如古人論脾胃。脾屬土。土主靜而不宜動。脾動則不安。既云脾動不安。何得下文又言脾聞聲則動。動則磨胃化食。脾不動。則食不化。論脾之動靜。其錯誤如是。其論肺虛如蜂窠。下無透竅。吸之則滿。呼之則虛。既

云下無透竅。何得又云肺中有二十四孔。行列分佈。以行諸臟之氣。論肺之孔竅。其錯誤又如是。其論腎有兩枚。即腰子。兩腎爲腎。中間動氣爲命門。既云中間動氣爲命門。何得又云左腎爲腎。右腎爲命門。兩腎一體。如何兩立其名。有何憑據。若以中間動氣爲命門。藏動氣者。又何物也。其論腎錯誤又如是。其論肝。左右有兩經。即血管。從兩脅肋起。上貫頭目。下由少腹環繞陰器。至足大指而止。既云肝左右有兩經。何得又云肝居於左。左脅屬肝。論肝分左右。其錯誤又如是。其論心。爲君主之官。神明出焉。意藏於心。意是心之機。意之所專曰志。志之動變曰思。以思謀遠曰慮。用慮處物曰智。五者皆藏於心。既藏於心。何得又云脾藏意。智。腎主伎巧。肝主謀慮。膽主決斷。據所論處處皆有靈機。究竟未說明生靈機者何物。藏靈機者何所。若用靈機外有何神情。其論心如此含混。其論胃主腐熟水穀。又云脾動磨胃化食。胃之上口名曰賁門。飲食入胃。精氣從賁門上輸於脾肺。宣播於諸脈。此段議論。無情無理。胃下口名曰幽門。即小腸上口。其論小腸爲受盛之官。化物出焉。言飲食入小腸。化糞下至闌門。即小腸下口。分別清濁。糞歸大腸。自肛門出水歸膀胱爲尿。如此論尿從糞中滲出。其氣當臭。嘗用童子小便。並問及自

飲小便之人。只言味鹹。其氣不臭。再者食與水合化爲糞。糞必稀溏作瀉。在雞鴨無小便則可。在牛馬有小便則不可。何況乎人。看小腸化食。水自闌門出一節。真是千古笑談。其論心包絡細筋如絲。與心肺相連者。心包絡也。又云心外黃脂是心包絡。又云心下橫膜之上。堅膜之下。黃脂是心包絡。又云膻中有名無形者。乃心包絡也。既云有名無形。何得又云手中指之經。乃是手厥陰心包絡之經也。論心包絡竟有如許之多。究竟心包絡是何物。何能有如許之多耶。其論三焦更爲可笑。靈樞曰。手少陰三焦主乎上。足太陽三焦主乎下。已是兩三焦也。難經三十。一難論三焦。上焦在胃之上。主內而不出。中焦在胃中脘。主腐熟水穀。下焦在臍下。主分別清濁。又云三焦者。水穀之道路。此論三焦是有形之物。又云兩腎中間動氣。是三焦之本。此論三焦是無形之氣。在難經一有形一無形。有是兩三焦。王叔和所謂有名無狀之三焦者。蓋由此也。至陳無擇以臍下脂膜爲三焦。袁淳甫以人身著內一層形色最赤者爲三焦。虞天民指空腔子爲三焦。金一龍有前三焦後三焦之論。論三焦者。不可以指屈。有形無形。諸公尙無定準。何得云手無名指之經。是手少陽三焦之經也。其中有自相矛盾者。有後人議駁而未當者。總之。

本源一錯。萬慮皆失。余嘗有更正之心。而無臟腑可見。自恨著書不明臟腑。豈不是癡人說夢。治病不明臟腑。何異於盲子夜行。雖竭思區畫。無如之何。十年之久。念不少忘。至嘉慶二年丁巳。余年三十。四月初旬。遊於灤州之稻地鎮。其時彼處小兒。正染瘟疹痢症。十死八九。無力之家。多半用代蓆裹埋。代蓆者。代棺之蓆也。彼處鄉風。更不深埋。意在犬食。利於下胎不死。故各義塚中。破腹露臟之兒。日有百餘。余每日壓馬過其地。初未嘗不掩鼻。後因念及古人所以錯論臟腑。皆由未嘗親見。遂不避污穢。每日清晨赴其義塚。就羣兒之露臟者。細視之。犬食之餘。大約有腸胃者多。有心肝者少。互相參看。十人之內。看全不過三人。連視十日。大約看全不下三十餘人。始知醫書中所繪臟腑形圖。與人之臟腑。全不相合。卽件數多寡。亦不相符。惟胸中膈膜一片。其薄如紙。最關緊要。及余看時。皆以破壞。未能驗明。在心下心上。是斜是正。最爲遺憾。至嘉慶四年六月。余在奉天府。有遼陽州一婦年二十六歲。因瘋疾打死其夫與翁。解省擬劊。跟至西關。忽然醒悟。以彼非男子。不忍近前。片刻行刑者提其心與肝肺。從面前過。細看與前次所看相同。後余在京時。嘉慶庚辰年。有打死其母之劊犯。行刑於崇文門外吊橋之南。卻得近

前及至其處。雖見臟腑。膈膜已破。仍未得見。道光八年五月十四日。剛逆犯張格爾。及至其處。不能近前。自思一簣未成。不能終止。不意道光九年十二月十三日夜間。有安定門大街板廠衙衙恆宅。請余看症。因談及膈膜一事。留心四十年。未能審驗明確。內有江寧布政司恆敬公言。伊曾鎮守哈密。領兵於喀什噶爾。所見誅戮逆尸最多。於膈膜一事。知之最悉。余聞言喜出望外。卽拜叩而問之。恆公鑒余苦衷。細細說明形狀。余於臟腑一事。訪驗四十二年。方得的確。繪成全圖。意欲刊行於世。惟恐後人未見臟腑。議余故叛經文。欲不刊行。復慮後世業醫受禍。相沿。又不知幾千百年。細思黃帝慮生民疾苦。平素以靈樞之言。下問岐伯。鬼臾區。故名素問。二公如知的確。可對君言。知之不確。須待參考。何得不知妄對。遺禍後世。繼而秦越人著難經。張世賢割裂河圖洛書爲之圖註。謂心肝肺以分兩計之。每件重幾許。大小腸以尺寸計之。每件長若干。胃大幾許。容穀幾斗幾升。其言彷彿似真。其實臟腑未見。以無憑之談。作欺人之事。利己不過虛名。損人卻屬實禍。竊財猶謂之盜。偷名豈不爲賊。千百年後。豈無知者。今余刻此圖。並非獨出己見。評論古人之短長。非欲後人知我。亦不避後人罪我。爲願醫林中人一見此圖。


胸中雪亮。眼底光明。臨症有所遵循。不致南轅北轍。出言含混。病或少失。是吾之厚望。幸仁人君子鑒而諒之時。



道光庚寅孟冬直隸玉田縣王清任書於京邸知一堂

古人臟腑圖

古人所繪臟腑圖形如此。

肺六葉兩
耳凡八葉





葉短之肝子附膽




親見改正臟腑圖

余將親見諸臟腑顯隱之形。繪於其後。計四十二件。


醫林改錯 卷上 親見改正臟腑圖

左氣門右氣門兩管歸中一管念
由心左轉出橫行後接衛總管




心長在氣管之下非在肺管之下
心與肺葉上稜齊

肺管至肺分兩枝入肺
兩葉直貫到底皆有節
管內所存皆輕浮白沫
如豆腐沫有形無體



兩六葉大面向背小面
向胸上有四尖向胸下
一小片亦向胸
肺外皮實無透竅亦
無行氣之二十四孔

膈膜以上僅止肺心
左右氣門餘無他物




其餘皆膈膜以下物人
身膈膜是上下界物

肝四葉
膽附于
肝右邊
第二葉



總提長於胃上肝又
長於總提之上大面
向上後連於脊肝體
堅實非腸胃膀胱可
比絕不能藏血

胃府之體質
止口貴門在
胃上正中下
口幽門亦在
胃上偏右幽
門之左寸許
么津門胃內
津門之左有
痞痞如棗名
遮食胃外津
門左名總提
肝連于其上




胃在腹是
平鋪臥長
上口向脊
下口向右
底向腹連
出水道

脾中有一
管體像玲
瓏易于出
水故名瓏
管




脾之長短與胃
相等 脾中間
一管即是瓏管
另畫瓏管者謂
有出水道令人
易辨也

氣府俗名鷄冠
油下棱抱小腸
氣府內小腸外
乃存元氣之所
元氣化食人身
生命之源全在
于此




此係小腸外有氣府包裹之

此是瓏管
水由瓏管
分流兩邊
出水道由
出水道滲
出沁入膀
胱為尿





出水道中有
有同血管
其餘皆係
水管




大腸上口即
小腸下口
名闌門大
腸下口即
肛門


兩腎凹處有
氣管兩根通
衛總管兩傍
腎體堅實內
無孔竅絕不
能藏精



精道下孔亦歸玉莖
精道在婦女名子宮

舌後白片
名曰會厭
乃遮蓋左
右氣門喉
門之物





古人言經絡是血管。由每臟腑向外長兩根。惟膀胱長四根。余親見百餘臟腑。並無向外長血管之形。故書於圖後以記之。

會厭左氣門右氣門衛總管榮總管氣府血府記

欲知臟腑體質。先明出氣入氣與進飲食之道路。古人謂舌根後名曰喉。喉者候也。候氣之出入。即肺管上口是也。喉之後名曰咽。咽者嚥也。嚥飲食入胃。即胃管

上口是也。謂咽以納食。喉以納氣。爲千古不易之定論。自靈素至今四千年來。無人知其錯而改正者。如咽嚥飲食入胃。人所共知。惟喉候氣之出入一節。殊欠明白。不知肺兩葉大面向背。上有四尖向胸。下有小片亦向胸。肺管下分爲兩杈。入肺兩葉。每杈分九中杈。每中杈分九小杈。每小杈長數小枝。枝之盡頭處。並無孔竅。其形彷彿麒麟菜。肺外皮亦無孔竅。其內所存皆輕浮白沫。肺下實無透竅。亦無行氣之二十四孔。先賢論吸氣則肺滿。呼氣則肺虛。此等錯誤。不必細辯。人氣向裏吸。則肚腹滿大。非肺滿大。氣向外呼。則肚腹虛小。非肺虛小。出氣入氣吐痰。吐飲唾津。流涎與肺毫無干涉。肺管之後。胃管之前。左右兩邊凹處。有氣管兩根。其粗如筋。上口在會厭之下。左曰左氣門。右曰右氣門。痰飲津涎。由此氣管而出。古人誤以咳嗽喘噤哮吼等症。爲肺病者。因見其症自胸中來。再者。臨症查有外感。用發散而愈。有燥痰。用清涼而愈。有積熱。用攻下而愈。有氣虛。用補中而愈。有陰虧。用滋陰而愈。有瘀血。用逐瘀而愈。揚揚得意。立言著書。以爲肺病無疑。不知左氣門右氣門兩管。由肺管兩傍。下行至肺管前面半截處。歸並一根。如樹兩杈歸一本。形粗如筋。下行入心。由心左轉出。粗如筆管。從心左後行。由肺管左邊過。

肺入脊前。下行至尾骨。名曰衛總管。俗名腰管。自腰以下。向腹長兩管。粗如筋。上一管通氣府。俗名雞冠油。如倒提雞冠花之狀。氣府乃抱小腸之物。小腸在氣府。是橫長。小腸外氣府內。乃存元氣之所。元氣即火。火即元氣。此火乃人生命之源。食由胃入小腸。全仗元氣蒸化。元氣足則食易化。元氣虛則食難化。此記向腹之上一管。下一管。大約是通男子之精道。女子之子宮。獨此一管。細心查看。未能查驗的確。所以疑似。以俟後之業醫者。倘遇機會。細心查看再補。衛總管對背心兩邊。有兩管。粗如筋。向兩肩長。對腰有兩管。通連兩腎。腰下有兩管。通兩胯。腰上對脊正中。有十一支管。連脊。此管皆行氣行津液。氣足火旺。將津液煎稠。稠者名曰痰。氣虛火衰。不能煎熬津液。津液必稀。稀者名曰飲。痰飲在管。總以管中之氣上攻。上行過心。由肺管前氣管中。出左右氣門。痰飲津涎。本氣管中物。古人何以誤爲肺中物。因不知肺管前有氣管相連而長。止知痰飲津涎自胸中來。便疑爲肺中物。總是未親見臟腑之故。手握足步。頭轉身搖。用行舍藏。全憑此氣。人氣向裏吸。則氣府滿。氣府滿。則肚腹大。氣向外呼。則氣府虛。氣府虛。則肚腹小。衛總管行氣之府。其中無血。若血歸氣府。血必隨氣而出。上行則吐血衄血。下行則溺血便

血。衛總管之前。相連而長。粗如筋。名曰榮總管。卽血管盛血。與衛總管長短相等。其內之血。由血府灌漑。血府卽人胸下膈膜一片。其薄如紙。最爲堅實。前長與心口凹處齊。從兩脅至腰上。順長如坡。前高後低。低處如池。池中存血。卽精汁所化。名曰血府。精汁詳胃津門條下。前所言會厭卽舌後之白片。乃遮蓋左右氣門喉門之物也。

津門津管遮食總提瓏管出水道記

咽下胃之一物。在禽名曰嚙。在獸名曰肚。在人名曰胃。古人畫胃圖。上口在胃上。名曰賁門。下口在胃下。名曰幽門。言胃上下兩門。不知胃是三門。畫胃豎長。不知胃是橫長。不但橫長。在腹是平鋪臥長。上口賁門向脊。下底向腹。下口幽門亦在胃上。偏右脅向脊。幽門之左寸許。另有一門。名曰津門。津門上有一管。名曰津管。是由胃出精汁水液之道路。津管一物。最難查看。因上有總提遮蓋。總提俗名膜子。其體長。於賁門之右。幽門之左。正蓋津門。總提下前連氣府。接小腸。後接提大腸。在胃上後連肝。肝連脊。此是膈膜以下。總提連貫胃肝大小腸之體質。飲食入

胃。食留於胃。精汁水液。先由津門流出入津管。津管寸許外分三枝。精汁清者。入髓府化髓。精汁濁者。由上枝臥則入血府。隨血化血。其水液由下枝從肝之中間。穿過入脾。脾中間有一管。體相玲瓏。名曰瓏管。水液由瓏管分流兩邊。入出水道。出水道形如魚網。俗名網油。水液由出水道滲出。沁入膀胱。化而為尿。出水道出水一段。體查最難。自嘉慶二年看臟腑時。出水道有滿水鈴鐺者。有無水鈴鐺者。於理不甚透徹。以後診病。查看久病壽終之人。臨時有多飲水者。有少飲水者。有不飲水者。故後其水仍然在腹。以此與前所看者參考。與出水道出水一節。雖然近理。仍不敢為定準。後以畜較之。遂喂遂殺之畜。網油滿水鈴鐺。三四日不喂之畜。殺之無水鈴鐺。則知出水道出水無疑。前言飲食入胃。食留於胃。精汁水液。自津門流出。津門既孔如筋大。能向外流精水汁液。稀粥豈不能流出津門。雖孔如筋大。其處胃體甚厚。四圍靠擠縮小。所以水能出而食不能出。況胃之內。津門之左一分遠。有一疙瘩。形如棗大。名曰遮食。乃攢食於水之物。待精汁水液流盡。食方腐熟。漸入小腸。化而為糞。小腸何以化食為糞。小腸外有氣府。氣府抱小腸。小腸外氣府內。乃存元氣之所。元氣化食。此處與前氣府參看。化糞入大腸。自肛門

出。此篇記精汁由胃出津門。生精生血。水液由瓏管出水道。入膀胱爲尿。食由胃入小腸。元氣蒸化爲糞之原委也。

腦髓說

靈機記性。不在心在腦一段。本不當說。縱然能說。必不能行。欲不說。有許多病人不知原始。至此又不得不說。不但醫書論病。言靈機發於心。卽儒家談道德言性理。亦未有不言靈機在心者。因始創之人。不知心在胸中。所辦何事。不知咽喉兩傍有氣管兩根。行至肺管前。歸並一根。入心。由心左轉出。過肺入脊。名曰衛總管。前通氣府精道。後通脊。上通兩肩。中通兩腎。下通兩腿。此管乃存元氣與津液之所。氣之出入。由心所過。心乃出入氣之道路。何能生靈機。貯記性。靈機記性在腦者。因飲食生氣血。長肌肉。精汁之清者。化而爲髓。由脊骨上行入腦。名曰腦髓。盛腦髓者。名曰髓海。其上之骨。名曰天靈蓋。兩耳通腦。所聽之聲歸於腦。腦氣虛。腦縮小。腦氣與耳竅之氣不接。故耳虛聾。耳竅通腦之道路中。若有阻滯。故耳實聾。兩目卽腦汁所生。兩目系如線長於腦。所見之物歸於腦。瞳人白色。是腦汁下注。

名曰腦汁入目。鼻通於腦。所聞香臭歸於腦。腦受風熱。腦汁從鼻流出。涕濁氣臭。名曰腦漏。看小兒初生時。腦未全。顙門軟。目不靈動。耳不知聽。鼻不知聞。舌不言。至週歲腦漸生。顙門漸長。耳稍知聽。目稍有靈動。鼻微知香臭。舌能言一二字。至三四歲。腦髓漸滿。顙門長全。耳能聽。目有靈動。鼻知香臭。言語成句。所以小兒無記性者。腦髓未滿。高年無記性者。腦髓漸空。李時珍曰。腦爲元神之府。金正希曰。人之記性皆在腦中。汪訥庵曰。今人每記憶往事。必閉目上瞪而思索之。腦髓中一時無氣。不但無靈機。必死一時。一刻無氣。必死一刻。試看癰症。俗名羊羔風。卽是元氣一時不能上轉入腦髓。抽時正是活人死腦袋。活人者。腹中有氣。四肢抽搐。死腦袋者。腦髓無氣。耳聾眼天。弔如死。有先喊一聲而後抽者。因腦先無氣。胸中氣不知出入。暴向外出也。正抽時。胸中有漉漉之聲者。因津液在氣管。腦無靈機之氣。使津液吐噦。津液逗留在氣管。故有在聲。抽後頭疼昏睡者。氣雖轉入於腦。尙未足也。小兒久病後元氣虛抽風。大人暴得氣厥。皆是腦中無氣。故病人毫無知識。以此參考。豈不是靈機在腦之證據乎。

氣血合脈說

脈之形余以實情告後人若違心裝神仙喪天良評論必遭天誅

氣府存氣。血府存血。衛總管。由氣府行周身之氣。故名衛總管。榮總管。由血府行周身之血。故名榮總管。衛總管。體厚形粗長。在脊骨之前。與脊骨相連。散佈頭面四肢。近筋骨長。即周身氣管。榮總管。體薄形細長。在衛總管之前。與衛總管相連。散佈頭面四肢。近皮肉長。即周身血管。氣在氣府有出有入。出入者。呼吸也。目視耳聽。頭轉身搖。掌握足步。靈機使氣之動轉也。血自血府入榮總管。由榮總管灌入周身血管。滲於管外。長肌肉也。氣管近筋骨生。內藏難見。血管近皮肉長。外露易見。氣管行氣。氣行則動。血管盛血。靜而不動。頭面四肢。按之跳動者。皆是氣管。並非血管。如兩眉稜骨後凹處。俗名兩太陽。是處肉少皮連骨。按之跳動。是通頭面之氣管。兩足大指次指之端。是處肉少皮連骨。按之跳動。是通兩足之氣管。兩手腕橫紋高骨之上。是處肉少皮連骨。按之跳動。是通兩手之氣管。其管有粗有細。有直有曲。各人體質不同。胳膊肘下。近手腕肉厚。氣管外露者短。胳膊肘下。近手腕肉薄。氣管外露者長。如外感中人。風入氣管。其管必粗。按之出膚。寒入氣管。管中津液必凝。凝則阻塞。其氣按之跳動必慢。火入氣管。火氣上炎。按之跳動必急。人壯邪氣勝。管中氣多。按之必實。大力。人弱正氣衰。管中氣少。按之必虛小。

無力。久病無生機之人。元氣少。僅止上行頭面兩手。無氣下行。故足面按之不動。若兩手腕氣管上。按之似有似無。或細小如絲。或指下微微亂動。或按之不動。忽然一跳。皆是氣將絕之時。此段言人之氣管。生平有粗細曲直之不同。管有短長者。因手腕之肉有薄厚也。按之大小者。虛實也。跳動之急慢者。寒火之分也。前所言。明明是脈。不言脈者。因前人不知人有左氣門右氣門。血府氣府。衛總管。榮總管。津門津管。總提遮食。瓏管出水道。在腹是何體質。有何用處。論臟腑包絡。未定準。是何物。論經絡三焦。未定準。是何物。並不能指明經絡是氣管。血管。血管。論脈理。首句便言脈爲血府。百骸貫通。言脈是血管。氣血在內流通。周而復始。若以流通而論。此處血真能向彼處流。彼處當有空隙之地。有空隙之地。則是血虛。無空隙之地。血流歸於何處。古人並不知脈是氣管。竟著出許多脈訣。立言雖多。論部位一人一樣。並無相同者。古人論脈二十七字。余不肯深說者。非謂古人無容足之地。恐後人對症無論脈之言。診脈斷死生易。知病難。治病之要訣。在明白氣血。無論外感內傷。要知初病傷人。何物不能傷臟腑。不能傷筋骨。不能傷皮肉。所傷者無非氣血。氣有虛實。實者邪氣實。虛者正氣虛。正氣虛。當與半身不遂門四十種氣。

虛之症。小兒抽風門。二十種氣虛之症。互相參考。血有虧瘀。血虧必有虧血之因。或因吐血衄血。或溺血便血。或破傷流血過多。或崩漏產後傷血過多。若血瘀有血瘀之症可查。後有五十種血瘀症。互相參考。惟血府之血。瘀而不活。最難分別。後半日發燒。前半夜更甚。後半夜輕。前半日不燒。此是血府血瘀。血瘀之輕者。不分四段。惟日落前後燒兩時。再輕者。或燒一時。此內燒兼身熱而言。若午後身涼。發燒片刻。乃氣虛參耆之症。若天明身不熱。發燒止一陣。乃參附之症。不可混含從事。

心無血說

余友薛文煌。字朗齋。通州人。素知醫。道光十年二月。因赴山東。來舍辭行。閑談言及古人論生血之源。有言心生血。脾統血者。有言脾生血。心統血者。不知宗誰。余曰。皆不可宗。血是精汁入血府所化。心乃是出入氣之道路。其中無血。朗齋曰。吾兄所言不實。諸物心皆有血。何獨人心無血。余曰。弟指何物心有血。曰。古方有遂心丹治癲狂。用甘遂末。以猪心血和爲丸。豈不是猪心有血之憑據。余曰。此古人

之錯。非心內之血。因刀刺破其心腔子。內血流入於心。看不刺破之心。內並無血。余見多多。試看殺羊者。割其頸項不刺心。心內亦無血。又曰不刺心。何死之速。余曰滿腔血從刀口流。所以先流者速。繼而周身血退還腔子。所以後流者遲。血盡氣散。故死之速。如人鬪毆破傷。流血過多。氣散血亡。漸至抽風。古人立名曰破傷風。用散風藥治死受傷者。凶身擬抵治一個。即是死兩個。若明白氣散氣亡之義。即用黃耆半斤。黨參四兩。大補其氣。救一人豈不是救兩人。朗齋點首而別。

方敘

余不論三焦者。無其事也。在外分頭面四肢。周身血管。在內分膈膜上下兩段。膈膜以上。心肺咽喉。左右氣門。其餘之物。皆在膈膜以下。立通竅活血湯。治頭面四肢周身血管血瘀之症。立血府逐瘀湯。治胸中血府血瘀之症。立膈下逐瘀湯。治肚腹血瘀之症。病有千狀萬態。不可以余爲全書。查證有王肯堂證治準繩。查方有周定王朱繡普濟方。查藥有李時珍本草綱目。三書可謂醫學之淵源。可讀可記。有國朝之醫宗金鑑。理足方效。有吳又可瘟疫論。其餘名家。雖未見臟腑而攻

發補瀉之方。效者不少。余何敢云著書。不過因著醫林改錯臟腑圖記後。將平素所治氣虛血瘀之症。記數條示人以規矩。並非全書。不善讀者。以余之書爲全書。非余誤人。是誤余也。

通竅活血湯所治症目

通竅活血湯所治之病。開列於後。

頭髮脫落

傷寒瘟病後頭髮脫落。各醫書皆言傷血。不知皮裏肉外血瘀。阻塞血路。新血不能養髮。故髮脫落。無病脫髮。亦是血瘀。用藥三付。髮不脫。十付必長新髮。

眼疼白珠紅

眼疼白珠紅。俗名暴發火眼。血爲火燒。凝於目珠。故白珠紅色。無論有雲翳無雲翳。先將此藥吃一付。後吃加味止痛沒藥散。一日二付。三兩日必全愈。

糟鼻子

色紅是瘀血。無論三二十年。此方服三付。可見效。二三十付可全愈。舍此之外。並

無驗方。

耳聾年久

耳孔內小管通腦。管外有瘀血。靠擠管閉。故耳聾。晚服此方。早服通氣散。一日兩付。三二十年耳聾可愈。

白癥風

血瘀於皮裏。服三五付可不散漫。再服三十付。可痊。

紫癥風

血瘀於膚裏。治法照白癥風。無不應手取效。

紫印臉

臉如打傷血印。色紫成片。或滿臉皆紫。皆血瘀所致。如三五年。十付可愈。若十餘年。三二十付必愈。

青記臉如墨

血瘀症。長於天庭者多。三十付可愈。白癥、紫癥、紫印、青記。自古無良方者。不知病源也。

牙疳

牙者骨之餘。養牙者血也。傷寒、瘟疫、痘疹、痞塊，皆能燒血。血瘀牙床，紫黑，血死牙脫。人豈能活？再用涼藥凝血，是促其死也。遇此症，將此藥晚服一付，早服血府逐瘀湯一付，白日煎黃耆八錢，徐徐服之，一日服完，一日三付，三日可見效。十日大見功。一月可全愈。總然牙脫五七個，不穿腮者，皆可活。

出氣臭

血府血瘀，血管血必瘀。氣管與血管相連，出氣安得不臭？即風從花裏過來，香之義。晚服此方，早服血府逐瘀湯，三五日必效。無論何病，聞出臭氣，照此法治。

婦人乾勞

經血三四月不見，或五六月不見，咳嗽喘喘，飲食減少，四肢無力，午後發燒，至晚尤甚。將此方吃三付，或六付，至重者九付，未有不全愈者。

男子勞病

初病，四肢痠軟無力，漸漸肌肉消瘦，飲食減少，面色黃白，咳嗽吐沫，心煩急躁，午後潮熱，天亮汗多，延醫調治，始而滋陰，繼而補陽，補之不效，則云虛不受補，無可

如何可笑著書者。不分別因弱致病。因病致弱。果係傷寒瘟疫大病後。氣血虛弱。因虛弱而病。自當補弱而病可痊。本不弱而生病。因病久致身弱。自當去病。病去而元氣自復。查外無表症。內無裏症。所見之症。皆是血瘀之症。常治此症。輕者九付可愈。重者十八付可愈。吃三付後。如果氣弱。每日煎黃耆八錢。徐徐服之。一日服完。此攻補兼施之法。若氣不甚弱。黃耆不必用。以待病去。元氣自復。

交節病作

無論何病。交節病作。乃是瘀血。何以知其是瘀血。每見因血結吐血者。節亦發。故知之。服三付不發。

小兒疳證

疳病初起。尿如米泔。午後潮熱。日久青筋暴露。肚大堅硬。面色青黃。肌肉消瘦。皮毛憔悴。眼睛發眵。古人以此症。在大人爲勞病。在小兒爲疳疾。照前症再添某病。則曰某疳。如脾疳、疳瀉、疳腫、疳痢、肝疳、心疳、疳渴、肺疳、腎疳、疳熱、腦疳、眼疳、鼻疳、牙疳、脊疳、蛔疳、無辜疳、丁奚疳、哺露疳。分病十九條。立五十方。方內多有梔子、黃連、羚羊、石膏、大寒之品。因論病源係乳食過飽。肥甘無節。停滯中脘。傳化遲滯。腸

胃漸傷。則生積熱。熱盛成疳。則消耗氣血。煎灼津液。故用大寒以清積熱。余初時對症用方。無一效者。後細閱其論。因飲食無節。停滯中脘。此論是停食。不宜大寒之品。以傳化遲滯。腸胃漸傷。則生積熱之句而論。當是虛熱。又不宜用大寒之品。後遇此症。細心審查。午後潮熱。至晚尤甚。乃瘀血也。青筋暴露。非筋也。現於皮膚者。血管也。血管青者。內有瘀血。漸至肚大堅硬成塊。皆血瘀凝結而成。用通竅活血湯。以通血管。用血府逐瘀湯。去午後潮熱。用隔下逐瘀湯。消化積塊。三方輪服。未有不愈者。

通竅活血湯

赤芍一錢

川芎一錢

桃仁三錢
研泥

紅花三錢

老葱三根
切碎

鮮薑三錢
切碎

紅棗七個
去核

麝香五釐
絹包

用黃酒半斤。將前七味煎一鍾去渣。將麝香入酒內。再煎二沸。臨臥服。方內黃酒。各處分兩不同。寧可多二兩。不可少。煎至一鍾。酒亦無味。雖不能飲酒之人亦可服。方內麝香。市井易於作假。一錢真可合一兩假。人又不能辨。此方麝香最要緊。多費數文。必買好的方妥。若買當門子更佳。大人一連三晚吃三付。隔一日再吃。

三付。若七八歲小兒。兩晚吃一付。三兩歲小兒。三晚吃一付。麝香可煎三次。再換新的。

〔方歌〕通竅全憑好麝香。桃紅大棗老慈薑。川芎黃酒赤芍藥。表裏通經第一方。

加味止痛沒藥散 治初起眼疼白珠紅。後起雲翳。

沒藥 三錢

血竭 三錢

大黃 三錢

朴硝 二錢

石決明 三錢

爲末分四付。早晚清茶調服。眼科外症千古一方。

通氣散 治耳聾不聞雷聲。余三十歲立此方。

柴胡 一兩

香附 一兩

川芎 五錢

爲末。早晚開水沖服三錢。

血府逐瘀湯所治症目

血府逐瘀湯所治之病。開列於後。

頭痛

頭痛有外感。必有發熱惡寒之表症。發散可愈。有積熱必舌乾。口渴。用承氣可愈。有氣虛。必似痛不痛。用參耆可愈。查患頭痛者。無表症。無裏症。無氣虛痰飲等症。忽犯忽好。百方不效。用此方一劑而愈。

胸疼

胸疼在前面。用木金散可愈。後通背亦疼。用瓜蒌薤白白酒湯可愈。在傷寒用瓜蒌陷胸柴胡等。皆可愈。有忽然胸疼。前方皆不應。用此方一付。疼立止。

胸不任物

江西巡撫阿霖公。年七十四。夜露臥胸可睡。蓋一層布壓則不能睡。已經七年。召余診之。此方五付全愈。

胸任重物

一女二十二歲。夜臥令僕婦坐於胸方睡。已經二年。余亦用此方。三付而愈。設一齊問病源。何以答之。

天亮出汗

醒後出汗。名曰自汗。因出汗醒。名曰盜汗。盜散人之氣血。此是千古不易之定論。

竟有用補氣固表滋陰降火。服之不效。而反加重者。不知血瘀亦令人自汗盜汗。用血府逐瘀湯。一兩付而汗止。

食自胸右下

食自胃管而下。宜從正中食入咽。有從胸右邊嚥下者。胃管在肺管之後。仍由肺葉之下轉入肺前。由肺下至肝前。出膈膜入腹。肺管正中。血府有瘀血。將胃管擠靠於右。輕則易治。無礙飲食也。重則難治。擠靠胃管。灣而細。有礙飲食也。此方可效。全愈難。

心裏熱名曰燈籠病

身外涼。心裏熱。故名燈籠病。內有血瘀。認爲虛熱。愈補愈瘀。認爲實火。愈涼愈凝。三兩付血活熱退。

瞥悶

卽小事不能開展。卽是血瘀。三付可好。

急躁

平素和平。有病急躁是血瘀。一二付必好。

夜睡夢多

夜睡夢多是血瘀。此方一兩付全愈。外無良方。

呃逆俗名打咯忒

因血府血瘀。將通左氣門。右氣門。歸並心上一根氣管從外擠嚴。吸氣不能下行。隨上出故呃氣。若血瘀甚。氣管閉塞。出入之氣不通。悶絕而死。古人不知病源。以橘皮竹茹湯、承氣湯、都氣湯、丁香柿蒂湯、附子理中湯、生薑瀉心湯、代赭旋覆湯、大小陷胸等湯治之。無一效者。相傳咯忒傷寒咯忒瘟病必死。醫家因古無良法。見此症則棄而不治。無論傷寒瘟疫雜症。一見呃逆。速用此方。無論輕重。一付即效。此余之心法也。

飲水即噎

飲水即噎。乃會厭有血滯。用此方極效。古人評論全錯。余詳於痘症條。

不眠

夜不能睡。用安神養血藥治之不效者。此方若神。

小兒夜啼

何得白日不啼。夜啼者。血瘀也。此方一兩付全愈。

心跳心忙

心跳心忙。用歸脾安神等方不效。用此方百發百中。

夜不安

夜不安者。將臥則起。坐未穩又欲睡。一夜無寧刻。重者滿床亂滾。此血府血瘀。此方服十餘付。可除根。

俗言肝氣病

無故愛生氣。是血府血瘀。不可以氣治。此方應手效。

乾嘔

無他症。惟乾嘔。血瘀之症。用此方化血。而嘔立止。

晚發一陣熱

每晚內熱。兼皮膚熱一時。此方一付可愈。重者兩付。

血府逐瘀湯

當歸三錢

生地三錢

桃仁四錢

紅花三錢

枳殼二錢

赤芍二錢

柴胡一錢

甘草一錢

桔梗一錢

川芎一錢

牛膝三錢

水煎服。

〔方歌〕血府當歸生地桃。紅花甘草殼赤芍。柴胡芎桔牛膝等。血化下行不作勞。

隔下逐瘀湯所治症目

隔下逐瘀湯所治之症。開列於後。

積塊

積聚一症。不必論古人立五積六聚七癥八瘕之名。亦不議駁其錯。駁之未免過煩。今請問在肚腹能結塊者是何物。若在胃結者必食也。在腸結者燥糞也。積塊日久。飲食仍然如故。自然不在腸胃之內。必在腸胃之外。腸胃之外。無論何處。皆有氣血。氣有氣管。血有血管。氣無形不能結塊。結塊者必有形之血也。血受寒則凝結成塊。血受熱則煎熬成塊。豎血管凝結則成豎條。橫血管凝結則成橫條。橫豎血管皆凝結。必接連成片。片凝日久。厚而成塊。既是血塊當發燒。要知血府血

瘀必發燒。血府血之根本。瘀則殞命。肚腹血瘀不發燒。肚腹血之梢末。雖瘀不致傷生。無論積聚成塊。在左肋、右肋、臍左、臍右、臍上、臍下。或按之跳動。皆以此方治之。無不應手取效。病輕者少服。病重者多服。總是病去藥止。不可多服。倘病人氣弱。不任尅消。原方加黨參三五錢。皆可不必拘泥。

小兒痞塊

小兒痞塊。肚大青筋。始終總是血瘀爲患。此方與前通竅活血湯、血府逐瘀湯。三方輪轉服之。月餘。未有不成功者。

痛不移處

凡肚腹疼痛。總不移動。是血瘀。用此方治之。極效。

臥則腹墜

病人夜臥。腹中似有物。左臥向左邊墜。右臥向右邊墜。此是內有血瘀。以此方爲主。有雜症。兼以他藥。

腎瀉

五更天泄三兩次。古人名曰腎泄。言是腎虛。用二神丸、四神丸等藥。治之不效。常

有三五年不愈者。病不知源。是難事也。不知總提上有瘀血。臥則將津門攢嚴。水不能由津門出。由幽門入小腸。與糞合成一處。糞稀漉。故清晨瀉三五次。用此方逐總提上之瘀血。血活津門無攢。水出瀉止。三五付可全愈。

久瀉

瀉肚日久。百方不效。是總提瘀血過多。亦用此方。

隔下逐瘀湯

靈脂 <small>二錢炒</small>	當歸 <small>三錢</small>	川芎 <small>二錢</small>	桃仁 <small>三錢研泥</small>
丹皮 <small>二錢</small>	赤芍 <small>二錢</small>	烏藥 <small>二錢</small>	元胡 <small>一錢</small>
甘草 <small>三錢</small>	香附 <small>錢半</small>	紅花 <small>三錢</small>	枳殼 <small>錢半</small>

水煎服。

〔方歌〕隔下逐瘀桃牡丹。赤芍烏藥元胡甘。歸芎靈脂紅花殼。香附開鬱血亦安。

醫林改錯

清 玉田 王勳臣清任著

鄞縣 曹赤電炳章圈點

卷下

半身不遂論敘

醫家立言著書。心存濟世者。乃良善之心也。必須親治其症。屢驗方法。萬無一失。方可傳與後人。若一症不明。留與後人再補。斷不可徒取虛名。恃才立論。病未經見。揣度立方。倘病不知源。方不對症。是以活人之心。遺作殺人之事。可不畏歟。如傷寒、瘟疫、雜症、婦科。古人各有所長。對症用方。多半應手取效。其中稍有偏見。不過白玉微瑕。惟半身不遂一症。古之著書者。雖有四百餘家。於半身不遂立論者。僅止數人。數人中並無一人說明病之本源。病不知源。立方安得無錯。余少時遇此症。始遵靈樞素問、仲景之論。治之無功。繼遵河間、東垣、丹溪之論。投藥罔效。輾

轉躊躇。幾至束手。伏思張仲景論傷寒。吳又可著瘟疫。皆獨出心裁。並未引古經一語。余空有活人之心。而無濟世之手。凡遇是症。必細心研究。審氣血之榮枯。辨經絡之通滯。四十年來。頗有所得。欲公之天下。以濟後人。奈不敢以管見之學。駁前人之論。另立方法。自取其罪。友人曰。真胸有確見。屢驗良方。補前人之缺。救後人之難。不但有功於後世。正是前代之勲臣。又何罪之有。余聞斯議。不揣鄙陋。將男婦小兒。半身不遂。癱腿痿症。抽搐筋攣。得病之源。外現之症。屢驗良法。難治易治之形狀。及前人所論脈理臟腑經絡之錯誤。一一繪圖申明其說。詳述前後。以俟高明。再加補助。於醫道不無小補云爾。

半身不遂論

半身不遂。病本一體。諸家立論。竟不相同。始而靈樞經曰。虛邪偏客於身半。其入深者。內居榮衛。榮衛衰則真氣去。邪氣獨留。發為偏枯。偏枯者。半身不遂也。素問曰。風中五臟六腑之俞所中。則為偏風。張仲景曰。夫風之為病。當令人半身不遂。三書立論。本源皆專主於風。至劉河間出世。見古人方論無功。另出手眼。云中風

者。非肝木之風內動。亦非外中於風。良由將息失宜。內火暴甚。水怯莫制。心神昏昧。卒倒無所知。其論專主於火。李東垣見河間方論矛盾。又另立論曰。中風者。氣虛而風邪中之病。在四旬以後。壯盛稀有。肥白氣虛者。間亦有之。論中有中腑。中臟。中血脈。中經絡之分。立法以本氣虛外受風邪。是其本也。朱丹溪見東垣方症不符。又分途立論。言西北氣寒。有中風。東南氣濕。非真中風。皆因氣血先虛。濕生痰。痰生熱。熱生風也。其論專主於痰。濕痰是其本也。王安道見丹溪論中有東南氣濕。非真中風一句。便云靈樞素問。仲景所言。是真中風。河間東垣丹溪所言。是類中風。虞天民言。王安道分真中風。類中風之說。亦未全是。四方病此者。盡因氣濕痰火。挾風而作。何嘗見有真中風。類中風之分。獨張景岳有高人之見。論半身不遂。大體屬氣虛。易中風之名。著非風之論。惟引用內經厥逆並辨論寒熱血虛。及十二經之見症與症不符。其方不效者。可惜先生於此症。閱歷無多。其餘名家所論病因。皆是因風因火因氣因痰之論。所立之方。俱係散風清火順氣化痰之方。有云氣血虛弱而中風邪者。於散風清火方中。加以補氣養血之藥。有云陰虛虧損而中風邪者。於滋陰補腎藥內。佐以順氣化痰之品。或補多而攻少。或補少而攻

多。自謂攻補兼施。於心有得。今人遵用。仍然無效。又不敢議論古人之非。不曰古方不合。今病便云。古今元氣不同。既云方不合病。元氣不同。何得傷寒病麻黃承氣陷胸柴胡。應手取效。何得中風門愈風導痰秦艽三化。屢用無功。總不思古人立方之本。效與不效。原有兩途。其方效者。必是親治其症。屢驗之方。其不效者。多半病由議論。方從揣度。以議論揣度。定論立方。如何能明病之本源。因何半身不遂。口眼歪斜。因何語言蹇澀。口角流涎。因何大便秘結。小便頻數。毫無定見。古人混猜以一虧損五成元氣之病。反用攻發剋消之方。安得不錯。溯本窮源。非錯於醫。乃錯自著書者之手。嗟呼。此何等事。而竟以意度。想當然乎哉。

半身不遂辨

或曰。半身不遂。古人風火濕痰之論。諸家層次議駁。有證據可憑乎。余曰。卽以仲景傷寒論中風篇云。中風則令人頭疼身痛。發熱惡寒。乾嘔自汗。金匱要略論傷風。則令人鼻塞噴嚏。咳嗽聲重。鼻流清涕。中風本門又云。夫風之爲病。當令人半身不遂。今請問何等風。何等中法。令人頭疼身痛。發熱惡寒。乾嘔自汗。何等風。何

等中法。則令人鼻塞噴嚏。咳嗽聲重。鼻流清涕。何等風。何等中法。則令人半身不遂。半身不遂。若果是風。風之中人。必由皮膚入經絡。亦必有由表入裏之症可查。嘗治此症初得時。並無發熱惡寒。頭疼身痛。目痛鼻乾。寒熱往來之表症。既無表症。則知半身不遂。非風邪所中。再者衆人風火濕痰之論。立說更爲含混。如果是風火濕痰。無論由外中。由內發。必歸經絡。經絡所藏者。無非氣血。氣血若爲風火濕痰阻滯。必有疼痛之症。有疼痛之症。乃是身痛之痹症。非是半身不遂。半身不遂。遂無疼痛之症。余平生治之最多。從未見因身痛痺症而得半身不遂者。由此思之。又非風火濕痰所中。

半身不遂本源

或曰君言半身不遂。虧損元氣。是其本源。何以虧至五成方病。願聞其說。余曰。夫元氣藏於氣管之內。分佈周身。左右各得其半。人行坐動轉。全仗元氣。若元氣足。則有力。元氣衰。則無力。元氣絕。則死矣。若十分元氣。虧二成剩八成。每半身仍有四成。則無病。若虧五成剩五成。每半身只剩二成半。此時雖未病。半身不遂。已有

氣虧之症。因不疼不癢。人自不覺。若元氣一虧。經絡自然空虛。有空虛之隙。難免其氣向一邊歸併。如右半身二成半。歸併於左。則右半身無氣。左半身二成半。歸併於右。則左半身無氣。無氣則不能動。不能動。名曰半身不遂。不遂者。不遂人用也。如睡時氣之歸併。人不能知覺。不過是醒則不能翻身。惟睡醒時氣之歸併。自覺受病之半身。向不病之半身流動。比水流波浪之聲尤甚。坐時歸併身必歪倒。行走時歸併。半身無氣。所以跌仆。人便云因跌仆得半身不遂。殊不知非因跌仆得半身不遂。實因氣虧得半身不遂。以致跌仆。

口眼歪斜辨

或曰。半身不遂。既然無風。如何口眼歪斜。余曰。古人立歪斜之名。總是臨症不細心審查之故。口眼歪斜。並非歪斜。因受病之半臉無氣。無氣則半臉縮小。一眼無氣力。不能圓睜。小眼角下抽。口半邊無氣力。不能開。嘴角上抽。上下相湊。乍看似歪斜。其實並非左右之歪斜。管治此症。凡病左半身不遂者。歪斜多半在右。病右半身不遂者。歪斜多半在左。此理令人不解。又無書籍可考。何者。人左半身經絡。

上頭面。從右行。右半身經絡。上頭面。從左行。有左右交互之義。余亦不敢爲定論。以待高明細心審查再補。

又曰。口眼歪斜。盡屬半臉無氣乎。余曰。前論指兼半身不遂而言。若壯盛人。無半身不遂。忽然口眼歪斜。乃受風邪阻滯經絡之症。經絡爲風邪阻滯。氣必不上達。氣不上達頭面。亦能病口眼歪斜。用通經絡散風之劑。一藥而愈。又非治半身不遂方之所能爲也。

辨口角流涎非痰飲

或曰。口角所流。非痰飲乎。余曰。嘗治此症。見所流盡是清水。並非稠痰。明明氣虛不固津液。不明此理。試看小兒氣不足時。流涎者十有八九。高年人氣衰時。流涎者十有二三。再以他症互相參看。流涎者屬氣虛無疑。

辨大便乾燥非風火

或曰。患半身不遂。兼大便乾燥。古人名曰風燥。言其病有風有火。有是理乎。余曰。

若是風火。用散風清火潤燥攻下藥。大便一行。風散火清。自當不燥。嘗見治此症者。誤用下藥。下後乾燥更甚。總不思平素出大恭時。並非大恭順穀道自流。仍用氣力催大恭下行。既得半身不遂之後。無氣力使手足動。無氣力使舌言。如何有氣力到下部催大恭下行。以此推之。非風火也。乃無氣力催大恭下行。大恭在大腸。日久不行。自乾燥也。

辨小便頻數遺尿不禁

或曰。小便頻數。遺尿不禁。有火有虛。有分別乎。余曰。有溺尿時玉莖內疼痛。尿一點一滴而出。兼之色紅。乃是火症。若高年人。或虛弱人。尿長而痛。其色清白。乃屬氣虛。溺孔開張。尿流而不知。名曰遺尿。不禁者。尿欲出而人禁止不溺。尿仍自出。此專指小便自病而言。若半身不遂。兼小便頻數。遺尿不禁。絕無玉莖疼痛之苦。此是氣虛不固提也。

辨語言蹇澀非痰火

或曰。說話不真。古名語言蹇澀。前人論舌之本有痰有火。此理想來不錯。余曰。非痰火也。舌中原有兩管。內通腦氣。卽氣管也。以容氣之往來。使舌動轉能言。今半身無氣。已不能動。舌亦半邊無氣。亦不能全動。故說話不真。試看小兒氣不足時。不能行走。高年人氣衰時。說話俱不真。是其證也。

辨口噤咬牙

或曰。旣無風火。如何口噤咬牙。余曰。口噤自是口噤。咬牙自是咬牙。古人以口噤咬牙混成一症。何臨症粗心之甚。口噤是虛。咬牙是實。口噤是牙緊不開。咬牙是叩齒有聲。在傷寒、瘟疫、雜症、婦科。有虛症口噤者。有實症咬牙者。獨半身不遂有口噤。絕無咬牙。亦有口噤太甚。下牙裏收。其聲如銼似咬牙。實非咬牙。亦虛症也。如無半身不遂。又無他症相兼。忽然口噤不開。乃風邪阻滯。經絡氣不上達之所致。用疎通經絡之劑卽愈。

記未病以前之形狀

或曰。元氣既虧之後。未得半身不遂以前。有虛症可查乎。余生平治之最多。知之最悉。每治此症。愈後問及未病以前之形狀。有云偶爾一陣頭暈者。有頭無故一陣發沉者。有耳內無故一陣風響者。有耳內無故一陣蟬鳴者。有下眼皮長跳動者。有一支眼漸漸小者。有無故一陣眼睛發直者。有眼前長見旋風者。有長向鼻中攢冷氣者。有上嘴唇一陣跳動者。有上下嘴唇相湊發緊者。有睡臥口流涎沫者。有平素聰明忽然無記性者。有忽然說話少頭無尾。語無倫次者。有無故一陣氣喘者。有一手長戰者。有兩手長戰者。有手無名指每日有一時屈而不伸者。有手大指無故自動者。有胳膊無故發麻者。有腿無故發麻者。有肌肉無故跳動者。有手指甲縫一陣陣出冷氣者。有脚指甲縫一陣陣出冷氣者。有兩腿膝縫出冷氣者。有脚孤拐骨一陣發軟。向外稜倒者。有腿無故抽筋者。有脚指無故抽筋者。有行走兩腿如拌蒜者。有心口一陣氣堵者。有心口一陣發空。氣不接者。有心口一陣發忙者。有頭項無故一陣發直者。有睡臥自覺身子沉者。皆是元氣漸虧之症。因不痛不癢。無寒無熱。無礙飲食起居。人最易於疎忽。

論小兒半身不遂

或曰。小兒亦有半身不遂者。余曰。小兒自周歲至童年。皆有突然患此症者。少多半由傷寒。瘟疫。痘疹。吐泄等症。病後元氣漸虧。面色青白。漸漸手足不動。甚至手足筋攣。周身如泥塑。皆是氣不達於四肢。古人以風治。是於此症閱歷無多。

癱痿論

或曰。元氣歸併左右。病半身不遂。有歸併上下之症乎。余曰。元氣虧五成。下剩五成。週流一身。必見氣虧諸態。若忽然歸併於上半身。不能行於下。則病兩腿癱痿。奈古人論痿症之源。因足陽明胃經濕熱。上蒸於肺。肺熱葉焦。皮毛焦悴。發爲痿症。概用清涼攻下之方。余論以清涼攻下之藥。治濕熱腿疼痺症則可。治痿症則不相宜。豈知痺症疼痛。日久能令腿癱。癱後仍然腿疼。痿症是忽然兩腿不動。始終無疼痛之苦。倘標本不清。虛實溷淆。豈不遺禍後人。

補陽還五湯

此方治半身不遂。口眼歪斜。語言蹇澀。口角流涎。大便乾燥。小便頻數。遺尿不禁。

黃耆四兩

歸尾二錢

赤芍一錢

地龍去土一錢

川芎一錢 桃仁一錢 紅花一錢

水煎服。

初得半身不遂。依本方加防風一錢。服四五劑後去之。如患者先有入耳之言。畏懼黃耆。只得遷就人情。用一二兩。以後漸加至四兩。至微效時。日服兩劑。豈不是八兩。兩劑服五六日。每日仍服一劑。如已病三兩個月。前醫遵古方用寒涼藥過多。加附子四五錢。如用散風藥過多。加黨參四五錢。若未服。則不必加。此法雖良善之方。然病久氣太虧。肩膀脫落二三指。縫胳膊曲而搬不直。脚孤拐骨向外倒。啞不能言一字。皆不能愈之症。雖不能愈。常服可保病不加重。若服此方愈後藥不可斷。或隔三五日吃一付。或七八日吃一付。不吃恐將來得氣厥之症。方內黃耆不論何處所產。藥力總是一樣。皆可用。

〔方歌〕補陽還五赤芍芎。歸尾通經佐地龍。四兩黃耆爲主藥。血中瘀滯用桃紅。

瘟毒吐瀉轉筋說

上吐下瀉。轉筋一症。古人立名曰霍亂。宋朝太醫院立方。名曰局方。立藿香正氣

散以治之。以邪氣傷正氣之病。反用攻伐正氣之藥。豈不愧太醫之名。至我朝道光元年。歲次辛巳。瘟疫流行。病吐瀉轉筋者數省。京都尤甚。傷人過多。貧不能葬埋者。國家發帑施棺。月餘之間。費數十萬金。彼時業醫者。有用參朮薑附見效者。便言陰寒。有用芩連梔柏見效者。則云毒火。余曰。非也。不分男婦老少。衆人同病。乃瘟疫也。或曰。既是瘟疫。薑附熱。芩連涼。皆有見效者。何也。余曰。芩連效在初病。人壯毒勝時。薑附效在毒敗人弱氣衰時。又曰。有芩連薑附服之不效。而反有害者。何也。余曰。試看針刺而愈者。所流盡是黑紫血。豈不是瘟疫燒煉。瘟疫自口鼻入氣管。自氣管達於血管。將氣血凝結。壅塞津門。水不得出。故上吐下瀉。初得用針刺其胳膊肘裏灣處血管。流紫黑血。毒隨血出而愈。或曰。所刺是何穴。請明白指示。余曰。余雖善針。不必論。是穴名曰尺澤。人氣管周身貫通血管。周身亦貫通尺澤。左右四五根血管。刺之皆出血。皆可愈。尺澤上下刺之亦可愈。總之用針所刺而愈。皆風火氣有餘之症。不足之症。愈針愈壞。此針灸家隱諱而不肯言也。倉卒之時。用針刺。取其捷便也。一面針刺。一面以解毒活血湯治之。活其血。解其毒。未有一藥而愈者。但此症得之最速。傷元氣最快。一半日可傷生。若吐瀉一兩

時後。或半日後。一見腿抽。便是腿上氣少。一見胳膊抽。便是胳膊上氣少。如見眼胞塌陷。汗出如水。肢冷如冰。謾言涼藥有害。即余所立解毒活血湯。亦有過無功。此時無論舌乾口燥。大渴飲冷。一時飲水數碗。放心用薑附回陽湯。一付可奪命。此法非淺醫所能知也。

解毒活血湯

連翹	二錢	葛根	二錢	柴胡	三錢	當歸	二錢
生地	五錢	赤芍	三錢	桃仁	八錢	紅花	五錢
枳殼	一錢	甘草	二錢				

水煎服。

〔方歌〕解毒活血連翹桃。紅花歸殼葛赤芍。柴胡甘草同生地。吐瀉良方用水熬。此方謂初得吐瀉而言。若見汗多。肢冷。眼塌。不可用。

急救回陽湯

若吐瀉一見轉筋身涼汗多。非此方不可。莫畏病人大渴飲冷不敢用。

黨參 八錢

附子 八錢
大片

乾薑 四錢

白朮 四錢

甘草三錢

桃仁二錢

紅花二錢

〔方歌〕急救回陽參附薑溫中朮草桃紅方。見真膽雄能奪命。雖有桃紅氣無傷。解毒活血湯與急救回陽湯。兩方界限分清。未有不應手而愈者。慎之慎之。

論抽風不是風

夫抽風一症。今人治之不效者。非今人錯治。乃古方誤人。古人不止論病立方。誤人立病名曰抽風。風之一字。尤其誤人。又因此症多半由傷寒瘟病。或痘疹吐泄等症。病久而抽。則名曰慢驚風。慢驚風三字。相連立名。更爲可笑。不但文義不通。亦未細察病源。若真是風。風之中人。必有皮膚入經絡。亦必有由表入裏之症可查。既查無外感之表裏。古人何得著書立方。總言是風。其所以言風者。因見其病發作之時。項背反張。兩目天弔。口噤不開。口流涎沫。咽喉痰聲。昏沉不省人事。以爲中風無疑。殊不知項背反張。四肢抽搐。手足握固。乃氣虛不固肢體也。兩目天弔。口噤不開。乃氣虛不上升也。口流涎沫。乃氣虛不固津液也。咽喉往來痰聲。非痰也。乃氣虛不歸原也。如不明此理。試看高年人。久病壽終時。或項強身重。或露

睛天弔。或牙緊流涎。或痰聲拽鋸。或冷汗淋漓。一派氣脫之症。明明顯露。以抽風之兩目天弔。口噤流涎。痰聲拽鋸。互相參看。則抽風之症。氣虛無疑。元氣既虛。必不能達於血管。血管無氣。必停留而瘀。以一氣虛血瘀之症。反用散風清火之方。安得不錯。服散風藥。無風服之則散氣。服清火藥。無火服之則血凝。再服攻伐剋消之方。氣散血亡。豈能望生。溯本窮源。非死於醫。乃死於著書者之手。每見業小兒科閱歷多者。絕不誤人。因抽風古方不效。見抽風則棄而不治。亦有高手。看小兒現在之症。知將來必抽風。雖無方調治。亦必告知病家。此病恐將來抽風。何以知其將來必抽風。凡將欲抽風之前。必先見抽風之症。如見頂門下陷。昏睡露睛。口中搖舌。不能啼哭。哭無眼淚。鼻孔煽動。咽喉痰聲。頭低不抬。口噤無聲。四肢冰冷。口吐白沫。胸高如碗。喘噤氣促。面色青白。汗出如水。不能裹乳。大便綠色。腹內空鳴。下洩上嗽。肌肉跳動。俱是抽風之兆。前二十症不必全見。但見一二症。則知將來必抽。其中有可治者。有不可治者。並所用之方。皆開列於後。若露睛天弔。不食不哭。痰鳴氣喘。病雖沉重。乃可治之症。若天庭灰色。腎子上縮。或脈微細。或脈全無。外形雖輕。乃不治之症。

可保立甦湯

此方治小兒因傷寒瘟疫。或痘疹吐瀉等症。病久氣虛。四肢抽搐。項背後反。兩目天弔。口流涎沫。昏沉不省人事。皆效。

黃耆一兩五錢生

黨參三錢

白朮二錢

甘草二錢

當歸二錢

白芍二錢

棗仁三錢炒

山萸一錢

枸杞子二錢

故紙一錢

核桃皮一個連打碎

水煎服。

此方分兩。指四歲小兒而言。若兩歲。分兩可以減半。若一歲。分兩可用三分之一。若兩三個月。分兩可用四分之一。又不必拘於付數。余治此症。一日之間。常有用兩三付者。服至不抽。必告知病家。不可因不抽。遂不服藥。必多服數付。氣足方妥。〔方歌〕可保立甦故紙棗。朮歸芍藥耆草。山萸枸杞水煎服。一個核桃帶殼搗。

論痘非胎毒

夫小兒痘疹。自漢至今。著書立方者。不可勝數。大抵不過分順險逆。辨別輕重死

生。並無一人說明痘之本源。所以後人有遵保元湯。用黃耆、人參者。有遵歸宗湯。用大黃、石膏者。有遵解毒湯。用犀角、黃連者。痘本一體。用藥竟不相同。遇順險之痘。查小兒壯弱。分別補泄清涼。用之皆可望生。惟一見逆症。遂無方調治。即云天數當然。此不知痘之本源故也。或曰。古人若不知痘之本源。如何見逆痘便知幾天死。余曰。此非古人知痘之本源也。因看痘多知。某日見苗。某日何形。某日何色。某日何症。治之不效。至某日必死。古人知逆痘幾天死者。蓋由此也。如知痘之本源。豈無方調治。或曰。如君所言。痘之逆症有救乎。余曰。痘之險症。隨手而愈。不足論。至於逆症。皆有本源。辨明本源。豈不可救。如余所治。悶症不出。周身攢簇。細密如蠶殼。平板如蛇皮。不熱即出。見點紫黑。周身細密無縫。紫白灰色相間。蒙頭鎖口。鎖項托腮。皮肉不腫。通身水泡不起。脹行漿不化。膿結痂。見點後抽風不止。九竅流血鮮紅。咳嗽聲啞。飲水即噎。六七天作癢。抓破無血。七八日泄肚。胃口不開。至危之時。頭不能抬。足歪不正。兩目天弔。項背後反等逆症。初見之時。辨明虛實。皆可望生。易此理者。知余補前人之未及。救今人之疑難。不明此理者。妄加評論。以余言爲狂妄。而不知非狂也。知痘之本源也。不似諸家議論。出痘總是胎毒。諸

書又曰。自漢以前無出痘者。既云胎毒。漢以前人獨非父母所生。此論最爲可笑。若依古人之論。有謂胎毒藏於臟腑。而何以未出痘以前。臟腑安然無病。有謂胎毒藏於肌肉。而何以未出痘以前。皮膚更不生瘡。又有謂胎毒藏於骨髓。或因驚恐跌仆。或因傷食感冒。觸動其毒。發爲天花。信如斯言。因驚恐跌仆。傷食感冒。觸動而發。則是自不小心。伏思出花正盛時。非止一人出花。少則一方。多則數省。莫非數省之人。同時皆不小心。此論更爲無理。再見世上種痘之醫。所種之痘。無論多少。無一不順。若是胎毒。毒必有輕重。毒重者痘必險。何以能無一不順。由此思之。如何胎毒二字。牢不可破。殊不知痘非胎毒。乃胞胎內血中之濁氣也。兒在母腹。始因一點真精。凝結成胎。以後生長臟腑肢體。全賴母血而成。胞胎內血中濁氣。降生後仍藏榮血之中。遇天行觸濁氣之瘟疫。由口鼻而入氣管。由氣管而達血管。將血中濁氣逐之。自皮膚而出。色紅似花。故名天花。形圓如豆。故名曰痘。總之。受瘟疫輕。瘟疫隨花而出。出花必順。受瘟疫重。瘟疫在內逗遛。不能隨花而出。出花必險。受瘟疫至重。瘟疫在內燒煉其血。血受燒煉。其血必凝。血凝色必紫。血死色必黑。痘之紫黑。是其證也。死血阻塞道路。瘟疫之毒。外不得由皮膚而出。必

內攻臟腑。臟腑受毒火煎熬。隨變生各臟逆症。正對痘科書中所言。某經逆痘。不知非某經逆痘也。乃某經所受之瘟毒也。痘之順逆。在受瘟疫之輕重。治痘之緊要。全在除瘟毒之方法。瘟毒不除。花雖少而必死。瘟毒若除。花雖多不致傷生。痘科書中。但論治胎毒。而不知治瘟毒。縱知治瘟毒。而不知痘毒巢穴在血。若辨明瘟毒輕重。血之通滯。氣之虛實。立救逆痘於反掌之間。此所謂知其要者。一言而終耳。

論痘漿不是血化

痘出時是紅色。五六天後忽變清漿。次變白漿。次變混漿。次變黃膿。終而結痂。古人謂痘漿總是血化。若是血化。紅血必能變白色。今請以血一盞試之。或以礬清。或以火熬。能使之變清水白漿混漿黃膿乎。痘本血管內血中濁氣。遇天行逐濁氣之瘟疫。自口鼻而入於氣管。達於血管。將血管中濁氣與血。並氣管中津液。逐之自毛孔而出。所以形圓色紅。五六天後痘中之血。仍退還血管。痘內止存濁氣津液。津液清。名曰清漿。清漿為瘟毒燒煉。稠而色白。故名白漿。白漿再煉。更稠而

混。故名混漿。混漿再煉。稠如瘡膿。故名黃膿。將黃膿煉乾而結痂。痘不行漿。皆因血不退還血管。血不退還血管。皆因血管內有瘟毒燒煉。血凝阻塞血之道路。若通血管之瘀滯。何患漿之不行。

論出痘飲水卽噎

出痘有四五天。七八天。飲水卽噎者。古人論毒火壅於咽喉。列於不治之症。總是不明咽喉左右氣門之體質。舌後爲喉。卽肺管。喉後爲咽。卽胃管。咽前喉後兩邊凹處有氣管兩根。名左氣門。右氣門。舌根有一白片。其厚如錢。名曰會厭。正蓋肺管左右氣門上口。人嚥飲食。必以舌尖抵上腭。使會厭將肺管與左右氣門蓋嚴。飲食方可過肺管左右氣門。入後之胃管。試看人吃飯。飲食將入嚥至喉。未入咽時。或忽然冷笑。氣暴上衝。會厭一開。或一粒米。一滴水。入左右氣門。立刻由鼻噎出。是其證也。今瘟毒燒煉會厭。血凝不能蓋嚴氣門。故飲水滲入卽噎。食不噎者。因微小縫能滲水而食不能入。故不噎。化開會厭中瘀血。其噎立止。

論七八天痘瘡作癢

痘瘡作癢者。當先分明皮膚。皮是皮膚。皮膚不分。如何能明痘瘡作癢之本源。如人湯燙火燒。隨起一泡。其薄如紙。即是皮膚。裏肉外厚者是皮。痘至六七天。瘟毒濁氣津液盡歸於皮之外。膚之內。痘窠之中。正氣虛。不能達痘中行。漿化膿結痂。以致瘟毒外不得出。膚內不得入。皮毒在皮外。膚裏故作癢。醫家遵素問諸瘡痛癢皆屬於火之句。隨用清涼之品。尅伐生氣。不但作癢不止。胃氣轉傷。有專用補氣者。氣愈補而血愈瘀。血瘀氣更不能外達於皮膚。此時用補氣破血之劑。通開血道。氣直達於皮膚。未有一藥而癢即止者。

通經逐瘀湯

此方無論痘形攢簇。蒙頭覆釜。周身細碎成片。或夾疹夾癰。浮衣水泡。其色或紫或暗或黑。其症或乾嘔煩躁。晝夜不眠。逆形逆症。皆是瘀血凝滯於血管。並宜用此方治之。其方中藥性不大寒大熱。不大攻大下。真是良方也。

桃	仁	八錢	紅	花	四錢	赤	芍	三錢	山	甲	四錢
皂	刺	六錢	連	翹	三錢	地	龍	三錢	柴	胡	一錢
麝	香	三厘		去心			去心				

水煎服。大便乾燥加大黃二錢。便利去之。

五六日後見清漿白漿。將麝香去之。加黃耆五錢。將山甲、皂刺減半。至七八日後。桃仁、紅花亦減半。黃耆可用八錢。此方指四五歲而言。若一二歲分兩可減半。若八九歲分兩可加一半。

〔方歌〕通經甲皂麝香龍。逐瘀赤芍桃與紅。連翹柴胡毒可解。便乾微用大黃攻。

會厭逐瘀湯

此方治痘五六天後飲水即噎。

桃仁炒五錢

紅花五錢

甘草一錢

桔梗三錢

生地四錢

當歸二錢

元參一錢

柴胡一錢

枳殼二錢

赤芍二錢

水煎服。

此方指五六天後噎水而言。若痘後抽風兼飲水即噎者。乃氣虛。不能使會厭蓋嚴氣管。照抽風方治之。

〔方歌〕會厭逐瘀是病源。桃紅甘桔地歸元。柴胡枳殼赤芍藥。水噎血凝立可痊。

止瀉調中湯

治痘六七日後泄瀉不止。或十餘日後泄瀉皆治之。

黃耆八錢

黨參三錢

甘草二錢

白朮錢二

當歸二錢

白芍二錢

川芎一錢

紅花三錢

附子一錢製

良薑五分

官桂五分去粗皮

水煎服。

此方指痘六七天後泄瀉而言。痘後抽風兼泄瀉者亦效。不是初出痘泄瀉之方。
〔方歌〕止瀉調中參草耆朮歸芍藥芎紅隨。附子良薑桂少用。氣虛泄瀉總相宜。

保元化滯湯

治痘五六日後痢疾。或白或紅。或紅白相雜皆治。

黃耆一兩煎湯沖

滑石一兩末

晚服加白沙糖五錢更妙。

此方乃余之心法。不獨治小兒痘症痢疾。大人初痢久痢皆有奇效。然大人初痢。滑石用一兩五錢。白糖一兩。不必用黃耆。久痢加黃耆。滑石仍用一兩五錢。

〔方歌〕保元化滯補攻方。一兩黃耆煎作湯。爲末滑石須一兩。冲服痢止氣無傷。

助陽止癢湯

治痘六七日後。作癢不止。抓破無血。兼治失音聲啞。

黃耆一兩

桃仁二錢

紅花二錢

皂刺一錢

赤芍一錢

山甲一錢

此方治痘後六七日。作癢甚者。抓破無血。不是治初出痘一二日作癢之方。
〔方歌〕助陽止癢耆桃仁。皂刺赤芍山甲同。聲啞失音同一治。表虛因裏氣不行。

足衛和榮湯

治痘後抽風。兩眼天吊。項背反張。口噤不開。口流涎沫。昏沉不醒人事。周身潰爛。膿水直流。皆治之。

黃耆一兩

甘草二錢

白朮二錢

黨參三錢

白芍二錢

當歸一錢

棗仁二錢

桃仁一錢

紅花五分

水煎服。

此方專治痘後抽風。及周身潰爛。若因傷寒瘟疫雜症。疾久氣虛。抽風。抽風門另有專方。

〔方歌〕足衛和榮耆草朮。參芍歸棗桃紅扶。抽風風字前人誤。服此還陽命可甦。

少腹逐瘀湯說

此方治小腹積塊疼痛。或有積塊不疼痛。或疼痛而無積塊。或少腹脹滿。或經血見時。先腰痠。少腹脹。或經血一月見三五次。接連不斷。斷而又來。其色或紫。或黑。或塊。或崩漏。兼少腹疼痛。或粉紅兼白帶。皆能治之。効不可盡述。

更出奇者。此方種子如神。每經初見之日。吃起一連吃五付。不過四月必成胎。必須男女年歲。與月合成陽數方生子。如男女兩人。一單歲。一雙歲。必擇雙月方生子。如兩單歲。或兩雙歲。必擇單月方生子。擇月不可以初一爲定準。以交節爲定準。要知偶有經過二十日結胎者。切記準日期。倘月分不對生女。莫謂余方不驗。余用此方。効不可以指屈。

道光癸未年。直隸布政司素納公。年六十。因無子甚憂。商之於余。余曰。此易事耳。

至六月。令其如君服此方。每月五付。至九月懷孕。至次年甲申六月二十二日生少君。今七歲矣。此方更有險而不險之妙。孕婦體壯氣足。飲食不減。並無傷損。三個月前後。無故小產。常有連傷數胎者。醫書頗多。仍然議論滋陰養血。健脾養胃。安胎保胎。效方甚少。不知子宮內先有瘀血。占其地。胎至三月再長。其內無容身之地。胎病靠擠。血不能入胎胞。從傍流而下。故先見血。血既不入胎胞。胎無血養。故小產。如曾經三月前後小產。或連傷三五胎。今又懷胎至兩個月前。將此方服三五付。或七八付。將子宮內瘀血化淨。小兒身長有容身之地。斷不致再小產。若已經小產。將此方服三五付。以後成胎。可保無事。此方去疾種子安胎。盡善盡美。真良善方也。

少腹逐瘀湯

小茴香炒七粒

乾薑炒二分

元胡一錢

沒藥研一錢

當歸三錢

川芎二錢

官桂一錢

赤芍二錢

蒲黃正三錢

靈脂炒二錢

水煎服。

〔方歌〕少腹茴香與炒薑。元胡靈脂沒芎當。蒲黃官桂赤芍藥。種子安胎第一方。

懷胎說

兼記難產胎衣不下方

古人論胎在子宮。分經輪養。一月肝經養。二月膽經養。三月心經養。四月三焦養。五月脾經養。六月胃經養。七月肺經養。八月大腸養。九月腎經養。若依其論。胎至兩月。自當肝經交代。膽經接班。此論實在無情無理。兒在母腹。全賴母血而成。一言可了。何必圖取虛名。故作欺人之論。又如子啼門云。兒在母腹。口含臍帶。瘡瘡吮血養生。請問初結胎無口時。又以何物吮血養生。既不明白。何不歸而謀諸婦。訪問收生婆。訪問的確。再下筆。斷不致遺笑後人。豈知結胎一月之內。並無胎衣。一月後兩月內。始生胎衣。胎衣既成。兒體已定。胎衣分兩段。一段厚。是雙層。其內盛血。一段薄。是單層。其內存胎。厚薄之間。夾縫中長一管。名曰臍帶。下連兒臍。母血入胎衣內盛血處。轉入臍帶。長臍帶肢體。周身齊長。並非先長某臟。後長某腑。一月小產者。並無胎衣。兩月小產者。有胎衣。形如秤錘。上小下大。不過三指長短。三月小產者。耳目口鼻俱備。惟手足有拳不分指。至月足臨生時。兒蹬破胎衣。頭

轉向下而生。胎衣隨胎而下。胎衣上之血。隨胎衣而下。此其長也。最關緊要是難產。古人原有開骨散。服之有效者。有不效者。其方總論活血開骨。不重用力勞乏。余每用開骨散。重加黃耆。不過一時胎即下。至胎衣不下。古人原有沒竭散。始而用之。有效有不效。繼而加倍用之。胎衣立下。藥味要緊。分兩更要緊。

古開骨散

治難產。

當歸一兩

川芎五錢

龜板八錢

血餘燒灰一團

加生黃耆四兩。

水煎服。

古沒竭散

治胎衣不下。

沒藥三錢

血竭三錢

爲末。滾水調服。

黃耆桃紅湯

治產後抽風。兩目天吊。口角流涎。項背反張。昏沉不省人事。

黃耆八兩

桃仁三錢

紅花二錢

水煎服。

婦科以濟陰綱目爲最。醫宗金鑑擇其方論纂爲歌訣。令人易讀易記。惟抽風一症方不效。余已補之。

古下瘀血湯

治血鼓。何以知是血鼓。腹皮上有青筋。是血鼓腹大。

桃仁八錢

大黃五分

蟅蟲三個

甘遂五分爲末沖服或八分

水煎服。與前隔下逐瘀湯輪流服之安。

抽葫蘆酒

治腹大周身腫。

自抽乾葫蘆。焙爲末。黃酒調服三錢。若葫蘆大。以黃酒入內煮一時。服酒頗效。取其自抽之義。

蜜葱猪膽湯

治通身腫。肚腹不大。

猪膽取一個

白

蜜調和四兩四錢

葱頭白四個帶一寸

黃酒半觔

用酒煎葱兩三沸。將酒冲入蜜膽內。服之立效。

蝮蛇皮散

治遺精夢而後遺。不夢而遺。虛實皆效。

蝮蛇皮一個。瓦上焙為末。黃酒調。蚤服。實在效。真難吃。

小茴香酒

治白濁。俗名騙白。又名下淋。精道受風寒。藥全不效。

小茴香一兩炒黃。為粗末。黃酒半觔燒滾。冲。停一刻。去渣服酒。

痺症有瘀血說

凡肩痛。臂痛。腰疼。腿疼。或周身疼痛。總名曰痺症。明知受風寒。用溫熱發散藥不愈。明知有濕熱。用利濕降火藥無功。久而肌肉消瘦。議論陰虧。隨用滋陰藥。又不效。至此便云病在皮脈。易於為功。病在筋骨。實難見效。因不思風寒濕熱入皮膚。

何處作痛。入於氣管。痛必流走。入於血管。痛不移處。如論虛弱。是因病而致虛。非因虛而致病。總滋陰外受之邪。歸於何處。總逐風寒去濕熱。已凝之血。更不能活。如水遇風寒。凝結成冰。冰成風寒已散。明此義。治痺症何難。古方頗多。如古方治之不效用。

身痛逐瘀湯

秦	朮	一錢	川	芎	二錢	桃	仁	三錢	紅	花	三錢
甘	草	二錢	羌	活	一錢	沒	藥	二錢	當	歸	三錢
靈	脂	二錢	香	附	一錢	牛	膝	三錢	地	龍	二錢

去土

若微熱。加蒼朮、黃柏。若虛弱。量加黃耆一二兩。

〔方歌〕身痛逐瘀膝地龍。羌秦香附草歸芎。黃耆蒼柏量加減。要緊五靈桃沒紅。

礪砂丸

治癰瘰鼠瘡。滿項滿胸。破爛流膿。無不應手取效。

礪砂二錢 皂角子一百個 乾醋一觔 醋內侵三日 入

入砂鍋內熬之。將乾。將鍋子礪砂拌於皂子上。候乾。以微火焙乾。或以爐台上炕。

之。每晚嚼五粒。或八粒。一日蚤晚或吃二次。以滾白水送。然乾則皂子過硬。爲末服亦可。方內礪砂。有紅白二種。余所用。是紅色者。未知白色礪砂。功效若何。礪砂紅色者。出庫車北山洞中。夏令從洞中出火。人不能近前。冬令同民赤身近洞取之。本草言西域鹽鹵熬成者。誤也。

癲狂夢醒湯

癲狂一症。哭笑不休。詈罵歌唱。不避親疎。許多惡態。乃氣血凝滯腦氣。與臟腑氣不接。如同作夢一樣。

桃 仁	八錢	柴 胡	三錢	香 附	二錢	木 通	三錢
赤 芍	三錢	半 夏	二錢	腹 皮	三錢	青 皮	二錢
陳 皮	三錢	桑 皮	三錢	蘇 子	四錢	甘 草	五錢

水煎服。

〔方歌〕癲狂夢醒桃仁功。香附青柴半木通。陳腹赤桑蘇子炒。倍加甘草緩其中。
龍馬自來丹

馬前子 八兩

地

龍焙乾爲末

香 油 一觔

將香油入鍋內熬滾。入馬前子煆之。得馬前子微有響爆之聲。拿一個用刀切兩半。看其內以紫紅色爲度。研爲細末。再入前地龍末和均。麵糊爲丸。綠豆大。每付吃三四分。臨臥服。鹽水送。若五六歲小兒。服二分。紅糖水送。如不爲丸。麵子亦可服。如吃齋人。去地龍亦可。

治癰症。俗名羊羔風。每晚先服黃耆赤風湯一付。臨臥服丸藥一付。吃一月後。不必服湯藥。淨吃丸藥。久而自愈。愈後將丸藥再吃一二年。可保除根。病源記前腦髓說中。

黃耆赤風湯

黃耆生二兩

赤芍一錢

防風一錢

水煎服。小兒減半。

治癱腿。多用一分。服後以腿自動爲準。不可再多。如治諸瘡諸病。或因病虛弱。服之皆効。無病服之。不生疾病。總書數篇。不能言盡其妙。此方治諸病皆効者。能使周身之氣通而不滯。血活而不瘀。氣通血活。何患疾病不除。

黃耆防風湯

治脫肛。不論十年八年。皆有奇効。

黃耆生四兩

防風一錢

水煎服。小兒減半。

黃耆甘草湯

治老年人溺尿。玉莖痛如刀割。不論年月深久。立効。

黃耆生四兩

甘草八錢

水煎服。病重一日兩付。

木耳散

治潰爛諸瘡。効不可言。不可輕視此方。

木

耳乾一兩焙

白沙糖和一兩

以溫水浸如糊。敷之縛之。

此方與蝟蝟皮治遺精。抽葫蘆治鼓症。義同。明此義。方可以學醫。

玉龍膏即勝玉膏

治跌打損傷。貼之頗効。

香油一觔

白薇

升麻

當歸

川芎

連翹

銀花

甲片

川烏

象皮

乳香

沒藥

輕粉三錢

冰片三分

麝香三分

白占二兩

將前九味藥入油內煨枯色。去渣入宮粉三盒。離火再入乳沒冰片麝攪均。再將白占投入於內攤貼之。此膏去宮粉。即糕子藥。貼破爛諸瘡。其効如神。木耳散。玉龍膏。潰爛諸瘡。可靠之良方也。不可輕視。

辨方效經錯之源 論血化為汗之誤

胞姪作礪來京。見臟腑圖記問曰。伯父所繪之圖。經絡是氣管。皆本於衛總管。由衛總管散佈周身。是周身經絡通連。並非各臟腑長兩經。姪思古人若不明經絡。何以張仲景著傷寒。按足六經之現症。立一百一十三方。分三百九十七法。其方効著頗多。姪不解其理。余曰。爾看其首篇。細心研究。便知其方効論錯之理。如首

篇論足太陽膀胱經。爲寒邪所傷。則令人頭疼身痛項強。發熱惡寒。乾嘔無汗。用麻黃湯治之。若諸症如前而有汗。是傷風。用桂枝湯治之。所論是足太陽經。足太陽專通兩足。而不通兩手。其論傳邪。傳足六經。不傳手六經。爾看初得傷寒。頭疼身痛。項強。發熱惡寒。未有兩胳膊兩手不疼痛發熱惡寒者。用麻黃湯。亦未有周身皆愈。而獨不愈兩胳膊兩手者。豈不是方雖効而論經絡實錯之明證。若仲景以前有人親見臟腑。著明經絡貫通。仲景著傷寒。必言外感寒邪。入周身之經絡。用麻黃湯發散周身之寒邪。一言可了。論有汗是傷風。以桂枝湯治之。以桂枝、白芍、甘草三味。然從未見治愈一人。桂枝湯所以不見効者。因頭疼身痛發熱有汗。非傷風症也。乃吳又可所論之瘟疫也。又問寒邪在表。自當見頭疼身痛發熱惡寒。無汗之表症。初得傷寒。尙未傳裏。如何卽有作嘔之裏症。仲景著論。王叔和等數十人註釋。並未說明表症作嘔之所以然。姪實不能明白。求伯父明白指示。余始看爾不過有讀書之志。而無業醫之才。今據爾此問。尙有思路。將來不致粗心。輕忽人命。爾問寒邪在表。如何有作嘔之裏症。余詳細告汝。寒邪始入毛孔。由毛孔入皮膚。由皮膚入絲絡。由絲絡入陽絡。由陽絡入經。由經入衛總管。由衛總管

橫行入心。由心上行入左右氣管。由左右氣管上攻左右氣門。故作嘔。此表症所以作嘔之本源也。用麻黃湯服之入胃。其藥汁由津門流出入津管。過肝入脾中之瓏管。從出水道滲出。沁入膀胱爲尿。其藥之氣。卽藥之性。由津管達衛總管。由衛總管達經。由經達絡。由絡達絲絡。由絲絡達皮膚。由皮膚達毛孔。將寒邪逐之。自毛孔而出。故發汗。邪隨汗出。汗出邪散。故嘔卽止。此周身經絡內外貫通。用麻黃湯發散表邪。隨汗而出之次第也。又問仲景論目痛鼻乾不得眠。是足陽明胃經之表症。以葛根湯治之。其方內有麻黃。此理不甚明白。余曰。寒邪由入經絡。正氣將寒邪化而爲熱。故名曰邪熱。邪熱上攻頭頂。腦爲邪熱所擾。故不得眠。目系通於腦。邪熱由腦入目。故目痛。鼻通於腦。邪熱由腦入鼻。故鼻乾。明是邪熱上攻之火症。並非足陽明胃經之表寒。用葛根而愈者。莫謂葛根是溫散之品。葛根乃清散之藥也。其方內用麻黃者。發散在表未化之寒邪也。此又是方效經絡錯之明證。又問仲景論胸脅痛。耳聾口苦。寒熱往來而嘔。其症在半表半裏。是足少陽膽經之症。用小柴胡湯治之。其方神效。姪思此症。若不在膽經。其方又神效。若在膽經。膽又居膈膜之下。其痛又在胸脅。此一段姪又不明白。余曰。爾

看臟腑圖。膈膜以上之血府。便明白。邪熱入於血府。攻擊其血。故胸脅作痛。邪向血內攻。血向外抗拒。一攻一拒。故寒熱往來。熱灼左右氣門。氣上下不通。故嘔而口苦。邪熱上攻。故耳聾目眩。柴胡能解血府之熱。熱解汗自出。邪隨汗解。故效甚速。此亦是方效論經錯之明證。至傳變多端。總不外表裏虛實。爾若明傷寒。須看吳又可之瘟疫。若見書少。必有偏寒偏熱之弊。昨晚爾當客問。古人言汗在皮膚。是血發於皮膚外。是汗。言汗卽血化。此理爾不解。彼時不告汝者。非謂爾當客多言。因客粗知醫。並非名手。故不當客告汝。汗卽血化。此丹溪朱震亨之論。張景岳雖議駁其非。究竟不能指實出汗之本源。古人立論之錯。錯在不知人氣血是兩管。氣管通皮膚有孔竅。故發汗。血管通皮膚無孔竅。故不發汗。何以知血管通皮膚無孔竅。爾看生瘡破流黃水者。其毒由氣管而來。每日常流黃水。其皮膚不紅。瘡毒若在血管。初起皮膚必紅。必待皮膚潰爛。所流必是膿血。爾在看瘟疫發癰。出疹。小兒出痘。色雖紅而不流血。豈不是血管通皮膚無孔竅之明證乎。姪作礪來京。因閑談問余。彼時是書業已刻成。故書於卷末以記之。

醫林改錯終

醫林改錯 卷下 辨方効經錯之源 論血化爲汗之誤

四〇

〔清〕

徐 鏞

輯述

醫
西
學
舉
要

中
國
醫
學
大
成

醫學舉要提要

清徐鏞撰。鏞字玉臺。南匯人。其卷一、列六經合論。卷二、列時邪合論。卷三、列雜證。卷四、列治法合論。卷五、列古今方補註。卷六、列玉臺新案。張聲馳云。其論六經。則條分縷析。論時邪雜症。則語簡旨賅。治法悉合乎機宜。論方不流於偏僻。其玉臺新案。精思所致。彷彿古人。雖不逮石氏之精博。而其平時之精闡素靈。推原仲景。已可略見一斑。總之。石氏之書其原也。徐氏之書其委也。兩書彙集。由原竟委之謂也。是書與醫原。張謙甫嘗於光緒十七年。鉛印合刊行世。通行一時。近年已不多見。爰再爲校刊之。

醫學舉要提要

醫學舉要目錄

- | | |
|----|-------|
| 卷一 | 六經合論 |
| 卷二 | 時邪合論 |
| 卷三 | 雜證合論 |
| 卷四 | 治法合論 |
| 卷五 | 古今方補註 |
| 卷六 | 玉臺新案 |

醫學舉要目錄

醫學舉要

清 南匯 徐 鏞 玉臺輯述

鄞縣 曹赤電炳章圈點

卷一

六經合論

按仲景自序言作傷寒雜病論合十六卷。則傷寒雜病未嘗分爲兩書也。所云太陽之爲病。脈浮。頭項強痛而惡寒。陽明之爲病。胃家實也。少陽之爲病。口苦咽乾目眩。太陰之爲病。腹滿而吐。食不下。自利益甚。若下之。必胸下結硬。少陰之爲病。脈微細。但欲寐也。厥陰之爲病。消渴。氣上撞心。心中疼熱。饑而不欲食。食則吐衄。下之利不止。是六經分司諸病之提綱。不專爲傷寒一症立法。今之讀傷寒論者。一惑于傳經之說。再惑于三綱鼎立之說。遂至經旨不明。自程郊倩、柯韻伯撤去舊解。覺仲景所分之六經。不特可以治風寒。并可以治雜病。

頭痛發熱。汗出惡風。爲桂枝本症。脈浮弱。爲桂枝本脈。一見此症此脈。無問其爲中風傷寒雜病也。汗出而熱不解。因邪在營衛之間。不在皮毛之際。故以桂枝生薑甘草大棗辛甘發散。中配以芍藥酸寒。用以發汗。卽用以止汗也。又慮中氣虛餒。不能送邪外出。須助以熱粥。經云飲入于胃。以傳于肺。肺主皮毛。汗所從出。服已啜粥。充胃氣以達于肺也。是方調和營衛。不特自汗盜汗。虛癰虛痢所宜。卽勞倦內傷。及一切陽虛等症。咸宜用之。以桂枝爲建中之祖耳。胸滿去芍藥。喘加厚朴杏仁。汗漏不止加附子。亡陽起臥不安去芍藥。加蜀漆龍骨牡蠣。爲救逆湯。此皆進而從陽也。若退而從陰者。加黃芩爲陽旦湯。倍芍藥。又治太陰腹滿微痛加大黃。治太陰大實病。難經云陽維爲病苦寒熱。陰維爲病苦心痛。後人並用桂枝湯。以陽維屬衛。陰維屬營。桂枝湯調和營衛也。專用芍藥甘草二味。名芍藥甘草湯。專治血虛腹痛。乃泄木安土之義。餘痛不治。以其酸寒。無溫散之力也。桂枝湯治表虛。倍芍藥加膠飴。名小建中湯。桂枝爲和劑。建中爲補劑也。故不特傷寒心悸而煩。及腹中急痛者宜之。卽虛勞裏急。亡血失精等症。金匱與黃芪建中湯並用。又疸症篇云。男子黃。小便自利。當與虛勞小建中湯。則知此湯爲治虛

勞之專劑。男子身黃便利。顯屬虛寒而非濕熱。故亦以此湯治之也。是方加黃芪。名黃芪建中湯。意在保護肺氣。不令自汗。專爲虛勞而設。而非傷寒門所有事。然許學士治傷寒無汗。尺中脈遲。不任發散者。先用黃芪建中以實其氣。後用麻黃湯以發其汗。此又善于取裁矣。千金于小建中湯加當歸。名內補當歸建中湯。治女科虛羸少氣。裏急腹痛等症。意在安營以補血。故更其名曰內補也。麻黃湯治頭痛發熱。身疼腰痛。骨節疼痛。惡寒無汗而喘之症。乃太陽發汗之峻劑。桂枝湯中無麻黃。且得芍藥之監制。誤用尚可挽回。是方麻桂辛溫。佐以杏仁開氣。雖有甘草之和。猛銳莫當。頗爲難用。時行感冒。代以葱豉湯。九味羌活湯足矣。凡遇冷風哮喘等症。邪鬱肺經而無涉于下焦真元者。麻黃湯又爲要劑。本方去桂枝。局方名三拗湯。冬日無汗用之。較本方爲緩也。仲景于本方中去桂枝加石膏。更名麻杏甘膏湯。治肺經鬱遏作喘。表寒裏熱之症。小青龍湯。於發汗中利水。蓋汗爲水類。肺爲水源。傷寒表不解。發汗而未透也。心下爲水氣。卽未出之汗也。乾嘔發熱而咳。或微喘。邪未盡而停於肺胃之間也。病屬有形。非一派發汗所能愈。故用麻黃之解表。卽用白芍五味之斂逆。一以散水。

寒。一以收喘咳也。又加乾薑之溫肺。細辛之溫腎。半夏之除嘔。甘草之緩中。表裏分消。水氣有不散者乎。金匱用以治溢飲。以飲亦水類。四肢之水。與心下之水同治也。加石膏以治肺脹。以水停心下而兼煩躁。石膏辛寒。即倣傷寒大青龍之旨也。後人用小青龍治水腫。以無汗而喘。即遵內經開鬼門之治也。方中五味乾薑。尤爲治表寒發咳之要藥。所以小柴胡真武等湯。方後俱云咳者加五味子乾薑。五苓散與猪苓湯。同治脈浮發熱。渴欲飲水。小水不利之症。而一屬陽明。必顯躁煩熱悶。故于茯苓猪苓澤瀉利水之中。加阿膠滑石以滋陰滌熱。一屬太陽。或太陽轉屬陽明。必因發汗未透。以致邪水內畜。故于茯苓猪苓澤瀉利水之中。加白朮以健脾利水。桂枝以散表除邪。觀仲景云。多服煖水汗出愈。則知此方利水而兼發汗也。後人移治交腸。交腸者。大小易位而出也。金匱加茵陳治黃疸。名茵陳五苓散。後人去桂名四苓散。純爲利水之劑。合平胃名胃苓湯。又爲消腫利濕之劑。

痞者。天地不交之謂。以邪氣痞塞于中。上下不通而名。滿而硬。痛爲結胃。但滿不痛爲痞。諸家論痞。或偏於寒。或偏於熱。究之寒熱互結則成痞。惟其寒熱有差多。

差少。故諸方或以附子之辛熱立名。或以大黃黃連之苦寒立名。或以生薑之辛散立名。或以甘草半夏之和緩立名。按甘草瀉心湯用乾薑半夏黃芩黃連甘草大棗六味。益以人參名半夏瀉心。益以人參生薑名生薑瀉心。柯韻伯曰。太陽變痞。用生薑瀉心。陽明變痞。用甘草瀉心。少陽變痞。用半夏瀉心。至大黃黃連瀉心湯止。用大黃黃連二味。再加黃芩附子。名附子瀉心。仲景立法。原各有不同。一言以蔽之。不外辛開苦降而已。治痞要藥。在乾薑黃連二味。半夏黃芩甘草大棗四味。則輔佐而已。偏於寒則多用乾薑。亦可參以附子。偏於熱則多用黃連。亦可參以大黃。偏於中虛則加人參。或涉表邪一二則加生薑。并可與旋覆代赭黃連等湯出入互用。又按程郊倩曰。若不因誤下而為痞者。或痰或食或氣為之結。俱非瀉心湯治。更有陰經得寒而成痞逆者。服瀉心湯必成大害。大結胸證。硬滿而痛。不必定在心下。故用硝黃葶藶甘遂等峻劑。而小結胸但在心下。按之則痛。較大結胸之手不可近為緩。而脈之浮滑。又不同於沉緊。但用黃連之苦以降之。半夏之辛以散之。括薑之苦以潤之。去渣微下黃沫即安。以熱痰留滯。不同畜水橫溢。故不用峻劑也。

梔子豉湯治陽明初病。不全在表。不全在裏。汗下溫針。皆在所禁。惟用梔子一味。先煎。後內香豉。爲能雙解表裏。外而身汗惡熱身重。內而喘滿咽乾口苦。一齊可解矣。

凡三陽合病。腹滿身重。譫語遺尿而大汗出。白虎湯爲要方。石膏知母之寒。監以甘草粳米。則不傷胃氣。加人參爲人參白虎。治陽明渴欲飲水。口乾舌燥。蓋熱已入胃。不當復表。屎未燥硬。尙未可攻。須用白虎以除熱潤燥。人參以補氣生津。金匱治中喝亦用人參白虎。以暑邪汗多作渴。雖曰太陽。實係陽明也。

猪苓湯治脈浮發熱。渴欲飲水。小便不利。證同五苓。此方以陽明燥熱。故用二苓。澤瀉以利水。卽用滑石阿膠以滋陰。不同太陽寒水之化。故去朮桂二味。消渴門中尤爲要劑。

瘀熱在裏。非汗吐所宜。身無汗。小便不利。不得用白虎。斑熱發黃。內無津液。不得用五苓。故製茵陳蒿湯。茵陳稟北方之色。受霜承雪。經冬不凋。復感春生之氣。發育。因舊本而復茂。故能啓水寒之氣上行。梔子則導君火之氣以下行。更入血分而通水之源。大黃苦寒下泄。導濕滌熱。三物合用。所以佐樞運承氣之不及也。

難經云。陽盛陰虛。下之則愈。用承氣下之。乃所以存陰也。然下劑不用滋陰而用破氣。蓋胃主降。穢物停滯胃中而不降。由於氣之不承。故以承氣名湯。大承氣以厚朴枳實氣藥爲君。大黃芒硝血藥爲臣。因痞滿燥實堅五者全見。勢甚盤結。硝黃大寒。必藉枳朴之苦溫以滌蕩之。煮法先內枳朴。後內大黃。又次內芒硝。小承氣以大黃爲君。枳朴爲臣。胃府實滿。稍緩於三焦之實熱。不用芒硝。則不傷下焦真陰。煎法三味同煮。不分次第。若調胃承氣。以炙草硝黃微和胃氣。不用枳朴。勿令大泄下。熱結有淺深。用藥有輕重。三承氣之用。總在臨證化裁耳。少腹脹滿而小便自利。知爲血畜下焦。畜血能發熱。故如狂。桃仁承氣湯。用芒硝大黃甘草。卽調胃承氣也。熱甚搏血。故加桃仁以潤燥緩肝。表證未除。故加桂枝以調營解表。是方於女科經閉門中。尤爲要劑。仲景抵當湯丸。用水蛭蟲蟲桃仁大黃四味。爲攻瘀血之峻劑。而血蠱等證。尤爲要藥。然水蛭鹹寒有毒。未可輕試。此代抵當丸所由設也。方用桃仁歸尾生地各一兩。潤以通之。桂心三錢。熱以動之。大黃四兩。元明粉一兩。苦寒鹹寒以蕩滌之。加穿山甲一兩者。引之以達瘀所。煉蜜爲丸。甘以緩急也。

少陽屬膽。清淨之府。無出無入。經在半表半裏。治宜和解。小柴胡湯用柴胡升陽達表。黃芩退熱和陰。半夏祛痰散逆。參草薑棗輔正補中。使邪不得復傳入裏也。其見證則嘔而發熱。寒熱往來。口苦耳聾。胸滿脇痛。心煩喜嘔。但見一證。卽是。亦何必諸證悉具。始爲小柴胡湯證哉。崔氏小前胡湯卽本方以前胡易柴胡。子和柴胡飲子卽本方去半夏加當歸白芍大黃。大柴胡湯治陽邪入裏。表證未除。裏證又急者。用柴胡解表。大黃枳實攻裏。黃芩清熱。白芍斂陰。半夏和胃止嘔。薑棗調和營衛。是方比三承氣爲緩。以不用芒硝之燥急也。

太陽少陽合病。必有頭痛胸滿。口苦咽乾。寒熱往來之病機。或大或弦之脈象。陽邪入裏。膽火移熱於脾。故自下利。黃芩湯用黃芩徹熱爲君。佐白芍甘草大棗以和營氣。雖非胃實。亦非胃虛。故不須人參以補中。兼痰飲則嘔。故仍加半夏生薑。後人移治春溫伏熱。機要以之治痢。更名黃芩芍藥湯。是方遂爲治痢之祖方矣。胸中有熱而欲嘔吐。胃中有寒而作腹痛。此上熱下寒也。濕家下之。丹田有熱。胸中有寒。此上寒下熱也。黃連湯爲升降陰陽之通劑。與小柴胡兩解表裏。實爲對

待方中人參補虛。半夏除嘔。甘棗緩中。四味與小柴胡同。餘則彼用柴胡。而此易以桂枝。彼用黃芩。而此易以黃連。彼用生薑。而此易以乾薑。和解雖同。而上下之邪與表裏之邪異矣。是方與瀉心諸湯。出入互用。仲景云。理中者。理中焦。則知太陰厥逆。自利不渴。脈沉無力者。當以此方為主。方中人參補氣益胃爲君。白朮健脾燥濕爲臣。甘草和中補土爲佐。乾薑溫胃散表爲使。仲景本用丸劑。後人改丸爲湯。加附子名附子理中。取補火生土之意。加黃連名連理湯。參辛開苦降之治。脾約丸。太陰下劑也。津液被約而未至虧損者。宜之。麻仁杏仁。甘以潤之。枳實厚朴。苦以破之。白芍大黃。寒以下之。使胃不過強而脾不過弱。津液流通。使小便不數而大便不硬。則約者自開。四逆湯以炙草爲君。乾薑附子爲臣。通脈四逆湯以乾薑爲君。炙草附子爲臣。因加減中有面色赤者。加蔥之例。後人遂以加蔥爲通脈四逆。四逆與理中同治太陰臟寒。自利不渴。四肢厥逆等證。而制方有中下之別。理中用白朮。取其守中。故專治太陰。四逆用生附。取其溫下。故不時兼治三陰。卽太陽亦可通用。柯韻伯曰。用於太陰本經。固本以逐邪也。於少陰。溫土以制水也。於厥陰。和土以升木也。於

太陽。益火以扶元陽也。本方加人參。名人參四逆湯。加茯苓人參。名茯苓四逆湯。去炙草。名乾薑附子湯。去炙草加葱白。名白通湯。再加人尿猪膽汁。名白通加猪膽汁湯。陶節菴變易其制。於葱白乾薑附子。外加人參五味麥冬。收陰生脈。面色赤者。更加黃連少許。大破其格拒之陰。廣皮芳香利氣。甘草甘緩和中。獵茶苦降達下。更用土漿水澄清煎藥。取土氣以靜鎮之。沖入白蜜冷服者。藉寒潤以急趨之也。

真武湯與小青龍。同爲利水之劑。青龍治太陽邪水內畜。汗劑以升散之也。真武治少陰真水泛溢。溫劑以鎮攝之也。方中附子益坎宮之少火。以配水。佐白朮之健以制水。茯苓之淡以滲水。白芍之酸以收水。生薑之辛以散水。後人移治內飲。以飲亦水類也。腎氣丸爲裏中之裏。真武用生薑。尙爲裏中之表與。吳茱萸湯治陽明少陰二經虛寒之證。仲景以陽明病不能食者。名中寒。食穀欲吐。或乾嘔。或吐涎沫。是胃氣虛寒。不能容物也。頭痛者。陽明之脈上於頭也。仲景以吐利煩躁四逆爲少陰死症。今吐利手足厥冷。是專指手掌與四逆之通冷者。迥別。故雖煩躁欲死。究非死症。並用此湯。吳茱辛熱。爲通陽泄濁之要藥。故以爲

君。人參薑棗補益中氣。使土有以制水而水不上侵矣。

桃花湯用赤石脂。一半煎服。一半爲末調服。取其固下。乾薑粳米辛甘相得。取其守中。治下利不止。便膿血者。夫下利而兼便膿血。則非下利清穀。全屬虛寒可知。便膿血而由於下利不止。則非裏急後重。全屬濕熱可知。讀者須會徐之才瀝可去脫之條。兼參李東垣升陽散火之義。

黃連阿膠湯治少陰熱邪傳裏。心煩不寐之症。黃芩黃連直清心火。白芍收斂心神。阿膠雞子黃性滋補心神。且二物交通乎腎。亦以見芩連之輔佐。少陰與他經不同。

猪膚湯以猪爲水畜。而膚又津液所存。滋陰而不滑泄。佐以白蜜米粉。潤肺保脾。熬香熱服。功能引熱下行。治少陰病下利咽痛胸滿心煩。方雖平淡。實出神奇。烏梅丸治虯厥。又主久利。泄肝安胃法也。蟲得酸則軟。而無力上攻。且酸爲木味。助本氣也。故用烏梅苦酒之酸。蟲得辛則伏。而其頭向下。且辛爲金味。制木邪也。故用蜀椒之辣。且細辛生薑桂枝附子當歸。莫非味之辛者。薑附之用。溫經而復陽。細辛雖入少陰。亦能散寒而通陽。桂枝和營衛而治其厥。人參同薑附則溫補。

中州。當歸一味。以厥陰本爲血臟而宜之。黃柏黃連。卽內經熱因寒用之旨。恐寒邪拒格。卽以寒藥引道之。所謂治寒以熱。涼而行之也。王晉三製安胃湯。治饑不欲食一症。川椒之辛。妙去佐烏梅之酸。安結行陰以化肝。枳實乾薑用生助人參行陽道以益氣。黃連真清脾胃生化之源。統論全方。辛酸同用以化肝氣。酸甘相輔以和胃氣。肝化胃和。自能進食。

白頭翁湯治熱毒血痢。口渴下重之症。白頭翁苦寒而能息風。秦皮苦寒而能固脫。黃連苦寒而能燥濕。黃柏苦寒而能堅陰。四面搜逐伏邪。則上焦之渴。下焦之利。俱可止矣。金匱加阿膠甘草以治產後下痢。因產後虛極。兼顧其氣血也。

燒裨散治陰陽易症。而朱奉議有殺鼠糞湯治陰易。殺鼠雄鼠也。其糞兩頭尖者卽是。複以韭白。取以濁攻濁之義。後人移治遺濁疝氣。及女人淋帶等症。少腹疼痛者。屢有殊功。

竹葉石膏湯治傷寒解後。虛羸少氣。氣逆欲吐之症。竹葉石膏之辛寒。以散餘熱。人參甘草麥冬粳米之甘平。補虛生津。生薑半夏之辛溫。豁痰止嘔。雖曰寒劑。亦和劑也。移治暑熱煩渴等症。少變人參白虎之例。

旋覆代赭湯治傷寒解後噫氣一症。人參甘草扶正補虛。薑棗半夏和脾養胃。旋覆花之辛。旋轉於上。代赭之重。鎮逆於下。後人治頑痰。用代赭煨末。旋覆花湯調服。亦良法也。再按。噫氣有屬於土木交旺者。則又從事於承氣左金之例。

炙甘草湯又名復脈湯。治脈結代。心動悸者。雖於太陽傷寒見之。而不止太陽爲然。傷寒爲然。諸病之後皆然。故千金以治虛勞。外臺以治肺痿。蓋氣血並虛。法當陰陽兼補。此氣者何。手太陰肺也。此血者何。手少陰心也。所謂脈爲心合者是也。此氣此血。皆屬輕清而非重濁。觀此方用人參炙草桂枝薑棗以補氣。而不用芪朮。則不患燥陰。卽所以調和營衛。用麥冬生地阿膠麻仁以補血。而不用歸芍。則不患滯陽。卽所以復脈通心。且更君以炙草。助以清酒。皆於輕清二字相協成功。薛生白曰。長沙夫子用阿膠。何曾云炒。後人畫蛇添足耳。阿膠之用。專爲濟水伏流也。炒之濟水何在哉。

險症每在陽明少陰二經。最當詳辨。喻嘉言治黃長人犯房勞病傷寒。守不服藥之戒。身熱已退。十餘日外。忽然昏沉。渾身戰慄。手足如冰。一醫已合就薑附之藥矣。喻用調胃承氣湯。約重五錢。煎成熱服半盞。少頃又熱服半盞。人事大清。忽然

渾身壯熱。再與大柴胡一劑。熱退身安。凡傷寒初起發熱。煎熬津液。鼻乾口渴。便秘。漸至發厥者。不問知其爲熱也。蓋犯房勞而病感者。其勢不過比常較重。如發熱則熱之極。惡寒則寒之極。頭痛則痛之極。所以然者。陰虛陽往乘之。非陰盛無陽之比。况病者始能勿藥。陰邪必輕。安得以陰厥之例爲治耶。又治徐國楨傷寒六七日。索水到前。復置不飲。異常大躁。將門牖洞啓。身臥地上。展轉不快。更求入井。一醫洶洶。急以承氣與服。喻診其脈。洪大無倫。重按無力。謂曰。此用人參附子乾薑之症。奈何認爲下症耶。觀其得水不欲嚥。情已大露。豈水尙不欲嚥。反可飲大黃芒硝乎。於是以附子乾薑各五錢。人參三錢。甘草二錢。煎成冷服。服後寒戰戛齒有聲。以重綿和頭覆之。縮手不肯與診。陽微之狀始著。再與前藥一劑。微汗熱退而安。

厥逆一症。有陰陽之分。凡四肢厥逆。外見張目不眠。聲音響亮。口臭氣粗。身輕惡熱之症。爲陽厥。法主破陽行陰以止其厥。若外見目瞑倦臥。聲低息短。少氣懶言。身熱腹寒之症。爲陰厥。法主祛陰散寒以回其陽。譫語一症。有陰陽虛實不同。經言實則譫語。虛則鄭聲。在陽明爲實症。爲譫語。乃

陽明胃實。燥結不通。火亢極陽。真陰立亡。而神明內亂。譫語無倫。法主大承氣湯。急祛其陽以救其陰。在少陰爲虛症。爲鄭聲。乃少陰中寒。魄汗出而下利。氣虛陽脫。神魂無主。細語呢喃。錯亂顛倒。法主四逆理中。急回其陽以固其脫。煩躁一症。陰陽互關。曰陽煩陰躁。又曰煩出於心。躁出於腎。其實不然。煩者未有不躁。躁者未有不煩。煩躁皆同。而症之陰陽不同。有爲少陰亡陽。身熱多汗而煩躁者。乃腎中真陽。隨汗而浮越於外。法主溫補以回其陽。有爲陽明熱越。身熱多汗而煩躁者。乃胃中津液。隨汗而盡越於外。法主人參白虎等法以徹其熱。昏睡一症。在少陰爲陰霾甚而陽不開。法當急回其陽以禦其陰。在陽明則有熱甚神昏。法當速徹其熱以退其陽。且昏睡與不眠。其症不同而法則同。在陽明張目不眠者。其常也。然又有熱熾神昏之症。其人均爲口臭氣粗。汗出惡熱。其法亦均當徹其熱。在少陰但欲寐者。其常也。然又有裏陰過勝。格拒真陽。隨汗外越。不得內交於陰。亦不得眠。其人均爲頭眩身重。少陰懶言。其法亦均當回其陽。昔人以仲景河間東垣丹溪爲四大家。然仲景醫中時聖也。三子則伯夷伊尹柳下惠而已。試觀傷寒方中。黃芩白虎。已開河間之先也。建中理中。已開東垣之先

也。復脈黃連阿膠。已開丹溪之先也。然則謂三子得仲景之一端而引伸之則可。謂三子補仲景之未備則未確也。

凡病不外六經。精於傷寒法。乃可通治雜病。蓋雜病之規矩準繩。已畢俱於傷寒中也。如虛損之症。保陰液則復脈宜投。護陽氣則建中是賴。痰飲之症。開太陽則青龍有效。攝少陰則真武多功。中風風痺等症。桂枝湯之加減。具見神奇。中寒寒厥等症。四逆輩之裁成。皆堪貴重。溫熱以黃芩為主。取其酸苦堅陰。暑喝以白虎加參。藉其甘寒制火。濕症宜發汗利水。而麻黃五苓。當增味以取效。燥症宜養血益陰。而膠連復脈。可節錄以見長。噎膈忌用辛香。惟瀉心湯可開。可降。關格忌投劫奪。惟黃連湯能降能升。血症破瘀。在上則大黃黃連瀉心湯。在下則桃仁承氣。抵當湯。而復脈尤滋陰調血之聖劑。水症攻邪。在表則青龍及越婢湯。在內則大陷胸與十棗湯。而真武尤溫經利水之良方。消渴之證。太陽則五苓文蛤。陽明則白虎猪苓。哮喘之證。兼寒則桂枝朴杏。兼熱則麻杏甘膏。疸證腹滿而嘔。仍取柴胡。小便自利。仍取建中。而穀疸始專事乎茵陳。瘧證調和營衛。不離桂枝。開發腠理。不離柴胡。而溫瘧則借材於白虎。瀉痢諸證。烏梅丸爲寒熱兼投之劑。而暴注

下迫。則白頭翁猪苓猪膚葛根黃連黃芩湯是也。至若白通通脈桃花等劑。又治陰寒下利者矣。嘔吐諸證。小柴胡爲表裏兼解之方。而虛陽上逆。則五苓散竹葉石膏湯黃芩半夏生薑湯是也。至若吳萸四逆理中。等劑。又治中虛作嘔者矣。多汗有白虎桂枝四逆。不寐有猪苓梔豉膠連。大便閉則承氣脾約。密煎是也。小便閉則五苓猪苓茵陳是也。婦人熱入血室。陽明受邪。少陽乘之。與丈夫異者。故另立規條也。小兒寒中陰經。太陰最多。厥陰間有。與大人同者。卽共此方法也。旣悟微旨於傷寒之中。自得妙法於傷寒之外。更參金匱。如逢故我。豈有異致哉。

醫學舉要卷一 六經合論

醫學舉要

清 南匯 徐 鏞玉臺輯述

鄞縣 曹赤電炳章圈點

卷二

時邪合論

或謂東南多濕。但有溫暑而無傷寒。或謂溫暑莫非傷寒所致。故非過於寒涼。即過於辛散。都非中道。茲將四時感證。一一合論。而知風寒溫暑燥濕。皆能著人爲病。常氣異氣之不同。是邪非邪之互異。臨證了然。斯無或混。

內經云。今夫熱病者。皆傷寒之類也。程郊倩曰。開口便道破熱病爲傷寒之類。其與傷寒自是兩病。蓋傷寒有統屬之傷寒。有分隸之傷寒。所該者廣。又曰。內經傳經熱病。是傷寒之類。實非傷寒而卽瘟疫也。

內經曰。凡病傷寒而成溫者。先夏至日者爲病溫。後夏至日者爲病暑。程郊倩曰。

內經全文。俱是說熱病。恐人失去了冬傷於寒。春必病溫之旨。故以凡病傷寒而成溫者八字結出之。是其言熱。都是言溫。溫病已成。在春不發。在夏亦發。溫與暑實是一病。與時令之溫病。時令之暑病從外得之者不同。

難經以中風傷暑飲食勞倦傷寒中濕爲五邪。其意以中風屬肝木。傷暑屬心火。飲食勞倦屬脾土。傷寒屬肺金。中濕屬腎水。肝病中風得之。心病傷暑得之。脾病飲食勞倦得之。肺病傷寒得之。腎病中濕得之。此自病者爲正邪也。肝病中風得之。心病傷暑得之。脾病傷寒得之。肺病中濕得之。此從後來者爲虛邪也。肝病傷暑得之。心病飲食勞倦得之。脾病傷寒得之。肺病中風得之。此從前來者爲實邪也。肝病傷寒得之。心病中濕得之。脾病中風得之。肺病傷暑得之。腎病飲食勞倦得之。此從所不勝來者爲賊邪也。肝病飲食勞倦得之。心病傷寒得之。脾病中濕得之。肺病中風得之。腎病傷暑得之。此從所勝來者爲微邪也。

難經以中風傷寒濕溫熱病溫病爲五傷寒。其意以中風傷寒應風寒二氣。濕溫應暑濕二氣。熱病應燥火二氣。溫病則爲異氣。故中風傷寒濕溫熱病。各指脈形。

而溫病之脈。則曰行在諸經。不知何經之動。各隨其經所在而取之也。
仲景云。太陽病。發熱汗出。惡風脈緩者。名爲中風。方中行曰。太陽病三字。卽首條
所揭脈浮頭項強痛而惡寒者是也。後皆倣此。柯韻伯曰。中風惡風。類相感也。風
性散漫。脈應其象。故浮而緩。
仲景云。太陽病。或已發熱。或未發熱。必惡寒。體痛嘔逆。脈陰陽俱緊者。名曰傷寒。
程郊倩曰。太陽雖同。而寒屬陰邪。則發熱較遲於中風。然已未之間。必惡寒特甚。
自不同中風之僅惡風而稍兼惡寒也。其體則痛。陰寒擊於經隧而氣血凝泣。自
不同中風之無內擊也。其嘔則逆。寒邪束於皮毛。氣無從越而壅上。自不同中風
之乾嘔。僅鼻鳴而氣不甚逆也。脈陰陽俱緊。以寒主勁急。而且爲實邪。故緊而浮
沉俱有力。則大不同於陽浮陰弱之緩脈矣。證與脈非中風能混。卽推之暑濕溫
熱。俱不得以其似是者混。名曰傷寒也。
仲景云。太陽病。發熱而渴。不惡寒者。爲溫病。若發汗已。身灼熱者。名曰風溫。風溫
爲病。脈陰陽俱浮。自汗出身重。多眠睡。息必鼾。語言難出。若被下者。小便不利。直
視失溲。若被火者。微發黃色。劇則如驚癇。若火薰之。一逆尙引日。再逆促命期。柯

韻伯曰。太陽中暑。亦有因於傷寒者。雖渴而仍惡寒。太陽溫病。反不惡風而渴。是病根不因於寒而因於風。發熱者病在表。法當汗解。然不惡寒。則非麻桂所宜。風與溫相搏。發汗不如法。風去而熱反熾。灼熱者。兩陽相薰。灼轉成陽明之候也。程郊倩曰。溫病初得。病在經隧之間。治法只宜求之太陽暑之裏。陽明暑之表。如所云心中懊懣。舌上胎者。梔子豉湯主之。渴欲飲水。口乾舌燥者。白虎加人參湯主之。脈微發熱。渴欲飲水。小便不利者。猪苓湯主之之類。

陽暑者。動而得之之症。潔古東垣所謂中熱。即仲景所謂中暍也。陰暑者。靜而得之之症。潔古東垣所謂中暑。其實非暑邪也。乃因暑而致之病。蓋亦傷寒之類。張鳳達曰。劉復真謂暑脈虛而微弱。按之無力。又脈來隱伏。弦細乳遲。皆暑脈也。脈虛身熱。謂之傷暑。中暍脈虛而微者是也。寒病脈日變。溫熱脈不變。寒病脈浮洪有力者易治。乳細無力者難治。無脈者不治。溫熱則不然。溫有一二部無脈者。暑熱有三四部無脈者。被火所逼。勒而藏伏耳。非絕無也。照經用辛寒藥。火散而脈起。脈起而病愈。要在辨之詳耳。周禹載曰。中暑一症。不過清心利小便。解暑毒。補真氣而已。即脈來虛弱。重者伏匿。喘促逆冷。卒然昏暈。不可用溫。此熱傷元氣。用

溫則助陽耗陰。且冬月脈浮緊浮緩。分傷寒中風。夏月弦緊傷風。弦緩中暑。表疎自汗則脈虛。表緻無汗則脈緊耳。世俗不明。曰夏月陰氣在內。大順散爲必用之藥。夫陰非寒也。陽外而陰內耳。丹溪云。伏陰在內。陰字有虛之義。作陰冷則誤矣。火令之時。燍石流金。何陰冷之有。孫真人用生脈散。氣虛可知也。古人用大順散。非謂伏陰。本治冰果所傷。冷香飲子。治陽氣大虛。多慾厥逆。漿水散。治汗多亡陽。脈微欲絕。其餘不過清暑益氣湯。消暑十全散。十味香薷飲之類足矣。濕溫者。先傷於濕。又中於暑。暑濕相搏而爲病也。王宇泰曰。昔人治濕溫。通身皆潤。足冷至膝下。腹滿不省人事。六脈皆小弱而急。問所服藥。皆陰病藥也。此非受病重。藥能重病耳。以五苓合白虎十餘劑稍甦。更與清燥湯調理而安。凡陰病厥冷。兩臂皆冷。今脛冷臂不冷。則非下厥上行。故知非陽微寒厥。而合用溫熱藥也。喻嘉言立三氣一門。三氣者。熱濕暑是也。蓋春分以後。秋分以前。少陽相火。少陰君火。太陰濕土。各行其令也。天之熱氣下。地之濕氣上。人在其中。受其炎蒸。無隙可避。多有氣倦神昏。肌膚癢起。胸膈痞出。頭面癰生。甚則消渴癰疽。吐瀉瘧痢。無所不病。內經運氣主病。凡屬少陰君火。卽與太陰濕土一例同推。不分彼此。而太

陰司天。濕淫所勝。平以苦熱。佐以酸辛。以苦燥之。以淡泄之。治濕之法則然矣。下文即出治熱之法云。濕上甚而熱。治以苦溫。佐以甘辛。以汗爲散而止。

飲食勞倦。難經列之五邪。李東垣獨以內傷立論。然亦必稍兼外感。故東垣補中益氣。亦用升麻柴胡以發表。王宇泰曰。內傷外感。兼見而相合者。脈症尤宜細心求之。若顯內症多者。則是內傷重而外感輕。宜以補養爲先。若顯外症多者。則是外感重而內傷輕。則以發散和解爲主。此又東垣未言之意也。

飲食勞倦。又宜分而爲二。勞倦傷爲不足。用東垣補中益氣。飲食傷爲有餘。用潔古枳朮丸。又按王安道曰。枳朮丸之類。雖曰消導。尙有補益之意存乎其間。此物滯氣傷。消補並行者宜之。若所傷之物。枳朮丸所不能去者。備急丸。養黃丸。瓜蒂散等。潔古東垣亦未嘗委之而勿用也。又按秦景明曰。凡治夾食傷寒。不可先攻其食。且先發散寒邪。次可消導之也。

喻嘉言謂內經秋傷於濕。上痿而咳。發爲氣厥。應是秋傷於燥。而凡諸氣膈鬱。諸痿喘嘔之症。皆是燥氣爲病。爰立秋燥一門。可謂補千古之未備。但所製清燥救肺湯一方。都是內因之藥。必合寓意草中二案以觀之。始足盡秋令時邪之治。

吳吉長乃室新秋病灑淅惡寒。寒已發熱。漸生咳嗽。然病未甚也。服表散藥不愈。身日尪羸。延至初冬。飲以參朮補劑。轉覺奄奄欲絕。食飲不思。有咳無聲。瀉痢不止。危在旦夕。是病總爲誤藥所致。始先皮毛間灑淅惡寒。肺金爲時令之燥所傷。用表散已爲非法。至用參朮補之。則肺氣閉錮。而咳嗽之聲不揚。胸腹飽脹。不思飲食。肺中之熱。無處可宣。急奔大腸。食入則不待運化而直出。食不入。則腸中之垢污。亦隨氣奔而出。是以瀉痢無休。今以潤肺之藥。兼潤其腸。則源流俱清。寒熱咳嗽泄瀉一齊俱止。方用黃芩地骨皮甘草杏仁阿膠。初進一劑。瀉即少止。四劑畢而寒熱俱除。又數劑而咳嗽俱全愈。鄉人王氏婦秋月亦病寒熱。服參朮後亦奄奄一息。但無咳嗽。十餘日不進粒米。亦無大便。時時暈去。不省人事。喻以大黃芒硝甘草石膏四味爲粗末與之。遂將二劑連服。頃之腹中弩痛。下結糞數塊。進粥二盞。前病如失。

仲景以瘧濕暍三者合論。則瘧與濕不同。柯韻伯曰。六氣爲病。皆能發熱。然寒與熱相因。暑與濕相從。獨燥與濕相反。濕病多得之地氣。燥病多得之內因。此病因之不同也。內經病機十九條。燥症獨無。若諸瘧項強。皆屬於濕。愚竊疑之。傷寒論

有瘧濕之分。又云太陽病發汗太多因致瘧。則瘧之屬燥無疑也。瘧疫者。沿門闔境。老少強弱。觸之即病。乃天地之瘧氣也。疫癘之邪。都從口鼻而入。直行中道。流布三焦。非比傷寒六經。可表可下。吳又可曰。疫邪內不在臟腑。外不在經絡。舍於伏脊之內。去表不退。附胃亦近。乃表裏之分界。是為半表半裏。即針經瘧論所謂橫連膜原是也。所製達原飲一方。用檳榔二錢。厚朴一錢。草果仁五分。三味協力攻堅。直達其巢穴。使邪氣潰敗。速離膜原。又慮發熱作渴之症。三者重傷津液。故加知母一錢。以滋陰。白芍一錢。以和血。黃芩以清熱。甘草五分。以調中。後人治疫。皆遵此議。若喻嘉言所治之疫。值明季兵荒之後。乃大疫也。故以人參敗毒散為主方。與又可頗異。而其論症甚詳。爰為採入。喻曰。世俗所稱大頭瘧者。頭面腮頤腫如瓜。穀者是也。所稱蝦蟆瘧者。喉痺失音。頸筋腫大者是也。所稱瓜瓢瘧者。胸高脇起。嘔血如汁者是也。所稱疔瘡瘧者。遍身紅腫。發塊如瘤者是也。所稱絞腸瘧者。腹鳴乾嘔。水泄不通者是也。所稱軟脚瘧者。便清泄白。足重難移者是也。治法未病前。預服芳香正氣藥。則邪不易入。此為上也。邪既入。急以逐穢為第一義。上焦如霧。升而逐之。兼以解毒。中焦如瀉。疏而逐之。兼以解毒。下

焦如瀆。決而逐之。兼以解毒。

經謂一陰一陽結。謂之喉痺。王太僕曰。一陰者。手少陰君火。心主之脈氣也。一陽者。手少陽相火。三焦之脈氣也。二火皆主脈。並絡於喉。氣熱則內結。結甚則腫脹。腫脹甚則痺。痺甚而不通則死矣。蓋手少陰少陽。君相二火獨甚。則熱結正絡。故病且速也。十二經中言嗑乾咽痛喉腫。頰腫舌本強。皆君火爲之。喉痺急速。相火所爲也。君火猶人火。相火猶龍火。人火焚木其勢緩。龍火焚木其勢速。內經之言喉痺。則咽與舌在其間。以其病同是火。故不分也。治喉痺之火。與救火同。內經火鬱發之。謂發汗也。然咽喉中豈能發汗。故出血者。乃發汗之一端也。近世有爛喉痧之名。最易傳染。蓋亦瘟疫之類。解表清熱兩途。一失其宜。禍生反掌。不可不慎也。

霍亂之症。仲景載之傷寒後。而不與中暑合論。熱多欲飲水者。五苓散主之。寒多不用水者。理中丸主之。治法已備具矣。道光初。遍地多朝發夕死之症。一起腹痛吐瀉。脈道歇絕。故難施治。其可治者。或用大熱而愈。或用大寒而愈。則知仲景寒多熱多之旨。爲千古不易準繩也。

凡斑屬血。疹屬氣。斑疹初見。卽當細看。葉天士曰。看胸背兩脇。點大而在皮膚之上者爲斑。或雲頭隱隱。或瑣屑小粒者爲疹。又宜見而不宜見多。按方書謂斑色紅者屬胃熱。紫者熱極。黑者胃爛。亦必看外症所合。方可斷之。然而春夏之交。濕病俱發。疹爲甚。且其色要辨。如淡紅色。四肢清。口不甚渴。脈不洪數。非虛斑。卽陰斑。或胸微見數點。面赤足冷。或下利清穀。此陰盛格陽於上而見。當溫之。若斑色紫小點者。心胞熱也。點大而紫。胃中熱也。黑斑而光亮。熱勝毒甚。雖屬不治。若其人氣血充者。或依法治之。尙可救。若黑而晦者。必死。若黑而隱隱。四旁赤色。火鬱內伏。大用清涼透發。間有轉紅。成可救者。若夾斑帶疹。皆是邪之不一。各隨其部而泄。發出宜神情清爽。爲外解裏和之意。斑疹出而昏者。正不勝邪。內陷爲患。或胃津內涸之故。再有一種白痞小粒。如水晶色者。此濕熱傷肺。邪雖出而氣液枯也。必得甘藥補之。或未至久延。傷及氣液。乃濕鬱衛分。汗出不徹之故。當理氣分之邪。或白枯如骨者。多凶。爲氣液竭也。

幼科最多痧疹。聶久吾曰。最忌誤用溫熱。早用寒涼。此二語最爲扼要。

婦人病溫。與男子同。但多胎前產後。與經水適來適斷。葉天士曰。大凡胎前病。古

人皆以四物加減治之。謂護胎爲要。恐來害妊。如熱極。用井底泥藍布浸冷。覆蓋腹上等。皆是保護胎元之意。但亦要看其邪之可解處。用血膩之藥不靈。又當審察。不可認板法。然須步步保護胎元。恐損正邪陷也。至於產後之法。按方書慎用苦寒藥。恐傷其已亡之陰也。然亦要辨其邪能從上中解者。稍從症用之。亦無妨也。不過無犯下焦。且屬虛體。當如虛怯人病邪而治。總之無犯實實虛虛之禁。況產後當氣血沸騰之後。最多空竇。邪勢必乘虛內陷。虛處受邪。爲難治也。如經水適來適斷。邪將陷血室。傷寒少陽言之詳悉。不必多贅。但溫熱與正傷寒不同。仲景立小柴胡湯。提出所陷熱邪。參棗扶胃氣。以衝脈隸屬陽明也。此與虛者爲合治。若熱邪陷入。與血相結者。當宗陶氏小柴胡湯。去參棗。加生地桃仁。查肉丹皮。或犀角等。若本經血結自甚。少腹必滿痛。輕者刺期門。重者小柴胡湯去甘藥。加延胡歸尾桃仁。挾寒加肉桂心。氣滯者。加香附陳皮枳殼等。然熱陷血室之症。多有譫語如狂之象。防是陽明胃實。當辨之。血結者。身體必重。非若陽明之輕旋便捷。何以故耶。陰主重濁。絡脈被阻。側旁氣痺。連胸背皆拘束不遂。故去邪通絡。正合其病。往往延久。上逆心胞。胸中痛。正陶氏所謂血結胸症也。王海藏出一桂枝

紅花湯。加海蛤桃仁。原爲表裏上下一齊盡解之理。看此方大有巧手。故錄出以備學者之用。

中寒症。屬少陰經。卽傷寒之重者耳。王節齋曰。病有感有傷有中。感者在皮毛。爲輕。傷者兼肌肉稍重。中者屬臟腑最重。寒有感寒傷寒中寒。風有感風傷風中風。暑有感暑傷暑中暑。當分輕重表裏。治各不同。又如中風中濕中毒。中者中也。謂邪直入於中也。

四氣著人。每多伏邪爲患。生氣通天論曰。春傷於風。邪氣留連。乃爲洞泄。夏傷於暑。秋爲痃瘕。秋傷於濕。上逆而咳。發爲痿厥。冬傷於寒。春必病溫。陰陽應象論曰。春傷於風。夏生飧泄。夏傷於暑。秋必痃瘕。秋傷於濕。冬生咳嗽。冬傷於寒。春必病溫。王安道曰。據此四傷。諸家註釋。皆不得經旨。蓋由推求太過故也。夫風暑濕寒者。天地之四氣也。洞泄也。痃瘕也。咳與痿厥也。溫病也。皆是因其發動之時。形證昭著。乃逆推而知其昔日致病之原。爲傷風傷暑傷濕傷寒耳。非是初受傷之時。能預定其今日必爲此病也。且夫傷於四氣。自當時卽發者。有過時發病者。有久而後發病者。有過時之久。自消散而不成病者。蓋因邪氣之傳變聚散不常。及正

氣之虛實不等也。按六氣雖分主四時。每多伏氣爲患。故傷寒不必定屬於冬。而溫病亦嘗適見於冬。春溫因冬不藏精。暑之爲病。每盛發於秋。而瘧痢諸邪。都因伏暑而發。卽嘉言所補秋燥一篇。亦謂不應於新秋而應於十月。瘧疾一症。方書雖有痰食寒熱瘴癘之互異。然因暑發俱多。薛立齋曰。大凡瘧症。皆因先傷於暑。次感於風。客於營衛之間。腠理不密。復遇風寒。閉而不出。舍於腸胃之外。與營衛並行。晝行於陽。夜行於陰。並則病作。離則病止。併於陽則熱。併於陰則寒。淺則日作。深則間作。在氣則早。在血則晏。痢疾一症。古稱滯下。蓋裏有滯濁而後下也。但滯在氣。滯在血。冷傷熱傷而滯非一。症之大法。則機要所云後重則宜下。腹痛則宜和。身重則除濕。脈弦則去風。膿血稠粘。以重劑竭之。身涼自汗。以熱藥溫之。風邪內結。宜汗之。驚澹而利。宜溫之。可謂要言不煩。

類傷寒症。不可不知。許叔微曰。近似傷寒者有五症。發熱而惡寒者。傷寒之候也。脈浮而數。發熱惡寒。或有痛處。是欲爲癰膿也。脈浮按之反濇。發熱惡寒。或膈熱而嘔吐。此傷食也。脈浮而滑。發熱而背寒。或頭眩而嘔吐。此風痰症也。脈浮而弦。

發熱而惡寒。或思飲食。此欲作瘧也。李士材曰。類傷寒有五症。一曰痰。中脘停痰。憎寒發熱。自汗胸滿。但頭不痛。項不強。與傷寒異耳。一曰食積。胃中停食。發熱頭痛。但身不痛。不惡寒。不浮緊。與傷寒異耳。一曰脚氣。足受寒濕。頭痛身熱。肢節痛。便閉嘔逆。但脚氣或腫滿。或枯細。與傷寒異耳。一曰內癰。脈浮數。當發熱惡寒。若有痛處。飲食如常。畜積有膿也。胸中痛而咳。脈數咽乾。不渴。濁吐腥鼻。肺癰也。少腹重按之痛。便數如淋。汗出惡寒。身皮甲錯。腹皮腫。脈滑數。腸癰也。胃脘痛。手不可近。胃脈細。人迎盛者。胃脘癰也。

六氣之行。本乎五運。司天在泉。亦宜參以活法。何柏齋曰。天元紀大論等篇。以年歲之支干。分管六氣。蓋已失先聖之旨矣。年歲之支干。天下皆同。且通四時不變者也。天氣之溫暑寒涼。民病之虛實衰旺。東西南北之殊方。春夏秋冬之異候。豈有皆同之理。此其妄誕。蓋不待深論而可知。近世傷寒治法。則以得病日之干支為主。其源亦出於此。決不可用。蓋金木水火土之氣。各主一時。當時則為主氣。爲司天。非其時而有其氣。則爲客氣。與時正相反者。則爲在泉。蓋其氣伏於黃泉之下而不見也。治療之法。用熱遠熱。用寒遠寒。所謂必先歲氣。毋伐天和也。春時木

醫學舉要卷二時邪合論

醫學舉要卷二 時邪合論

醫學舉要

清 南匯 徐 鏞玉臺輯述

鄞縣 曹赤電炳章圈點

卷三

雜症合論

偏枯者。半身不隨也。風痺者。身無痛。四肢不收也。近世所見。二症居多。總名之曰中風。喻嘉言曰。中絡邪正衛。猶在經脈之外。故但肌膚不仁。中經則邪入營脈之中。內而骨。外而肉。皆失所養。故軀殼爲之重著。然猶在軀殼之間。至中腑中臟。則離軀殼而內入。邪中深矣。臟腑必歸於胃者。胃爲六腑之總司也。廩於腸胃。并舉大小二腸並重。蓋風性善行空竅。水穀入胃。則胃實腸虛。風邪卽進入腸中。少頃水穀下胃。則腸實胃虛。風復進入胃中。見胃風必奔迫於二腸之間也。風入胃中。胃熱必盛。蒸其津液。結爲痰涎。壅塞隧道。胃之支脈絡心者。纔有壅塞。卽堵其神

氣出入之竅。故不識人也。諸臟受邪至盛。必進入心而亂其神明。神明無主。則舌縱難言。廉泉開而流涎沫也。

類中之症。河間主火。東垣主氣。丹溪主濕。王安道曰。三子所論。自是因火因氣因濕。而爲暴病暴死之症。內經所云三陰三陽發病。爲偏枯痿易。四肢不舉。亦未嘗必因於風也。夫風火氣濕之殊。望聞問切之異。豈無所辨乎。

內風之症。卽景岳所云非風也。如陰中之水虛。則病在精血。陰中之火虛。則病在神氣。蓋陽衰則氣去。故神志爲之昏亂。非火虛乎。陰虧則形壞。故肢體爲之廢弛。非水虛乎。今以形離神壞之症。乃不求之水火之原。而猶以風治。鮮不危矣。試以天道言之。其象亦然。凡旱則多燥。燥則多風。是以風木之火從乎燥。燥則陰虛之候也。故凡治內風者。專宜培補真陰以救根本。使陰氣復則風燥自除矣。然外感者。非曰絕無虛症。氣虛則虛也。內傷者。非曰絕無實證。有滯則實也。治虛者。當察其在陰在陽而直取之。治實者。但當察其因痰因氣而暫開之。此於內傷外感。及虛實攻補之間。最宜察其有無微甚而酌其治也。甚至有元氣素虛。卒然仆倒。上無痰。下失禁。瞑目昏沉。此厥絕之證。尤與風邪無涉。使非大劑參附。或七年之艾。

破格挽回。又安望其復元氣於將絕之頃哉。葉天士曰。凡中風證。有肢體縱緩不收者。皆是陽明氣虛。當用人參爲首藥。而附子黃耆炙草之類主之。若短縮拘攣。則以逐邪爲急。

唐許胤宗治中風不語。用黃耆防風二味。煮湯置床下蒸之。是夕便能語。後人遂將二味煎服。加白朮名玉屏風散。爲治風要方。金匱黃耆桂枝五物湯。卽小建中去甘草飴棗加黃耆也。本治血痺。醫宗金鑑移治偏枯。左半身不遂。則加當歸以和血。右半身不遂。則倍黃耆以補氣。手軟倍桂枝。足軟加牛膝。骨軟加虎骨。元氣虛加人參。陽氣虛加附子。以偏枯由於營衛之虛。故血痺之方。可以通用。又按喻嘉言曰。凡治一偏之病。治宜從陰引陽。從陽引陰。從左引右。從右引左。蓋觀樹木之偏枯者。將灌其枯者乎。抑灌其未枯者。使榮茂而因以條暢其枯者乎。口噤身冷爲瘖厥。四肢不收爲風痺。河間所謂心火暴甚。腎水虛衰之證。製地黃飲子一方。熟地培根本之陰。桂附菴蓉巴戟返真元之火。山茱石斛溫肝平胃。茯苓菖蒲補心通腎。麥冬五味保肺以滋化源。諸藥等分。每用五分。加薄荷煎湯。濁藥軟投。故云飲子。

痺者。風寒濕雜合之證。李士材曰。內經論痺。即其曰雜至。曰合。則知非偏受一氣。可以致痺。又曰。風勝為行痺。寒勝為痛痺。濕勝為著痺。即其下一勝字。則知但分邪有輕重。未嘗非三氣雜合為病也。筋痺屬肝。游行不定。上下左右。隨其虛邪。與氣血相搏。聚於關節。或赤或腫。筋脈弛縱。古稱走注。今名流火。脈痺屬心。臟腑移熱。復遇外邪。客搏經絡。留而不行。故癱痺。肌肉熱極。唇口反裂。皮膚色變。肌痺屬脾。留而不移。汗多。四肢緩弱。皮膚不仁。精神昏塞。今名麻木。皮痺屬肺。邪在皮毛。癢疹風瘡。搔之不痛。宜疎風養血。骨痺屬腎。痛苦切心。四肢攣急。關節浮腫。鶴膝風者。即三氣之痺於膝者也。如膝骨日大。上下左右。日枯細者。且未可治其濕。先養氣血。俾肌肉漸榮。後治其濕可也。

八風五痺之證。最宜藥酒。而必以史國公藥酒方為勝。當歸二兩。杜仲二兩。薑汁炒。牛膝二兩。白朮二兩。炒。枸杞四兩。平補足三陰經。虎脰骨四兩。壯骨而祛風。鼈甲二兩。益陰血而去肝風。防風二兩。羌活二兩。松節二兩。晚蠶沙二兩。草薢二兩。蒼耳子二兩。秦艽四兩。茄根八兩。等藥為末。用絹袋盛之。煮無灰酒三十斤。煮熟退火氣服之。每日數次。常令醺醺不斷。既以祛風。又能去濕。而左癱右瘓。口眼喎斜。四肢

疼痛等證。皆可愈矣。

痿證與痺證不同。由於真陰之虛。不可妄用風藥。張子和曰。大抵痿之爲病。皆由客熱而成。好慾貪色。強力過極。漸成痿證。故痿臂屬肺。脈痿屬心。筋痿屬肝。肉痿屬脾。骨痿屬腎。總由肺受火熱。葉焦之故。相傳於四臟。痿病成矣。治痿獨取於陽。明者何。蓋以陽明者。五臟六腑之海。主潤宗筋。宗筋主束骨而利機關也。朱丹溪曰。肺熱則不能管攝一身。脾傷則四肢不能爲用。而諸痿之病作。瀉南方則肺金清而東方不實。何脾傷之有。補北方則心火降而西方不虛。何肺熱之有。虞天民曰。西北二方。在人爲腎水肺金所居之地。二臟常恐其不足。東南二方。在人爲肝木心火所居之地。二臟常恐其有餘。虎潛丸爲治痿要方。龜板四兩羊肉半斤煨作丸虎骨一兩皆血肉之品。而一取滋陰。一取補形。一取祛風。並通絡脈。熟地二兩黃柏四兩填少陰之精。知母二兩清太陰之氣。牛膝三兩當歸一兩白芍兩半滋厥陰之血。諸藥皆滯。佐陳皮半錢以疎之。諸藥皆涼。佐瑣陽一兩以溫之。丸用淡鹽湯下。引以下達。使經脈充盈。絡脈通利。則痿可愈矣。此方乃補陰通絡之要方。又不徒治痿也。

陽痿之證。方書多云命門火衰。惟王節齋發明腎經鬱熱之義。云曾親見一二人服黃柏知母清金滋腎而愈。

原氣虛與虛損不同。喻嘉言曰。原氣虛可復。虛損難復。虛損又有易復難復兩候。因病致虛者。緩調自復。因虛致損者。虛上加虛。卒難復也。丹溪論勞瘵主乎陰虛者。蓋自子至巳屬陽。自午至亥屬陰。陰虛則熱在午後子前。寤屬陽。寐屬陰。陰虛則汗從寐時盜出。升屬陽。降屬陰。陰虛則氣不降。氣不降則痰涎上逆而連綿不絕。脈浮屬陽。沉屬陰。陰虛則浮之洪大。沉之空虛也。世人病陰虛極多。而陰中之水虛。與陰中之火虛。最宜分別。王太僕曰。倏熱往來。時發時止。是無水也。晝見夜伏。夜見晝止。不時而動。是無火也。當求其屬而主之。無火者。宜益火之源。以消陰翳。無水者。宜壯水之主。以制陽光。寒者熱之。熱者寒之。此其常也。惟陰虛之人。最宜詳審。王太僕曰。大寒而盛。熱之不熱。是無火也。大熱而盛。寒之不寒。是無水也。病有假熱真寒。則何以治之。李瀕湖曰。陰寒在下。虛陽在上。治之以寒。則陰寒愈甚。治之以熱。則拒而不內。熱藥冷服。下咽之後。冷性既消。熱性便發。病氣隨愈。此熱因寒用法也。按金匱男子脈大爲勞。脈極虛亦爲勞。脈大則氣分泄。

越。如建中歸脾四君異功等所宜也。脈虛則精血下奪。如六味八味左歸右歸大造天真等所宜也。若陰虛枯燥之極。不受補劑者。雖有清金滋肝之法。終難爲力。乾血勞證。最宜審察。血傷則無以沃其膚。故甲錯也。目得血而能視。營氣不貫於空竅。故黯黑也。此證補之不可。涼之無益。仲景有大黃蜜蟲丸之法。以地黃十兩爲君。以大黃^{十兩}爲臣。以甘草二兩白芍四兩桃仁一兩杏仁一升爲佐。以乾漆一兩之苦蜜蟲一升水蛭百枚臍蟪百枚蠱蟲一升之鹹爲使。又有陳大夫所傳百勞丸。可以參酌互用。吳鶴皋曰。濁陰不降。則清陽不升。今人遇一勞證。便用滋陰。服而不效。坐以待斃。術豈止此耶。咳嗽一證。分外感內傷。張景岳曰。外感之咳。必由皮毛而入。皮毛爲肺之合。而凡外邪襲之。則必先受於肺。久而不愈。則必自肺而傳於五臟。內傷之咳。必起於陰分。肺屬燥金。爲水之母。陰損於下。則陽孤於上。水涸金枯。火過於燥。肺燥則癢。癢則咳不能已。朱丹溪曰。上半日嗽者。胃中有火也。黃昏嗽者。脾肺氣虛也。午後嗽者。腎中陰火也。徐叔拱曰。咳嗽外感六淫。鬱而成火。必六淫相合。內傷五臟相勝。必五邪相併。有此不同。而中間又有斂散二法。斂者。謂收斂肺氣也。散者。謂解散

寒邪也。宜斂而散。則肺氣弱。一時發散而走泄正氣。爲害非輕。宜散而斂。則肺寒邪一時斂住。害亦非小。且如感風咳嗽。已經散之後。其表虛復感寒邪。虛邪相併。又爲喘嗽。若欲散風。則愈重而虛其肺。若收斂。則愈又滯其邪。當先輕解。漸次斂之。肺不致虛。邪不致滯。喘嗽自止矣。李辰山曰。丹溪以麻黃人參同用。謂之一散一補。凡表邪入肺。失於疎散。經年咳嗽。百藥無功。自非麻黃。終難搜逐。卽虛勞咳嗽。火浮於肺。帶節麻黃。同貝母收功。人疑而畏之。何不取丹溪之言。一再思之。肺痿因肺受火炎。久則肺竅俱閉。喉間或癢或瘡。嗽有血點。痰帶紅線。六葉遂日焦枯而成痿矣。仲景復脈湯。千金生脈散。錢氏阿膠散。喻氏清燥救肺湯。皆可選用。肺癰由氣血混一。壅滯不行。仲景葶藶大棗瀉肺湯。千金葶藶湯。並爲要劑。又考喻嘉言治肺癰。皆用活法。斡旋。因肺癰不可用補。而脾虛又不能生肺。肺燥喜於用潤。而脾滯又難於運食。今日脾虛之極。食飲不思。則於清肺藥中。少加參末以補脾。明日肺燥之極。咳逆有加。則於清肺藥中。少加阿膠以潤燥。血證有傷陽傷陰之分。柯韻伯曰。氣亢於上。焦之陽分。則陽絡傷。血隨氣而上。溢於口鼻。桃仁承氣湯以下之。血隨氣而下。陷於二便。補中益氣湯以舉之。氣有餘

必挾火。當用苦寒以涼其氣。氣不足。便挾寒。宜用甘溫以益其氣。此調氣之大法也。又曰。血自心來者。補心丹主之。脾來者。歸脾湯主之。肺來者。生脈散主之。腎來者。腎氣丸主之。此補血之大法也。劉宗厚曰。四物湯。此特血病而求血藥之屬也。若氣虛血弱。又當從古人血虛以人參補之。陽旺即能生陰血也。補佐之屬。若紅花。桃仁。蘇木。丹皮。血竭者。血滯所宜。蒲黃。阿膠。地榆。百草霜。棕櫚灰者。血崩所宜。蓯蓉。瑣陽。牛膝。枸杞。龜板。夏枯草。益母草者。血虛所宜。乳香。沒藥。五靈脂。凌霄花者。血痛所宜。乳酪。血液之物。血燥所宜。薑。桂。血寒所宜。苦參。生地。汁。血熱所宜。繆仲淳曰。治吐血有三訣。宜行血。不宜止血。宜補肝。不宜伐肝。宜降氣。不宜降火。葉天士曰。凡咳血之脈。右堅者。治在氣分。係震動胃絡所致。宜薄味調養胃陰。如生扁豆。茯苓。神北沙參。苡仁等類。左堅者。乃肝腎陰傷所致。宜地黃。阿膠。枸杞。五味等類。脈弦脇痛者。宜蘇子。桃仁。鬱金。降香等類。成益盈碗者。葛可久。花蘆石散。或大黃。黃連。瀉心湯。一證而條分縷析。從此再加分別。則臨證有據矣。衄者。皆因經絡熱盛。陽氣壅重。迫血妄行而出於鼻也。以犀角。地黃湯為主方。口鼻俱出。爲大衄血。歸脾湯加童便。藕節。舌上出血。曰舌衄。先用蒲黃煎湯漱之。次用槐花炒

研摻之。黃芪六一湯合生脈散服之。熱湧舌上。出血如泉。川文蛤爲散摻之。虛熱舌脹大。出血不止。生乾薑蒲黃爲末摻之。血從齒縫中或齒齦中出者。曰齒衄。又曰牙宣。有風壅。有腎虛。有胃火。消風補腎清胃。宜審診施治。耳中出血爲耳衄。以龍骨燒灰吹之。有肝火。有腎虛。宜臨證施治。血從目出。因誤藥而爲壞證者。斷不可救。若暴病發熱見此。梔子豉湯加犀角秦皮丹皮赤芍。血從毛孔中出者爲肌衄。脈數當歸補血湯。脈浮黃芪建中湯。脈弱保元湯。脈盛當歸六黃湯。便血有腸風臟毒脈痔之分。又有陽氣不升。下部虛而下血者。一見革脈。卽宜溫補。葉天士曰。凡心肝爲剛臟。可受柔藥。脾腎爲柔臟。可受剛藥。羅謙甫治便血立法以平胃散作主。加桂附乾薑歸芍。重加炒地榆以收下濕。卽此意也。洩血與血淋不同。痛屬火盛。血淋也。土牛膝一味煎膏服之。不痛屬虛。洩血也。若腎陰虧損。六味加土牛膝。或過服助陽藥而致者。爲難治。反胃一證。朝食暮吐。暮食朝吐。因胃中無陽。不能容受食物而然。非比食已卽吐者。爲胃火沖逆也。仲景大半夏湯。以人參佐半夏。取腑病以通爲補之義。而又佐以白蜜。沖入水中。揚之二十四遍。用以煮藥。升之緩之。總欲其宣揚穀氣也。

噎膈與反胃不同。飲食之際。氣忽阻塞。如有物梗塞者。名曰噎。心下格拒。飢不能食。或食到喉間。不能下咽者。名曰膈。此因陽氣內結。陰血內枯而成。丹溪有韭汁牛乳飲。汪訥菴曰。丹溪所言養血益陰潤燥和胃調中。不必盡備其方。可以意會。治噎膈諸藥。韭汁散瘀。竹瀝薑汁消痰。童便降火。人乳牛乳潤燥養血。蘆根汁止嘔。茅根汁涼血。蔗汁和胃。藕薺汁消食。驢屎殺蟲。或加燒酒米醋白蜜。和諸汁頻服亦佳。

關格一證。陰陽各極其偏。不能相營。先哲云。人迎候陽。一盛在少陽。膽與三焦也。二盛在太陽。膀胱小腸也。三盛在陽明。胃與大腸也。四盛以上者。陽脈盛而陰無以通。故曰格陽。寸口候陰。一盛在厥陰。肝與心主也。二盛在少陰。心與腎也。三盛在太陰。脾與肺也。四盛以上者。陰脈盛而陽無以交。故曰關陰。喻嘉言曰。自靈素難經仲景皆深言之。然無其方也。因爲上下古今。尋一死裏求生之治。治吐逆之格。由中而漸透於上。治不洩之關。由中而漸透於下。治格而且關。由中而漸透於上下。姑立進退黃連湯。要未可爲中人道也。按仲景黃連湯。治上下寒熱不和。爲升降陰陽之劑。喻氏師其意而進退之。方中黃連進則錢半。退則七分。進則生

用。退則薑製。乾薑進退俱用錢半。進則生用。退則炮用。人參進退俱用錢半。進則生用。退則乳製。桂枝進用一錢。退則不用。製半夏進退俱用錢半。大棗進退俱用二枚。統論進退二法。總以胃爲轉旋。而未及治下。夫腎爲胃關。腎氣不足。則小便必不能利。此退法中又須腎氣丸以培其下元也。

嘔與吐不同。王安道曰。嘔者。東垣所謂聲物俱出者也。吐者。東垣所謂物出而無聲者也。至若乾嘔與噦。皆聲出而無物也。東垣但以噦概之。而無乾嘔之論。夫乾嘔與噦。所異者微甚而已矣。乾嘔乃噦之微。噦乃乾嘔之甚。乾嘔者。其聲輕小而短。噦者。其聲重大而長。又曰咳逆。俗以呃逆及呃忒呼之。治呃忒亦有用橘皮竹茹湯而愈者。然則噦逆呃忒。病雖不同。而爲邪正之氣。佛鬱擾亂所致。則一也。吐酸與中酸不同。劉河間曰。肝熱則口酸。心熱則口苦。脾熱則口甘。肺熱則口辛。腎熱則口鹹。或口淡者。胃熱也。凡中酸法。宜溫藥散之者。亦猶解表之義。若久酸不已。則亦不宜溫之。宜以寒藥下之。後以涼藥調之。膈氣之證。與噎膈不同。噎膈由漸而成。難任剛藥。膈氣因胃陽衰微。陰乘陽位。以致粒米不入。日久不食。諸多虬蟲上居膈間。非辛辣不能開之。喻氏歷治多人。皆至半月不食而得生者。不

出理中六君。及旋覆代赭湯去代赭加赤石脂之治也。 饒雜與吞酸一類。張路玉曰。皆由肝氣不舒。相火乘及脾胃。治法不必用伐肝之劑。以六君子湯補脾運痰。火盛作酸者。用吳萸川連。 六鬱者。氣鬱濕鬱痰鬱熱鬱血鬱食鬱也。滑伯仁曰。氣鬱者。胸脇痛。濕鬱者。關節痛。周身疼。遇陰寒則發。痰鬱者。動則氣喘。寸口脈沉滑。熱鬱者。昏瞶小便赤。脈沉數。四肢無力。能食。食鬱者。噯酸。腹飽不能食。左寸脈和平。右寸脈緊甚。 五鬱者。五行之鬱也。趙養葵曰。東方生木。木者。生生之氣。即火氣也。火附木中。木鬱則火亦鬱。火鬱則土鬱。土鬱則金鬱。金鬱則水鬱。五行相因。自然之理。余用逍遙散一方。治木鬱而諸鬱皆愈。古方逍遙散。柴胡薄荷當歸白芍陳皮甘草白朮。扶神。其加味者。則丹皮山梔。余以山梔屈曲下行泄水。改用吳萸炒連。即左金丸。黃連清心火。吳萸氣燥。肝氣亦燥。同氣相求。以平肝木。木平則不生心火。火不刑金而金能制木。不直伐木而佐金以制木。此左金所以得名也。繼用六味地黃加柴胡白芍以滋腎水。俾能生木。逍遙散。風以散之也。地黃飲。雨以潤之也。凡熱寒往來。惡寒惡熱。嘔吐吞酸。饒雜。胸痛脇痛。少腹膨脹。頭眩盜汗。疝氣。飧泄等證。皆

對證之方。倘一服即愈。少頃復發。或頻發而愈甚。此必下寒上熱之假證。此湯不可復投。當改用溫補之劑。

怔忡之證。心胸築築振動。惶惶惕惕。無時得安者是也。歸脾湯爲要藥。

離魂病。身形作兩並臥。不辨真假。不語問亦無答。有人病此。用人參、硃砂、茯苓濃煎服。真者氣爽。假者即化。

五癰分五臟見證。錢仲陽曰。反折上竄。其聲如犬。證屬肝也。目瞪吐舌。其聲如羊。證屬心也。目直腹痛。其聲如牛。證屬脾也。驚跳反折手縱。其聲如雞。證屬肺也。肢體如尸。口吐涎沫。其聲如猪。證屬腎也。一說有馬癰而無大癰。馬癰者。但走不得眠。其狀如馬者是也。有人患此。醫用阜莢丸而愈。又按薛立齋曰。癰證當滋腎以生肝血。則風自熄而痰自消。治分虛實天淵。不可不辨。

癲狂之證。昔人以爲陽併於陰。陰併於陽。即內經重陰重陽之義。狂則少臥不眠。妄言妄笑。甚則上屋踰牆。其候多躁而常醒。實者用內經生鐵落飲。及白虎承氣。虛者壯水以制火。癲則或歌或笑。如醉如痴。甚則不知穢潔。其候多靜而常昏。實者用滾痰丸。清心丸。虛者當養神而通志。

驚恐二證。有輕重之分。張景岳曰。因病而驚者。當察客邪以兼治其標。因驚而病者。宜安養心神。滋培肝膽。專以扶元為主。恐之傷人。尤甚於驚。甚則心怯而神傷。精卻則陰痿。日消月縮。不亡不已。非大勇大斷。必不能拔去其根。室晦之證。即左傳所謂晦淫惑疾也。喻嘉言曰。吾鄉熊仲舒幼男。髫齡患一奇證。飲食如常。但脈細神呆。色天氣奪。左傳所謂近女室晦。即是此病。彼因近女。又遭室晦。故不可為。今受室晦之疾而未近女。是可為也。乃依治楊季登女病邪祟例。用犀角羚羊角龍齒虎威骨牡蠣粉鹿角霜人參黃耆羊肉等。少加牛黃丸。服旬日而安。臟燥之證。婦人病也。喜悲傷欲哭。像如神靈所作。數欠伸。金匱用甘草小麥大棗。名甘麥大棗湯。方後註云。善補脾氣。則知是方不獨為女科設也。遺滑之證。有夢屬心。妙香散主之。無夢屬腎。固精丸主之。脾胃濕熱。猪膽丸主之。妙香散用人參一兩黃耆一兩山藥二兩薑汁炒遠志一兩茯苓一兩茯神一兩。所以補其正。丹砂二錢麝香二錢。所以解其邪。木香二錢炙甘草二錢。交和於中。桔梗二錢。載引於上。使正氣旺而邪惑不侵。則遺泄可愈矣。右為末。空酒下。二錢。又考王荊公方。於本方中去黃耆山藥二香。加益智仁二兩五花龍骨二兩。則稍兼固濇之意。

也。是方亦治驚悸鬱結。固精丸用鹿茸二具鹿角霜分兩升固督脈。以督脈主一身之陽也。真陽不固。則用陽起石五錢以提之。強陽用事。則用韭菜子五錢以抑之。菴蓉一錢淡五味五錢巴戟肉五錢製附子五錢皆峻補真陽之品。石脂五錢龍骨五錢攔截精竅。茯苓五錢淡滲經氣。使諸藥歸就腎經。以成封固之功也。猪猪丸係劉松石方。用白朮四兩健脾勝濕。白色苦參三兩堅腎去濕。牡蠣四兩鹹寒。清熱止遺。丸以猪猪一具藥為丸。屬水中之土。能厚胃泄水。空朝米飲送下。久服不獨止遺。即勞瘦之人。亦可使之肥也。

腫脹之症。陰陽虛實不同。李士材曰。陽症必熱。熱者多實。陰症必寒。寒者多虛。先脹於內而後腫於外者為實。先腫於外而後脹於內者為虛。小便黃赤。大便秘結者為實。小便清白。大便溏泄者為虛。脈滑數有力者為實。脈浮弦細濇者為虛。色紅氣粗者為實。色悴聲短者為虛。凡實。或六淫外客。或飲食內傷。陽邪急速。其來必暴。每成於數日之間。凡虛。或情志多勞。或酒色過度。日積月累。其來有漸。每成於經月之後。又曰。經云諸濕腫滿。皆屬於脾。又云其本在腎。其標在肺。皆聚水也。又云腎者主水。胃之關也。關門不利。故聚水而從其類也。腫脹之病。諸經雖有。無

不由於脾肺腎者。脾主運行。肺主氣化。腎主五液。凡五氣所化之液。悉屬於腎。五液所行之氣。悉屬於肺。轉輸二臟以制水生金者。悉屬於脾。故腫脹不外此三經也。治法分內外上下虛實。不可不辨。在外則腫。越婢湯。小青龍湯。症也。在內則脹。十棗丸。神祐丸。症也。在上則喘。葶藶大棗湯。防己椒目葶藶大黃丸。症也。在下則小便閉。沉香琥珀丸。疏鑿飲子。症也。此皆治實之法。若夫虛者。實脾飲。腎氣丸。方加牛膝車前生。為治腫要方。症也。王節齋曰。喘與脹二症相因。必皆小便不利。喘則必生脹。脹則必生喘。先喘而後脹者。治在肺。先脹而後喘者。治在脾。喻嘉言曰。凡禽畜之類。有肺者有尿。無肺者無尿。肺壅而小便不行。以清肺為急。按脹症氣分不治。宜治血絡。久病必入絡也。葉天士治一徐姓小兒。單腹脹數月。幼科百治無功。僉用肥兒丸等。俱不驗效。乃用歸鬚桃仁延胡山甲蟪螳蟣蟲五靈脂山查之類。為丸。十日全愈。婦人病腫。尤宜分別水分血分。金匱云。先腫而後經斷者。為水分。先斷經而後腫者。為血分。古方載腫脹五不治。唇黑傷肝。缺盆平傷心。臍出傷脾。背平傷肺。足底平滿傷腎。消渴分三種。許叔微曰。一者渴而飲水多。小便數。脂似麩片。甜者。消渴病也。二者。

喫食多。不甚渴。小便少。似有油而數者。中消病也。三者渴飲水。不能多便。腿腫。脚先瘦小。陽痿弱。小便數。此腎消症也。按仲景腎氣丸爲治腎消之要藥。或有不
宜於桂附者。可用六味湯。喻氏載鄧橘存治傷熱消渴。堅令服一千劑而愈。又考
葉天士治消渴。於六味湯中加牛膝車前。導引腎肝。可謂善用古方。許叔微神
效散。用海浮石蛤粉蟬退爲散。鯽魚膽七個調服。亦治消渴之良方也。
黃疸之症。有表裏虛實之分。趙羽皇曰。經云。中央色黃。入通於脾。外主肌肉。上應
濕化。今太陰濕氣熾盛。濕滯熱蒸。鬱而不發。如蠶麴相似。遂成黃疸。治法有汗下
之分。補瀉之異焉。今人但用平胃五苓茵陳湯之類。清熱滲利之外。並無他說。雖
然。其濕熱之盛於腸胃者。或可攻之。若鬱於皮膚之間。而不得發越。過用疎利。則
濕熱反內陷而不得出。仲景治身熱發黃。有麻黃連翹赤小豆湯。無非急解其表。
令熱邪自外而散。方書止知可降而不知可升者。非理也。至於素患脾虛。寒涼過
甚。或小便清白而大便微澹。力倦神疲而脈細少氣。皆太陰脾氣極虛。而真色外
見之候。惟用補中益氣湯。略加車前牛膝一二味。濕勝者。連理湯尤宜。今人一遇
此症。不問其孰實孰虛。在表在裏。概用寒涼通劑。詎知脾胃虛者不宜寒。寒之則

中氣愈敗。脾胃弱者不宜降。降之則下多亡陰。或攻或補。或升或降。總在隨症變通。黃疸變黑爲女勞疸。用消石礬石散。消石卽芒硝之底沉凝者。性急下趨。苦鹹入血。散血消瘀。礬石燒礬一用酸寒。除錮熱在骨髓。二味等分爲散。用大麥汁和服。方寸匕。此用急奪下焦之瘀血。乃死裏求生之治也。又羅謙甫治陰黃。於四逆湯中加茵陳。名茵陳四逆湯。痰與飲不同。柯韻伯曰。痰飲之本皆水也。經云。飲食入胃。游溢精氣。上輸於脾。此自陽入陰也。脾氣散精。上歸於肺。此地氣上升也。通調水道。下輸膀胱。此天氣下降也。水精四布。五經並行。是水入於經而血乃成也。若陰陽不和。清濁相干。胃氣亂於中。脾氣艱於升。肺氣滯於降。而痰飲隨作矣。痰與飲同源。而有陰陽之別。陽盛陰虛。則水氣凝而爲痰。陰盛陽虛。則水氣溢而爲飲。除痰者。降氣清火。是治其標。補陰利水。是治其本也。滌飲者。降氣燥濕。是治其標。溫腎利水。是治其本也。按治飲有中下之分。如金匱所云苓桂朮甘湯主之。腎氣丸亦主之。是也。治飲有脾胃之分。如金匱小半夏湯。小半夏加茯苓湯。二方治胃。外臺茯苓飲治脾。是也。治飲有內外之分。如仲景小青龍治外飲。真武治內飲。是也。

頭痛一症。須分三陽及厥陰治之。外風內風。陽虛火鬱。無不有之。最宜詳審。

頭風有偏正之分。偏者主乎少陽。或補或瀉。總以柴胡爲要。傷及肝陰者。鹹涼柔鎮。正者有氣虛血虛。痰厥腎厥。陰傷陽浮。火亢邪風之不同。

眩暈一症。乃肝膽風陽上冒。非外風也。火盛者。用羚羊山梔連翹花粉元參鮮生地丹皮桑葉。以清泄上焦絡熱。此先從膽治也。痰多必理陽明。消痰如竹瀝薑汁菖蒲橘紅二陳湯之類。中虛必用人參。外臺茯苓飲是也。下虛必從肝治。補腎滋肝。育陰潛陽。鎮攝之治是也。至於天麻鉤藤菊花之屬。皆係熄風之品。隨症加入可也。

厥巔之疾。氣與血俱逆於高巔。故動輒暈去。婦人爲多。喻嘉言治吳添官母。以代赭龍膽蘆薈黃連。降其上逆之氣。以蜀漆丹皮赤芍。行其上鬱之血。以牡蠣龍骨五味。斂其浮游之神。最要在每劑藥中。入生豬膽汁二枚。蓋以少陽熱熾。膽汁必乾。取同類相求之義也。

面痛有虛實之分。張路玉曰。面爲陽明部分。而陽維起於諸陽之會。皆在於面。故面痛皆屬於火。暴痛多實。久痛多虛。高者抑之。鬱者開之。血熱者涼之。氣虛者補

之。

目疾初起。最要分別風寒風火。內障之症。因頭風致變者多。須從內風主治。不可過用風藥。耳中之症。體虛失聰。責在心腎。邪干竅閉。責在膽經。以腎開竅於耳。心寄竅於耳。膽絡脈附於耳也。

鼻中之病。手太陰手陽明主病。經又云。膽移熱於腦。令人辛額鼻淵。芷辛散統治鼻病。以白芷一兩散陽明之風。辛夷仁五兩散太陰之風。蒼耳仁二錢去皮散顛腦之風。並能去腐止淵。薄荷葉二錢氣味俱輕。能上行至高之分。為散每服一錢。葱白湯及茶清湯服。服之不效。亦宜參用治本之法。

齒痛在胃為熱。清胃散主之。在腎為虛。石刻安腎丸主之。若有外邪壅遏者。辛溫散寒。辛涼泄上之法。亦不可廢。

瘰癧婦女為多。不可輕用散堅追毒之劑。外臺祕要曰。肝腎虛熱則生瘰矣。一方用前胡兩半。川貝一兩。元參二兩。大力子二兩。黃芩兩半。昆布一兩。海藻一兩。紫背天葵一兩。夏枯草二兩。煎湯泛丸。每服三錢有效。若久潰。脈浮大。邪火盛也。面色眊白。金尅木也。皆不治。若赤脈貫瞳子。有幾條。則幾年死。

肩背作痛。手太陰足陽明爲病。肺朝百脈。肺病則不能管束一身。故肺愈爲病。卽肩背作痛。又背爲陽明之府。陽明有虧。不能束筋骨而利機關。卽肩垂背曲。若外邪爲患。當從太陽經治。衝氣上攻。當從少陰經治。

臂痛分六道。李東垣曰。以兩手仰直垂下。大指居前。小指居後而定之。臂臑之前廉痛者屬陽明。升麻白芷乾葛爲引經。後廉屬太陽。藁本羌活爲引經。外廉屬少陽。柴胡連翹爲引經。內廉屬厥陰。柴胡當歸爲引經。內前廉屬太陰。升麻白芷葱白爲引經。內後廉屬少陰。細辛當歸爲引經。

胸痺之症。人所通患。喻嘉言曰。胸中如離照當空。曠然無外。地氣一上。則窒塞有加。仲景用括蕒之潤以豁痰。薤白之滑以利竅。使以白酒。淡而不滯。引藥上行。以解散窒塞之邪。重者用附子乾薑。切不可任用香燥。

心痛有五。初學記曰。五臟失治。皆爲心痛。刺治分經。理甚明析。至若舍針用藥。尤宜審此詳義。蓋腎心痛者。多由寒邪上衝。故善癢。如從後觸其心。胃心痛者。多由停滯。故胸腹脹滿。脾心痛者。多由寒逆中焦。故其病甚。肝心痛者。多由木火之鬱。病在血分。故色蒼蒼如死狀。肺心痛者。多由上焦不清。病在氣分。故動作則痛益

甚。若知其氣則順之。在血則行之。鬱則開之。滯則逐之。火多實則或散或清之。寒多虛則或溫或補之。必真心痛者乃不可治。腹痛一症。分無形有形。無形爲患。如寒凝火鬱。氣阻營虛。及夏秋暑濕痧穢之類。有形爲患。如畜血食滯癥瘕。蛇蟻內疝。及平素偏好成積之類。審其痛勢之高下。色脈之衰旺。細究其因。確從何起。大抵在臟者。以肝脾腎爲主。在腑者。以腸胃爲主。

脇痛有左右之分。左脇作痛。專主厥陰肝經。右脇乘肺乘脾俱有。或泄木以安土。或清金以平木。左金丸用黃連爲君。六兩薑汁炒以直瀉其子。吳茱萸一兩鹽水一兩氣燥。與肝同氣相求。故必用以爲佐。金鈴子散用金鈴子去核泄肝家氣分之熱。延胡索兩一泄肝家血分之熱。雪羹用荸薺四個以散結。海蛇漂淨一兩以潛陽。三者俱爲要方。若血絡受傷。又當從事於仲景旋覆花湯之治矣。腰痛一症。腎爲主治。腰者腎之腑也。腎與膀胱爲表裏。在外爲太陽。在內屬少陰。又爲衝任督帶之要會。有內因外因不內外因之別。仲景腎著湯用乾薑炮辛熱以燥濕。白朮炒苦溫以勝濕。茯苓甘淡以滲濕。甘草和中而補土。腎病而皆用

脾藥。益土即所以制水也。有寒者加附子。或加肉桂澤瀉杜仲牛膝。積聚之症。越人以積者陰氣。五臟所生。聚者陽氣。六腑所成。巢氏以不動爲癥。動者爲瘕。亦即積聚之意。大凡屬腑屬臟。以經脈所過部分別之。又初病氣結在經。久病血傷入絡。用藥須於辛香之中。加入蠕動之品。透鬆病根。方能有效。疝症之因。不外乎寒。故仲景獨以寒疝立名。其所製當歸生薑羊肉湯三味以名其方亦爲產後下等方。惟以祛散寒邪。調養補虛爲事。並不雜入氣分之藥。又子和歷詳筋疝水疝狐疝癰疝氣疝血疝寒疝七者之名。總以辛香流氣爲主。蟲有五種。許叔微曰。千金謂勞則生熱。熱則生火。心蟲曰蚘。脾蟲寸白。腎蟲如截絲縷。肝蟲如爛杏。肺蟲如蠶。五蟲皆能傷人。惟肺蟲爲急。肺蟲居肺葉之內。蝕人肺系。故成癆疾。咳血聲嘶。藥所不到。治之爲難。有人說道藏中載諸蟲皆頭向下行。惟自初一至初五以前頭上行。故用藥多取月朏以前。蓋謂是也。淋濁二症。痛者爲淋。不痛者爲濁。淋有氣血砂膏勞五者之殊。氣淋爲病。小便澀滯。常有餘瀝下盡。血淋爲病。遇熱即發。甚則溺血。痛者爲血淋。不痛者爲尿血。砂淋爲病。陰莖中有砂石而痛。砂出痛止是也。膏淋爲病。溺出如膏。敗精結者爲砂。

精結散者爲膏。又煮海爲鹽之義。勞淋遇勞卽發。通淋通瘀。虎杖湯爲要方。濁有赤濁白濁之分。戴元禮曰。赤濁屬血。由心小腸火也。白濁屬氣。由肺大腸金也。葉天士又發明便濁精濁之治。便濁用萆薢分清飲等。精濁傷及督任。必用升固八脈之氣。

腿痛亦分六經。李東垣曰。前廉爲陽明。白芷升麻葛根爲引經。後廉爲太陽。羌活防風爲引經。外廉屬少陽。柴胡羌活爲引經。內廉爲厥陰。青皮吳萸爲引經。內前廉爲太陰。蒼朮白芍爲引經。內後廉爲少陰。獨活澤瀉爲引經。痛有血虛血寒寒濕風濕濕熱流注。陰虛陽虛腎虛風襲之殊。

足痛一症。外感者。惟寒濕濕熱風濕之流經入絡。經云。傷於涼者。下先受之。當以治濕爲主。其間佐溫佐清佐散。隨症以製方。內傷則不外肝脾腎三者之虛。或補中。或填下。或養肝。隨症以施治。喻嘉言論足上麻木。有熱極似寒之症。如夏月之反雨冰雹也。宜以竹瀝等清絡爲主。

醫學舉要卷三 雜證合論

醫學舉要

清 南匯 徐 鏞 玉臺輯述

鄞縣 曹赤電 炳章圈點

卷四

治法合論

肺爲嬌臟而朝百脈。主一身元氣。形寒飲冷則傷肺。火熱刑金亦傷肺。傷陽傷陰。最當詳辨。痺論云。淫氣喘息。痺聚在肺。肺位至高。六氣著人。肺先受之。治肺爲急。用藥最貴輕清。其腑爲大腸。位居於下。通腑之法。又不可不講也。心爲神明之主。經云。損其心者。調其營衛。而營衛之調。亦分陰陽。桂枝加龍骨牡蠣等湯。補心之陽也。養心湯。補心之神也。仲景瀉心諸湯。雖曰瀉心。實則瀉胃。瀉其子也。其腑爲小腸。位居於下。通腑之法。又不可不講也。包絡繫心。亦爲一臟。熱邪塞竅。牛黃丸至寶丹。最能通絡。又考趙以德論金匱苓

桂朮甘湯之治。亦本靈樞包絡脈動主議。則知熱痰宜涼。寒飲宜溫。又當分別三焦。亦爲一臟。其實上中下三者。分管臟腑。最當詳辨。葉天士曰。仲景傷寒。分配六經。河間溫暑。專究三焦。故柯韻伯論陽明三症。亦主三焦分治。熱在上焦。用梔子豉湯吐之。上焦得通。津液得下。胃家不實矣。熱在中焦。用白虎湯清之。胃火得清。胃家不實矣。熱在下焦。用猪苓湯主之。火從下泄。胃家不實矣。若雜症之分三焦。亦有其要。王叔和曰。假令病人聞穀氣臭者。病爲在上焦。假令病人少多爲欲食。不食亦可。病爲在中焦。假令病人飲食如故。病爲在下焦。脾胃同處中州。亦宜分別治之。滑伯仁曰。劉河間謂補瀉脾胃之本者。蓋以脾胃中和之氣也。燥其濕則爲瀉。潤其燥則爲補。喻嘉言曰。補虛有二法。一補脾。一補胃。如瘧痢後脾氣衰弱。飲食不運。宜補其脾。如傷寒後胃中津液久耗。宜補其胃。葉天士曰。納食主胃。運化主脾。脾宜升則健。胃宜降則和。又曰。太陰濕土。得陽始運。陽明陽土。得陰自安。仲景急下存陰。其治在胃。東垣大升陽氣。其治在脾。肝爲剛臟。有瀉無補。然四時之所化。始於木。究十二經之所養。始於肝。肝尤不可不養。肝之治有數種。水虛而木無以生。地黃丸乙癸同源是也。土虛而木無以植。

參苓白朮散緩肝培土是也。本經血虛有火。用逍遙散清火。血虛無水。用歸脾湯養陰。瀉火之治。上類乎心。補火之法。下同乎腎。其腑爲膽。瀉腑之法。則柴胡溫膽爲要方矣。

腎爲先天之本。有補無瀉。故仲陽獨有六味丸補腎。而無瀉腎之方。然左爲腎。右爲命門。水火得其正。則爲精爲氣。水火失其和。則爲熱爲寒。水中不可無火。無火則陰勝而寒病生。火中不可無水。無水則陽勝而熱病起。如水虧陰虛。只宜大補真陰。切不可再伐陽氣。火弱陽虛。只宜大補元陽。切不可再傷陰氣。其腑爲膀胱。外應皮毛。協營衛而主一身之表。臟氣足則腑不受邪矣。

奇經不可不究。李瀕湖曰。陽維起於諸陽之會。由外踝上行於衛分。陰維起於諸陰之交。由內踝上行於營分。所以爲一身之綱維也。陽蹻起於跟中。循外踝上行於身之左右。陰蹻起於跟中。循內踝上行於身之左右。所以使機關之蹻捷也。督脈起於會陰。循背而行於身之後。爲陽脈之總督。故曰陽脈之海。任脈起於會陰。循腹而行於身之前。爲陰脈之承任。故曰陰脈之海。衝脈起於會陰。挾臍而行。直衝於上。爲諸脈之衝要。故曰十二經脈之海。帶脈則橫圍於腰。狀如束帶。所以總

約諸脈者也。是故陽維主一身之表。陰維主一身之裏。以乾坤言也。陽蹻主一身左右之陽。陰蹻主一身左右之陰。以東西言也。督脈主身後之陽。任脈主身前之陰。以南北言也。帶脈橫束諸脈。以六合言也。喻嘉言曰。奇經所主。雖不同正經之症。其關於營衛則一也。葉天士曰。凡衝氣攻痛。從背而上者。係督脈主病。治在少陰。從腹而上者。係衝任主病。治在厥陰。或填補陽明。

絡脈不可不究。以初病在經。久病在絡也。喻嘉言曰。經有十二。絡亦有十二。絡者。兜絡之義。卽十二經之外城也。復有胃之大絡。脾之大絡。及奇絡之大絡。則又外城之通界。皇都出入之總途也。故又曰。絡有十五焉。十二經生十二絡。十二絡生一百八十系絡。系絡生一百八十纏絡。纏絡生三萬四千孫絡。自內而生出者。愈多則愈小。稍大者在俞穴肌肉間。營氣所主外廓。由是出諸皮毛。方爲小絡。表症汗之。此其常也。而亦有先宜於補者。許叔微治鄉人邱生病。傷寒發熱。頭痛煩渴。脈雖浮數而無力。尺以下遲而弱。許曰。此雖麻黃症。而尺遲弱。仲景云。尺中遲者。營氣不足。氣血微少。未可發汗。於是於建中湯內加當歸黃耆合飲。翌日脈尙爾。其家煎迫日夜促發汗藥。幾不遜矣。許忍之。但用建中調營而已。至五日尺

部方應。遂授麻黃湯。啜第二服。發狂須臾少定。略睡已中汗矣。信知此事誠難。仲景雖云。不避晨夜。卽宜便治。醫者亦須顧其表裏虛實。待其時日。若不循次第。暫時得安。虧損五臟。以促壽限。何足貴也。

重症緩治。用法之詳審也。而有不得不急者。喻嘉言治朱孔陽年二十五歲。形體清瘦。素向安逸。夏月因構訟。奔走日中。濕熱合內鬱之火。而成痢疾。晝夜一二百次。不能起床。以粗紙鋪於褥上。頻頻易置。但進水而不能食。其痛甚厲。肛門如火烙。揚手擲足。躁擾無奈。喻診其脈。弦緊勁急。不爲指撓。謂曰。此症一團毒火。蘊結於腸胃之間。其勢如焚。救焚須在頃刻。若二三日外。腸胃朽腐矣。於是以大黃四兩。黃連甘草各二兩。入砂鍋內煎。隨滾隨服。服下人事稍安片刻。少頃仍然躁擾。一晝夜服至二十餘碗。大黃俱已煎化。黃連甘草俱至無汁。次日病者再求前藥。喻診畢。見脈勢稍柔。知病可愈。但用急法。不用急藥。遂改用生地麥冬各四兩。另研生汁。而以花粉丹皮赤芍甘草各一兩。煎成和汁大碗嚥之。以其來勢暴烈。一身津液。從之奔竭。待下痢止。然後生津養血。則枯槁難回。今脈勢既減。則火邪俱退。不治痢而痢自止。豈可泥潤滯之藥而不急用乎。服此果然下痢盡止。但遺些

少氣沫耳。緩緩調至旬餘。方能進穀。治熱邪急症。豈可無此急法耶。

暑熱當令而發者易辨。而伏暑之症。至冬月而發者。尤不可不辨。吳茱山治一婦人。冬月感病。洒洒惡寒。翕翕發熱。惡食乾嘔。大便欲去不去。諸醫皆以虛弱痰飲。治以二陳補心等藥不效。延及半月。吳診其脈。虛而無力。類乎傷暑。衆不然也。究問病因。其婦曰。因天寒換著綿衣。取綿套一床蓋之。須臾煩渴。寒熱嘔吐。延綿至今耳。吳曰。誠哉傷暑也。蓋綿套晒於盛暑。夾熱收入笥中。必有暑氣。尙未開泄。今人體虛。得之易入。故病如是。其婦曰然。遂製黃連香薷飲二服而愈。

凡病在危急。必得出奇制勝。方能速愈。李瀕湖治外甥柳喬。素多酒色病。下極脹痛。二便不通。不能坐臥。立哭呻吟者七晝夜。用通利藥不效。遣人叩李。李曰。此乃濕熱之邪。在精竅道。壅脹隧路。病不在大腸膀胱。而在二陰之間。故前阻小便。後阻大便。乃用棟實茴香穿山甲諸藥。入牽牛加倍煎服。一服而減。三服而平。喻嘉言治葉茂卿。乃郎出痘。未大成漿。其殼甚薄。兩月後尙有著肉不脫者。一夕腹痛。大叫而絕。喻用梨汁入溫湯灌之立甦。頃復痛絕。灌之又甦。遂以黃芩二兩煎湯和梨汁與服。痛止。令製膏子藥頻服。不聽。其後忽肚大無倫。一夕痛叫。小腸突出。

臍外五寸。交鈕各二寸半。如竹節壺頂狀。莖物交摺長七八寸。明亮如燈籠。外症從來未經聞見。喻知其爲肺熱而氣壅不行。仍爲治之。以黃芩阿膠二味。清肺之熱。潤肺之燥。日進十餘劑。三日後始得小水。五日後水道清利。臍收腫縮而全愈。凡病至延久。藥初投之而效。繼投之而不效者。必求其本而治之。柯韻伯治孫介夫春間病咯血。旋愈旋作。初服芩連而愈。繼而寒涼不效。更進參耆而愈。後用溫補不效。復用寒涼而又不效。因而就商於柯。柯曰。斯未求其本耳。諸寒之而熱者。取諸陰。所謂求其屬也。君病陰虛而陽盛。以寒藥治之。陽少衰。故病少愈耳。復進寒涼而陽亦虛。得溫補而病少愈耳。再進溫補而陰愈虛。復進寒涼而陰陽俱虛。故連綿而不解耳。豈知臟腑之源。有寒熱溫涼之主哉。必壯水之主。以制陽光。方爲合法。因立加減腎氣丸一劑。而喘嗽安。再劑而神氣爽。膏粱多虛。藜藿多實。此其常也。而亦有異焉者。富貴之人。讀書明理。不乏修身養性者。且富貴有二種。創業之富貴。多由艱難困頓而成。血脈筋骨充實。至一再傳之後。則專事養安佚而已。貧賤之人。飢餓勞役。最多內傷症。憂愁困苦。最多七情症。且貧賤有二種。生而貧賤者。其心安。終貧賤而其始本不貧賤者。其心不安。

素問脫營失精二義不可不知。

南北之說亦不可拘。王節齋曰。李東垣北醫也。羅謙甫得其法以聞於浙。朱丹溪南醫也。劉宗厚世其學以鳴於陝西。方中行曰。東南之人何嘗不病其東南之風寒。西北之人豈可不病其西北之暑濕。

設有人焉。正已奪而邪方盛者。將顧其正而補之乎。抑先其邪而攻之乎。見有不到的。則死生係之。此其所以宜慎也。夫正者本也。邪者標也。若正氣既虛。則邪氣雖盛。亦不可攻。蓋恐邪未去而正先脫。呼吸變生。則措手無及。故治虛邪者。當先顧正氣。正氣存則不至於害。且補中自有攻意。蓋補陰即所以攻熱。補陽即所以攻寒。世未有正氣復而邪不退者。亦未有正氣竭而命不傾者。如必不得已。亦當酌量緩急。暫從權宜。從少從多。寓戰於守。斯可矣。此治虛之道也。若正氣無損者。邪氣雖微。自不宜補。蓋補之則恐正無與而邪反盛。適足以藉寇兵而資盜糧。故治實症者。當直去其邪。邪去則身安。但法貴專精。便臻速效。此治實之道也。要之能勝攻者。方是實症。實者可攻。何慮之有。不能勝攻者。便是虛症。氣去不返。可不寒心。此邪正之本末。有不可不知也。惟是假虛之症不多見。假實之症最多也。假寒

之症不難治。而假熱之治多誤也。然實者多熱。虛者多寒。如丹溪曰。氣有餘便是火。故實能受寒。而余續之曰。氣不足便是虛。故虛能受熱。世有不明真假虛實。而曰知醫者。則未敢許也。

邪氣盛則實。精氣奪則虛。二句爲治病之大綱。其詞似顯。其義甚微。最當詳辨。而辨之有最難者何也。蓋實言邪氣。實宜瀉也。虛言正氣。虛宜補也。凡邪正相搏而爲病。則邪實正虛。皆可言也。故主瀉者則曰邪盛則實。當瀉也。主補者則曰精奪則虛。當補也。各執一白。茫無定見。藉口文飾。孰得言非。是以至精之訓。反釀莫大之害。不知理之所在。有不可移易者。奈時醫不能察耳。余請析此爲四。曰孰緩孰急。其有其無也。所謂緩急者。察虛實之緩急也。無虛者急在邪氣。去之不速。留則生變也。多虛者急在正氣。培之不早。臨期無濟也。甚虛甚實者。亦治其實。可一掃而除也。微虛微實者。所畏在虛。但固守根本。先爲已之不可勝。則邪無不退也。二虛一實者。兼其實。開其一面也。二實一虛者。兼其虛。防生不測也。總之。實而誤補。固必增邪。猶可解救。其禍小。虛而誤攻。真氣忽去。莫可挽回。其禍大。虛實之緩急。不可不察也。所謂有無者。察邪氣之有無也。凡風寒暑濕燥火。皆能增邪。邪之在

表在裏。在腑在臟。必有所居。求得其本。則直取之。此所謂有。有則邪之實也。若無六氣之邪。而病出三陰。則皆情欲以內傷。勞倦以傷外。非邪似邪。非實似實。此所謂無。無則病在元氣也。不明緩急。有無四義。必至以逆爲從。以標作本。絕人長命。損德多矣。可不懼且慎哉。

醫學舉要

清 南匯 徐 鏞玉臺輯述

鄞縣 曹赤電炳章圈點

卷五

古今方補註

白虎加桂枝湯方仲景

溫痺二瘧。但熱不寒。治須清降。桂枝調和營衛。金匱用於白虎湯中。引領熱邪仍從外泄。用之恰當。二進必愈。然此乃邪發於手太陰肺經。故可頃刻致和而瘧已。若熱氣深伏。陰虛內熱而病涉足少陰。又當參鼈甲首烏養陰之例。

蒼朮白虎湯

濕溫之症。暑濕相搏。其脈陽濡而弱。陰小而急。其症頭項多汗。兩足逆冷。譫語。若視爲虛寒而投以溫補。誤之甚矣。白虎湯爲治暑熱之正劑。加蒼朮以治其濕。暑

濕兼治。尤爲要方。然恐寒降太過。許叔微治王彥龍。先用人參白虎。繼用蒼朮白虎。是兼顧其中氣也。

玉女煎

景岳方

陽明少陰二經。皆是津液所關。陽明實則火熾而津液涸。少陰虛則水虧而津液亦涸。考兩經合治之方。仲景猪苓湯。養陰而兼利水。景岳玉女煎。養陰而兼清火。蓋白虎湯治陽明而不及少陰。六味地黃湯治少陰而不及陽明。是方石膏清胃。佐知母以泄肺氣。實則瀉其子也。熟地滋腎。佐麥冬以清治節。虛則補其母也。牛膝入絡通經。能交和中下。尤爲八陣中最上之方。

追瘧飲

休瘧飲

何人飲

並景岳方

三方並用。製首烏當歸。以瘧邪既久。無不傷及營血也。追瘧飲用於氣血未甚大衰之候。而少陽半表之邪。尙滯於經。故用柴胡半夏陳皮青皮甘草以和之。休瘧飲用於汗散既多。意專固其元氣。故加人參炒白朮炙草以補之。不特止瘧。且爲善後計也。何人飲則於補虛之中。又兼去寒。故加人參以補中。邪用陳皮以和中。生薑以溫中也。三方並用。陰陽水煎。露一宿。次早清晨服。

柴芩煎景岳方

此方治表邪未解。內外皆熱。暑瘧煩渴。協熱下利。水畜發黃等證。柴胡散表邪。黃芩梔子清裏熱。枳殼快氣以調和表裏。澤瀉木通滲濕以通利三焦。凡喜冷氣壯脈象滑數者。並宜用之。如瘧痢並行。鮮血純血者。加白芍甘草。濕勝氣陷者。加防風。若營虛不能作汗者。又當參合歸柴煎之例。而加當歸炙草矣。

清燥湯東垣方

燥與濕相反。此方多用去濕之品。而特以清燥名者。蓋取清肅肺金之義。肺為辛金主氣。大腸為庚金主津。今為濕熱之邪所困。則腎水生化之源絕。而痿躄喘渴之症作。是方用人參三分黃耆錢半茯苓三分白朮一錢蒼朮一錢陳皮五分甘草二分補土以生金。麥冬二分五味子九粒保金而生水。黃連一分黃柏二分當歸二分生地二分瀉火滋陰。猪苓二分澤瀉五分升麻三分柴胡三分升清降濁。使治節有權。則水出高原而諸症自愈。是方重在濕熱。故不用潤劑。與喻氏清燥救肺。各成一格也。

清燥救肺湯喻嘉言方

喻氏補秋燥一門。以正四時。以備六氣。可謂發前人之所未發。但燥氣傷人。必由陰分先虛。非比風寒暑濕。由於外感者多。所製清燥救肺湯。治諸氣膈鬱。諸痿喘嘔之症。純以生津保肺立法。并不雜入外感之藥。石膏二錢半。清肺中之熱。麥冬一錢。滋肺中之陰。阿膠真者八分。補肺中之血。佐胡麻炒一錢。滑以利竅。人參七分。補肺中之氣。佐杏仁去皮尖炒八分。苦以豁痰。經霜桑葉三錢。枇杷葉一片。去輕清涼泄。復用甘草一錢以和之。統論全方。清金平木。以制亢逆之火。補胃生肺。以壯高原之水。名之曰救肺。涼而能補之謂也。痰多加貝母瓜蘆。血枯加生地。熱甚加犀角羚羊角牛黃。泄鬱不用辛香。清熱不用苦寒。凡治燥症之權衡。已畢具於此矣。

星附散

中風之症。手足躄曳者。因虛風寒痰阻遏脾中陽氣而然也。夫既曰虛風。則必忌用治風之藥。曰寒痰。則必遍舉燥痰之藥。方中南星製。僵蠶炒。川烏製。黑附白附。皆辛熱之品。人參茯苓半夏製。則調養正氣者矣。每藥止用二分。煎成熱服。以助脾中之陽。此寓發散於不發散之中也。

烏頭粥

本事方

此治風淫末疾。痺在手足者也。用香熟白晚米二合。入薑製川烏末四錢。以砂礮煮作稀粥。入生薑自然汁一匙。白蜜三匙。攪勻空心溫啜之。從營衛所生之地注力。故合穀味。如中濕多。再加薏苡仁三錢。凡半身不遂。腫痛不能舉者。服此預防之。

保陰煎汪續功方

此方治虛勞。名曰保陰者。以虛勞未有不因於陰虛也。方中二地壯水爲君。二冬清金爲臣。龍眼悅脾而生金。制水。玉竹潤肺而益腎養肝。陰不足者補之以味。人乳龜板血肉之品。滋燥益陰。復佐以茯苓山藥。調和脾胃。使無陰柔偏勝之虞。牛膝引藥下行。石斛煎湯代水。使虛羸之體。得以充血生津而有所恃。內熱有汗加地骨皮。內熱無汗加牡丹皮。腰痛加枸杞杜仲。或加猪腰猪脊髓。盜汗加棗仁五味子。怔忡不寐加棗仁。咳嗽加桑白皮枇杷葉百合。有痰加貝母。有血加藕汁童便。食少加薏苡仁。泄瀉去生地天冬。加山茱白芍大棗蓮肉。肺脈按之無力者。宜加人參。

緩肝煎景岳方

此治陰寒疝氣之方。疝屬肝病。而陰寒為虛。故用當歸二錢。三錢。以補真陰之虛。茯苓二錢。以泄經腑之滯。肉桂一錢。二錢。以鎮濁陰。烏藥二錢。利氣而疎邪逆。小茴二錢。沉香一錢。或木香。為疝家本藥。生薑為引。辛以散之。如寒甚者。吳萸附子乾薑亦可加入。

腎氣丸

仲景方

六味地黃丸

錢仲陽方

加味腎氣丸

濟生方

仲景治虛勞痰飲消渴。及婦人轉胞。並用腎氣丸。至崔氏移治脚氣上入。更名八味丸。後人遂為溫補命門之通劑。至錢仲陽治小兒。以體屬純陽。故去桂附。後人遂為峻補真陰之通劑。至濟生方。又於腎氣丸中加牛膝車前。以治水腫。方書或以六味地黃丸為主方。或以加味腎氣丸為金匱腎氣丸。由不明製方之源流也。

左歸丸

景岳方

左歸宗錢仲陽六味丸。減去丹皮者。以丹皮過於動汗。陰虛必多自汗盜汗也。減去茯苓澤瀉者。意在峻補。不宜於淡滲也。方用熟地之補腎為君。八兩。山藥之補脾。四兩。山茱之補肝。四兩。為臣。配以枸杞補精。四兩。川膝補血。三兩。酒洗蒸熟。兔絲補腎中之氣。四兩。鹿膠碎炒。珠龜膠碎炒。補督任之元。雖曰左歸。其實三陰

並補。水火交濟之方也。至於加減之法。如真陰失守。虛火炎上者。去枸杞鹿膠。加女貞麥冬。火燄肺金。乾枯多嗽者。加百合。夜熱骨蒸者。加地骨皮。小水不利不清者。加茯苓。大便燥結者。去兔絲。加肉苁蓉。一切柔潤之品。在所必用。又如氣虛加人參。血虛微滯。加當歸。腰膝痠痛。加杜仲。臟平無火。而腎氣不充。去龜膠。加補骨脂。蓮肉胡桃。宜清宜補。應寒應熱。總在臨症化裁。

右歸丸

景岳方

仲景腎氣丸。意在水中補火。故於羣隊陰藥中。加桂附。而景岳右歸。峻補真陽。方中惟肉桂二兩附子製二兩熟地八兩山藥四兩山茱四兩與腎氣丸同。而亦減去丹皮之辛。澤瀉茯苓之淡滲。枸杞兔絲鹿膠三味。與左歸丸同。去龜膠牛膝之陰柔。加杜仲湯製四兩當歸三兩便溫潤之品。補右腎之元陽。即以培脾胃之生氣也。其加減之法。陽衰氣虛。必加人參。以爲之主。陽虛精滑。或帶濁便溏。加補骨脂。飧泄腎泄不止。加北五味肉豆蔻。飲食減少。或不易化。或嘔吞酸。加乾薑。腹痛不止。加吳茱萸。腰膝痠痛。加胡桃肉。陰虛陽痿。加巴戟肉苁蓉。或加黃狗外腎。與鹿膠同爲血肉之補。誠爲治命火衰微之要劑。

百勞丸

勞瘵積滯。卽世俗所稱乾血勞是也。而於婦女爲多。患此百無一痊。大半都爲藥壞。非破氣卽滋陰。非寒涼卽溫補。俱未中病。故無一效。是方據許州陳大夫云。此仲景所傳。治一切勞瘵積滯。不經藥壞者宜服。則知此爲治勞瘵積滯之第一方。并以知曾經藥壞者服之不效矣。方用乳香一錢沒藥一錢。當歸二錢。護持氣血。是寓守於大黃四錢。桃仁個十四。攻積消滯之中。加人參二錢。戰之意也。煉蜜爲丸。急藥緩投。則不傷於峻也。百勞水杓揚百遍者是。又名甘瀾水。於五更時候。取水下百丸。一片清空之氣。以蕩滌邪穢也。惡物旣下。祇服白粥十日。取淡味以養陰。以示不可驟用補劑也。

祛風丸

潔古方

枸杞白芍地骨皮生地熟地皆補血之品。而加黃耆以固表。枳殼以疏裏。甘草以和中。一派調和營衛。獨防風一味爲風藥。等分蜜丸。而特名爲祛風丸者。以血行風自滅也。

四神丹

東垣方

元參當歸生地。亦皆補血之品。而加羌活之走經散表者於其間。則能消解血分蘊積之風。丸用等分。煎服亦可。是方與前方治癘風者。俱可爲久服之方。取其調和營衛而不傷胃也。

化痰丸

王節齋方

痰因火而逆上。凝結喉間。吐咯難出者。名老痰鬱痰。病在至高之分。非寒非濕。若用辛溫香燥。不特已過病所。抑且以火濟火。是方天冬一兩。黃芩一兩。以清肺。連翹五錢。青黛另研。以清心。蛤粉一兩。芒硝另研。軟堅散結。香附三錢。鹽橘紅一兩。利氣寬胸。薤仁一兩。爲痰嗽所必需。復用桔梗五錢。舟楫之劑。浮而上之。此症根蒂已深。非湯藥所能速愈。故用丸以緩之。用煉蜜少加薑汁以作丸者。藉其辛甘之味。留戀喉間也。

代溫中丸

丹溪小溫中丸。治腫脹之屬於濕熱者。局方禹餘糧丸。治水腫之屬於寒濕者。二方並用針砂。小溫中丸六君子合苦參黃連等。意在補虛以去其濕熱。熱爲標而濕爲本。故以溫中立名。禹餘糧丸。以餘糧蛇黃針砂爲主。輔佐之屬。不外開鬼門

潔淨府去菀陳莖三法。而復以薑桂附之大溫大熱。則通陽祛陰。奏功最捷。不治水而水自逐矣。然二方誠爲腫脹要藥。而一用人參貴重。貧富不便道行。一苦製法浩繁。鄉野不能預備。此代溫中丸之所由設也。方用醋製針砂一兩。性燥重墜。能於胃中平肝邪。尅賊之氣。香附三錢。乾漆灰三錢。一氣一血。複以平胃散健脾燥濕。蒸餅爲丸。湯酒任下。並不雜入寒涼。不失溫中之義。

旋覆花湯 紅藍花酒

皆仲景方

是方仲景治肝著及半產漏下。孫真人千金方亦採之。後世罕用。近時王晉三葉天士改用青葱管理氣。新絳和血。治脇痛等症。開後人治絡法門。而我鄉不審製方之旨。疑新絳爲代紅花。反議用者之好奇。其實紅花與新絳。治分天淵。仲景云。肝著其人常欲蹈其胸上。未先苦時。但欲飲熱。蓋肝邪必由肺家傳來。肝氣著而不行。欲還之肺。故常欲蹈其胸上。用旋覆花者。散結氣以安肺也。其人素有積冷。故先欲飲熱。全用葱之青白。通陽以開積冷也。新絳雖紅藍花染就。而質本繭絲。功能補脾。且內有烏梅黃柏以監制之。則取其和血而非破血。所以婦人寒虛相搏。半產漏下。亦用此方。至若紅花止治血結。仲景另用紅藍花一味。酒煎單服。以

治婦人六十二種風。腹中血氣刺痛。高明之士。盍將仲景書細細繹之。

虎杖湯

本事方

許叔微本事方載此。治婦人諸淋。香巖葉氏云。今世無識此藥。每以土牛膝代之。土牛膝一名地菰。功專消瘀。取其根之鮮者。洗淨搗爛。絞汁大半茶杯。調入麝香乳香各分許。引入至陰之所。隔湯燉熱服之。屢有殊功。不特女科宜用。卽男子通淋通瘀。亦要藥也。煎服治產後便閉及血蠱等症。

生花湯

會稽錢氏方

產後忌用酸寒。故於四物中去白芍。炮薑去血中之寒。凡外受新邪。及內傷積冷。咸宜。桃仁去皮尖生用則能和血。留皮尖炒用則能破血。且地黃生熟異功。亦可隨症施用。大便難者。加肉苁蓉。若虛甚則加人參。又當從補氣生血之例矣。

烏鰂骨丸

內經方

凡病實中有虛。則當於虛處推求。虛中有實。卽當於實處推求。內經此方治血枯之病。而轉用破瘀之藥。以虛中有實也。夫女子而至月事衰少。而或不來。時病出清液。四肢清。目眩。唾血。前後血。而又不能食。氣竭肝傷可知矣。名曰血枯。不亦宜。

乎。據此病形。似當溫補。而其間不得不審察者。因病有新久。胸脇有寬否。不能食有妨礙不妨礙之分。若是暴病。胸脇兼無支滿之苦。投以溫補無疑矣。此則胸脇支滿而妨於食。是厥陰上乘陽明之候。病至則先聞腥臊臭者。腥臊為肝之本氣。病至聞之。不病時則不聞也。原其病因。總是瘀血為患。此非得之一時。良由少年時有所大脫血。若醉入房中。日積月累而致此疾耳。瘀血不去。則新血不生。故名血枯。不同暴崩暴漏。藥宜溫補者也。治以烏鰂骨四分。蘆茹一分。二物并合。有破宿生新之妙。丸以雀卵溫補助陽。服藥五丸而後飯。使其徐行下焦。復飲以鮑魚汁。取其臭穢之味。以利腸垢而和肝傷也。

柳陰地黃丸

本事方

生地二兩 柴胡黃芩秦艽各半兩 赤芍一兩 皆清肝之品。凡師尼寡婦室女。皆獨陰無陽。欲心萌而不遂。是以陰陽交爭。乍寒乍熱。全類溫瘧。久則為勞。其脈弦出寸口。為陰旺思男之候。宜用此方蜜丸。烏梅湯下。斂而抑之。使陰血得平。則寒熱止矣。

六神散

陳無擇方

七味白朮散

錢仲陽方

星附六君子湯

小兒血脈筋骨未充。多虛熱。亦多虛寒。世醫於虛熱症。惑於外感風寒。而不知補中以除熱。於虛寒症。狃於穉年陽體。而不知溫中以逐寒。如病解後發熱不除。與初病發熱不同。乃元氣虛而陽浮於外也。當用六神散固氣收陽之法。如泄瀉作渴。肌表發熱。非感冒也。乃津液少而脾胃虛也。宜用白朮散升清降濁之法。如慢驚嘔吐。痰涎上潮。此是純陰用事而不支也。當用星附六君子湯固正祛邪之法。三者皆以四君為主。一加山藥扁豆。一加木香藿香葛根。一加南星白附子。功堪鼎峙。六神散不合生脈者。治在脾而不關肺也。不合四物者。病在氣而不關血也。六味皆沖和純粹之品。收陽歸內。尤爲神效。白朮散以二香佐四君。因脾喜芳香。補脾之功更捷。以葛根甘寒直走陽明。清陽得升而熱自除矣。至若風痰非南星莫效。寒痰非白附不除。而當寇深之日。有四君以坐鎮其間。此爲有制之師。

醫學舉要卷五 古今方補註

醫學舉要

清 南匯 徐 鏞 玉臺輯述

鄞縣 曹赤電 炳章圈點

卷六

玉臺新案

寒證醫案

發熱惡寒。頭疼身痛之暴證。人易辨之。惟久鬱肺經而成喘嗽。有似陰虛勞嗽者。不可不辨。郡城西門外奚藕莊客幕於外。上年道途受熱。曾患喘嗽。服自便而愈。今復患喘嗽。投自便而加劇。醫亦概用清肺補肺。終不見效。自疑爲陰虛重證。徬徨無措。遂延予診。余爲脈象見緊。似數非數。前患暑熱。故自便可愈。今患寒邪。故反增劇。用小青龍湯而愈。

魏湘舟郡城北門外猛將廟人。瘍醫也。患喘嗽二載。遍試醫人。總不出清肺補肺。

自亦疑爲陰虛勞證。予囑其常服乾薑五味子。堅守一月。果得全效。郡廟道士徐兆奎久患三瘧。堅不服藥。二年方愈。愈後冬月又病傷寒。壯熱頭痛。醫疑冬溫。誤投辛涼之劑。即昏嘿不省人事。醫者以其昏嘿不省。以爲熱邪內陷。束身告辭。其師楊承宗求治於予。予診其脈。虛軟無神。似數非數。亦爲驚惶。但知其瘧後中氣素虧。復傷於寒。非冬溫也。即投溫中之劑。一劑稍甦。二劑方醒。三劑乃安。粥飲日漸增加。但膈中似有冷塊。即於溫中劑內加附子三分。始得平復。調理一月而安。

徽人夏履成年六十有餘。素日無疾。忽於三更時候。氣喘痰升。昏昏嘿嘿。不能自言所苦。余係寓鄰。即來叩門索治。予即往診。見有出氣而無入氣。即投大劑腎氣湯。頃刻氣平而愈。此證若待來朝索治。必致不救。

發斑醫案

發斑初用辛涼。繼用鹹寒。人人知之。而陰斑之證。最不可誤。南匯丞役許龍之子。身熱發斑。有似火證。醫用犀角等化斑套劑。病勢轉危。不省人事。口中歌唱不休。有時譫語。余診其脈。浮越無倫。按之不實。舌絳而潤。並不燥渴。疑是陰證。細詢病

因。其妻言未病時。大叫脚冷。其爲陰證無疑。遂用薑附等藥冷服一劑。夜卽安睡。但元陽喪敗之餘。神疲倦怠者半月。服歸脾湯二十餘劑而愈。

火證醫案

火證清之。此其常也。而有不得不急下者。最當堅決。得勝渡范某。初病卽昏沉。醫用辛散。汗後不解。卽驚惶推諉。余曰。汗之不解。治須下之。前醫曰。下之利不止。奈何。余曰。右關沉實。攻下無虞。用大承氣合涼膈而愈。

南匯本城楊熙宗令郎。病瘧寒熱俱輕。飲食如故。守不服藥之戒。一日自神廟燒香而歸。忽發狂言。似有神靈所作。邀余診視。脈象沉鬱。魄汗淋漓。未能審其果爲熱厥。不敢驟用寒涼。姑用膽星竹瀝與服。服下人事頓清。詢其近日所服何物。曰薑棗湯。日服兩次。視其舌色。面白底絳。唇若塗硃。知爲熱邪無疑。時已三更。余見其病勢稍持。約其明日轉方。天明復來邀診。據述醒時未及三刻。旋又發厥。遂用犀角地黃湯合大承氣。許其大便一行卽愈。奈他醫謂下則必死。病家轉多疑慮。時有張二川係楊內戚。力勸本家定服余方。煎藥已近下午時候。病者牙關緊閉。強將羊角灌入。服至半劑。大便卽解。前恙頓除。

南匯姚裕豐。醫士也。秋月寒熱。雜投藿香正氣香薷飲之類。醫中來問病者。必定一方。其自己亦不能主持矣。其父沛寰。因其病勢危劇。始來邀余。余用急下之劑。前醫交沮。謂此屬不治之證。何用下爲。余坐等其家煎服。大下宿垢。繼服滋補半月而愈。

治脈伏醫案

前營游擊舒公。初夏病感。寒熱頗輕。但右脇以下掣痛不安。頭痛亦在右邊。大便不實。醫以爲類傷寒證。用辛溫表散不效。余按其脈隱伏不彰。舌上灰色。苔厚而濕潤欲滴。初疑濕勝於熱。用吳氏達原飲。繼疑寒熱互結。用進退黃連湯。但有二三分效驗。舒公深信不疑。然必終奏全效。余心始安。沉思良久。頭痛脇痛俱在右邊。此熱氣鬱遏陽明。故脈象不彰。遂揀去溫藥。專用三黃石膏。堅服二十餘劑而愈。時前營守備邢公亦患熱病。初起卽舌絳神昏。醫皆用葱豉湯透表。余用涼膈散清中。授方不服。聽其津乾液涸五日而亡。官在同營。病在一時。或信或不信。判若恩仇。舒公曰。總難逃一命字。

附錄與姚敬修書令愛之證。肝藏積熱。肺受暴寒。故衝氣上逆。咳嗽發喘。余用仲

景麻杏甘膏湯。發散外邪。掃除內熱。失此不治。必延勞怯。因受足下重托。故再四沉思而用此方也。得汗後。用錢仲陽補肺阿膠散。大下宿垢。瘀滯後。用喻氏清燥救肺湯。石膏搜剔餘邪。人參補氣。阿膠補血。乃虛實兼到之方。寫方時。賢喬梓細問。畢竟吉凶何如。予一口擔承。何嘗有片言驚駭。其方其案。尙在尊齋。可覆視也。足下受方不用。先自徬徨。更請某師診治。誤認虛脫之證。揚言左脈已無。遂令合家大小。涕淚交零。并通知媒氏。通知許字之家。謂此證已被石膏喫壞。今已不治矣。噫。某師久負盛名。何徒恃佞才而不達古訓也。夫脈之鬱也。被火逼勒耳。非無也。精究古大家書。則悟此奧義矣。某師言此是怯證。非時邪也。殊不知怯證初起。亦須下去惡物。古方百勞丸。許州陳大夫托名仲景而傳者也。某師亦嘗精究其義乎。人言某師所定之方。與予方相似。不知實判天淵。余以人參石膏同用。意仍在於清火。某師以人參五味陳皮同用。意專在於補虛。不知此證大積雖去。餘火尙多。稍帶溫補。尙慮復焰之勢。人參只宜些少。足下過費人參。反致增病。尊居之北。有俞姓女。病伏熱綿延四十餘日。人用輕清不效。余用石膏而效。今歲少陰司天。陽明在泉。運氣使然也。某師讀景岳書。不達玉女煎用石膏之旨。其能升其堂。

而入其室乎。前俞姓女服石膏後。發出暑毒滿身。其母不以爲藥之過。而以爲藥之功。奇哉婦人有識。乃遠勝於丈夫也。敬修得書之後。其膽始壯。余仍大進寒涼。下利五日而全愈。

治老人醫案

老人元虛。病宜扶元。人人知之。竟有陽氣充實。常服大寒之藥。常得帶病延年者。南匯本城謝鳳鳴年七十有四。因上年秋間涉訟到郡。舟中冒暑。即發溫瘧。微寒惡熱。胸膈痞悶。余適寓郡城。用清心涼膈散而寒熱止。繼用半夏瀉心湯而痞悶除。旋即結訟回南。不再服藥。延至初冬。喘嗽大作。醫用疎散。愈治愈劇。至新正初十外。日夜不能交睫。痰涎盈盆盈碗。囑其子恩榮等速辦後事。無餘望矣。適有徽友汪郁廷在座。謂此證仍請予診治。必有出奇制勝之處。郡城僅一浦之隔。何不專舟邀歸以一診。鳳鳴平日持家甚儉。因欲死裏求生。不得不從汪議。余亦以世好難辭。即束裝東歸。時已正月十六夜。診畢。即知其誤用辛溫。許以尙可挽救。方用大劑白虎。參入大劑犀角地黃。堅服四十餘日而全愈。若不細察其脈。而但拘年齒以施治。必至抱怨九泉。至嘉慶二十五年。重遊泮水。至道光五年。已八十有

四。一日不飲蔗汁梨漿等味。卽大便艱澁。辛溫之誤人有如此。

瘧疾醫案

寒熱往來之瘧。治宜小柴胡湯。不知陰虛之體。用之轉增大患者。郡城姚敬修。夏日病瘧。醫投小柴胡十餘劑。竟無增減。停藥二日。忽然發厥。舌短眩暈。危在頃刻。居與余寓相近。急來延診。余用大劑清肝之藥。一服而安。知其多服柴胡。肝陰虧乏。厥陽亢逆也。愈後四肢痠麻。用養陰藥調理半年。始得平復。三陰久瘧。陽虛氣虛。人易知之。不知初因暑熱而起者。久瘧保陰爲主。南匯本城沈熙曾堅信余言。服二十餘劑而愈。其他服溫補而致斃者。余親見二人也。

痢疾醫案

府廩生高菊裳。名崇璠弟。藥房名崇瑞。選拔又中式。令堂病陽虛久痢。醫頻服溫補。延至半載。病反增劇。晝夜三五十次。余診時。但述腰脊空痛異常。遂用斑龍丸峻補奇脈。初服一劑。病勢大減。自後連服數劑。竟無增減。服參些少。略安片刻。而菊裳藥房昆仲。以尊人病怔忡經年。參藥大費。人參豈能常服。余爲沉思良久。改用黃耆建中加鹿角。時有醫士李蘅堂。秀在座。謂峻補之法。繼以宣通陽氣。亦是一法。力贊此方爲

中病。堅服二十餘劑而愈。

華庠生王熾令堂秋月病熱。初延李孝廉謹診視。用薄荷連翹山梔等。俱用薑汁製服。服後發厥。復延一時醫診視。用白虎湯清火。人事雖清。下痢不止。改用補劑。亦無效驗。王生係瑤峰先生令孫。余本屬世好。來寓力懇專治。余倍費苦思。用仲景桃華湯而愈。

南匯東門李連城病肝氣脹痛。因多服左金。遂至下痢不止。食飲不思。人亦不與之食。更醫則條張條李。用藥則惟朮惟苓。僉云不治。已措辦後事矣。不得已而索治於余。予令其早上服大劑歸脾。晚間服大劑六味。并令家人誘其食肉。即有效驗。一月全痊。

勞倦內傷醫案

南匯南門張寶華。勞倦之餘。又兼食滯。乃內傷中之有餘者。脈象狂大。熱渴異常。予係舊戚。平日相信不疑。即用下奪清中之法。但前因葬事太勞。未即痊愈。親友中有疑爲失表之證。囑其更請他醫調治。醫謂從未得汗。熱邪內陷之象。用葱豉等發汗。汗竟不出。反發昏沉。仍懇予治。予惟以清降爲事。漸漸神清食進。始終無

汗而愈。愈後大便艱澀。惟服大黃。補藥一劑不服。於以知外邪宜汗。內傷禁汗。內傷之虛者。爲勞倦傷。宜補中益氣。飲食傷虛中挾實者。宜枳朮丸。內傷之純實者。則宜攻下也。王安道辨之甚詳。

偏枯醫案

新場鎮閔欽齋年五十外。形體清瘦。多火少痰。冬月忽患偏枯在左。遂從吳門解館而歸。醫惟以補氣消痰爲事。反增咽燥喉痺等證。病家謂本原既竭。故用補劑不效。延予聊問消息。余謂其脈其證。純是一團火氣。須用河間治火之法。方用二地二冬知柏等。甘寒苦寒相間。投二劑。頓覺神情清爽。病者方憶未病前數日。左肩胛猶如火燒。始信治火之說爲不謬也。繼服虎潛丸而全愈。提憲稿房陳掌衡夫人患半身不遂。體實瘦弱。疑是血虛。投溫經養血。全無增減。因思內經云。痛者寒氣多也。病在脈絡。非辛烈猛重之味。不能勝任。服許學士川烏粥而愈。

痺證醫案

風寒濕三氣合而爲痺。祛風祛寒祛濕。人人知之。不知有當變通者。泗經戴星杓

年近四十。因烟業赴上洋。一夕忽患腿痛。不便行走。寓中適有素明醫理者。謂腎氣素虛。乃欲中之漸。必服大造丸可。戴以客寓起居不便。遂乘肩輿而歸。本鎮及郡中之醫。皆用溫藥。并服大造丸。服下掣痛增至十分。兩手亦痛。陽事痿縮。遂延余診。余謂此屬熱痺。俗名流火是也。舌苔雖白。其實絳底。陽事痿縮。王節齋所云鬱火也。遂用三黃石膏犀角地黃等大劑。半月而起於床。更用虎潛大補陰丸等。一月後步履如常矣。

南庠生謝恩榮令堂患熱痺。醫以爲血衰氣弱。投以補劑轉劇。余用羚羊角二冬玉竹竹瀝等通絡之劑。投數劑而全愈。

痿證醫案

前營千總龔振邦。多慾陰虧。夏月病足膝痿弱。余謂當作暑痿治。清暑益氣加活血之品。授方不服。轉服傷科之藥。一旦昏厥。心痛欲死。仍延余診。脈來虛散。生脈散加和中之品。服一劑果覺少安。渠家信之不篤。遍請他醫。通同酌治。改用參地桂附。服之轉增脹滿。又請一醫以和中降氣爲治。脹滿雖稍除。而元氣愈弱。病者益難支撐。改用參朮一劑。而從前心痛欲死之證復作。不得已。遂聽命於予焉。余

謂此屬少陰腎水虧乏。轉服傷科之藥。則氣亦虛矣。參朮桂附。適以耗陰。橘半枳砂。適以耗氣。俱未中病。故愈治愈劇。壯水之主。以制陽光。乃正治也。用六味合生脈等。堅服五十餘劑而愈。

南匯營兵朱七官。濕熱成痿。求治於他縣時醫。以峻補剛劑。囑其頻服。半月後。厥陽上逆。頭眩耳鳴。胸中擾攘不安。格寒於下。兩脚如冰。自分已無生理。友人武生顧鳴鶴與朱鄰近。延予判決死生。余按脈象狂大。謂此證因溫補誤投。非絕證也。遂用芩連知柏豬膽汁等大寒之品。一劑即減。投二十餘劑而全愈。

郡城徐華封女。病痿。兩足不能相去以寸。脊間皮寬肉軟。有如斗大。醫用雜補氣血之劑不效。予謂飲食如故。病屬下焦。耆朮守中。不能達下。四物誠爲女科要藥。若欲填實精髓。則又不勝任矣。考內經筋痿骨痿。皆屬奇經絡病。乃用生鹿角龜板海參魚膠羊肉等血肉之味。配入熟地枸杞牛膝歸芍。堅服三十餘劑而全痊。

虛勞醫案

亭林鎮北陸某。素患勞嗽。時作時止。至是益加氣喘。偏臥不能轉側。脈象細弱。有似氣虛痰飲。醫用補脾理氣。久而不效。遂以本證爲辭。予適在鎮中顧宅。延予一

判安危。余謂此屬肺腎陰虧。非氣虛也。初用錢氏阿膠散。繼用六味地黃湯而愈。

腫脹醫案

府庠生王迪賢令堂。患喘腫。脈浮無汗。渴飲異常。宗仲景風水治例。兼參王節齋先喘後腫之旨。用麻杏甘膏湯而愈。

南匯本城李孝思。單脹數月。諸藥不效。余按脈象沉微。此屬陽微。用塞因塞用法。專服理中加附子而愈。

郡城卜姓女。十有三歲。先患痧疹。繼患瘧疾。醫用開泄太過。遂至脹滿。肚腹以下堅硬如石。本家疑爲虛證。請一老醫中專用補藥者診治。豈知竟云痧毒內攻。法在不治。余時初到郡中。遂延余診。余按其脈沉細而微。脾虛景象。顯然如繪。初用錢氏白朮散而堅硬消。繼用陳氏六神湯而脹滿愈。得勝渡張永椿室。係氣虛之體。秋月患腹脹。服消耗藥太過。數日間腹大如臛。余即用濟生腎氣。立見奇效。後稍有脹意。即投前方而愈。

腳氣醫案

郡廩生方鐵華。剛令尊患腳氣上攻。醫投燥濕理氣通陽之劑。喘腫益加。余謂諸

熱之而寒者取諸陽。因立加味腎氣湯。初服不覺其功。而亦不見其燥熱。堅服三十餘劑而愈。

發黃醫案

吳靜山敬權孝廉令正錢夫人。時邪後遂發黃腫。日嗜乾茶無度。蘇太諸醫皆用氣血並補。久而不愈。延余診之。脈兩手俱洪數之甚。詢得腹中攻痛無常。夜則身熱如烙。此由陰液不充。瘀滯乾粘所致。宿血不去。則肢體浮腫。新血不生。則肌肉消瘦。一切補脾剛藥。未可施於此證。考仲景治黃。有猪膏髮煎潤燥之法。爰倣其義。專用滋潤之品。調養腎肝而愈。

前營遊擊溫公大勇夏月自浦口來松。途中冒暑。到署後請醫調治。初用清暑利濕不效。改用參朮歸地。轉增脘痛。自後朝暮更醫。僉言誤補留邪。治難有效。遂延余診。余見其身面發黃。總是胃腑結聚不行所致。用連理湯辛開苦降法。授方不服。遂就診於青浦醫家。方用茵陳五苓散等。服之亦不效。遂以絕證爲辭。歸至署中。計無復出。始委命以聽余焉。予仍用前法。服參些少。是夜即得安寢。改用理中湯調理半月而愈。後以禮貌之衰。堅辭不往。陞金山參將後。重發舊恙。遂成不治。

之證矣。

濁證醫案

濁證濕滯爲多。而亦有宜於溫固者。上海徐德音濁下如涕。醫不辨其爲精濁。概以利濕之法治之。久不見效。漸至食則易飢。心火上亢。腎水下趨。形消腰折。寒熱頻頻。督脈陽維交病。余謂此係精濁。非便濁也。用鹿角兔絲骨脂等溫補下焦。兼服威喜丸而愈。

提憲稿房陳壽昌病濁。醫者疑其腎陰虧損而致此疾。早投補腎藥。少腹脹痛欲死。余用左金清火。合雄鼠糞湯攻濁而愈。

頭痛醫案

嘉定陳姬年五十有七。病頭痛數年。額上爲甚。額屬陽明部分。久痛必虛。須填補陽明。兼鼓舞胃中清陽之氣。用玉屏風散加炙草葛根二劑全愈。推此而太陽頭項痛。少陽頭角痛。厥陰頭顛痛。皆可按法而治矣。

高橋鎮曹連珍室。操持家事頗勞。兼多暴怒。孟夏得疾。自天柱至頭顛。忽然強痛。堅重難移。兩耳赤腫。胃中饒雜。脈象洪數。宗喻氏治吳添官母例而愈。

腹痛醫案

楓涇鎮宋元英境。享安閑。恣情房幃。患腹痛二年。醫藥不效。遂就診於吳郡極時之醫。以絕證爲辭。宋卽歸家。料理後事。深信醫言爲不謬。余適過楓。晤宋氏西席程永孚。談及醫理。遂爲知己。遂同元英來寓就診。細按其脈。細詢其證。總是陰陽悖逆。升降不利使然。問曰。曾服瀉心湯。進退黃連湯否。曰未也。因酌一方以授。投一劑而稍平。數劑而全愈。

前余在嘉定。有鄉人王四九官病膈。向服和中藥。據述投三四劑輒效。逾時復然。就診於予。投進退黃連湯不應。改用丹溪韭汁牛乳飲而愈。因知古人因證立方。不相假也。

胎前醫案

胎前宜涼。人人知之。而亦有宜於溫者。胎前宜補血。不宜破血。而亦有轉用破血而得安者。總在臨證時之細心體會也。郡城孫錦章室。懷胎五月。病轉胞不溺。醫用清利水道。並不究及轉胞由於下焦虛寒。由於中焦氣弱。由於肝家血滯。猪苓澤瀉車前等藥。徒傷胃氣。故飲食減少。夜不得寐。諸恙漸臻。而胞系之繚戾者如

故也。日請穩婆擡起。始得溺出。究之元氣不支。日甚一日。因而延余診治。余診其脈。緩大有力。許以可救。遵金匱成例。投腎氣湯一劑。是夜稍得安寢。蓋利水之藥。足以瀉腎。投桂附而命門溫煖。故稍得安寢耳。再遵丹溪補氣成例。投參朮湯一劑。飲食漸能知味。惟病者大便不行已數日。腹中至此更覺不安。改用茱連湯一劑。大便得解。小便雖仍穩婆伺候。病者因諸恙悉減。深信不疑。再求良治。余爲沉思者久之。脈象比前益見有力。元氣已復而胎氣未舉。必有瘀血阻塞其間。遂用大劑破血之藥。一劑而脹遂消。三劑而胎氣舉。凡破血之藥。最足礙胎。今破血而胎反固。妙在先用補藥以助其元氣也。

產後醫案

產後感冒時邪。宜溫散。不宜涼散。人人知之。而亦有不宣於溫而宜於涼者。誤用溫則不得不用大寒矣。歸鞠氏姪女。冬月初產無恙。至六日頭痛身熱。凜凜畏寒。予用梔豉湯。夜半熱退。逾日復熱。更醫用產後逐瘀成法。遂加煩躁。余謂冬溫爲病。清之可安。通評虛實論曰。乳子而病熱。脈懸小者。手足溫則生。仍依時邪治例。用白虎湯而愈。凡產後無產證而染他證者。即當以他證治之。而丹溪大補氣血

之言。卻不可拘。仲景云。病解能食。七八日更發熱者。此爲胃實。大承氣湯主之。夫陽明經中。仲景尙再三戒人不可輕下。而產後亡血既多。仍云承氣主之。蓋既爲胃實。自有不得不用之理。舉一證而產後之挾實者可類推也。仲景云。產後下利。虛極。白頭翁加甘草阿膠湯主之。夫既曰虛極。仍用白頭翁湯者。下痢中既有渴。欲飲水熱而下重之證。則白頭翁湯自有不得不用之理。惟其虛極。故加甘草阿膠以養其正。舉一證而產後之挾虛者可類推也。

產後惡露不行。胸腹飽脹。溫之通之。人人知之。而亦有不宣於溫而宜於涼。不宜於通而宜於和者。東門鞠上玉室初產患此。其脈數大而疾。上兼鼻衄。余用當歸二兩煎湯。沖熱童便與服。稍稍安穩。但惡露止有點滴耳。更醫用炮薑等溫通套劑。遂至胸腹增脹。惡露點滴不行。有欲依產後春溫治例。大進苦寒之品。余曰。又非穩治。堅用歸地丹芍等涼血和血之劑。十餘日。惡露大行而全愈。凡產後病解能食。七八日更發熱者。當作別病治。初產後即發熱者。則仍作產後治。但各有寒熱兩途。不可不條分縷析。

郡城侯姓婦年三十有八。因元宵夜遊。行走太勞。歸即小產。醫者皆以其胸腹有

塊。用逐瘀成法。每劑必加炮薑。俱未有效。後雖停藥。而骨節如焚。積塊愈大。小便艱澁。熱痛異常。至三月初。始延余診。已奄奄一息。診其脈沉伏之極。隱隱難尋。予固知其陰虛陽盛。但日期多延。宜用緩治。初投復脈。減去薑桂。神氣稍安。繼投丹溪大補陰丸。諸恙悉減。終投本事虎杖湯。積塊平復。淋痛皆除。不及一月。飲食大增而全愈。

得勝渡衛姓婦。初產惡露不行。發熱疼痛。中挾冬溫伏氣。醫用逐瘀溫經套劑。遂至熱邪流注左腿。日夜難安。飲多食少。至冬至。朝廷予診治。予變產後宜溫之說。用涼血大劑。加通瘀解毒。四服全愈。

郡城張六老室。產後月餘。崩中不止。時當暑月。醫用和中養血。俱不能止。病已三日夜。視爲必死。余診其脈浮大欲脫。連聲索救。神氣尙清。急令煎黃耆一兩。當歸一兩。服之頃刻立止。古方當歸補血湯。黃耆多於當歸五倍。今加當歸與黃耆等分者。時當暑月。恐黃耆之過亢也。

血厥醫案

郡城七星橋翁氏女。經前發厥。厥必數日不醒人事。醫用硃黃膽星之屬。經年不

效。己卯六月。延予診治。脈象搏指。余謂此係經血內瘀。久而發厥。非痰迷心竅也。硃黃膽星。焉能破瘀生新耶。乃合內經烏鰂骨丸。仲景旋覆花湯。河間金鈴子散。爲一方。數劑全痊。竟不再發。

醫學舉要終

醫學舉要卷六 玉臺新案

後記

《脈因證治》四卷。舊題元·朱震亨著。先生字彥修，金華（浙江義烏）人，世居丹溪，故人稱丹溪先生，爲金元四大醫家之一。著述有《格致餘論》、《局方發揮》等。以養陰說名揚後世。《脈因證治》一書，恐非先生原著，而系後人采集《格致餘論》、《丹溪心法》等書有關內容編成。

是書按脈、因、證、治的次序，論述了七十個證候的臨床診治，簡而賅，約而備。編者認爲先診脈，次究因，次審證，最後論治是診治疾病應當遵循的程序，故以「脈因證治」作爲書名。

本次影印重刊，參考上海科學技術出版社一九五八年版，對明顯錯誤之處，作了改正。

《韓氏醫通》，又名《醫通》二卷。明·韓忞撰於嘉靖元年（公元一五二二年）。忞字天爵，號飛霞子，四川瀘州人。因體弱多病而棄儒從醫。

著述除《韓氏醫通》外，尚有《楊梅瘡論治方》一卷，已佚。

本書是韓氏闡述醫學見解的綜合性醫著，內容包括醫論、醫話、醫案、方藥論述和經驗效方等，內容豐富，頗有創見。如提出規範的病歷記錄格式（一望形色，二聞聲音，三問病情，四切脈理，五論病源，六治方術），開創完整病歷記錄之先例；論述補法和補藥，很有心得；所記處方，實用有效，著名方劑交泰丸、三子養親湯，并出于此。

本次影印重刊，參考江蘇科學技術出版社一九八五年版，對明顯錯誤之處，作了改正。

《醫林改錯》二卷。清·王清任著。初刊于道光庚寅年（公元一八三〇年）。

王清任，一名全任，字勛臣。直隸省（今河北省）玉田縣人。一生著述，唯《醫林改錯》而已。是書篇幅不大，約三萬字，然對後世影響極大，以其為作者實踐之記錄，要言不繁，見解獨到故也。其于人體解剖，自有發現，糾前人之錯誤，補先人之不足。王氏認為，為醫必須明了人體結

構，特別是臟腑結構。他懷疑古人所繪臟腑圖形。爲此，不避污穢，趁疫病流行之機，夜臨荒郊義塚，細察暴露荒野之尸首，詳加記錄，繪成圖形。其于瘀血證治，尤獨具慧眼，經驗極爲豐富，所列通竅活血湯、血府逐瘀湯、膈下逐瘀湯、少腹逐瘀湯、補陽還五湯諸方，療效卓著。先生對後世之貢獻及影響，莫大于此。

本次影印重刊，參照人民衛生出版社一九八五年版《醫林改錯注釋》（該書原文選用最早刊本——清道光庚寅年京都隆福寺胡同三槐堂書鋪本），對明顯錯訛之處，作了改正。

《醫學舉要》清·徐鏞撰。徐鏞字玉臺，南匯人。是書六卷。卷一六經合論，條分縷析，概述仲景六經要點。卷二時邪合論，分述風寒溫暑燥濕四時所感之證，了然不混。卷三雜證合論，要言不繁，理法并重。卷四治法合論，頗合機宜，并能結合實踐加以闡述。卷五古方補注，選方實用，評論中肯。卷六玉臺新案，能見先生臨證深思熟慮。書名《醫學舉要》，名副其實。

本次影印重刊，參考上海科學技術出版社一九五八年本，對明顯錯誤之處，作了改正。

蕭敏材

書目

(一) 黃帝內經素問集註	(清) 張隱庵	(二五) 南病別鑑	(清) 葉香岩	(四〇) 口齒類要	(明) 薛己	(三七) 程杏軒醫案	(清) 程杏軒
(二) 黃帝內經靈樞集註	(清) 張隱庵	(二六) 痧脹玉衡	(清) 薛生白	(四一) 尤氏喉科秘書	(清) 尤季	(三八) 何澹安醫案	(清) 何澹安
(三) 傷寒明理論	(明) 吳學勉	(二七) 瘧疾論	(清) 郭石陶	(四二) 咽喉脈證通論	(清) 許繼	(三九) 邵蘭蓀醫案	(清) 邵蘭蓀
(四) 傷寒九十論	(宋) 許叔微	(二八) 濕溫時疫治療法	(清) 韓善徵	(四三) 喉舌備要秘旨	(清) 佚名	(四〇) 吳鞠通醫案	(清) 吳鞠通
(五) 陰證略例	(元) 王好古	(二九) 增評傷暑全書	(清) 紹興醫學會	(四四) 重訂喉證家寶	(清) 包三輔	(四一) 冷廬醫話	(清) 陸定圃
(六) 傷寒兼證析義	(清) 張樞	(三〇) 伏氣解	(清) 張鳳達	(四五) 正體類要	(清) 薛己	(四二) 柳洲醫話	(清) 陸定圃
(七) 傷寒六經辨證治法	(清) 尤在涇	(三一) 伏邪新書	(清) 葉子南	(四六) 外科證治全生集	(清) 王洪緒	(四三) 獨塘醫話	(清) 張景岳
(八) 傷寒補例	(清) 沈目南	(三二) 伏陰論	(清) 葉子南	(四七) 外科選要	(清) 唐芹洲	(四四) 先哲醫話	(清) 錢謙益
(九) 傷寒來蘇集附錄	(清) 周學海	(三三) 羊毛痘論	(清) 劉吉人	(四八) 外科醫鏡	(清) 張貞庵	(四五) 潛齋醫話	(清) 王士禛
(一〇) 重刊金匱玉函經二	(清) 周揚俊	(三四) 溫熱逢源	(清) 陶萬寧	(四九) 外科全書	(清) 梁祐軒	(四六) 友漁齋醫話	(清) 黃通
(一一) 沈註金匱要略	(清) 沈目南	(三五) 隨息居霍亂論	(清) 王士禛	(五〇) 瘰癧法門	(清) 李子殿	(四七) 對山醫話	(清) 毛對山
(一二) 金匱要略心典	(清) 尤在涇	(三六) 痘疫霍亂答問	(清) 陳慶龍	(五一) 胎產指南	(清) 陳寶功	(四八) 客塵醫話	(清) 許繼
(一三) 金匱翼	(清) 尤在涇	(三七) 鼠疫快微	(清) 連文冲	(五二) 重訂產孕集	(清) 張曜孫	(四九) 巢氏諸病源候總論	(清) 巢元方
(一四) 脈經	(晉) 王叔和	(三八) 增補評註溫病條辨	(清) 吳鞠通	(五三) 女科切要	(清) 包興言	(五〇) 重訂靈蘭秘要	(明) 王肯堂
(一五) 重訂太素脈秘訣	(明) 張太素	(三九) 痰火點雪	(清) 葉子南	(五四) 女科經緯	(清) 吳通源	(五一) 肯堂醫論	(清) 王肯堂
(一六) 脈說	(明) 王紹隆	(四〇) 慎柔五書	(清) 葉子南	(五五) 校註婦人良方	(清) 薛立齋	(五二) 研經言	(清) 李時珍
(一七) 望診遵經	(清) 葉子南	(四一) 理虛元鑑	(清) 周揚俊	(五六) 慈幼新書	(清) 程鳳雛	(五三) 醫學讀書記	(清) 尤在涇
(一八) 臨證驗舌法	(清) 楊雲峰	(四二) 虛損啓微	(清) 洪錦華	(五七) 原精要論	(清) 袁氏(佚名)	(五四) 市隱廬醫學雜著	(清) 王士禛
(一九) 察舌辨證新法	(清) 劉恒瑞	(四三) 何氏虛勞心傳	(清) 何嗣宗	(五八) 活幼心書	(清) 吳觀承	(五五) 醫學源流論	(清) 葉天士
(二〇) 脈學輯要評	(日) 丹波元簡	(四四) 症因脈治	(清) 葉子南	(五九) 幼科直言	(清) 曹世榮	(五六) 慎疾芻言	(清) 徐大椿
(二一) 痘疫論	(明) 吳有性	(四五) 周慎齋遺書	(清) 葉子南	(六〇) 小兒衛生總微論方	(清) 孟介石	(五七) 醫學心悟	(清) 程林
(二二) 醫門普度溫疫論	(明) 吳有性	(四六) 脈因證治	(清) 葉子南	(六一) 幼幼集成	(清) 陳復正	(五八) 神農本草經	(清) 吳普
(二三) 張氏溫暑醫旨	(清) 張少林	(四七) 韓氏醫通	(清) 葉子南	(六二) 針灸甲乙經	(清) 皇甫謐	(五九) 珍珠囊補遺藥性賦	(清) 李東垣
(二四) 溫熱暑疫全書	(清) 周禹載	(四八) 醫學舉要	(清) 葉子南	(六三) 針灸素難要旨	(清) 高士奇	(六〇) 雷公炮制藥性解	(清) 王晉三
(二五) 溫證指歸	(清) 吳正功	(四九) 一草亭目科全書	(清) 葉子南	(六四) 眉壽堂方案選存	(清) 葉天士	(六一) 藥微續編	(清) 李中梓
(二六) 溫熱病指南集	(清) 周約元	(五〇) 銀海指南	(清) 葉子南	(六五) 徐批葉天士晚年方	(清) 葉天士	(六二) 醫方考	(清) 吳鞠通